



Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.5.26





Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.5.26



Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.5.26



Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.5.26






cod. - ygenouard
pag. 494




Ex Libris Joannis Nenouard
1874



Hic liber est Pauli Astij et
suz. ~~amici~~ fratris.
m. gus. cavallotti 7


SBon. Min. 7 et.



PAVLLI
MANVTII
EPISTOLARVM
LIBRI XII

Vno nuper addito.

EIVSDEM
QVAE. PRAEFATIONES
APPELLANTVR.



VENETIIS, Apud Hieronymum Polum
M D LXXXII.

PAVLI
MANVILI
EPISTOLARVM
LIBRI XII

Vno scripto addito.

FIVSDEM
OVAR. PRÆFATIONES
APPELLANTVR.



PRINCIPI
ILLVSTRISS.
ET. EXCELLENTISS.
IACOBO
BONCOMPAGNO
LITTERATORVM. MAECENATI
AMPLISSIMO
ALDVS. MANVTIVS
PAVLLI. F. ALDI. N.
STVDII. GRATITVDINIS. OBSERVANTIAE
ERGO
HOC. PAVLLI. PATRIS
EPISTOLARVM. PRAEFATIONVMQ.
VOLVMEN
NVNCVPAT. DICATQ.

PRINCIPI
ILLVSTRIS
ET. EXCELL. ENTISS.
IACOBO
BONCOMPAGNO
LITTERATORVM. MAECENATI
AMPLISSIMO
ALDV. S. MANVTVIS
PAVLLI. F. ALDI. N.
STVDII. GRATITVDINIS. OBSERVANTIAE
ERGO
HOC. PAVLLI. PATRIS
EPISTOLARVM. TRACTATIONVMQ.
VOLUMEN
NUNCVAT. DEDICATQ.

25

A
fer
fis
qu
mi
cata
qui
par
ma
ex
pru
per
cur
itac

AD. ILLVSTRIS.
ALBERICVM. CIBO
MALASPINAM
MASSAE. ET. CARRARIAE
PRINCIPEM



X. iis artibus, quae meri-
to Liberales appellantur,
excellere duas in primis,
Litterarum scientiam, &
Rei militaris praestantiam,
in omni aetate omniū con-
sensu iudicatum est: vtra vero ex his ip-
sis illustrior, vtra magis expetenda sit, &
quaesitum aliquādo est a magnis viris, &
minime tamē adhuc plane videtur expli-
cata deliberatio. nam, vt otium, & pax, sine
quibus litterae non cōsistunt, armis com-
parentur: tamen nec ipsa feliciter satis ar-
ma tractantur, nisi adsint illa quae magna
ex parte a litteris petūtur, consiliū, ordo,
prudētia, animi praeterea ita ratione tem-
perata magnitudo, vt, sicubi periculū oc-
currat, metus pariter ac temeritas absint.
itaq. cōstat, quae nationes bellica gloria

a 3 cla-

claruerunt, in iisdem viguisse studia do-
ctrinae, vt in Graecia, quae Persarum in-
numerabiles exercitus non modo susti-
nuit, verum etiam fregit, atque profliga-
uit; ipsa vero numquam vinci, nisi a se
ipsa, potuit. domesticis enim & diuisa
discordiis, & infirmata bellis, non tam
Philippi, Macedonum Regis, virtute,
quam propriis perculsa viribus, afflictaq.
corrui; Romana vero gente quae fuit vl-
la vmquam gens aut belli gerendi scien-
tia, ac fortitudine praestantior, aut iis
praecipue litteris, quae rudes animos hu-
manitate informant, exculta diligentius?
hinc illa manus ducum Excellentium,
quae Romani terminos imperii quam
longissime protulit, Catones, Aemiliani,
Sullae, Luculli, Caesares, quos historiae
mirabiliter laudant, nec tamen ita, vt eo-
rum merita laudes vllae satis adaequare
videantur. Age, Macedonum tot victo-
riae, tot militaria decora vnde fluxerint,
si quis interroget; quid respondebimus?
hoc primum, vt opinor, ab Alexandro
duce: is enim Asiam perdomuit vniuer-
sam, & ad intimos etiam Oceani recessus
pene-

penetrasse fertur: deinde illud, a phalan-
ge, quae fuit acies in exercitu firmissima
quod vtrumque si spectetur, ac perpen-
datur accurate; non exiguam fortasse bel-
licae laudis partem litterae sibi vindi-
cant. nam Alexandrum a primis annis
disciplina erudiit Aristotelis, & ad eam
tum animi, tum ingenii praestantiam,
quae postea res illas, omnium opinione
maiores, & aggressus est, & confecit,
praeceptis philosophiae pulcherrimis
extulit. Phalangem vero, eiusque artem
struendae ab vno primum Homeri poe-
tae versu manasse, Doctissimi homines
memoriae prodiderunt. Ergo vicissim &
a litteris adiuuantur arma, & ab armis
litterae sustententur. quod si, ubi quae-
tum armis imperium est, ibi artes illae vi-
gerent, quae litterarum vsu cognoscun-
tur: conseruarentur facile studia ciuium,
ac populorum: & in communi omnium
concordia, nullus vnquam externis vi-
ribus ad labefactandam publicam rem lo-
cus esse posset. quod contra & in Grae-
cia, & apud Romanos, & vbiuis gentium
accidisse, atque accidere quotidie, vide-
mus,

mus. Neque solum in vna ciuitate, aut
in vna etiam gente multos, sed vix in sin-
gulis familiis singulos, qui vtramque lau-
dem adamauerint, & in vtraque pariter
excelluerint, reperire difficillimum est.
vnum quidem non modo nostra tempe-
state, sed multorum saeculorum memo-
ria, historiae celebrant, quem vere phoe-
nicem inter omnes Europae vniuersae
Principes licet appellare, Laurétium Me-
dicem, proauū tuum: cuius, nescio, plus
ne virtus in bellis, an in pace sapientia,
ac moderatio enituerit. nam rem Floren-
tinam, saepe aduersa fortuna nutantem,
confirmauit, interdum malis prope ex-
stinctam vnus ipse non modo restituit, ue-
rum etiam vehementer auxit. tranquillis
vero rebus, ornauit patriam, muniuit le-
gibus optimis, atque institutis: iustitiam
praeter ceteros, ac temperantiam publi-
ce, priuatimq. coluit: liberalitate, si quis
vmquam, delectatus est: cuius fama lon-
ginquas regiones peruagata, barbaras
etiā gentes, & religione diuersas, illi con-
ciliauit, multosque, aliqua modo virtute
nobili ve arte insignes, in vrbem Floren-
tiam

tiam p
vel in
tantu
bus C
plicen
benig
fouit.
bi vir
ras, &
rentiu
pro e
mus e
rae q
magn
minim
domest
tus, Le
berales
que on
quando
gnosce
bo, &
omni
exerci
nalibu
ab eo

tiam perduxit. Et, vt alia vel in patriam,
vel in singulos non vulgaria merita omit-
tantur, quis miseram Graeciam, suis sedi-
bus Othomanorum iniuria pulsam, sup-
plicem, atque egentem hospitio excepit,
benignitate subleuauit, perpetuo studio
fouit, ac tutatus est? vnus eam laudem si-
bi vindicat, vnus in Italia Graecas litte-
ras, & praeclara doctinarum studia Lau-
rentius Medices excitauit: cum & ipse
pro ea, qua excelluit, eruditione acerri-
mus esset ingeniorum aestimator, & natu-
rae quodam impulsu ad beneficentiam
magnopere propenderet: vt mirandum
minime videatur, si, tanto patre genitus,
domestico tam illustri exemplo commo-
tus, Leo X, Pontifex maximus, omnes li-
berales disciplinas praemiis extulit, at-
que ornauit amplissimis, effecitque, vt ali-
quando Romam in vrbe Roma liccret a-
gnosceret. In tua vero paterna gente Ci-
bo, & in materna Malaspina, mirabilis
omnium virtutum in omni aetate fuit
exercitatio. &, ne illa nimis vetera ex an-
nalibus fide dignis repetamus, iam inde
ab eo tempore, cum, Graecorum Impe-
rato-

ratorum ætate, opidum Pera, quod pro-
xime Byzantium situm est, Genuenses
obtinebant; quo tempore summis hono-
ribus, & copiis maiores tuos floruisse
constat: aut, cum Mucius ille Cibo, pla-
ne alter Mucius in tuenda patriæ salute,
triremibus priuato sumptu comparatis,
atque instructis, Pisanos, Genuensium
rebus acriter infensos, in Sardinia profligauit: sexcenta præterea in Genuensium
Remp. merita, in qua etiam Gulielmus
Cibo Cruce rubea, publico insigni, vir-
tutis ergo decoratus est: hæc vt omittam
& illa, quæ auorum nostrorum memo-
ria gesta sunt, attingam; Aranus, Aaron
in historiis nominatus, equestri dignita-
te ornatus, Romani Senatoris titulo insi-
gnis, antiqua ille quidem suæ gentis no-
bilitate clarus, multo tamē suis laudibus
illustrior, qui nihil vñquam in vita non
egregium, non amplum, non ingenuo no-
bilibus viro dignum aut cogitauit, aut fe-
cit, is, qua tempestate Renatus Andega-
uēsis Alfonso Neapolitanorum Regi bel-
lum intulit, in eo bello, quaecumq. a sum-
mo duce munera postulantur, ea fortissi-
me

me pr
poli p
ac po
in im
stitia
sum r
nati p
fice in
apud
quem
scrim
gratia
rum v
optim
iuncta
dabilit
colend
ptus &
Pontifi
bus, a
creatus
dissimi
tea co
omnes
omni l
secutu

me praestitit, vsque eo, vt Renatus, Nea-
poli potitus, cum pro Rege, iure summo,
ac potestate amplissima, constituerit. quo
in imperio ita se gessit abstinenter, ita iu-
stitiam est complexus, vt, cum ad Alfon-
sum rursus victoria inclinasset, afflictis re-
nati partibus, exceptus ab illo sit honori-
fice in primis, ac splendide: quemque
apud Renatum antea, eundem apud eum
quem saepe armis laeserat, saepe in di-
scrimen vitae adduxerat, & dignitatis, &
gratiae locum obtinuerit. Ex hac tanta-
rum virtutum praestantia filius eius, ad
optimam naturam optima voluntate ad-
iuncta, documenta sumpsit ad vitam lau-
dabiliter instituendam, & iis artibus ex-
colendam, quibus postea maximam ade-
ptus & virtutis, & probitatis opinionem,
Pontifex, approbante D E O, fauenti-
bus, atque incumben- tibus hominibus,
creatus est. Nec se postea, vt multi, sui
dissimilem praebuit; sed, quantum an-
tea contenderat, ut in studio uirtutis
omnes anteiret, tantum, ut se ipse in
omni laude uinceret, & studuit, & con-
secutus est. itaque, quemadmodum ei
non

non modo ad obtinendam Cardinalis di-
gnitatem, verum etiam ad Pontificatum,
antiqua maiorum existimatio, & clarissi-
ma patris memoria quasi viam ex aliqua
parte muniit, aditumque patefecit: sic pa-
tris deinde tui fratrem, multis illum qui-
dem animi bonis ornatum, multo tamen
facilius ad Cardinalatum egregia Pontifi-
catus Innocentii fama perduxit. Haec est
in tua gente, magne Princeps, non opum,
ac diuitiarum, quibus etiam minime di-
gni saepe affluunt, sed virtutis, & gloriae,
perpetua multorum saeculorum serie
quasi per manus tradita, & ad te ipsum vs-
que conseruata hereditas. Nec vero pater-
num tibi quidem genus praedicandum,
maternum autem dissimulandum vide-
tur. utroque licet, si vetera aspectas, ae-
que glorieris. nam Malaspinarum nobili-
tas simul & antiquitas Etrusci poetae do-
ctissimi, ac sapientissimi Dantis testimo-
nio cognoscitur: nobilitas in eo, quod il-
lam Italiae partem, quae hodie Lune-
iana communi vocabulo nuncupatur,
Malaspinis olim vniuersam paruisse tra-
dit: antiquitas autem, quod, cum ipse
annis

annis
florue
non vt
tis ant
lat. V
cas, A
des tu
imita
fantur
egregi
cta, tu
&, qu
est mi
gentis
cis ear
abint
omnis l
merces
moria c
audio:
nullum
tum, p
res gest
litterar
dices v
lucule
sup

annis ante nos ducentis quinquaginta
floruerit, Corradum tamen Malaspinam
non ut aerati suae proximum, sed ut mul-
tis ante saeculis natum, honorifice appel-
lat. Vides, a quibus viris originem du-
cas, Alberice clarissime. neque vero vi-
des tu quidem, sed non imitaris, aut
imitaris quidem, sed non assequeris. ver-
santur enim in animo tuo cogitationes
egregiae: inde emergunt praeclara fa-
cta, tuis maioribus, teque ipso digna.
&, quamquam tibi maxime propositum
est militare decus, unde primum tuae
gentis nobilitas fluxit: magni tamen fa-
cis earum doctrinarum studia, quae si
absint ab hominum vita, simul absit
omnis humitas, neque satis diu, quae
merces virtutis est, recte factorum me-
moriam conferuetur. faues ingeniis, ut
audio: nihil deesse litteratis hominibus,
nullum commodum, nullum ornamen-
tum, pateris: cupis virorum illustrium
res gestas aeternis mandari monumentis
litterarum. & videt iam de Laurentii Me-
dices vita libros tres, a Nicolao Crotto
luculenter conscriptos: qui cum superio-
ribus

ribus diebus Venetias venisset, mira quædam de animi, ingenii, consilii tui præstantia, de studio erga nobiles disciplinas, præterea de humanitate, ac morum elegantia prædicabat. quæ cum in te ipso bona sint, longe pluris intelligentium iudicio, quam ea, quæ petuntur extrinsecus, aestimantur. nam, argenti, atque auri magnam vim possidere, imperare populis, opida tenere munitissima, clarum esse a maioribus, omnes pæne Italiae Principes, summos etiam Reges, necessitudine attingere; magna quidem hæc sunt, nec tibi communia cum multis, eiusmodi tamen, ut inter fortunæ munera referantur; quæ scis etiam ad tui dissimillimos peruenire: vitam autem sic instituere, ut omnia consilia, omnes actiones ratio moderetur: virtutem in se ipso expetere, in aliis diligere, ac ornare; velle inter homines eminere beneficentia potius, quam potestate: hæc quia partim sequeris, partim adeptus iam es, ideo te vere diuitem, qui æterna bona tibi compares, vere nobilem, qui nobilitatem a te ipso haurias, existimamus. Atque

que et
pende
miora
vrbes,
& agg
beneu
lare, q
paratu
pe ad
te dili
qui su
dio fa
iam al
adoles
ta cupi
tum, fe
feruant
laudibu
sum, ut
deinde
brando
aliquan
iam inc
bus op
eorum
pianu

que etiam illa ipsa, quae dixi a fortuna
pendere, quia cum virtute coniungis, fir-
miora fiunt: quandoquidem neque tuas
vrbes, tuamque ditionem moenia potius
& aggeres, & flumina, quam populorum
beneuolentia tuebitur; neque facilius vl-
lare, quam recte factis, beneuolentia com-
paratur. Quae sit autem eorum, qui pro-
pe adsunt, qui te quotidie intuentur, ad
te diligendum propensio; nos, qui longin-
qui sumus, ex nostro in te singulari stu-
dio facile iudicamus. nam me quidem,
iam aliquot abhinc annis, ea, quae de te
adolescentulo, rerum laudabilium infini-
ta cupiditas, & magnarum indoles virtu-
tum, ferebatur, in tui amorem atque ob-
seruantiam coepit allicere: postea, tuis
laudibus cum aetate auctis, incensus ita
sum, ut statuerim, tibi quidem primum,
deinde etiam aliis, aut meum in te cele-
brando ingenium, aut certe uoluntatem
aliquando ostendere. Quare, cum haec
iam increbuerit consuetudo, ut, de qui-
bus optime sentimus, iis dicata esse, &
eorum nomine insigniri nostra scripta cu-
piamus: mittendum putavi ad te, dum
aliquid

aliquid interim fortasse praestantius adornatur, volumen Epistolarum, & Praefationum mearum. quas ego nequaquam edere animum induxissem, nisi me suadentis, atque etiam petentis Venetae nobilitatis mouisset auctoritas. quibus enim pro summis erga me meritis omnia debere mihi videor; iis cur aliquid a me negari aequum putem? cur non obsequar amplissimis viris, non credam sapientissimis, non gratificer amicissimis? Tuo vero nomini liber inscriptus ut exiret, fecerunt illa superiora: quae ne te offendant, (quando quidem sunt a me, non ut gratiam tuam ficta laudatione colligerem, sed ut omnibus mei erga te studii causam verissimam exponerem, commemorata) cupio impetrare a modestia tua, & debeo scilicet, cum etiam in iis non tam ad laudandum, quam ad cohortandum non nulla pertineant: & currentibus ad metam, atque etiam appropinquantibus minime molestas esse cohortantium voces, minime plausum displicere constat.

Venetiis, CIO I C L I I X

EPISTOLARVM
PAVLLI. MANVTII

LIBER. PRIMVS

RAINVTIO. FARNESIO

CARDINALI. CREATO

Romam.



QVIA virtus est ipsa per se amabilis; & quia nobilitati honor & obseruantia debetur; amari te iam inde a tua pueritia, studio virtutis incensum; & colui, clarissimo genere ortum, Paulli III. Pontificis nepotem. iam tunc equidem uidi, praedixiq. multis, qui futurus esses, & nunc, opinionem, auguriumq. de te meum exitu comprobante, utrique nostrum gratulor: tibi, cui tribuuntur ea, quae semper illustria fuerunt, nunc eo magis, quod a Paulo III. Pontifice tribuuntur; mihi, qui de tua futura dignitate, fretus indole, moribus, ingenio tuo, adolescens uere coniecerim. Cardinalis es. optabile, & honorificum: sed est in isto honore pondus, & labor. cadunt in eam, quam nunc sustines, personam uirtutes omnes, atque ita cadunt, ut, si absint, is, qui honor est, honor esse desinat, uel sit etiam summa deformitas. Curae autē, & cogitationes illae sunt praeclare, illae, Rainuti, te dignae, aeternaq. cum gloria coniunctae, pietatem praecipue colere; excubare animo pro salute, ac dignitate Ecclesiae: beneficentiam sine spe praemiorum exercere; nihil omnino

A facere

facere, nihil cogitare, in quo statim decus non eluceat: nam, ubi paullo videtur obscurius, ibi satis constat turpitudinem inesse. quae profecto tibi in mentem uenire, atque ob oculos assidue uersari, cum in aui tui summam gloriam intueris, necesse est. & omnino datum hoc uestro generi diuinitus uidetur, uobis nascentibus heorum numerus ut augeatur, & quasi maius lumen de sublimi quadam specula errantibus honestis disciplinis uiam, & hospitium ostendat. ergo alter alteri exemplo estis ad bene agendum: uobiscum simul & oriuntur uirtutes, & cum aetate crescunt; donec uitae munere perfectos educant ex hac rerum humanarum taeterrima caligine, & in illa sempiterna luce collocatos cum illo bonis omnibus circumfluente caelestium animorum coetu coniungant. Aut igitur mihi nullus tui cohortandi relictus est locus, aut hic tantum, ut uelis esse tui quam simillimus: quodque tuo generi, tuo nomini, tibimet ipsi, tuisque debes institutis, id cumulate persolendum existimes. Vnum exoptandum, ut, qui tibi istam mentem cum ista auctoritate dedit, (dedit autem omnium auctor laudandarum rerum, & creator Deus) idem uelit utriusque rei fructum esse maxime diuturnum, & aequare tuae uitae spatium cum iis bonis, quae in te summa contulit. profecto, tales gubernatores, tam peritos, tam uigilantes, Christiana religio si numquam non haberet; numquam illae exorirentur dissidentium opinionum horribiles procellae; quae iam etiam multis abhinc annis Petri nauem coeperunt, neque dum consistere patiuntur. quo quidem mihi libet ominari de te idem plane, quod cupio; futurum, ut optimis

optimis artibus, quamdiu uixeris, praesidio sis, & ornamento; uiuas autem, quamdiu uel temperantia dure, uel naturae lege licet. Vale.

Venetiis.

∞ D XLIV

ALFONSO. CARAFAE

CARDINALI. CREATO

Romam.

2

SOLENT esse, quae minus expectantur, laetiora. nihil tamen ista, qua te actum nuper accepimus, dignitate neque magis expectatum apud eos, qui tua studia, tuos ad uirtutem praeclarus impetus nouerant, neque iucundius, aut laetitiae maioris umquam fuit. nemo enim dubitat, quin eum, qui te nunc ornat, honorem ornaturus aliquando sis, eximia tua gloria bono publico coniuncta. quo te hortari res ipsa non patitur. nam, si attendes diligenter, & considerare eum animo tuo, adhibita in consilium ratione, uolueris, primum illud, quis te Cardinalem creauit; deinde, quae Cardinalis partes, quam graues, & laboriosae, quam eadem honorificae, ac splendidae sint; postremo, quibus temporibus haec tibi sit imposita persona, quam alienis a uirtute, quam turpi omnibus in locis omnium paene scelerum labe foedatis: profecto ipse te; nullo cuiusquam hortatu, a te ipso de tua laude admonitus, excitabis ad excellentem omnium artium honestarum cupiditatem: quaeque his artibus aduersantur, abiicies, atque contemnes, neque solum eo

A 2 uiro

4 PAVLLI. MANVTII

uero, quem in posterum praestare debes, qualemque te fore omnes auguramur, uerum indigna prorsus homine iudicabis. Vixisti semper antea laudabiliter: fuit in puero pudor: est in adolescente probitas, est perfecta paenitentia, & expetendarum vitandarumque rerum scientia: desiderari videbatur, in qua te ostenderes, occasio. delata diuinitus est omnium maxima, singulari consilio summi Pontificis Paulli xv. qui cum sit patruus parentis tui, cum te ab ineunte aetate non mediocriter dilexerit; cum omnes suos incredibili quadam completi caritate consueuerit: tamen in te honestando alia quaedam secutus est: dedit honorem non propinquitati, aut familiae, sed tibi ipsi, qui familiae nomen studeas illustrare, & quo modo principia se dant, studium comprobabit euentus. En habes Alfonse campum, in quo tua uirtus, parata uigiliis, bene agendi consuetudine iam confirmata, excurrat. haec est illa, ad quam te exercebas, quo tuae spectabant curae, tuo ingenio, tuis optimis cogitationibus, ac studiis dignissima prouincia. ostende, quae tuae sit non modo voluntatis, uerum etiam industriae praestantia; & prome ea animo tuo illa praeclara, quae, ut antiquum gentis tuae decus, ac domesticam praesentem uirtutem referres, a pueritia collegisti. Non est, mihi crede, labor ei, qui bene sentiat, bene facere. quod enim positum est in nobis ipsis, non aliunde pendet, non extrinsecus assumitur, in eo, quid obstat, quo minus uoluntatem res ipsa consequatur? Iam, ipsa uirtus inuitat, ipsa allicit, atque afficit sui studiosos omni uoluntate, omnibusque praemiis. nec dubito, quin excellens animi tui uis omnes difficultates, omnia superet

ret humana. Quare gratulor equidem tibi tua causa, de isto, quo te extulit Paulli Pontificis diuina sapientia, honoris altissimo gradu: sed me mouet aliquanto magis publica res: quam tu, traditam tibi simul cum ista dignitate, atque commendatam, saepe, ac nunc quidem maxime, talium virorum ope indigentem, tueberis in omni vita; praesidiumq. erit in te situm aduersus iniustitiam impietatemq. firmissimum. Quae si tibi magna videntur, atque gloriosa; debes animum sic instituere, ac moderari, nihil ut ad te ipsum referas, nihil ipse tibi arroges aut a te ipso expectes. manasse a Deo cuncta puta; qui perennis aeternusq. bonorum omnium est fons. nos enim ut nos, nihil sumus; aliquid autem, atque adeo plurimum ut a Deo, & per Deum, esse possimus. Vale.

Venetis, ∞ D L VII.

STEPHANO. SAVLIO

Decentianum.

3

MAGNUM est hoc, Sauli clarissime, humanitatis, & amoris in me tui argumentum, quod, cum in istis locis nunc sis, ubi multam diei partem cum singulari viro, Cardinali Polo, grauissimis, sanctissimisq. sermonibus traducas; non modo tamen de me cogitas, quo ego uno contentus esse poteram, verum etiam id ipsum mihi declarandum litteris existimes. at quibus litteris? scriptis mehercule, quod ad verba attinet, elegantissime; quod ad sententias, prudentissime: ut iis legendis non magis amare amorem tuum, qui te ad scribendum impulerat, quam eloquen-

A 3 uiam

tiam suspicerem; qua effeceras, ut illa ipsa, quae scriberes, cum ornatoria essent, amabilia quoque uiderentur. Quare, cum tibi ago gratias, ut debeo, immortales, quod ita animatus in me sis: tum vero etiam te rogo, in quo me ambitio quaedam mouet, ut id, quod facis, perpetuo facias. quanti enim putas ad meam laudem interesse, cum hoc percrebescit, me a Stephano Saulio diligi: cuius est familia perillustis: qui suae ipse familiae clarum lumen est: quem praeclari illi uiri, eius consuetudine, & conuictu magnopere delectati, coluerunt, Bonamicus, Iulius Camillus, Longolius. Haec ego, Sauli, cum aliquot abhinc annis cogitarem; semper quidem, ut a te diligerer, optaui: ut vero etiam laudarer, optare fortasse potui, sperare, cum ipse me nossem, certe non debui. at tu in hac parte mecum sane perliberaliter egisti. scripsisti, in hac Romanae linguae facultate, non mihi neminem praestare, sed id, quod ego cum legerem erubui, neminem esse, cui non ipse antecellam. equidem, ut, quod res est, aperiam, fateor a prima pueritia ita me in litteris esse uersatum, ut unam maxime spectarem eloquentiam, unam colerem, unam admirarer. atque hoc me studio satis mea sponte flagrantem, acrius inflammabant ii, qui tum homines, uiuebant, Bembus, Sadoletus, Bonamicus; quorum nomina per orbem terrarum celebrata sermonibus, & scriptis, exstingui nulla uetustate posse intelligebam. Polus hic noster, qui nunc in omni laude, omniue uirtute tantus est, suis me scriptis capiebat atque afficiebat maxime. ego tum, ut erat aetas mea, praeter verborum, & nonnullarum sententiarum

tiarum ornamenta, nihil agnoscebam. pure, & eleganter scribere putabam esse id, quod unum si assequer, excellerem. sed Rhambertus meus, qui ex Gasparis Contareni, praestantissimi viri, consuetudine prudentiam hauserat, praeclara quaedam notabat in Polo; meque paullo aetate inferiorem, ex vulgata venalium magistrorum disciplina rudem, atque impolitum, erudiebat, & conformabat exemplo. tum quidem, quantum proficerem, non me paenitebat: & ex iis, quae ieceram, fundamentis aliquid eiusmodi, quale ego vellem, excitari aliquando posse videbatur. sed in rebus humanis, quis est, cui nihil umquam secus accidat? cum in eloquentiae studio multus essem, nec satis valetudini parcerem, incidi in morbum: qui cum esset per se grauis, tum eo factus est periculosior, quod, usu mihi librorum a medicis interdicto, magna sane est animi mei affectio, atque aegritudo consecuta. post biennium denique valetudine recuperata, cum praeteriti temporis iacturam sarcire diligentia vellem, ad pristina redeuntem exceperunt domesticae controuersiae; quas neque sedare minimo negotio, neque negligere sine graui mearum fortunarum exitio licebat. his quoque me difficultatibus aliquando is, cui omnia debeo, eripuit Deus. Lucem iam, quasi diu per tenebras errassem, videbar adspicere: & quamquam, multorum annorum amisso fructu, erat sane cur ingemiscerem, vitamque mihi haud satis incundam putarem; tamen, otii spe recreatus, facile impetrabam a me ipso, ut ex animo meo superiorum molestiarum, atque incommodorum memoriam obliuione delerem. Vigebat

bat item, ut antea, pristina illa cura: nec erat quidquam in meis consiliis antiquius, quam ut abditas atque implicatas in mente cogitationes non modo aperire, atque explicare verbis, verum etiam exornare, quasque pigmentis & coloribus illustrare possem. res erat nec exigui temporis, & maximi laboris. tempus non, quantum rei magnitudo ferret, suppetebat; cum ex veteris patris instituto in hoc imprimendorum librorum munere, & restituendae antiquitatis cura distinerer. laborem autem, vel si abundarem tempore, perspecta valetudinis meae ratio recusabat. utrumque tamen cum voluntas vinceret, quotidieque aliquot horas, occupationibus ereptas, stylo darem: ecce me nescio quis, homo certe satis fortuna felix, praemiis commotum, & blanditiis captum, atque irretitum, Romam abduxit. ubi cum aliquot menses non in iis, quae semper amaueram, litterarum studiis, sed inani officiorum genere consumpsissem; & ille, quem secutus eram, montes aureos pollicitus vix minima praestaret; collegi ipse me; neque solum studiorum meorum, quae intermiseram potius, quam dimiseram, verum etiam rei familiaris, cui nisi consularem, ipsa quoque iacere studia necesse erat, habendam mihi rationem duxi. quo consilio in patriam reuersus, retuli me omnino ad veteres meas tum legendi, tum scribendi exercitationes: sed tum in domestica re constituenda, tum in emendandis antiquorum libris districtus, postea vero etiam erudienda duodecim nobilium adolescentium Academia per triennium occupatus, quantulam habuerim excolendae facultatem eloquentiae, quantumque

tumque
ingressu
tuerim
sti tu,
sima s
quale i
care; o
mus, i
cillima
scriptor
genere
non po
in e. op
sane di
ut ceter
cessaria
fuisse
to minu
hoc sing
abundem
me. nu
quam m
hominis
gnat: r
dia fove
set: qui
opus es
stemab
cum ill
gitanda

tumque in tantis temporum angustiis per eam, quam ingressus eram, Latinae scribendi uiam procedere potuerim, facile, ut opinor, est existimare. Nosti tu, Sauli, cuius acies ingenii etiam ea, quae occultissima sunt, assequitur, primum cuius prudentiae sit, quale illud est, quod in imitatione sit optimum, diiudicare; deinde, cuius industrie, quod optimum iudicamus, id re ipsa consequi. quod utrumque cum sit difficillimum; id quod, ut uides, aetate nostra optimorum scriptorum paenuria declarat; cum tamen, qui hoc in genere elaborant, plurimi sint: satis equidem mirari non possum, cur tu me in epistola tua summum feceris in eloquentia, dederisq. id, quod ego si accipiam, mei sane dissimillimus, hoc est impudens plane sim. nam, ut cetera, quae dixi esse ad studium huiusce laudis necessaria, mihi non defuerint, quae utinam mediocritas fuissent temporis quidem, ut paullo ante exposui, multo minus habui, quam res tanta postulabat. fatum in hoc singulare meum est, ut otio numquam abundem. abundem autem? utinam non semper indigerem maxime. nunc ad occupationem etiam accessit sollicitudo; quam mihi ex immaturo Cardinalis Masaei, diuini hominis, interitu exortam utinam aliquando dies exstinguat: ratio quidem hoc nondum potuit. ille mea studia fouebat unus: ille mihi otii spem dederat; & fecisset: quis enim ad benignitatem propensior? ille me, ubi opus esset, auctoritate ornabat, consilio monebat, re sustentabat. quid plura? in illo mihi erant omnia, & cum illo mihi omnia perierunt. quare non tam mihi cogitandum est, ut opus uniuersum de Romanis antiquitatibus,

IO PAVLLI. MANVTII

taibus, quod tu dilaudas, illo auctore institutum, pos-
sim absoluere, quam ut partem aliquam, iam confe-
ctam, liceat perpolire. quod ipsum, si mihi nunc per
meas occupationes liceret, hic tamen, qui me uexat,
dolor certe non concederet. ac mehercule haec ipsa,
quae tu nunc legis, irrigavi lacrumis, cum scriberem:
nec putavi fore, cum tot curis distinerer, ut possem scri-
bere: sed magna vis amoris est, magna obseruantiae
erga te meae. ea fecit, ut hoc officium rebus omnibus
anteferrem. Aduentus tui iam aliquam nobis exspe-
ctationem amicorum sermo commouerat. eam tu quod
litteris confirmes, ualde laetor. cupio enim tuam tum
humanitatem, tum prudentiam, quarum altera tibi
ab hominibus amorem, altera etiam honorem conci-
liat, in consuetudine & sermonibus regustare. me au-
tem quod huius consilii praecipuam tibi ais esse caus-
sam; facile patior mihi hoc a te, viro grauissimo, per-
suaderi; amoq. mirabiliter animum, atque amorem
istum tuum; cui respondere officiis etsi difficile est,
perpetuo tamen studio, & singulari quodam ob-
seruantiae genere, ut spero, tibi satisfaciam. Vale.
Vnetiis, ∞ D LIII.

E I D E M

Decentiano Genuam redeunti.

4

ET SI multarum rerum curis atque oneribus ita
premor, optime Sauli, ut respirare uix possim: tamen,
ut litteris tuis, amantissime scriptis, aliquid responde-
rem,

rem, abieci omnia, & officium, quod tibi a me debetur, habui antiquissimum. Video te miro quodam ueteris eloquentiae amore, ac studio teneri. significant hoc studia tua, declarant scripta, sermones ubique non obscure testantur. nae tu rem pulcherrimam diligis: cuius me quoque forma cepit adolescentem: & de voluntate illa, uel cupiditate potius, tantum abest, ut dies aliquid detraxerit, ut cum aetate simul amor creuerit. quare, cum tibi ego tam multis in rebus concedam; patere, obsecro te, in hac me una riualem esse tuum, nec tibi uel tantillum omnino uelle concedere. sentimus enim idem, quod tu, nihil esse speciosius elequentia, nihil praestantius: quam, ut ipse nosti, amarunt aetate nostra, atque appetiere quamplurimi; potiri autem, ut mihi quidem uidetur, adhuc nemo potuit. quis enim Latinae orationis laudem non magnopere diligendam dixit? quis porro rationem, & quasi viam, qua peruenire ad eam liceat, nobis indicauit? nam, qui se ita exercent, ut ex ueterum scriptis & membra, & integrum quandoque comprehensionis corpus sua inscripta transferant; non equidem eos reprehendo; siquidem perfecti similitudinem quandam sequuntur; sed, quia perfectum ipsum non attingunt, in magna laude non posuorim. Obsecro te, Sauli, qui iudicio excellis, quid tibi de Christophoro Longolio uidetur? equidem, si quando, quid de scriptis illius existimem, interrogor, ita soleo respondere, exilem esse in sententiis, non luculentum in uerbis; ut tamen de eo, si uitae contigisset usura diuturnior, bene censeam sperandum fuisse. sed, ut nunc est, mea quidem sententia, nullus est. quid enim affert exquisitum,

quisitum, quid singulare, quid non uulgatum, non ex quotidiana consuetudine, usq. sumptum? At scribit interdum & de rebus familiaribus, & ad familiares. Quid tum? quasi non uel in obscuro argumento possit ingenii lumen elucere. Nam, quod in eo uerborum circuitus saepe a Cicerone totus est: si consulto fecit, quod inde laudem speraret, iudicium requiro. etenim; aliena quae sunt, ad nos translata stulte iactamus: ut neminem laudare solemus, quia pulcher, quod accipitur a natura; at quia temperatus, quia iustus, quae posita sunt in nobis ipsis. sin, quod potius existimo, inops a Latina lingua explicare animi sensa aliter non potuit: necessitatem excuso: nec tamen, quod faciebat, diutius eum puto facturum fuisse. qui enim in illo otio Patauino nihil ageret aliud, quam ut se tum eloquentiae copiis, quae philosophiam ornant, tum earum artium instrumento, sine quibus muta silet eloquentia, locupletaret; utriusque studio facultatis consecutus esset, ut, suis quasi opibus abundans, de alieno quotidie parcius assumeret. cuius autem generis ea, quae moriens reliquit, scripta sunt; abesse eum iudico ab ea specie, quae est inscribendo optima, longissime. quae de re cum aliquot abhinc annis in conuentu amicorum sermo esset ortus, memini dissentire a me amicū hominem, & eruditum: qui Ciceronis in libris diu, multumq. uolutatus, tamen Longolium suspicit. aurea uidelicet cum assidue tractet, aerea non inter-noscit. itaque, paucis post illum sermonem diebus interiectis, cum epistolam ad me misisset, in qua ita scripsit, nihil sibi tam accidisse mirandum, quam quod

quod a
scripta
mini q
me pos
quas u
que aff
Anax
bedine
tiquitat
etiam
difficile
quam c
nem ca
est, &
re sigilla
cipiantur
diocri in
in re uide
ficatam f
eaq. meri
lud, quae
se consec
splicere:
quam in
posse; q
Tum in
cum pa
exquisit
Terentia
uerbis q

quod a me audisset, cum dicerem, mihi Longoliana scripta non admodum probari; nihil rescripsi, quod homini quinquagenario insitam opinionem non speravi me posse euellere. & sunt omnino quaedam res, quas ubi sensu & iudicio ipsi non percipimus, atque assequimur, nulla satis oratio probabit, ut cum Anaxagora, niuem atram iudicante, frustra de albedine disputares. Improbas igitur, inquires, si ab antiquitate scribentes mutuemur? Ego uero, si apte fiat, etiam summe probò. sed hoc ipsum, Apie, quam difficile sit, ex eo licet cogitare, quod Latinam linguam continet uniuersam: uniuersa enim sub imitationem cadit. imitandi autem ratio, quia & multiplex est, & admodum recondita: primum, de ea praecipere sigillatim, infinitae doctrinae est; deinde, quae praecipiantur, cognoscere, & perfecte exsequi, non mediocris ingenii. Cumq. id, quod enitet in oratione, aut in re uideatur esse, aut in uerbis: ego olim rem significatam simul cum uerbis significantibus sumebam: eaq. meis scriptis cum inseruisssem, tum optimum illud, quod quaeritur imitando, plane arbitrabar ne esse consecutum. postea coepit mihi meum consilium displicere: cogitavi, quoniam id esset memoriae magis, quam ingenii; quod ego efficerem, praestare multos posse; quod autem multi possent, egregium non esse. Tum iniui rationem haud paullo difficiliorem, quam cum paucissimis mihi esse communem intelligebam. exquisitas sententias, de Cicerone excerptas, aut de Terentio, tacitus in animo uersabam. eas ornabam uerbis quam poteram lectissimis, ut, quasi uestitu orationis,

tionis mutatio, cum eadem essent, aliae tamen viderentur. Erat non dissimilis in uerborum figuris commentatio. si quas notaueram illustriores, ad alias sententias ita traducebam, ut interdum eandem locutionem in res prope innumerabiles accommodans, quasi ex una cera plures imagines, nec tamen eiusdem generis, effingerem. In hac exercitatione quantum esset, utinam aut mature cognouissem, aut sero cognitum, auideq. arreptum uis occupationum non extorsisset. equidem, si quis me neget in scribendo quidquam esse, non pugabo: sed, si quid sum, ab hac una esse contendam. Tibi gratulor, Sauli, qui & uis, quod sentis esse praecclarum; &, quod uis, nihil impedit, quo minus praestare possis. otii enim tantum habes, quantum styli exercitatio postulat. abundas, ut animi, sic fortunae bonis: in quibus ipsis (Zenonis pace dixerim) non minima, his praesertim temporibus, ad virtutem uis est. ingenio uero ita flores, ut tuam maxime consuetudinem propterea expetierint ii, qui ipsi ingenii gloria praeter ceteros excellere putabantur. atque utinam ea, quae litteris mandasti de homine Christiano, aliquando emittas; ut opinionem ac sermones de te meos res ipsa confirmet, quod breui futurum facile spero. recipis enim te nunc in uillulas tuas, hoc est in summum otium: ubi cum nullam tibi horam a studiis uacuum abire patiaris; (sic enim & a multis antea cognoueram, & postea Coccius noster confirmauit) expolitionem intra paucos menses expectamus operum tuorum. qua de re ut interdum me Decii nostri litteris certiores fieri uelis, etiam atque etiam rogo. Pontificis Legatus, Ludouicus Beccatellius, homo

mo antiquae probitatis, humanitate, ac doctrina prae-
 stans, post obitum Cardinalis Masaei ita me comple-
 xus est, ut omnem in meis commodis atq. ornamentis cu-
 ram & cogitationem fixisse uideatur. cui non tam a me
 gratiae sunt habendae, quod agit ipse quantum potest,
 ac plus etiam, quam potest; quam, quod alios etiam,
 magnos & principes uiros, ad me augendum, atque
 honestandum suo exemplo, atque auctoritate uehe-
 menter excitat. qui cum multi sint, tua tamen inter
 omnes elucet liberalitas; qui, re vix audita, amore
 in me tuo, studio erga litteras incitatus, tantum tua
 sponte ad hanc prouinciam conferre uelle pollicitus es,
 quantum ex animo meo nulla umquam delebit obli-
 uio. Vale, tuamq. valetudinem cum tua, tum no-
 stra etiam, qui a te pendemus, caussa diligenter cura.
 Venetiis, ∞ D L I I I.

E I D E M, Genuam. 5

MAGNUM mihi solatium attulit epistola tua:
 iucunditatem, dicere non possum, quam tempora eripiunt
 sic, ut me tristitiae totum paene tradiderim. Ac primum,
 obiisse audio fratrem meum Bononiae, cum ualeret op-
 time, repentino morbo oppressum. fratrem cum dico, me
 alterum iure naturae dico. uerum addo illud. obierit, si
 uera narrantur, frater is, qui bonitate praestabat, uale-
 bat ingenio, excellebat industria, factus ad omnia maxi-
 me omnium uidebatur. itaque obruor dolore: nec, puto,
 emergam, nisi aut, illi melius esse, cognouero, aut, si na-
 turae,

turae satisfacit, opem tulerit ipsa dies: quae ualeat ad omnia plurimum, animi uero morbis plus etiam interdum, quam ratio, medetur. Ad hanc aegritudinem accedunt domestica, meaq. propria. uxor, cuius praecipue studiores familiaris, ac domus tota nititur, quae me multis molestiis, multarumq. rerum & curarum onere leuabat, quae meam ualeitudinem praesenti semper officio tuebatur, ipsa nunc iacet, periculi non expers, affectis diuturno morbo uiribus. ego uxor acerbissime anniuersariis oculorum doloribus: quos sanare, cum iam paene tentata sint omnia, humanae artis esse non puto. remedia sunt ab uno illo, qui malis cunctis medetur, caelesti medico expetenda. is mihi optimam, ut spero, ualeitudinem aliquando restituet; si hoc minus, muniet me saltem ea uirtute, qua res aduersae facile perferuntur. ita salus ex morbo nascetur, non haec, qua corpus uiget, quam ego adhuc omni remedium genere frustra quaesiui, quae cum ipso corpore paucorum annorum spatio penitus exstinguetur, sed illa multo praestantior, qua nostrae mentes, cum sese ab hac terrestri labe seiunxerint, & cum purissimo illo caelestium animorum coetu consociauerint, perpetuo fruuntur. interim, tot in me concurrentibus malis, aegre impetum sustineo, planeque, quoniam homo sum. debilitor aduersis. Hic tu me uocas ad scribendum; & hortaris, ut ea tradam litteris, quae assiduo Latinae linguae usu, & diuturna tibi uideor exercitatione consecutus. Vis me scilicet, optime Sauli, eam uiam, quae ad eloquentiam ducit, aperire. spissum opus, ac difficile, multi otii, tranquillae mentis,

non

non ro
neque
firmos
senio.
cedat
aggre
quidem
ria con
te, in
re, qu
nus nec
abunda
iudicium
tinent
sum eni
git inopi
la Grae
nium la
num illi
domi ale
eximis p
historicos
lophos
bantur
nus libe
ri, min
aegre si
nui ual
ueteris
in refra

non nostrae fortunae, cuius tibi imaginem ostendi, neque nostrorum nervorum, quos tu putas esse satis firmos; ego, quam sint imbecilli, experior saepe, ac sentio. At erunt praeclari conatus, etiam si non succedat. Si ita est, hac laude nemo excluditur. potest aggredi, qui vult. velle autem quis non debet? si quidem egregia cupientem aliqua vel ex hoc ipso gloria consequetur. te, si quemquam, Sauli doctissime, te, inquam, ipsum decet maxime omnium id suscipere, quod mihi imponis. quae enim sunt ad hoc munus necessaria, quorum aliis alia desunt, ea in te uno abundant omnia, ingenium, usus diuturnus, doctrina, iudicium. quid? opes, & fortuna nunquid huc pertinent? illae vero, mea sententia, vel maxime. cursum enim ingeniorum retardat, vires debilitat, ac frangit inopia. an tu putas Aristotelem, & Platonem illa Graeciae lumina, an Ciceronem nostrum, an Plinium tam multa potuisse litteris mandare, nisi summum illis otium rerum omnium affluentium peperisset? domi aiebant servos eruditos: contubernales habebant, eximiis praemiis accersitos ex ultimis terris, rhetores, historicos, prestantis ingenii, singularis doctrinae philosophos. cum his se quotidie exercebant, commentabantur, disputabant: horum omnium opera, quatenus liberet, utebantur. at ego sumptum unius pueri, minima mercede conducti, quo in scribendo utor, aegre sustineo. Et in his angustiis, in hac mea tam tenui valetudine, tam aduersa fortuna, quia rudes homines veteris eloquentiae cupidos, meis scriptis non erudio, nec in rectam Latine scribendi viam induco, appellas me

B

quasi

quasi malum debitorem, atque etiam accusas, uerbis
 tu quidem humanissimis, & alieno, ut uideris nomine,
 re tamen ipsa grauitur, & ut ego iterpretor, tuo iu-
 ditio; quod uereor in primis, facioque, sicuti debeo,
 plurimi. uerumtamen uidere te puto, quam faculta-
 tem res desideret. quid autem praestari a me possit, ne-
 mo omnium, qui uiuunt, me ipso melius intelligit. qua-
 re noli mihi languorem, aut desidiam obuiere; quae
 abesse procul a me, qui anteaetae meae uitae cursum
 inspiciet, atque examinabit, facile cognoscet. satis ha-
 beas, si nemo istam in te culpam conserat. qui cum in-
 genio praestes, aetatem omnem in Latina lingua con-
 triueris; ex quo factum est, ut eam perfecte calleas;
 id quod tuorum scriptorum subtilitas, & elegantia de-
 clarat: cum ualetudinem non desideres; otio paene dif-
 fluas: addo etiam illud; cum optime tibi cum fortuna
 conueniat: quae tibi de suis bonis tantum elargita est,
 ut erogare quantamuis pecuniam in homines doctos eo-
 rumque studia nullo tuo incommodo possis: haec cum in
 te sint omnia, eaq. ut ego arbitror, summa, non mi-
 nima quidem certe: abstines tamen ab hoc munere,
 & hortaris alios nulla tibi re, praeterquam uolunta-
 te, & studio, conferendos. Quis non miretur sitire fon-
 tes? sitiunt enim certe, cum tu petis a me tamquam
 ex arido solo, quod in te ipso uberrimum esse constat;
 & cum ad nostram potius inopiam confugere, quam
 tuis copiis uti uis. Hoc loco mihi uenit in mentem, tuam
 quoque causam, non modo meam, meditantem, quod
 tu fortasse respondeas. Distingues illa superiora: ne-
 gabis in te uno esse omnia, quae dixi esse de Latina lin-
 gua

qua scri-
 enim: et
 dem, &
 cies, f
 sio, qu
 dem tec
 re: uer
 alii, ve
 ac plu
 tamen
 bus ia
 quam
 bonos
 quam
 probabo
 me put
 mine C
 lo multa
 quam a
 etia, ne
 dit, qui
 qui pote
 cem in
 audient
 nubat la
 rectus,
 quidem
 conferen
 redeo ill
 niam. ca

qua scribentibus necessaria. de fortuna concedes: patet enim: etiam, opinor, de naetudine, de otio ingenii laudem, & doctrinae, quae tua modestia est, abs te reuicies, fortasse etiam, quae tui est in me animi propensio, quae humanitas, ad me transferes. Nolim equidem tecum, Sauli, ne in tua quidem laude contendere: verum, quod tu mihi de te ipso non credes, credent alii, verumq. fatebuntur, adducti in hanc sententiam, ac plane confirmati, non tam auctoritate mea, quam tamen, in his praesertim elegantioribus literis, in quibus iam tot annos versor, non esse nullam intelligo, quam tuo ipsius testimonio, quod habet ponderis apud bonos ac sapientes viros in omni re plurimum. te, inquam ipso teste locuplete, cui fides habenda videatur, probabo tuam virtutem. Oblitus ne es, aut oblitum me putas illius temporis, cum tu librum tuum de homine Christiano mihi ostendisti? bone Deus, quam in illo multa praeclara, cuius industriae, cuius prudentiae, quam a te grauius, quam copiose, quam splendide tractata. neq. vero ego vnus illum librum, videre alii, vidit, qui vir, & quantus, Reginaldus Polus Cardinalis qui potest esse instar omnium, quem tu profecto iudicem in re tua numquam recusabis. hunc ego audiui, audiuerunt multi, de tuo interdum libro loquentem. ornabat laudibus. (& est homo, ut scis, natura simplex, rectus, cuius ab intimo sensu numquam ne minimum quidem aut vultus, aut oratio discrepet) quid plura? conferendum cum antiquitate iudicabat. Quamobrem redeo illuc, & concludo paucis. Magni facis eloquentiam. cupis eam cognosci, cupis amari, & coli. egre

gi cupiditas, & nobili sane viro digna: verum, ut
 tibi satisfacias, & inuenias exitum studii tui, elige de
 duobus virumuis. aut ipse qui potes; ostende nobis La-
 tinae linguae pulchritudinem, ac praestantiam; doce
 nos, doce posteros, quae sit eius adipiscendae, & per-
 fruendae ratio ineunda: aut, si quos existimas hoc prae-
 stare posse, excita eos liberalitate, fove tuis copiis: no-
 li pati, animum eorum hac & illa cura distrahi; sit in-
 tentus, & fixus hoc vno in studio; neque abducatur
 ab opere pulcherrimo, ac nobilissimo humillimae inter-
 dum rei turpis, & sordida procuratio. ita consequeris
 facile, quod vis; optimisq; studiis & posteritati magna
 tua cum laude consules. Illa, quae scribis de leguleis
 quibusdam, in meum librum de Romanis legibus, de-
 trahendi studio, incurrentibus, legi nullo cum stoma-
 cho: nec sum miratus, a barbaris hominibus, sordido
 quodam litterarum genere assuetis, elegantioris do-
 ctrinae scientiam, & quasi lautitiam quandam stu-
 diorum contemni. Non placet istis meus liber: magnis
 videlicet viris, quorum fama aedium illarum, in qui-
 bus ipsi habitant, limina nondum est egressa. at pla-
 cet Vincentio Portulacae, cuius est in urbe Brixia
 insignis auctoritas, illustre per Italiam nomen, pla-
 cet Antonio Augustino, Marco Antonio Nat-
 tae, Laelio Tarello, Vido Pancirolo, iuris virius-
 que scientia claris: quorum nomina, scriptis egregiis
 testata virtus, atque expressa, cum aeternitate con-
 iunget. hos ego meorum laborum, & vigiliarum lau-
 datores cum audio, viros graues, & certos, omnium-
 que nobilissimos; voculas raucae plebeculae contemno.
 quidq.

quidq. leues, & obscuri homines de me sentiant, aut lo-
quantur, non esse mihi valde laborandum existimo. te
quoque sperabam in meis praesidiis esse, & si qui urge-
rent grauius, obsistere, impetumque inuidiae, & male-
uolentiae tua auctoritate, ac testimonio frangi. quod si fa-
cis; fructum sero meae singularis in te obseruantiae, &
habeo tibi, quam debeo, gratiam: sin minus; hoc tamen
nomine tibi debeo, quod meos obtrectatores flocci facis,
usque eo, ut indignos, quibus respondeatur, existimes.
Vale. Venetiis. ∞ D L I X

V I D O . F A B R O

Patauium. 6

N E S C I O, utrum fortunae succenseam, cuius cul-
pa factum sit, ut ego tuas litteras duobus fere mensi-
bus post eum diem, quo tu scripseras, acceperim; an ei-
dem gratias habeam, quod mihi, arculam quandam scri-
ptorum meorum euoluenti, planeq. aliud agenti, de im-
prouiso illas obtulerit. gratias habebo potius; quod eode
tempore simul cum iniuria beneficium accepi; & iniu-
riae beneficium praeserri, aequum est. sed, quoniam ue-
reor, ne tarditatem in scribendo meam durius acceperis;
hunc tu mihi scrupulum, Vide, si ex animo euelleres, face-
res humane, nec tamen inique: cum hoc ipsum, quod
commissum a me est, primum ex aliena culpa pendeat,
deinde nunc quidem etiam corrigatur. Venio ad tuas lit-
teras: quibus mihi gratius nihil potuit accidere; dicerem,
iucundius, nisi clausula illa de Bunello meo plane om-

B 3 rem

nem iucunditatem eriperet . nam sic fac existimes , ex illius viri interitu tantum me cepisse dolorem , quantum fortasse dies exhaurire nulla poterit . Vixerat me cum Venetiis per quadriennium : cum ego in illo probitatem morum , virtutemq. diligerem ; ille in me propensionem , credo , quandam ad litteras non improbaret . Intercessere etiam inter nos officia quaedam , sed a me leuia , nec satis digna , quae memoria tenerentur : quae tamen ille , ut erat gratus , nō memenisſe ſolum , ſed praedicare etiam ſolebat . ego ab illo maximum habebam beneficium , quod me , cum Philelp̄his , & Campanis nescio quibus (ut aliis parcam) miſere errantem , in hac recte ſcribendi viam primus induxerat . Videbatur quibusdam natura ſeuerior ; ſed erat leuiſſimus erga ſui ſimiles , hoc eſt erga bonos viros ; ubi vitium noſſet , cenſor acerrimus . Diſtinguere homines non fortuna , ſed moribus ſolebat . Loqui ad voluntatem neque ipſe poterat , neque ferre qui ad iſtam artem eruditus eſſet : totus erat apertus & ſimplex . Satis ſcio fuiſſe , qui illum deprauatae religionis nomine in crimen vocauerint . quorum vitam ſi cum Bunelli vita comparares , Socratem diceres iniquorum conſpiratione circumuentum . Coluit omnes virtutes & philoſopho dignas , & homine Chriſtiano , ſed continentiam praeter ceteras . hac vero ille triumphauit maxime , & triumphauit adoleſcens , cum ceteros voluptas capit . quo mirandum eſt minus , ſi tantus poſtea vir ex tanto adoleſcente factus eſt . nam extremam vitae partem , quam , ut in fabula actum , decet eſſe perfectiſſimam , heroicam audio fuiſſe , & plane diuinam . Quare incumbamus , o Vide , & hanc

hanc op
men ,
cum co
homin
modo is
ſeſto a
idem u
lum au
quod e
gratior
alios la
reſeren
aeterna
nihil po
quaedam
mei ; qu
ſo , qua
leſcenti
rae , do
virtutis a
nemo ad
ſerem ,
de me ip
ſi , cupi
cet nomi
qui laud
per labo
eſſe . al
quos di
optime

hanc operam Bunello nostro nauemus, ut illius nomen, immortalitate dignissimum, exstingui mortali cum corpore non sinamus. quod equidem enitar; & hominis mihi amicissimi, summi viri, memoriam (si modo is ego sum, qui tantum praestare possim) profecto ab interitu vindicabo. video te in tuis litteris idem velle: nec dubito, quin possis. nam & Bunellum amas mortuum: & vales plurimum ingenio; quod etiam pietas excitabit. cuius officii societas eo gratior utrique nostrum esse debet: quod cum apud alios laudabilis maxime erit, illustri exemplo gratiae referendae; tum ad animos nostros amore coniungendos aeternaque necessitudine conglutinandos, plus valere nihil potest. Reliqua erant in epistola tua magnifica quaedam, & eleganter scripta de laudibus parentis mei; quae verissima fateor; quaedam etiam de me ipso, quae non agnosco. nam, etsi tibi, nobilissimo adolescenti, multis non solum fortunae, sed etiam naturae, doctrinaeque bonis ornato, & quod caput est, virtutis amanti, placere maxime velim: tamen, quia nemo adhuc a me hoc impetrauit, ut ea mihi adscriberem, quae mea non essent, patere, obsecro te, de me ipso mihi potius me credere, quam tibi. quod si, cupidum esse laudis, laudem esse vis: isto me licet nomine non contempnas: quod ea, quae habent ii, qui laudabiles ducuntur, ego, eadem ut haberem, semper laboravi. sed scis, velle, & perficere, non idem esse. alterum contingit multis, alterum dumtaxat iis, quos diu diligere putantur. quorum ego te in numero, optime Vide, prestanti natura praeditum, Bunelli

24 PAVLLI. MANVTII
praeceptis informatum, confido facile futurum. Ve-
le. Venetius.

MARCELLO. CERVINO
CARDINALI
Romam. 7

POSTEA quam Roma discessi, etsi tum mea
vetus in te obseruantia, tum tua in me perpetua be-
neuolentia postulare videbatur, vt ad te quam saepis-
sime scriberem; tamen id non feci propterea quod om-
ne otium, atque omnem etiam mentis tranquillitatem
molestae in primis ademerunt occupationes: quarum me,
cum primum huc reuerti, tantus aestus absorbit, vt
longo interuallo vix emersem, nam primum domesti-
cas res ita male affectas offendi, vt eas seruare, multi
temporis, non exigui laboris, etiam alicuius artis esset.
deinde, cum illa, quam scis in meis epistolis nutu tan-
tum appellari, inimica natio virtutis, ac diligentiae,
quae etiam patri meo, viro optimo, (et adde si quid
vis) negotium exhibuit, ad me vexandum, atque op-
primendum conspirasset: durius habui negotium, vt
meas fortunas in tuto collocarem. sed me, qui antea prae-
sto mihi semper affuit laboranti, idem in hoc potissimum
discrimine egentem opis et consilii, nec mediocriter de to-
to rerum mearum statu sollicitum, respexit, ac liberauit
Deus. itaq. omni plane molestia perfunctus esse mihi vi-
deor. quid quaeris? aliqua etiam officii specie ab iisdem ob-
seruamur: ac se satis apte simulationis, vt opinor, artificio
tuentur.

tuentur. accipere tamen quod datur, quocumq. animo
detur, inscitiae non est: nec hodierni mores, & ratio
temporum secus postulat. Cetera sunt in meis rebus non
plane cuiusmodi nos optabamus, sed cuiusmodi tamen
multi non sperarunt: quibus haec, quae nunc agimus,
amplissima uidentur esse, cum nos prae iis, quae, nisi
quis casus nostris consiliis occurrerit, agere aliquando
cogitamus, tenuissima iudicemus. quam quidem ad
rem quod tu omnia, quae in te sunt, liberalissime pol-
liceris; quodq. Alexandrum etiam Farnesium, prae-
stantem omni uirtute Cardinalem, in eandem ratio-
nem propensum esse affirmas: equidem de te sic existi-
mo; & multas eseres, in quibus inuari a te pro tua
summa tum dignitate, tum etiam fortuna possim; &
in iis rebus numquam omnino mihi tuam esse humani-
tatem defuturam: Farnesium autem, diuinum adole-
scentem, natum ad liberalitatem, & ad gloriam, non
miror eo esse erga uirtutem animo, quo quia semper
fuit auus eius, iccirco ad eum gradum, qui est in terris
summus, & augustissimus, diu hominibusque uolenti-
bus adscendit. ac sane ille cum domestico exemplo, tum
multo etiam magis, egregia ipsius natura ad immorta-
litate laudem excitatus, saepe alias, quanti bonas ar-
tes faceret, ostendit, sed proxime uel in primis, cum
Hieronymum Ferrarium, inuenem rarissimae virtu-
tis, sane quam pro eius meritis ornauit, atque au-
xit. in quo, cum apud unum posuisse beneficium ui-
deatur, a multis tamen gratiam inuit. nam, cum
uos, tales uiri, patrocinium litterarum suscipitis:
quicumque bonis artibus delectantur, animo recrea-
ti, ut.

ti, veniunt in spem aliquando fore, ut, post diuturnos labores, & molestiarum quasi tempestates, in quietis & otii portum, vobis adspirantibus, deferantur. quos si in cursu studiorum instituto vestrae benignitatis aura deficiat: haerebunt, neque iam potuerunt, quo intendebant, sine ope auxilioq. vestro peruenire. verum huiusmodi dubitationem vestra iam consuetudo sustulit. magna enim optimae voluntatis documenta saepissime dedistis, maiora etiam dare cogitatis, cum quidem, ut Antonius Bladus ad me detulit, pulcherrimam rem, & vobis dignissimam aggressi, omnes libros Graece scriptos, qui nunc in bibliotheca Palatina conditi asseruantur, praelo subicere cogitatis, ut, multiplicatis exemplaribus, per orbem terrarum, in usum omnium gentium, omniumq. saeculorum, diuulgentur. cui se muneri Bladus a te esse praepositum aiebat: itaque venisse ad nos, ut & eos typos, quibus atramento illiis charta imprimitur, constandos curaret, & si qua praeterea sunt ad opus necessaria, maturaret. sane sum laetatus plurimum, hominemque sua sponte diligentissimum, tamen cohortari non desino, ut in ea re, quae ad commodum studiosorum, maxime vero ad tuam, ut ego sentio, gloriam spectat, operae ne parcat: eique dixi, ut ad omnia me & fratribus vteretur. neque minus prolixè, quae verbis pollicitus sum, ubi ille petierit, re praestabo. nam & hominem diligo, & vero tua voluntas maximi est apud me ponderis. In Romulo quidem tuo, quem initio sum complexus ut fratrem tuum, deinde amare coepi ut te fratre dignum, nihil praetermitto, quod aut in officio cohortandi, aut etiam in studio iuuandi positum sit. sed ille,

le, cui notissimae sunt occupationes meae, pudore, credo, facili, ut rarius ad me scribat: cum mihi, vel in maximis negotiis, ei vacare, non modo non molestum, sed etiam gratissimum sit: quod tu, si videbitur, ad illum scribes: simulq. litteris admonebis, ut, quo consilio Patavium est profectus, id studio & diligentia consequatur. neque tamen hoc dico, quod eum, adhuc quidem, lapsum esse putem; de quo etiam ea, quae volumus, & videmus, & audimus; sed quod, infirmitatem eius aetatis cum recorder, interdum vereor, ut possit consistere. Vale. Venetiis. D XXXIX

BERNARDINO. MAFAEIO

EPISCOPO. CREATO

Romam.

8

VBI te audiui Episcopum esse creatum, laetatus sum non tam ob ipsam rem, quae sane est per honorifica; propterea quod Episcopatus & sacerdotium est, & maximum sacerdotium; quam quia, de te ipso cogitans, intelligebam te eum esse, cui ad istam honestandam dignitatem summa facultas in optima voluntate non deesset. Tibi erunt, quae multis solent esse laboriosa, virtus, & vigilantia; ex tua vetere consuetudine facillima: non enim honorem quasi legem bonitatis, ad quam te fingeres, accepisti; sed honorem bonus accessisti, multis antea, magnisque rebus Paullo I I I. probatus; cui Pontifici & omnium sapientissimo, & optimo; qui & ipse Deo probatus est, & non probat
nisi

nisi sui similes. Gratulor igitur tibi, non ut gratulan-
 tur ii, qui fere, quibus fructibus auctus sis, vnum cogi-
 tant, cetera magnopere non spectant; sed ut ii, quibus
 dignitas, & religio prima sunt: quae tu coles maxime,
 & eris in Christi militia antesignanus. Grauem sane
 personam Episcopi sustinet is. vestrum est, errantes ani-
 mos in viam reducere. & reducit vos quidem prae-
 ceptis diuinae doctrinae tradendis; sed magna vis est in
 exemplo, cum ea, quae traditis, ipsi vita, & moribus
 exprimitis. quod tu praestabis utrumque omnium ma-
 xime; qui & habes non doctrinam modo, verum etiam
 eloquentiam. quarum altera imperitos erudias, al-
 tera languentes excites: & uiuis, ut homo, satis extra
 culpam. quod memini me multis abhinc annis in tua
 prima adolescentia miratum; cum ea in te laudarem,
 quae tamen imitari vix poteram. quod fecisti adole-
 scens, cum tua te singularis, optimaque natura ad de-
 cus inuitaret, & quasi manu prehensum duceret; nunc
 aetate confirmata, cum ad voluntatem accesserit ratio,
 dubitem, quin idem multo sis alacrius constantiusque
 factururus? dubitet, qui te ignorat: mihi, cui tua stu-
 dia, tui sensus ex nostra familiaritate notissimi sunt, du-
 bitare non licet. Quare, ut ad prima redeam, non eo
 solum nomine tibi gratulor, quod Episcopus es, in sum-
 ma dignitate constitutus; quod tibi scis esse commune
 cum multis: sed quod is es, qui cum ista dignitate
 virtutem aequare possis. quod quia vides quam non
 multi potuerint, eo magis tu, qui potes, hoc ipsum,
 quod potes, acceptum Deo referre debes, tantumque
 munus in te collatum, illud quidem plurimi facere,
 sed,

sed, quoniam est proprii erga te amoris argumentum,
muneris causam multo, quam ipsum munus, pluris
aestimare. Vale.

Venetiis. Kal. Maii. ∞ D XLII.

GABRIELI. CATIANO

Brixiam.

EPISTOLAS a te habeo duas: utramque scri-
ptam elegantissime, sed illam pleniorē, quam x i.
Kalen. Septem. dederas: nam haec recentior, cui no-
narum Octob. dies erat adscripta, argumentum habuit
fere nullum. venio igitur ad priorem: in qua cetera in-
cundissima. illud permolestum, quod te minus commo-
de significas valere: scribis enim, valde te ob aduer-
sam valetudinem vereri, ne non illud, quod instituisti,
absolvere, ac perpolire tibi liceat. Mi Catiane, ex-
cita prudentiam tuam; & occurre, morbi principiis;
ne ille, grauior deinde factus, & te, & amicos tuos,
qui, te aegrotante, valere non possunt, diutius vexet.
Hoc loco mihi ueniunt in mentem, quae tu me olim, mi-
nus recte cum haberem, prudentissime, & amantissime
monuisti. illa, illa ipse tibi nunc in memoriam redige;
& quae tuae tunc partes erant, eas nunc fac esse meas.
Tu mihi non ex Hippocrate, aut Galeno, sed ex uete-
rum philosophorum libris ea remedia, quibus ad salu-
tem meam praestantius esse nihil potuit, attulisti: ego
nunc idem in te facio: tuamque tibi medicinam resti-
tuo. uis, quae meum morbum, te medente, sanarunt,
ea tuo

ea tuo ipse in morbo praetermittere? non vis, opinor. non enim id te dignum est: qui ea saepe legisti, uide homines aliis cauere cum discant, sibi eos non cauere turpe est. quare adhibe eam, quam ad omnes res soles, ad te curandum diligentiam: & quod oneris suscepisse te scribis, id si grauius videtur, quam ut perferre possis, depone prius, quam opprimere. magnum est, quod moliris, & magni non solum ingenii, quo tu non eges, sed etiam otii: quo nisi abundas, quo modo te speras ea, quae in iure civili dispersa sunt, quae scis esse minime pauca, primum posse cogere, deinde coacta ita disponere, ut ex certis generibus totum ius civile cognoscatur? atque ego tamen sic existimo: si quis est, qui hoc praestare possit, aut eum te esse, aut omnino neminem: sed, quoniam res, & fortunae tuae, quemadmodum tu quidem affirmas, ita ferunt, ut in forum tibi necessario sit eundum; quae ratio, si modo & tibi, & populo placere velis, multi temporis exercitationem desiderat; haec autem, quae a te est iuris civilis instituta digestio, eiusmodi est, ut nihil operosius existimetur: vereor, ne, duarum rerum difficillimarum tractatione distractus, utramque dum vis, neutram assequar. quamobrem, quid suscipias, tui consilii est; ego monendi partes, quae sunt prudentiae, non assumo: neque enim plus vlla in re me existimo videre, quam tu uides: id, quod est beneuolentiae meae, faciam, ut magnopere te non solum horter, verum etiam rogem, uoluntati tuae minus, quam gloriae, ne seruias: quae quidem nobis, qui te summe diligimus, tantae curae est, ut plurimas nostrae salutis partes in tua salute posi-

tas existimemus. De Alciati libro, ualde te amo:
sed, eum, hoc quidem tempore, cur mittas, non est.
sunt quaedam, quae magis urgent. Quae scis a nobis
anno proximo superiore instituta, iam paene absolui-
mus. Domestica fere sunt ut uolumus. fratres ua-
lent optime, ego sicut soleo, hoc est, etsi non optime,
sic tamen, ut studiis nostris frui liceat. quod si perpe-
tuo detur, equidem hac mea tenuitate contentus ero; il-
lam firmitatem, illa athletarum latera non appeto: ne-
que mihi umquam de natura queri ueniet in mentem,
quae me corpusculo finxerit imbecillo: gratias agam po-
tius, quod effecerit, ut omnibus paene horis, aduersae
maletudinis metu, spectanda mihi ratio sit, & continen-
tiam, quae uirtus est, aut certe ad uirtutem ducit, co-
gar amplecti. Amamur a multis: si modo ex uultu,
& uerbis amor intelligitur: colimur etiam a nonnullis,
qui, falsa de nobis opinione adducti, nostram consuetu-
dinem, quasi docti hominis, uidentur expetere. qui-
bus ego si me patefecero, facile hunc errorem eripiam,
& puto, faciam; ne totos dies saluatoribus tribuam.
Vale. Venetiis. ∞ D XLIII

FRANCISCO . LVISINO

Patauium.

IO

SI. NESCIIS, Luifine, quantum ego amorē
nostro tribuam; cognosce ex hoc, quod & superioribus
mensibus licere mihi per eum putari ad tuas litteras,
humanissime scriptas, nihil respondere; & nunc, eo-
deme

dem fretus, etiam male respondeo. Non, est hoc, in-
 quis, officium colere. Quasi iam probaueris, quia
 non coluerim, ideo me turpem esse. non placet ita du-
 ris legibus amicitiam adstringi, ut numquam relaxen-
 tur. summam diligentiam maximis in rebus si ab ami-
 co requiris, iure facis: sed, si etiam in minimis, non
 aequus es. est enim profecto quaedam suauitas in ne-
 gligentia: quam qui ex amicitia tollit, horridior est, quā
 ut urbani mores ferre possint. quare, si amabilis esse uis
 (quamquam quis te uno amabilior est?) uerumtamen,
 si id tibi propositum est, ut omnibus in rebus aequa-
 bilis, aequa iucundus sis: permitte mihi, ut liceat ali-
 quando tecum esse negligenti. Nam, quod ad tuas li-
 teras attinet, ita iudico, scriptas esse non solum elegan-
 ter, in quo tamen non minima laus est, sed etiam sapien-
 ter; quod quia solet ab aetate tua longius abesse, non so-
 lum laude, sed etiam admiratione dignum est. uitium
 hoc in plerisque adolescentibus, atque etiam in robustio-
 ribus quibusdam fama celebratis animaduerto, ut ma-
 nia colligant, & eloquentiam non ut ueteres illi, in sen-
 tentiis, & uerbis a communi consuetudine alienis, sed
 in quibusdam vulgaribus, ac paene puerilibus ineptiis
 constituent. Quocirca non ego te, Luifine, hortabor,
 ut ex ista imperite scribentium turba te eximas: sed gra-
 tulabor potius, quod ita effecisti, ut hortationi locum
 non reliqueris. hoc cum adolescens adhuc, & paene
 imberbis, nondum ea prudentia, quae extrinsecus assu-
 mitur, propter aetatem copiose instructus, naturali qua-
 dam ingenii facultate, & assidua Ciceronis lectione sis
 consecutus: cum illa accesserint Aristotelica, in qui-
 bus

bus nunc totus es; usumq. rerum, qui in adolescentem non cadit, percallueris, qualem te virum futurum putemus? non sum natura blandus; neque soleo cuiusquam auribus inseruire: potius offendit quosdam libertas mea. itaque, quod dicturus sum, gratiae causa dictum ne putato. si quando accidit, ut interroger de iis, qui antiquam illam perfecte scribendi laudem posse nobis videantur iam paene amissam restituere, soleo te duobus praestantissimis adolescentibus, meis familiarissimis, Calino, & Amaltheo, tertium inserere. Calinum, puto, non nosti: qui clarissimum iuuenem Aloysium Cornelium singularis viri, Ioannis Cornelii, filium, in Cyprum insulam secutus, tertium iam annum abest. sed mihi hoc velim credas affirmanti: ea bona, quae magister tuus Aristoteles laudabilia esse dicit, omnia fere in illo adolescente aut esse iam, aut breui, ut ego auguror, futura. De Amaltheo autem quid sentiam, non expectas opinor, ut significem, neque ut ego tibi eum quasi latentem indicem, quem in illustri quadam specula virtus constituit. quare coniunge te cum his, & eloquentiam tres optimi adolescentes, aetate fere pares, con cordi studio, sicuti pulcherrimam virginem, diligite. quod si me etiam socium recipitis, & rivalem in hoc amore fertis: erit praeclara consensio; & Latinae linguae formam, quam, superioribus temporibus turpi barbarie uitiatam, nunc agnoscere vix possumus, posthac, ut opinio mea fert, intactam, illibatamq. tuebimur. Vale. Venetiis. ∞ DXLVII

C PAUL

PAVLLO . CONTARENO

Venetias .

II

CUM Venetiis proxime discessi, ut in hanc solitudinem ex ista frequentia me conferrem; magna sane laetitia perfruebar, & quod ad ea, quae homini carissima sunt in vita, uxorem, ac liberos meos redibam; & quod mihi, otium ad studia, amoenitatem ad valetudinem quaerenti, hunc esse praeter ceteros locum expetendum atque adamandum intelligebam. sed, ut in rebus humanis nihil est simplex, in summa voluptate molestiae tamen hoc erat, quod ita fortuna tulisset, ut, quo tempore tibi per anniuersarias Patauini gymnasii ferias Venetiis esse, & commorari liceret, tum ego a te disiungerer, magnamque manendi cupiditatem maxima discedendi necessitas vinceret. nec vero mihi dubium est, quin cum meo sensu tuus quoque sensus congruat, & quae me cura torquet, eadem te pungat. vincti enim in officio, atque amore, quam sit turpe, si te non mea vox aliquando docuisset, ipsi te libri, unde hauris illa praeclara, quibus ad laudem informamur, penitus erudirent. quod si, ut una simus, & tu, ut opinor, sperabas, & ego certe cupiebam, per intervalla locorum non licet: at, quod proximum est, ut una esse videamur, non video, cur praestare litteris, & consequi non liceat. nam si propterea, simul esse, iucundum est, quia mutuo sermone fruimur in litteris non ego quidem tuam vocem audio, neque tu meam; sed, quae voci subest res, eam nihilominus, quam

una

una cum sumus, percipimus, hoc etiam maiore cum fructu, quod aliquanto scribimus accuratius, quam loquimur. quare velim ad scribendum te des: & cum me tuae consuetudinis usuro, ob ingenii tui suauitatem, & sermonis elegantiam, mirifice capiat; haec, quae in te amo, quae nunc abesse doleo, fac, si me diligis, ne omnino de fiderem. debes hoc mea causa non nolle, tua vero maxime cupere. nam, cum te aliquot abhinc annis in re tam illam antiquae eloquentiae viam dederis, patris tui, viri optimi, ac sapientissimi, vocibus, consiliisque commotus, parui vero, clarissimi, ac praestantissimi ciui, exēplo incitatus: turpe tibi est, in mediocri laude consistere; & ad summam peruenire, sine stylo, assiduaque exercitatione, non licet. quid enim ille noster, cuius tu libros numquam de manibus deponis, quid aiebat? timere se, nisi frequenter declamaret, ne, quod adeptus erat in arte oratoria facultatis, exaresceret. Attende, mi Paule, & tuam causam, a qua mea disiuncta non est, si placet, mecum considera. Ille sibi, homo Romanus, Latinae orationis inopiam metuebat; cum tamen omnibus in hoc genere diuitiis abundaret: nos, quibus Latina lingua peregrina est, qui in optima scribendi aut dicendi ratione rudes, & infantes paene sumus, de summa eloquentia sine summo studio cogitabimus? & vnā omnium difficillimam rem, eandemque omnium gloriosissimam, ludibundi consequemur? Vides me ipsum, qui quid sim, ego quidem non statuo; sed sunt, quibus non esse nihil uidear; nullum paene diem intermittere, quin aliquid Latine scribam? cum tamen, ex quo lapidem hunc uoluo, annus iam uigesimus

C 2 abierit.

abierit. Est adolescens in vestra nobilitate, tibi non ignotus, mihi admodum familiaris: quem, excellenti praeditum ingenio, gloriae cupiditate flagrantem, nisi a Romanae eloquentiae laude ad huius maternae linguae studium falsa quaedam opinio traduxisset, erat cur de illo sperarem ea, quae summa sunt. tantam enim operam in scribendo ponit, quantam tu videlicet in legendo. sed neque illi in summa industria iudicii satis est, qui de Latinae linguae dignitate non optime sentire videatur: neque tibi, rectissime iudicanti, ad id ipsum quod probas obtinendum suppetit industria. quare uellem, ut & tu illum in diligentia, & ille te imitaretur in sententia. quod utrumque si contingeret; nae ego vestrae utriusque laudi praeclare consilium putarem. Sed ille de suo consilio viderit. iccirco enim se non existimat errare, quia, quos sequatur, auctores habet eos viros, qui, quod optimum esse dicunt, in eo facile omnibus hominibus antecellunt. Te vero, qui mecum in iisdem aedibus per triennium fere vixisti; qui, quidquid es, de meorum consiliorum praeceptorumque fonte fluxisti; cuius a laude mea laus quodam modo pendet; te, inquam, mi Paulle, quantum in me erit, errare non patiar; teque, coactus amore, & officiis tuis, hortari numquam desinam, ut in veram ac sinceram eloquentiae formam, cuius ego tibi excellentem pulchritudinem, duorum veterum oratorum exemplo, saepe demonstraui, tuae mentis oculos acriter intendas; eamque tibi a me veris, ut arbitror, lineis designatam, tu aliquando tuis scriptis, quasi coloribus, coneris exprimere. Graue, in-

quies,

quies, onus imponis, & difficilem mihi laborem mandas. Fateor ita esse: addo etiam illud, non esse nobis optandum, ut aliter sit. nam, cum omnium hominum in appetenda laude par prope voluntas, similisq. sensus sit: quod omnes appetunt, id si esset eiusmodi, ut consequi multi possent; quanti, obsecro, aestimares? opinor, minimi. copiam enim vilitas, & vilitatem sequitur contemptus. quare non tibi est dolendum, quod de sudoribus manat gloria. laetare potius, quod cum eam omnes amabilem esse, valdeque expectendam sentiant, plerosq. tamen laboris magnitudo terret, & aemulandi studium rei difficultas imminuit.

Est autem tibi ad hanc laudem, quo te voco, adiutus eo facilior, atque apertior, quod, quae duo sunt ad comparandam eloquentiam instrumenta maxime necessaria, ingenium, & memoria, virumq. sic tenes, ut in altero excellas, in altera iis, qui excellere putantur, non admodum concedas. haec tu bona si languere sinis, gratiam naturae non optimam refers; quae non in te benigna fuit, ut suum beneficium negligeres, sed ut ad decus, ad dignitatem, ad immortalem, aeternamq. laudem conferres. Neque vero is ego sum, qui te velim eloquentiam a philosophia seiungere, totosq. dies in hoc uno expoliendae orationis studio consumere. erras, si me ita sentire putas. ego philosophiam diuinum quiddam esse dico, indicem veritatis, magistram vitae, omnium virtutum, omniumq. laudandarum artium parentem. sed idem ita statuo; si, qui optime sciat, non optime loquatur, plerumq. fieri, ut id ipsum quod sciat, nescire videatur: & ut in conuiujs non pa-

rum interest, qua epulae ratione condiantur; sic in sermonibus, aut scriptis, magni refert, quibus animi cogitata verbis enuncientur. quod si cui ita stupidus aut ita deprauatus est sensus, ut ornatae, & bene structae orationis suauitatem, & tamquam harmoniam auribus non percipiat: hunc tu, si sapias, neque cor siles in re tua quia, recte qui non intelligit, is ut recte iudicet, sperare non licet: neque ipsum monebis; quia, quibus desunt principia naturae, iis inutilem artem esse constat. tu, si me audies, musarum vocem ab rusticano sono distingues; & ut inanem multorum loquacitatem oderis, sic elinguem quorundam sapientiam non amabis. qua in sententia uideo fuisse, quos uiros? Platonem, & Xenophontem: quibus ego plus crederem solis nutu significantibus, quam omnibus, qui nunc ubique sunt, philosophis cum iureiurendo confirmantibus. non ne uides magnum utrumque & excellentem in philosophia fuisse, utrumque tamen in hac, quam homines inepti reprehendunt, exornandae orationis facultate ita praestituisse, ut, eorum scripta cum legimus, nihil omnino purius, nihil elegantius, nihil illustrius fieri posse iudicemus? a qua laude plurimum absuissent, nisi temporis industriaeque multum in eloquentiae studio collocassent. neque uero eloquentiae studuissent, nisi ex ea decoris ornamentiq. plurimum ad philosophiam accedere, tamquam ad formosam virginem a corporis cultu, iudicassent. Hos igitur ego te imitari malo, quorum nomina adhuc uigent, cum ipsi duobus abhinc annorum millibus obierint, quam istos, si qui sunt, qui te infirmis rationibus a pulcherrimo consilio conantur abducere.

Perge,

Perge, ut facis, in disciplina philosophiae, in qua Patavi artificem habes eximium *M. Antonium Germanum*: eloquentiam uero, cuius, ut opinor, in uia me ducem non contemnis, ne dimitte. utrumque enim & debes, si tibi magna proposita sunt; & potes, si, quod me saepe dixisse memini, dici horas apte, & cum ratione distribuēs. Vale, & patrem tuum, & patruum, quos ego plurimi sane facio, & communes amicos meo nomine saluta.

Ex Plebe Sacii ∞ DIVI

CHRISTOPHORO. MADRUTIO
CARDINALI
Mediolanum.

AUDIO te de nobis & loqui, & sentire per honorifice. praeclarum hoc est, laudari a Principe uiro, & ab eo Principe, qui cum fortuna uirtutem ita coniunxerit, ut in utraque pariter emineat. atque ego te semper antea, cum numquam essem allocutus, numquam uidissem, tamen uehementer colui. mouebar uis praestantissimis actionibus, hominumque constanti sermone, omnia de te summa praedicantium. neque uero, si quis in te laudaret opes, aut nobilitatem, aut dignitatem, admirabar. communi multorum haec sunt, optabilia potius, quam laudabilia. sed illa, quae tuae proprie sunt, cum audirem; unum esse Christophorum Madrutium qui uirtutem ipse coleret studio singulari, in aliis ornaret praemiis amplissimis, omnesque liberales discipli-

C 4 nas

nas (fato quodam, temporum dicam, an hominum iniuriis? exsulantes) exciperet, amplecteretur, foueret; qui denique solidam gloriam spectaret, inania, quae multi sequuntur, contemneret: haec ego cum audirem, incitabar studio meae tibi singularis erga te obseruantiae declarandae: sed obstrepere litteris inanibus tali uiro, praeclaras Italiae urbes, multorumque populorum fortunas non potestate magis, quam iustitia, tuenti, hominis esse uel inepti nimis, uel impudenter ambitiosi existimabam. nunc autem, cum ad me sermones tui, mea cum laude habiti, reserantur; occasionem cupide complector, quam mihi tua liberalitas offert: tibi quoque gratias, quas possum quidem, ago, habeo autem certe maximas, atque immortales; tum quod ornes me testimonio iudicii tui, quod apud omnes ualere plurimum intelligo: tum uero, quod isto officio, ista tam praestanti humanitate quasi fores mihi aperueris ad amicitiam tuam. qua quidem ego me, si minus alia re licebit, perpetuo certe, ac singulari erga te studio, assidueque tuarum uirtutum praedicatione, dignum praestabo. quod cum antea fecerim, iudicio meo commotus; faciam tamen in posterum alacrius, ac diligentius tua humanitate incitatus, quam semper eandem in me futuram, non magis constantiae ratio, quam naturae tuae benignitas, mihi persuadet. Vale.

Venetius. ∞ D LVII

ROMV.

ROMULO. CERVINO

Patauium.

13

QVOD tu per saepe queri solitus es, id mihi nunc accidit, ut epistolae prorsus caream argumento: sed ego tamen non committam, quod tu soles, ut argumenti me inopia deterreat a scribendo. cum vide, quam diuersa ratio sit. tu, cum sententiam non habes, valde tibi ais laboriosum esse epistolam texere: ego numquam facilius soleo scribere, quam cum nihil habeo, quod scribam. At, inanes huiusmodi litterae sint, necesse est. Primum, hoc non semper. quandoque enim accidit, ut, nihil dicentes, aliquid tamen dicamus. & ut in ficiis est quaedam manus aberratio sine arte, in qua tamen ipsa ars sit: sic in epistolis argumentum quandoque est sine argumento. itaque, non semper inanes huiusmodi litterae: siquidem in iis solet aliquid nonnumquam exsistere, quod pondus habeat. sed fac inanes esse: quid refert? non hoc spectamus, id sequimur, ut, exercitatione ducere, eo perueniamus aliquando, ubi sita laus videatur eloquentiae? quod si nobis tantum in hoc proficere non licet, ut veteribus illis, quorum est purissima oratio, similes esse possimus: at tentemus tamen, si possumus nostris, qui inquinate loquuntur, dissimiles esse. quod, ut opinor, & multum, & saepe scribendo consequemur. Ac noli putare, semper in eo nobis esse elaborandum, ut philosophemur in epistolis. graues sententiae probantur: fateor: sed numquid hoc vno Latina lingua

conti-

continetur? me quidem Cicero noster paullo minus interdum delectat, de iocis cum agit, quam de turpi, & honesto cum disputat. utrobique enim sunt ornamenta: & virum. saepe necessarium est. itaq. ad utrumq. me do: teque, ut idem facias, etiam atque etiam hortor. cumq. res non erit, de qua scribas; tum tu, si me audis, vel leuissima quaeque ex omni parte, ex omni genere arripies, & iis pro argumento utere. hoc autem quatenus agas, aut cum quibus agas, tibi non praescribo: cuius tanta prudentia est, quantam aetas ista, qua nunc es, capere vix potest. Summa sit, ut & cum argumento, & sine argumento saepissime scribas. Val. Romae.

FRANCISCO. GONZAGAE

Patauium.

14

ODI paene meos oculos: etsi oculi sunt, idest omnium rerum carissimi: sed odi certe prius, quam antea, hunc morbum, quo mihi nunc tuus adspetus, tuus complexus eripitur. aduolare enim ad te, si valerem: nihil me moraretur: nihil esset tanti. an cum tu, magni Principis filius, familia natus Italicarum omnium nobilissima, nec iam a maioribus tantum, sed a te ipso clarus, Mantua me, humilis hominem loci, nondum de facie notum, litteris humanissimis tua sponte salutandum putaueris; ego, cum Patavii, huic est prope in conspectu meo, sis, non accurram ad te? facerem: sed soluta voluntas non est: impeditur enim valetudine. solatio tamen hoc, in magno dolore, sustentor, quod su-

turum

turum breui non dispero, ut conualescam. concurrunt simul, anni tempus, assidua medicorum cura, mea summa continentia. haec si proficient; adibo ad te, nulla interposita mora. opto enim, quae inter nos mutuo litterarum officio conglutinata amicitia est, eam paullo artius mutuis sermonibus, mutua consuetudine adstringi. sin haerebit morbus: obsecro te, largire hoc vel meae in te observantiae, vel humanitati tuae, ut omnino tuis literis ne caream: quas ego meis quam potero creberrimis dabo operam ut eliciam. Mitto ad te librum meum de Romanis legibus, proxime rogatu multorum editum. cupio, legas, cum hoc tamen, si vacat, nam, auocari te a studiis grauioribus mea causa, nolo. cupio etiam, cum legeris, probari tuo iudicio nostram industriam. sed hoc me cupere, rogare ne puta. volo tibi esse liberam in viramq. partem iudicandi facultatem. nihil mihi tribue: rem ipsam pende suo merito, ac statue de tuo sensu. nec enim is ego sum, qui plus amicitiae dari postulem, quam veritatis; nec tu is es, qui, si postulcm, facile concedas. Pergam ad reliqua, haec si tibi, tuiq. similibus non improbari cognouero. Vale Posseuino salutem, rarissimo inueni, cuius heri epistolae respondi. Venetiis.

ANTONIO. POSSEVINO

Patauium.

15

GRATVS, & iucundus admodum amor is, qui te in eam mentem impulit, ut officii gratia ad me scriberes. quid enim aliud existinem? cum argumen-

tium

tum res quidem ipsa tibi nullum daret . ingenium vero
 mirifice tuum amari , amplexatusque , quantum li-
 cuit , animo sum , quod raptim , & , ut ad hominem
 familiarem , familiariter cum scriberes , epistolam ta-
 men confeceris elegantissimam , distinctam luminibus
 eloquentiae , in qua non fucatus , sed verus , ac tam-
 quam naturalis Romanae linguae color enitatur . Ma-
 gne , Possuine , fratre iam maior , iuvene eximio : vr-
 ge totus in studio literarum . vides , quae te manent
 praemia . gloriam habes proximam , eamque paene
 manibus attingis . paullulum si te incitaueris , appre-
 hendes . non mehercule , quia nolis , dico : sed , ut in-
 telligas quantum cupiam , propterea dicendum puta-
 ui . faueo enim omnibus , qui recte sentiunt , recteq.
 faciunt : in te vero mea praecipua & est voluntas ,
 & esse debet . scis , quintum abhinc annum , Romae ,
 cum te frater tuus adolescentulum adduxit ad me , qui-
 bus verbis commendauerit , amicitia iunxerit , & ve-
 luti in clientelam tradiderit . ex eo tempore , quoties
 adiisti ad me , quos tecum habuerim sermones , quam
 studiose , quam amanter ad illa praeclara , quae fra-
 ter tuus amabat , sim cohortatus , potes recordari .
 dixi saepe , non esse tibi de fortunae bonis cogitandum
 quae vel improbi malis artibus quaerent , vel bo-
 nis viris recte quaesita facile casus eriperet . ostendi ,
 vere & esse , & appellari diuitem posse , qui libera-
 lium doctrinarum scientiam possideret . non neglexi-
 sti : contulisti cogitationes omnes tuas ad studium ve-
 rae laudis , & in eo nunc apud Franciscum Gonza-
 gam , nobilissimum , ac virtutis amore incensum ado-
 lescens ,

lescentem, ita versaris, ut propemodum videaris excellere. Quare gratulor equidem fratris tui manibus; quos laetari arbitror summopere, quia talis es, & quia fore tantus videris, quanta potest esse virtus maximo ingenio, acerrima voluntate, summo studio comparata. Nec vero, quod epistola tua significat, mea tibi sunt aut ad ullam fortunae accessionem, aut ad dignitatem studia expectanda. a te ipso, mihi crede, omnia proficiscentur. virtutem si habes, nihil desidera. ea pro te prensabit. ea tibi omnes honores, omnes, quas petieris, opes impetrabit. o praeclaram vitae ducem. te felicem, Possuine, qui cum hac vivis, & uiuendum statuis: me miserum, qui, cum idem sentiam, cogor tamen eam a me disiungere, victus gravitate morbi & iis curis, quae inuitum alio traducunt. quod si me Deus aliquando respexerit; acquiescam in iis studiis, quae sola sunt ad naturam meam, sola tranquillitatem animis afferunt, hominemque paulatim ab homine separant, & quantum licet, cum Deo coniungunt. Vale. Venetiis.

HIERONYMO. LIPPOMANO

Venetiis.

16

BREVIS epistola tua, sed habet multa sua vi. i. primum significas amorem in me tuum, quo quid gratius? nam, amari a nobili adolescente, propinquitatibus, amicitiiis, opibus florentissimo, optabile est: ab eo vero adolescente, cuius ad animi bo-

na

na comparanda mens omnis, & cogitatio dirigatur; qui scientiam literarum ita expetat, ut inani tamen ambitione prorsus vacet, nihil ad se ipsum, ad summum Deum omnia referat; hoc vero eiusmodi est, quod qui assequitur, triumphat. itaque ego vehementer mihi gratulor de amicitia tua: quam cupio esse perpetuam: & ut sit, omni equidem studio, omniq. erga te obseruantia laborabo. Quod vero ais nescio quid de beneficio in te meo: mi Heronyme, noli tantum largiri modestiae tuae, ut vocabulis parum propriis, nec satis cum re congruentibus utare. quod enim tu beneficium appellas, ego verius officium, & officium eiusmodi, quod praetermitti a me sine graui culpa vix posset. rogabas, ut consulerem studiis tuis. impetrasti facile, & curavi libentissime. quod enim tribuere uni tibi videbar, id non tibi tribuebam, quam litteris, quam virtuti, quam consuetudini, & naturae meae. amplector tamen istam humanitatem: quae tibi non modo beneuolentiam conciliat, verum etiam laudem parit. nam, ut extenuare, ac dissimulare, quae acceperis, beneficia, ieiuni animi est, & perangusti, ac sordidi: sic, ea verbis augere, palamque profiteri, excelsi, atque ampla spectantis hominis est; & ad liberalitatem, id est ad decus, & ad gloriam, nati. conuge, quaeso, istam mentem, atque istam sententiam cum doctrina, & cum iis studiis, ad quae te vocat illustre domesticum exemplum Veronensis Episcopi, parui tui: quem vides auersum penitus a studiis rerum humanarum, eaq. continentem, quae ceteri admirantur, totum esse in una virtute defixum, & diuinam consuetudinem, quatenus

tenus homini liceat, imitari. itaque nunc eius sapien-
 tissimis consiliis, ac sanctissimis institutis, eximiaq.
 doctrina, magna ex parte Romana nititur Ecclesia. hunc
 tu ducem si sequeris, & in eius vestigio pedem pones
 non eris bis in hoc dubio vitae cursu, non laberis in lu-
 brica iuventutis via. quod te facere iam, laetor; factu-
 rum etiam multo in posterum diligentius, confido. at-
 que ego, quando mihi licere apud te tantum vis, lan-
 guere te praeclaris in studiis non patiar. hortabor litte-
 ris, dum abero: praesens sermonibus excitabo. nunc
 me cupidum urbis, tuique maxime, ac paucorum
 tui similium, tenet tamen in his locis uxoris meae
 morbus: de qua iactor varie, tamquam fluctibus,
 modo spe, modo metu. in una tantum cogitatione
 viaetur animus consistere, & quietem aliquam ca-
 pere, cum quasi secum loquitur, & commemorat
 ipse sibi necessitatem illam rebus omnibus impenden-
 tem, ut animata intereant, creata dissoluantur. At
 est dolendum, si quem viribus aetateq. florentem im-
 matura mors oppressa. Ita, si mortem in malis, vi-
 tam felicitatis loco statuas. quod qui existimat, refel-
 litur exemplis. quam multis enim, diu vivere, miser-
 rimum fuit? Haec quam diu cogito, videor acquie-
 scere; satisq. leviter incommodi mei gravitatem susti-
 neo. sed certe nimis acerbe fortuna mecum egit, quae
 me, de me ipso, ut scis, ac de mea valetudine sollici-
 tum, alienis etiam malis implicaverit. Benacum pe-
 tere statueram. non licuit, neque forsitan licebit: Asulae
 quidem, opido satis eleganti, ubi magnam pueritiae
 meae partem traduxeram, omnes mihi iucunditates,
 omnia

omnia gaudia tum in fratris conuietu, tum in veterum
amicorum consuetudine fixeram. cecidit contra. fra-
ter enim aegrotauit diu, neque dum firmus est: amicis
autem qui possum frui, cum uxorem, multorum die-
rum morbo conflictatam, nunc incerta vitae spe ani-
mam trahentem, in oculis habeam? De me ipso, ac de
meo reditu, noli expectare dum scribam. vides me
alienis miseris esse miserum: meam non esse liberam,
aut solutam voluntatem, intelligis: nisi si meos dese-
rere, idest ab omni prorsus humanitate velim desci-
scere: quod profecto numquam committam. quod si
nostrorum animorum sensus, & nostra consilia Deo
patent, ut certe patent: amat, opinor, pietatem
meam; eaque, non dubito, quin mihi vel opem ab
eo celeriter impetret, vel hoc saltem, ut, quidquid eue-
nerit, moderate feram. profecto enim ex vno illo fon-
te omnis nostra fortitudo manat, omnisq. sapientia.
alioqui facile frangimur & facile aberramus a vero,
insidiosus voluptatum, illecebris abducti, & rerum
mutabilium fallacissima specie decepti. quae tu, ac
multo plura, cum audieris saepe de patruo tuo, qui
cum ab ineunte pueritia in iisdem aedibus, atq. in eo-
dem paene cubiculi vixisti: si quid huius generis mihi
nunc, multis difficultatibus ac molestiis circumuen-
to, litteris imperties; habebo a te munus aptissimum
meo tempori, dignum amicitia nostra, dignum ve-
ro maxime ea persona, quam tu sustines; qui te sa-
cris addixisti, semper ut bene ageres, aut bene cogi-
tares. Vale; & ad Episcopum Varonae designatum,
quem vidi numquam, de fama tamen cognitum stu-
diosè

Adiō se colo, obsecro te, cum scribes, me nomine salutem plurimam. *Asulae*. ∞ D LVI

EIDEM, Venetias. 17

NVMQVAM putavi fore, ut iniuriam acciperem in beneficio, praeserim a te, cuius in fronte, oculis, vultu habitare videtur humanitas. benigne mecum, & liberaliter agere, quod est proprium familiae tuae, magnopere te decuit: idq. adeo postulabat amicitia nostra: calide vero agere, & ficta veritatis imagine fucum facere, neque te dignum fuit, ad praeclara laudandarum rerum studia ex nobilissima familia nato, neque vero me, tui studiosissimo, de tua bonitate, tuisq. moribus egregie non modo sentiente, verum etiam praedicante. astutiae praestantibus viris numquam placuere. apertam, simplicem, rectam in omni vita consuetudinem sequuntur. quo ego te in numero quia credidi esse, & quia, ut esses, curare non mediocriter debuisti; ideo sum in fraudem facillime indutus, & illo tuo figmento, quo nihil umquam gustavi suavius, abstinui perinuitus. meae tamen inscitiae eo me pudet minus, quia sequitur amorem credulitas, et ita virum laude corrigitur. noli igitur me, quasi rudem quendam, et prorsus earum epularum, quae nono quodam artificio cediuntur, imperitum, contemnere poenarum satis in ipsa retuli: quam reieci quasi noxiam; cum esset eius generis, ut me docuit heri vesperi Sebastianus noster, unde simul possem et alimentum capere, valetudini meae uehementer aptum, et palatum oblectare, quantum antea fortasse

D

num-

50 PAVLLI. MANVTII
 numquam. restitue nobis tuam fidem. liceat mihi meum
 errorem tuo beneficio corrigere. magna res non est: ma-
 gnopere tamen sum commotus, vel inscitia mea, vel ma-
 litia tua: quae vicit omnino, vel fefellit potius opinio-
 nem meam. id si moleste fers; non longe abest mei lenien-
 di facultas: si modo animum tuum induxeris, ut id,
 quod potes, etiam velis. quod si secus acciderit: praedi-
 co tibi, culpam exiguam grauius lues: neque te mellitis
 placentulis, quibus me munerari solitus es, ab soluam,
 sed ea poena condemnabo, cuius etiam nomen cum au-
 dieris, extimesces. interim sustineo me, neque dum mu-
 to iudicium de te meum; quia te spero rationem utrius-
 que nostrum habere velle. Cupio tecum coram iocari, et
 simul adpectu illo tuo incundissimo frui. Vale. E cu-
 biculo meo, ante lucem.

E I D E M,
 Romam.

18

CVM in magnis molestiis haec vna me res delecta
 re non mediocriter soleat, quod amicitias a me diligen-
 ter coli, nec numquam officium contemni, ipse mihi sum
 conscius; legi perinuitus eam partem litterarum tua-
 rum, in qua me, ut immemorem promissi. appellas, at-
 que etiam, ut oblitum humanitatis, leuiter accusas. Ego
 tuae familiae nobilitatem, egregiaq. tuorum maiorum de-
 cora, pro eo ac debui, semper suspexi: te vero ipsum, prae-
 ditum iis bonis, quae nobilitatem omnem vincunt, amavi
 prorsus, a quo die mihi cognitus es, amore singulari. hanc
 immutari

immutari in me voluntatem, ita etiam si te mihi casus
 aliquis immutet, neque consuetudo mea, neque natura
 pateretur. quod equidem antea tibi certum esse, atq. ex-
 ploratum arbitrabar, nunc, quando subdubitare te video,
 significandum putavi; ne posthac umquam suspensiones
 istiusmodi, plane meo erga te studio, & mehercule etiam
 tua bonitate indignas, mearum epistolarum afferat in-
 frequentia. quamquam, si tuum otium cum meis occu-
 pationibus conferatur, non intelligo, cur ego tuam in
 scribendo valde laudare diligentiam, tu meam repre-
 hendere negligentiam debeas. satis, nisi fallor, statum
 rerum tuarum habeo cognitum: tu me scilicet videris igno-
 rare: nam, si nosset, & exigeres tamen id, quod prae-
 stare vix possum; esses iniquior. At erat amoris nostri,
 lenire litteris dolorem tuum in obitu patru, summi viri.
 sit ita: verumtamen abs te postulabat idem amor, ne offi-
 cium a me illud sine causa praetermitti, animum indu-
 ceres. Primum ego te, per aliquot annos domestica san-
 ctissimi hominis disciplina institutum, putabam humana
 omnia contemnere, mortem vero, quae sempiternae vi-
 tae initium est, etiam in bonis ducere. Quod si frangi-
 mur humanis, aut commouemur saltem; certe enim a
 stipite, a saxo, a ferrea materia longe distat hominis na-
 tura: quis tamen ab afflicto solatium expectat? aut quis
 me minus tranquilla experitur omnia? quae si tibi nota
 sint: profecto me liberes ab omni culpa, & cupias reuoc-
 care querellam tuam. Neque vero, si vigeat animus, &
 perferat aduersa, ita valemus ingenio, ut consolandi par-
 tes, quae doctrinae plurimum, & sapientiae postulant,
 audeamus assumere. non haec in nobis facultas est: quae

D 2 ras

tas eam aliunde licet: si modo, ut significas, quod mihi
tamen haud omnino persuades, in te ipso non est; qui &
acuere mentem liberalibus studiis, et augere prudentiam
usu rerum: ac praestantium virorum sermone potuisti.
quae si absint, ut abesse a me magna ex parte fateor: ta-
men ille ipse, qui tibi luctus causam attulit, idem a lu-
ctu te remouet exemplo vitae suae, cuius abesse nullam
partem a constantia, & a virtute reperies. Hunc igitur
tibi unum ante oculos constitue: finge ad eius imaginem
quidquid cogitas, quidquid agis: noli oculos ad vulgi de
prauatam consuetudinem flectere. ita consules egregie ra-
tionibus tuis: & illud recte instituendae vitae consilium,
quod a me requiris, nusquam esse praestantius, quam in
te ipso, cognosces. Vale. **CO. D. LX.**

EPISTOL

52
EPISTOLARVM
PAVLLI. MANVTII

LIBER. SECVNDVS

FRANCISCO. VARGAE
CAROLI. V. IMPERATORIS. ET
PHILIPPI. EIVS. FILII
HISPANIARVM. REGIS
ORATORI
Venetias.



OFFICII mei saepe me admonet officio-
rum tuorum recordatio. officium autem,
quod absens absenti praestare possum, litte-
rae sunt: quas misissem ad te iam antea, nisi
si huc aduenientem graues admodum, & peracerbae cu-
rae statim exceperant. quas enim res scis esse nobis in vi-
ta omnium carissimas, omniumq. primas, in iis me graui-
ter exercere fortuna coepit, uxore, liberis, fratre, vno pae-
ne tempore in morbum coniectis. ne mihi quidem belle sa-
tis est. animo enim affectus, valere corpore qui possum?
verumtamen, quia mihi haerent in mente consilia tua, fe-
ro haec ut humana, diuina spe, in qua tu soles omnia po-
nere, confirmatus. quod nisi hunc in portum, te ducem se-
cutus, confugissem. facile me tot malorum subita tempe-
stas obruisset. En, quam sit incertus nostrorum consilio-
rum euentus, & quam ea, quae nobis ipsi ad voluntatem
sugimus, contra cadant. Petiui has regiones non sine sum-

D 3 ptu,

ptu, non sine labore, spe ductus ualitudinis recuperandae:
 reliqui urbem pulcherrimam, mea negotia, tuam consue-
 tudinem, in qua mihi ornamenti statuo plurimum. haec
 bona, tantum abest, ut aliis bonis compensata sint, ut etiā
 multa successerint, quae si ad sensum referantur, mala
 vere possum appellare. sed, cum me sensus quandoque
 moueat, ratione tamen utor saepius. haec ostendit, nihil
 esse malum, nisi quod nostra culpa contingat: ancipitem
 esse in rebus humanis rationem iudicandi: nihil enim sem-
 per idem esse: quin, quae nobis aduersa, exitiosa, pror-
 sus misera videantur, ea saepe ita conuerti, ut ex iis ipsis
 multae commoditates emanent: contra, quae speciem ha-
 beant felicitatis, inde fluere quae acerbissima sunt, ex-
 sulum, paupertatem, ignominiam. quae ego cum cogito,
 reficior paullulum, & excito me, quatenus licet, ad eam
 virtutem, quae in aduersis rebus elucet: de qua cum mul-
 ta sint a philosophis tradita, unus tamen eam suo exem-
 plo praeclare docuit nostrae salutis auctor Iesus Chri-
 stus: quo magistro, quae sit vera fortitudo, discimus, om-
 niumq. laudandarum artium absolutam, ac vere salu-
 tem doctrinam consequimur. Atque ego te, Franciscus
 Varga, quod hoc studii genus omnibus & studiis, & scien-
 tiis anteponas, longe quidem hoc nomine pluris facio;
 quam quod negotia Caesaris Imperatoris ex omnium sae-
 culorum memoria praestantissimi, & Philippi Regis,
 omnium Regum maximi, apud Venetam Remp. orator
 administres. ista enim dignitate alii quoque nobiles viri
 claruerunt: pietate vero in Deum, & sanctitate vitae,
 parem fortasse aliquem, superiorem certe habes nemi-
 nem. itaque, postquam a te discessi, vix credas, quam sae-
 pe meus

pe meus ad te animus, tuorum sermonum desiderio, recurrat. equidem, vel si mihi cetera hic omnia secundissima fluerent, quae ex prior, ut dixi; satis aduersa; iniucunde tamen viuerem, quia procul a te absum; cuius ex humanitate, sermonibus, consiliis mirificos capiebam fructus, et documenta ad vitam recte traducendam utilissima. Quare iam me minus, quam antea, delectat, ac paene displicere totum coepit consilium illud meum de lacu Benaco incolendo. tua me singularis doctrina tua probitas, tua benignitas ad urbem reuocat. Benacum, per anni tempus cum licebit, aestate scilicet ineunte, (nam hieme regionem illam procellis, & ventorum vi totam audio agitari) si valetudo ita postulabit, inuisam. interea meam imbecillitatem ratione victus, & abstinentia tuebor. ac fortasse fiet, quoniam a Deo cuncta pendent, ut Venetiis, intra meos parietes, in oculis, & ad speculum meorum, commodissimo vitae genere, ita contuale sciam, ne qua postea me caeli mutandi necessitas extrudat. quod si assequar; habebis me, si me tantum ab humanitate tua sperare vis, quod profecto vis, familiarum, ac paene contubernalem: & hac equidem spe iam nunc mirifice sustentor. Vale.

HIERONYMO. FALETO

HERCVLIS. FERRARIENSIVM

DVCIS. ORATORI

Venetias.

2

QVOD heri inieciſti in ſermone, haeret in animo,
 & quo diligentius rem perpendo, eo magis omnia mea
 conſilia, omnes cogitationes ad nouam ſocietatem, quae-
 cumque ea ſit, conuerto, vexor enim, & deludor indigne
 ab homine taeterrimo, omniumq. impuriſſimo: cui non
 ſatis eſt auertere communem rem; ſed me prorſus ita de-
 ſpicit, ut nec dignum ducat, ad quem adeat accerſitus.
 equidem nihil mihi adſciſco, nihil arrogo inſolenter: nihil
 enim habeo neque a fortuna, neque a me ipſo, quo ni-
 mium extollar: verum tamen limina mearum aedium te-
 runtur quotidie pedibus virorum clariffimorum, ad me
 conſluentium. tu ipſe, tu, inquam, Falet, & maximi
 Ducis orator, & maximus ipſe vir, quem grauiffima di-
 ſtinent negotia, qui ſcribis hiftoriam, qui legum ſcien-
 tiam, veterum, & recentium, ſcriptis luculentiffimis
 explicas, venire tamen ad me, quae tua eſt humanitas,
 ſaepe ſolitus es, hor. aſq. multas ſuauiſſimo ſermone con-
 ſumere. Malum eſt, inquires, ab homine nequiſſimo con-
 temni. Malum: ſed peius etiam, expilari. quod niſi tua
 prudentia medicinam huic malo affert; petiit fructus
 omnis tuae liberalitatis. clauam enim citius de manu
 Herculis poſſim extorquere. quam ab iſto nummum. aut
 igitur ea mihi conſeruetur vtilitas, quam tuo benefi-
 cio

etio speraueram: aut, qui nos vult perditos, perdatur ipse nobiscum, & societas communi perniciē dissoluatur. verum, cum in tuum ingenium, tuam auctoritatem, & singularem in me benevolentiam intueor; traducor facile ad optimam spem; tranquilla omnia, comoda, copiosa mihi ipse polliceor. tu restitues vnus afflictam rem: & istum postremi ordinis hominem, omnibus inquinatum vitiis, indignum prorsus non modo amicitia nostra, sed congressu etiam, ac sermone, extrudemus, vt versetur posthac, & viuat cum sui similibus, in sordida nequitie, seiunctus a nobis, qui humanitatem colimus, & virtutem omni lucro anteponimus. Interim lege, quam saepe iam efflagitasti, partem libri nostri de quattuor Rebuspub. quam cupio a te probari. otium si habuero, quale vt aliquando consequar, operam dabo; in Bellombra tuo, si alibi non licebit, totum volumen absolnam. Vale. Ex aedibus nostris. ∞ DIVII.

Ex libro de quattuor Rebuspub.

EX. IIS, quae supra sunt commemorata, duae videntur propositi nobis argumenti partes absolutae. patere enim satis arbitramur, non modo quibus vitiis duae maximae, ac firmissimae ciuitates, primum Sparta, deinde Carthago, labefactatae corruerint; verum etiam, quibus illa vitia remediis vel sanari penitus, vel ita saltem corrigi potuerint, ne reipub. salutem in discrimen adducerent. nunc urbis Romae quaestio succedit: qui erat tertius in diuisione locus. postremae narrationi, conclusio futura nostri muneris, omniumque nobilissima,

nobilissima, & eadem difficillima tractatio, Venetiae nostrae reseruantur.

AC. DE Roma, quae nullo magis vitio, nullo grauius umquam morbo, quam imperii magnitudine, laborauit, primum illud occurrit, nulla omnino in ciuitate post homines natos aut virtutes, & honestas actiones aliquando floruisse magis, aut aequae malas artes, & exitiosa publicis rebus consilia valuisse. Primis reip. temporibus, cum nulli dum de plebe magistratus creabantur, summa senatus potestas, summa fuit auctoritas. utraque cum per aliquot annos viguisset, inclinare tum primum coeperit, cum tribuni pl. creati sunt. creatos autem culpa senatus, historiae declarant. nam, si prima repetere, & quae cuique rei causa sit, placet animo perquirere: tribuniciam potestatem, quae deinde senatus opes fregit ac debilitauit maxime, ipsius vitio senatus Romae constitutam, facile constabit. Quid igitur? an tu, dicet aliquis, senatum reprehendis, quia tribunos pl. creati passus sit, cum plebs eum magistratum non iam uocibus posceret, sed armis extorqueret? an amplissimum ordinem, quia per miserit, quod recusari sine reip. praesenti iam periculo non poterat, imprudentiae condemnas? Ego quidem minime: habeo enim rationem necessitatis; cui parere, sapientis semper est habitum. Secesserat armata multitudo in Sacrum montem: flagrabat ira, & odio in ordinem nobilium: auaritiam, superbiam, crudelitatem senatus accusabat: se bella gerere urbes capere, pro patria sanguinem effundere, mortem obire clamabat: pro his meritis inopiam, & iniurias patitis

ti: senatum commodis frui, senatum honoribus abundare: plebem seruire, quae, ut ceteri liberi essent, quotidie sua corpora hostium telis obiceret, quem non mouerent huiusmodi querellae? quem non terrent, cum ii, qui haec querebantur, alii pila, alii gladios manibus tenerent? recte fecit senatus: tribuniciam potestatem, a plebe flagitatam, concessit, non libenter, sed, ut impetum sedaret, maiorem temporis, quam suae uoluntatis, rationem duxit. haec, ut dixi, recte, nec sine summo consilio: sapiens enim cum necessitate non pugnat: at illud neque recte, neque prudenter; quod, ut in eam necessitatem res deduceretur, siue negligentia, siue superbia commisit. occurri principiis oportuit, & nascentem pestem exstingui. nam, cum omnes ciuitates, quae suo milite bella gerunt, quotidianis prope seditionibus fluctuare necesse sit: quo malo & ueterum memoria, & nostra aetate florentissimas ciuitates occidisse constat: summae difficultatis, ac diuinae cuiusdam sapientiae uidetur esse, ita rem moderari, ut consistat, neque permittere, ut multitudini, quae satis ipsa per se leuis est, nulla paullo iustior ad motum accedat occasio. Erant in plebe Romana quam plurimi; quibus aere alieno obstrictis, unde soluerent, non erat. hi cum ad tribunal consulum, qui tum, uondum creatis praetoribus, de creditis pecuniis ius dicebant, a feneratoribus uocarentur, egestatem excusantes, & domesticas miseras ad eliciendam misericordiam commemorantes, tamen non audiebantur. magistratus ne extendum feneratori debitorem, tradebat, ut, quamcunque creditor uellet, seruitutem seruiret. iniqua, & homine

mine prorsus indigna siue consuetudo fuit, siue lex.
 Tu mihi libertatem lege eripias, cum libertatis causa
 leges constituantur? an ego ullam legem potioreme
 lege ducam qua Deus, ut homo liberum animal esset,
 ac ceteri animantibus imperaret, aeterno iure sanxit?
 pecuniam auferis: non relinquis, unde viuiam, unde li-
 beros alam: fero: relinque libertatem; ut mercenario
 saltem opere ipse mihi, & esurienti familiae victum
 quaeram. Cum his acerbè magistratus agebat; acer-
 bius etiam feneratores; qui ciues Romanos, nexu vin-
 ctos, grauissimo seruili opere fatigabant, & nexorum
 in terga flagellis, ac verberibus saepe saeuiebant. His
 senatus miseris ciuibz consulere, causam libertatis su-
 scipere & potuit, & debuit; nexos e vinculis exime-
 re, humanitatis fuit; diem soluendi laxiorem egentibus
 statuere, aequitatis; vsuris modum facere, iustitiae.
 haec & facienda fuerunt, & ut fierent, cum a patri-
 bus plebs, atque consulibus frustra petisset; ad extre-
 mum, ut homines desperatio praecipites agit, armata
 multitudo in Sacrum montem, tria millia ab urbe pas-
 sum, secessit. tum, ut plebeiorum animi, stimulis
 iracundiae perciti, continerentur; senatus, periculo
 territus, de creando plebeio magistratu, quia res ali-
 ter conuenire non poterat, assensit. itaque tribuni pl.
 primum quinque, deinde decem, creati sunt. ab hac
 radice ortum quidquid inter ciues discordiae, quidquid
 seditionis, quidquid bellorum fuit. per annos quingen-
 tos, id est, usque ad exitium reip. tribuni pl. contra no-
 bilium potentiam seditiosis concionibus vociferari, ple-
 bem ad noui commodi spem, ad noua incitare consilia

num-

numquam destiterunt. specie libertatem tuebantur; re
vera senatum oppugnabant. primo magistratus, dein-
de & sacerdotia plebi communicata. ad extremum is,
qui solet, exitus consecutus est. nam plebs, ubi, quod
paucorum erat, ad se transtulit, rursus id ipsum, quod
multitudinis est, in unum confert. facit hoc inscitia, fa-
cit inopia, facit ea, quae in magno numero semper exsi-
stunt, voluntatum & opinionum dissimilitudo. ita popu-
laris administratio, quae maxime liberatis imaginem
praefert, occulte tamen, si spectemus exitum, ty-
rannis est: quoniam ex ea fere semper exoritur tyrannus:
sicuti deinde ex tyranno status optimatum genera-
tur. Huius mutationis exemplum satis illustre Roma
est. primo, regum summa potestas fuit: deinde sena-
tus, hoc est optimatum, maior, quam populi: tum
populi maior, quam senatus: postremo rursus unius
maxima, & singularis. populus enim C. Caesarem
extraordinariis imperiis auxit, eoque extulit, unde,
cum se monarchiae proximum esse homo acutus intelli-
geret, priuatam condicionem despexit: altiusque ma-
luit, ut humani mos ingenii fert, adscendere, quam ad
inferiora, quae reliquerat, descendere. Neque ve-
ro me fugit id, quod a doctissimis viris memoriae pro-
ditum est; firmissimas illius reip. vires esse, & quae
non facile ab externis viribus debilitentur, cuius non
simplex, neque unius generis administratio est, sed ita
mixta, ita temperata, ut in triplici forma unum consi-
lium, unam quasi mentem significet. neque ego tum in
ciuitate praeclare agi negauerim, cum & unus, & pau-
ci, & multi maximas res gerunt, nec tamen aut unus,
aut

aut pauci, aut multi praecipuae dominantur. verum, ut harum trium partium in suo quaeque munere modum seruet, & ea, quam habet, potestatem numquam abutatur, ego quidem hoc fieri posse non arbitror. sunt enim hi tres ordines admodum dissimiles: & inter dissimilia perpetuus aequabilitati locus esse non potest. nam, quemadmodum in musicis, quo plures chorae percutiuntur, eo suavior concentus efficitur, quia uariis ille multarum fidium numerus, in quo summa discordia est, arte conciliatus, & ad concordiam perductus, incredibili quadam iucunditate aures, animumque permulcet; sed haec tamen iucunditas ideo brevis est, quia de multis fidibus aliqua statim remittitur, & discrepat: sic multorum ordinum administratio uidetur illa quidem esse omnium optima; quia, quo longus ab unius imperio disceditur, eo propius ad libertatem acceditur; sed quia multis idem sentire difficile est, facile dissoluitur. quid autem ex dissolutione existat, multarum ciuitatum miserrimus exitus declarat. quare, cum sit necesse, ut de tribus potestatibus, quae pares sint, aliqua aliquando se efferat, & reliquis duabus insultet: ante prouidendum est, ut ea, unde magis hoc imminet periculi, quaeque ad temeritatem procliuior est, inferiorem locum obtineat, & reliquas duas neque dignitate, neque viribus adaequet. quae vero de tribus ea sit, quae facilius insanit, & cum insanierit, cohiberi non possit, hic sine dubio populus est. qui ut inferiorem in ciuitate condicionem aequo animo ferat, ita fiet, si cum eo semper iuste, numquam superbe, interdum etiam liberaliter senatus aget. tum populus nihil appetet,

appetet, nihil molietur: nouos magistratus, nouas leges, noua imperia non desiderabit: libera seruitute libenter seruiet: putabit enim se non hominibus seruire, sed legibus. haec si Romae senatus initio cauisset, quaeque furentis multitudinis impetus, quaeque vis esset, mature cogitasset: non, ut cum seruis agi solet, ita cum ciuibus agi passus esset: neque liberos homines uetuisset: usuras, hoc est inopiae causam, minuisset: ipsam autem inopiam publica benignitate subleuasset. quae quia non fecit, ideo illa, quae dixi, consecuta sunt, ex desperatione secessio, ex secessione tribunatus, ex tribunatu ordinum contentio, ex contentione libertatis interitus. Primis temporibus omnia potuit senatus; mediis multa senatus, multa populus; extremis omnia populus. itaque & primis temporibus, & mediis florentissima respu. fuit, extremis concidit. nullum enim ius, nullam potestatem a senatu tribunorum temeritas non abstulit. Aerarii dominus per multa saecula senatus fuerat. antiqua tamen iura tribunus pl. P. Clodius neglexit, lege lata, qua Pisoni & Gabinio cos. simul cum prouinciis pecuniam, quantam voluit, de publico dedit. Senatus lege Sempronia consulares prouincias pro consulibus decernebat. decretas tamen idem Clodius abstulit, Vatini scilicet tribuni pl. improbitatem imitatus: qui anno proximo C. Caesari Galliam Cisalpinam cum Illyrico, inuito senatu, sua lege dederat. Legati etiam ex auctoritate senatus deligebantur. Vatinius immutauit, & ipse sibi sua lege legationem detulit. Ipsa comitia quodam modo senatus in potestate fuerant; quia magistratum non gerebat is, qui ceperat,

64 PAVLLI. MANVTII
rat, nisi patres auctores essent. hoc quoque amissum,
nec fieri iam solere, Cicero significat in oratione pro
Plancio. Triumphum a senatu petere Imperatores e
provincia redeuntes diu consueuerant. inuentus est,
qui, cum senatus triumphum negasset, ad populum con
fugerit, & populo iubente, triumpharit. Qui pote
rat ea resp. consistere, & ad interitum non ruere, in
qua, quod senatus improbat, populus iubeat; quod
decernebat senatus, infirmabat populus? ius enim in
tercedendi tribuni pl. habebant: quo iure, ne senatus
consulta fierent, impediebat. at, impedire iussa popu
li, si senatus vellet; non erat, ut tuto posset. ilico enim,
incitantibus tribunis, erumpebat seditio, ilico vis, ili
co caedes. cuius periculi metu saepe senatus iniquissima
tulit. nam, ut omittam alia, quae sunt huius generis
sexcenta, regna ipsa sine senatus consulto barbaris ho
minibus ex tribunorum pl. libidine esse donata, scriptum
est. quae licentia cum retineri non posset, eo progressa
demum est, ut omnia perdiderit. nec dissimilis erit euen
tus, quacumque in ciuitate pares cum senatu vires po
pulus habebit: non quod, ubi aequalitas est, ibi recte
non sit: sed quod, ubi ad aequalitatem populus perue
nit, diuturnam esse non patitur. Quare, cum ex duo
rum ordinum aequalitate statim oriatur inaequalitas;
aequalitati perniciosae tu tam inaequalitatem antepono;
& eum ordinem praeesse rebus malo, qui potestate mi
nus abutitur, quam eum, cuius potestatem summa sta
tim licentia, summa temeritas consequitur.

MARIO.

MARIO. NIZOLIO

Parmam.

3

EPISTOLA tua, mi Nizoli, ut amici hominis, ac vehementer amandi, summa me voluptate affecit, ac meam vehementer incendit cupiditatem Parmam adeundi: non quod vrbs, aut vrbs ornamenta, me moueant: (alii haec mirantur, apud me vulgaria sunt) sed aueo incredibiliter patronum veterem meum, meum dico? immo vero litterarum ac studiosorum omnium, ipsumque litteris excellentem, Alexandrum Farnesium Cardinalem salutare: quem cognoui Romae, & colui puerum adolescens, eximia iam tum indole praeditum, & earum laudum principis, quas deinde auctus aetate simul & iudicio perfecit, magna omnium expectatio ne florentem. quo quidem tempore vehementer vrbs ipsa excitauit me, atque acuit in studio liberalium disciplinarum, adspectu ipso antiquitatis, & multiplici ac varia hominum eruditorum scientia: sed, ut ingenue vereque fatear, proprie me expoliuit aula Farnesii moribus, ac litteris; cum uiuerem coniunctissime ac familiarissime cum duobus praestantissimis viris, Marcello Cervino, & Bernardino Masaeio: quorum alterum Pontificem maximum, alterum Cardinalem, utrumque immortalitate dignissimum, aduersa bonis artibus iniqua mors eripuit. Quare, quod me Parmam vocas, & multi verbis inuitas amantissime, non me litterae tuae sopitum excitarunt, sed currentem potius, ut aiunt, incitauit.

E

citauit.

citarunt quod utinam cum voluntate cetera congruerent
iam iamque vobiscum essem. sed vides anni tempus: vides
itinerum difficultatem: scis, quam imbecillo sim corpo-
re, quam tenui, & ad incommoda, iniuriasque caeli per-
ferendas parum apto. timeo etiam a militibus; a quibus
otium non est: excurrere enim dicuntur, & praedas fa-
cere. non igitur veniam, cum a vobis unius diei vix
absim intervallo? veniam, opinor; quaeque aduersantur,
& impediunt, contemniam omnia. volui omnino meis
oculis, Farnesio videndo, satisfacere; volo hanc a me
ipso gratiam inire, & salutationis officio, expetito sane,
ac debito, perfungi. Te vero, optime, ac doctissime
Mari, cuius consuetudine & sermone careo multis
abhinc annis, quem mihi tamen ex animo numquam eri-
puit neque tempus, neque longinquitas, quo studio com-
plectar? quantam hauriam, cum praesens praesentem
alloquar, voluptatem? dilexi equidem, a quo primum
die te cognoui, tuos mores, tuam naturae comitatem, ac
suauitatem: doctrinam vero, ingenium, industriam su-
spexi semper, extulique laudibus ad caelum: nec iniuria.
nam si, Romanae linguae studium colere & illustrare,
laus est; quis hoc te vno aut curavit studiosius aetate no-
stra, aut cumulatiùs praestitit? ego ipse, quem tu esse
aliquid vis in hac Latine scribendi facultate; in quo ve-
reor ne te fallat amor: nam iudicium in dubium vocare
non debeo: sed, si quid sum, magna ex parte de tuo fon-
te fluxi. thesauros enim Ciceronis omnes, in illo prae-
claro tuarum Observationum libro congestos, reperi;
& usus sum facile: quos colligere dispersos, immensi
laboris fuisset, ac temporis. Laudas igitur beneficium
tuum,

tuum, cum me laudas, & quodam modo praemia capis
meritorum tuorum. De loco in oratione pro Sextio,
disputas erudite: nec a iudicio tuo mea discrepat opinio.
quiddam tamen superest, quod me leuiter pungat. qua
de re cum erimus inter nos collocuti; vel ego tuam sen-
tentiam, ut veram, vel tu meam sequeris gratiae sal-
tem causa. Vale, & Farnesio Cardinali, simulque
Antonio Mirandulae, Episcopo, uni omnium do-
ctissimo, atque humanissimo, meis verbis salutem plu-
rimam dicito. Asulae.

SILVIO. ANTONIANO

Ferrariam.

4

ACUTE admodum, mi Silui, nec minus aman-
ter scribis. ego autem in amore facile possum tibi respon-
dere, planeque respondeo: ingenii signa, praedico tibi,
ne prorsus ulla meis in litteris expectato. non soleo fe-
re studiosius epistolas elaborare: primum, quia, si quid
scribitur ad familiares, plane familiariter agendum pu-
to; odi illa nimis ambitiosa, constructa verbis, & sen-
tentiis exquisitis; deinde, quia ne si velim quidem in
epistolis agere accuratius, relinquitur ut possim. urgeor
quotidianis amicorum salutationibus; negotiis, & rei
domesticae cura paene opprimor: oculorum vero vale-
tudine sic interdum vexor, ut nullam partem capiam
quietis. quare male merearis de amico tuo, si velis ei,
tam valde occupato, tam grauius affecto, diligen-
tiae onus imponere. imitetur epistola sermonem, ex-

E 2 curat

currat libere; nullis adstricta legibus, & suauem quamdam, perfecta non indignam amicitia, negligentiam praeferat. alioqui officium scribendi, saepe inter absentes necessarium, gratum quidem semper, iniucundum et graue nimis accurata reddet industria. Quod me ornas laudibus; non efficis, ut ipse mihi placeam, aut assumam plus quam soleo: id assequeris, ut me tibi denuncias magis, cuius ex amore fluere ista video, numis in me honorifica, praeclara, singularia: quae optaui equidem semper, adeptum me numquam putauī. sed videlicet, affingere veritati, vobis poetis religio non est: idque facilius libenter; ne, consuetudine intermissa, quodam modo vestra iura minuantur. me tamen, si poetice scribis, artificium tuū, sin, ut scribis, ita sentis, error etiam deletat. haec enim me tibi commendat opinio, & amorem augeat necesse est: foris etiam, ut spero, fructum pariet. nam meis laudibus, tuo commoti testimonio, cum te excellere ingenio, florere magnorum Principum gratia constet, non pauci fortasse assentientur. quod utinam, id quod in meis consiliis erat summum, Ferrariae mihi vivere per valetudinem licuisset. nae ego te, singulari virtute adolescentem, ita meis studiis, & officiis essem complexus, ut nemini prorsus tuorum familiarium, ne Riccio quidem ipsi, apud quem filii locum obtines, in te amando concederem. Quid, inquires, si te, depulso morbo, confirmares? Utinam id aliquando eueniat: sed id quidem sperare iam vix audeo. iaceo enim nunc, & laqueo mihi ferrime: nec mihi caeli mutatio profuit: nec nouis remediis locus est; quae iam omnia frustra consumpsi: uno tamen bono mea mala compensantur, quod, etsi vires corporis

poris magna ex parte, ingenium tamen, quaecumque est, vis morbi minime debilitauit, aut fregit. itaque singulis noctibus aliquid scribo, aut legenti puero aures praebeo. sic assequar fortasse, ut, qui me non vident, carentem publico, & communi luce, viuere tamen intelligant, atque ita uiuere, ne quando cum aliis plene totus extinguar. Tu fructu, optime Silui, ista valetudine, & isto otio: cum illa tibi naturae munere satis firma contigerit, hoc habeas tui Principis liberalitate uberimum. Vale.

Venetius. ∞ DLIIX

EARTHOLOMAEO. RICCIO

Ferrariam. 5

VERA narras, optime Ricci, atque ita narras, ut in magna tuarum litterarum prudentia facile tamen amor interluceat. Mihi, ut scribis, condiciones hoc biennio delatae sunt multae; omnes cum emolumento, nulla sine dignitate. fecit tamen siue valetudo mea, siue voluntas, seu fati potius, quae in rebus humanis dominatur, occulta quaedam vis, ut omnes reiecerim. hanc postremam, delatam à summo Cardinali, Hippolyto Estensi, vnā auide sum complexus, vnā omnibus anteposui: nec est in meis consiliis quidquam antiquius, quam ut in illius aula, eximii Principis, ac viri praestantissimi, consenscam. itaque, quod hortaris, ut ad vos quamprimum me conferam; non efficis, ut cupiam, qui cupiditate

E 3 iam

iam ardeam; dolorem potius auges; cum intelligam,
 quod maxime volo, id me consequi, hoc quidem tempo-
 re, minime posse. nam, ut omittam, quod haec me
 frigoris acerrima uis, & intemperies caeli semel aut ite-
 rum cubiculo egressum pessime accepit, & in eadem
 claustra, in easdem, ubi multis iam mensibus iacui, te-
 nebras retrusit: praeterea pietas me retinet. Fratres ha-
 bet uxor mea duos: quos ego ambos unice diligo: con-
 traque ipsi mihi singularem non modo beneuolentiam,
 verum etiam obseruantiam praestant. probi sunt ado-
 lescentes, ingenio, modestia, uirtute etiam ornati, una
 re minus laudandi, quod inter ipsos parum conuenit.
 orta est inter eos post obitum patris de haereditate dis-
 sensio: inde lis, inde odium. quod nisi ego me inter-
 ponerem; nisi utrumque prensarem, rogaremque per
 parentis manes, per solitudinem matris, per existi-
 mationem familiae: conflictarentur assidue turpibus iudi-
 ciis, graui iactura famae, magno rei familiaris detri-
 mento. hoc ego dum uersor in negotio; dum in eo stu-
 dium, operamque pono, ut uxoris meae fratribus con-
 sulam: putem mihi esse uerendum, ne quis me, sana
 praeditus mente, reprehendat? non puto. non igitur
 hoc, te iudice, pertimescam. hem, Ricci, qui sa-
 cris in litteris non ambitione, ut multi, sed ita uersatus
 es, ut scientiam, e libris petitam, uita exprimeres;
 quae sunt illa praeclara, quae nos ille bonarum actio-
 num magister optimus edocuit? non haec sunt, egenti-
 bus subuenire, errantes in uiam, dissidentes ad concor-
 diam reuocare? ana igitur me de hoc officio. non
 postulo, ut laudes. iam enim didici, uel aetate doctus,
 uel

nel morbo
 potius, q
 que land
 que in u
 common
 accedit
 brum
 multis
 hanc v
 polyto
 amabil
 sermon
 tanq.
 do res
 hement
 Vale

A

Acc
 nostro, d
 quod si
 bi Roma
 bi non
 teatro
 quantus
 hercule
 tibi ego

nel morbo admonitus, recte factorum fructum a Deo
potius, quam ab hominum iudiciis, expectare, omnem-
que laudem non in honore verborum, sed in ipsa re, at-
que in una virtute constituer. Vides iam duas esse
commorationis meae causas, utramque satis gravem.
accedit tertia, ne ipsa quidem levis, ut imprimam li-
brum meum de legibus Romanis; quem poscentibus
multis debere iam diutius vix possum. eoque magis in
hanc voluntatem incubui, quod inscriptus emittetur Hi-
polyto Cardinali. Tu, mi Ricci, fac tibi ita persuadeas,
amabiliorem mihi Ferrariam fore tua causa. tuis enim
sermonibus, tua humanitate, tuo lepore frui, interrup-
tamq. multorum annorum consuetudinem licebit aliquā-
do resarcire. quod ut sit maxime diuturnum, opto ve-
hementer, & ut tu amantissime auguraris, etiam spero.
Vale. Venetiis. ∞ D LVI

ANTONIO. AVGVSTINO

Romam.

6

ACCEPI tuum Varroem, missum ab Octavio
nostro, delatum a Laeuino. quid quaeris? te dignus est.
quod si operam eandem posueris in Festo; plurimum ti-
bi Romanae litterae debebunt. aggredere. quid enim ti-
bi non succedet? qui, (ut omittam illa, quae pleno iam
theatro spectata sunt, ingenium, iudicium, doctrinam)
quantus quantus es, totus labor, totus industria es, ac me-
hercule non solum communi nomine, sed proprias etiam
tibi ego agam, atque habebo gratias. nam, quem in eo li-

E 4 bro

bro emendādo laborem suscipere cogitaueram, quem fortasse, & aliis pressus oneribus, & natura, ac valetudine imbecillus, non ferrem, eo me teuabis. Vale. Venetiis. Egregio iurisperito, Pyrrho Tarro, veteri mihi necessitudine coniuncto, salutem plurimam. ∞ D L I V.

E I D E M, Romam.

7

E G O vero & scripsi iam, nisi me fallit memoria, satis aperte: & nunc, quando tibi ita placet, iterabo eadem libentissime. Lapides, aut nummos, si quos habes, in quibus mentio fiat legum Romanarum; eos si nobis impertieris, habebo gratias, tuumq. & iam beneficium ipsa fortasse, me narrate, posteritas audiet. tabulas videor mihi legisse Romae nescio quas: sed neque tum descripsi; qui magni non facerem ea, quae nunc quidem tanti puto, nihil ut potius mihi sit: neque vero, quo in loco, aut apud quem eas legerim, satis nunc in memoriam reuocare possum. quare ad te confugio, vniuersae arcam antiquitatis, arcam tamen eiusmodi, quae pateat amicis tuis, hoc est bonis viris. quo me in numero quia esse vis, triumpho. Alexander autem tuus facile nostrum artificio vincet. tu enim excellis: at res quid sumus? aliquid fortasse, si cum aliis; nihil certe, si tecum Augustine comparemur. Plura nec possum, quod eram occupatus: quamquam hoc quidam quotidianum est: nec debeo hac in re, quam tibi non solum amicitia nostra, verum etiam litterae ipsae, quibus tibi scio nihil esse carius etiam me tacente, magnopere commendant. Vale.

&

& Siluestrum Aldobrandinum, virum excellentem, meum perueterem amicum, nisi graue est, saluta meis verbis plurimum. Venetiis.

E I D E M, Romam. 8

Nisi quis casus meis consiliis occurrat, editionem cogitabam eius libri, quem de legibus Romanis quinquenio ante a me conscriptum, debere diutius multis flagitantibus non possum. ad hunc librum quantum ex antiquis lapidibus accedere possit ornamenti, praeclare intelligo. porro, tu is es, qui hoc in usu, atq. hoc in genere scientiae tum quia Romae uiuis, tum quod in studiis totus haeres, paene solus excellas. quamquam hoc in tuis laudibus minimum est: alia sunt in te, quae ego non desino praedicare, haud sane paullo praestantiora: quae non est hic commemorandi locus, ac ne significandi quidem, ne tu me nimium esse blandum, & quasi tuae diffidentem humanitati, ad hoc artificium confugisse existimes. peto igitur a te, atque etiam rogo, (quamquam hoc verbum amicitiae nostra, tuaque maxime bonitas respuere videtur) si quid habes, quod ad leges Romanas pertineat, e libris excerptum, & veterum lapidum, aut etiam nummorum observatione collectum, id mihi ut impertias. bene mereberis de litteris, vel potius bene de te meritis gratiam referes: quando quidem earum ope, ac merito tantus es: bene etiam de me ipso, cuius laudi, pro nostra necessitudine, meoque erga te studio singulari, debes velle consulere. quamquam hoc certe non admodum specto: ambitionem enim paene habeo

habeo in extremis: prima mihi est, omniumq. rerum antiquissima publica studiosorum hominum utilitas: quo mei labores intenduntur, mea, quaecumque est, dirigitur industria. excute, si me amas, atque euolue funditus illa tua scrinia, in quibus conditi rerum antiquarum thesauri asseruantur. nemo enim, si possessio litterarum diuitiae sunt; quod homines eleganti iudicio, sanaq. praediti mente opinantur; nemo, inquam, optime Augustine, te ditior est. nec vero de tuis copiis multum imminues, si, quod futurum speramus, inopiae nostrae subueneris. qui se etiam nobiscum plurima communicares; multo id tamen quod dares, minus esset, quam quantum tibi, libris assidue tractandis, quotidie quaeritur. verum modeste tecum agimus: petimus a te minima de maximis: itaque facile impetrabimus. Vale. Venetiis.

E I D E M

LEGATO. PONTIFICIO

Viennam.

QVIA mihi honore tuo nihil est antiquius, propterea non mediocrem cepi laetitiam: tibiq. sum absenti gratulatus, quo primum tempore de legatione tibi delata ad Romanorum Regem, tum ex amicorum litteris, tum ex multorum sermonibus cognoui. illud, ut vere dicam, molestiae non nihil adpersit, quod veritus sum, ne nostrae litterae, quibus, in urbe dum viuis, tua studia splendorem & utilitatem addunt, te discente, & in Austriam usque, ad longe diuersum vitae genus translato, iacturae plurimum

iniam facerent. quod si, secus esse, significaueris: (iam enim versaris in ipsa re, quaeq. tua futura sit in vniuerso fere munere occupatio, vsus te monere, & erudire facile potest) cumulabis mea gaudia, & habebis gratiam iis: quibus honestare tuam virtutem his honoris insignibus, nullo nostro, hoc est artium, doctrinarumq. liberalium, detrimento, curae fuit. Ac primum illud, pro meo incredibili erga antiquitatem studio, etiam atque etiam a te petam, vel potius, quando pollicitus iam es, a te exigam, ut Festum Pompeium tua emendatione perpolias, atque illustres; aut, si habes ita emendatum, ut tibi, acerrimi, ac seuerissimi iudicii viro, satisfaciat, edendum omnino cures, neque deberi nobis eam utilitatem diutius pati, quam cum in illo vere aureo libro dispersam videamus, colligere tamen vix possumus, vel plane nullo modo possumus, locorum, ut scis, paene innumerabilium difficili scientia impediti. bene collocabitur industria tua: & hunc sibi comitem adiungi, ne solus eat per ora virum, Varro tuus aequo animo patietur. rogandus non es in tua laude, communi praesertim studiosorum commodo coniuncta: tu, si de illa non laboras, hoc saltem commouere te debeat. quod utinam aut mihi cum hac mente pars aliqua doctrinae tuae, aut tibi mea mens, & plane incredibilis ad communicandam virtutem animi propensio, cum ista tam exquisita, tamq. multiplici omnium pae ne literarum scientia contigisset. nae ego, quod ad me attinet, multa non sinerem ignorari, quae scire praeclarum est, quaeq. in tenebris, nisi tu eruas, perpetuo iacebunt. nec tamen persuadere mihi possum, te uelle nobis tam iniquum esse, ut tantam doctrinam, si quid tibi ac-

cidat

cidat humanitus, (homines enim sumus: nec ego mihi, nec tu tibi de vitae diuturnitate praestare quidquam possumus) extinguere tecum velis. Quid ea, quae chartis iam, & voluminibus explicasti? cur diutius premis, optime Augustine? cur ex ingenii tui fontibus expleri nostram sitim non uis? sed, opinor, aliquando facies: & faueo libenter meae spei, paullo minus, quam tuae gloriae; cui scio me optime consulere, cum haec ad te scribo. De me si quaeris: uexamur oculorum anniuersarie morbo: nec tamen labori parcimus: scribimus aliquid quotidie, aut legenti puero operam damus: aliquo fortasse ualeitudinis damno: sed nihil est tanti, ut a litterarum suauissima consuetudine seiungar. Onuphrius Panuinius, ille antiquitatis heluo, spectatae iuuenis industriae, & ingenio, ut probitate, praestans, hic est, eritque, ut uideo, in aliquot menses. imprimi suos Fastos cum commentariis; & interim adornat alia. saepe litigat obscuris de rebus cum Sigonio nostro. sed utriusque bonitas, mutuus amor, excellens ad cognoscendam ueritatem iudicium, facit, ut inter eos facile conueniat. Sigonium de facie non nosti: eius tamen scripta, non dubito, quin legeris. ea doctrinam, & ingenium declarant: humanitatis, & studii erga te, tuique. similes testis ego sum quem debes ipsum suo merito, praeterea tuae praeconem eruditionis, diligere. Vale. Venetiis.

E I D E M, Romam. 10

V B I te ad urbem rediisse cognoui, vehementer sa-
ne,

ne, pro meo erga bonas litteras perpetuo ac singulari studio, sum laetatus. te enim absente, silere mihi prorsus Romanae musae uidebantur. Scripseram ad te superioribus diebus; easque litteras ad aulam noui Imperatoris miseram; quas acceperis, nec ne, cupio scire. appellabam te, quod iam promiseras, de Festo cum tuis correctionibus diuulgando. de quo nunc eo magis urgeo, quia nisi fallor, spatii plus habebis. aggressus nesis, & quousque opus perduxeris, ac de perpolitio-
ne quid speres, si ad me scripseris, gratissimum facies. Vale. Venetiis.

BENEDICTO. RHAMBERTO,
rusticanti.

SVADEBAM, ut exires; quod aegrotans, quantum esset in caeli mutatione, cognouissem: nunc idem angor, te profecto: neque me congressus, neque sermo cuiusdam inuat: solus, ut in litore, obervo. qui etiam, etsi scio quam sis prudens, & in omni re moderatus; tamen, ut est amor sollicitus, offensiones in te omnes timeo. commune omnium est, ut rure, veluti quamdam viuendi licentiam nacti, liberius agamus. amabo te, mi Rhamberte, noli istam consuetudinem imitari, serua tuam veterem continentiam. & quoniam mihi, ut saepe tecum locutus sum, aduersus non dissimilem destillationem praesens auxilium fuit exercitatio: te quoque ipsum, nisi fallor, hoc uno maxime senties allenari; si modo hoc tenebis, ut meridianum

in

in solem ne te cōmittas; multo vero minus in ventum,
 qui sit inclementior. nam sunt aurae quaedam leues, qua-
 rum spiritus non modo non hominum generi noxius, sed
 etiam vitalis: & ego, has saepe ultro secutus, sen-
 si languentes in me vires earum quasi flabris excitari,
 Sed o Rhamberte, audi me, hoc verissime monentem. ni-
 hil agis, nisi iucunde viuas. si vis te tibi restituere; des
 te ad hilaritatem oportet, & ex animo tuo dispellas, si
 qua trīstium cogitationum residet nubecula. Hanc esse
 praestantissimam medicinam, vel potius vnā esse medi-
 cinam, me quidem, superioribus temporibus eodem mor-
 bo laborantem, docuit euentus. quare te rogo, vt pro eo,
 quanti ipse tibi es, quantiq. etiam nos apud te sumus, quo-
 rum salus in tua salute posita est; des operam, vt ve-
 terem morbum noua ratione cures, & aliquando
 istam turbam medicorum malam in crucem iubeas abi-
 re; qui te pharmanis non solum diuersis, sed etiam
 contrariis integrum iam annum lacerant, dum laten-
 tem in obscuro veritatem tuo periculo quaerunt. Vale.
 Venetiis. ∞ D XLIV. mense Sept.

MARIO. CORRADO

Brundisium.

12

DEBEO tibi, mi Corrade, tot iam nominibus,
 prorsus vt non videam, qui soluendo esse possim. scri-
 psisti ad me saepe: tantum ne? sunt alia: humanissi-
 me, elegantissime: laudes in me contulisti eas, quas
 si agnoscam, ipse me nimium videar amare. tibi tamen
 habeo

habeo gratias de ista tam liberali, tamq. erga me proluxa voluntate; eamque, si gratus, idest si uir bonus esse uolo, ut certe uolo, puto mihi esse inter summa beneficia collocandam. itaque, cum te numquam uiderim, fero tamen in oculis: &, quamquam habeas, qui te talem diligant; quos necesse est esse quamplurimos; ego tamen primas in amore partes appeto, secundis non libenter acquiesco. non soleo blandus esse, nec auribus dare, quod negari possit ueritati. quare uelim mihi credas affirmanti; neminem me tibi Latina in oratione antepone, conferre admodum paucos. hoc ego ita iudico: nec tu meum iudicium in dubium reuocare debes: cum mihi iam in epistolis tuis tantum in hoc genere tribueris. unum doleo, tuam istam latere uirtutem in extremo Italiae angulo, neque in hac luce uersari, ubi fructum caperes eam laudem, quae tibi debetur iudicio, ac testimonio praestantium virorum. quod si te cohortando possem adducere, ut demigratione cogitares: aggrederer, & in hanc rationem totus incumberem: uerum neque mihi de statu rerum tuarum constat; &, si cohortatione moueri potes, ipsa te res, nequaquam tibi, ut opinor, obscura, uel me tacente debet incitare. Quod scire vis de meis antiquitatibus, haec sunt. Liber nunc imprimatur de legibus: quem, cum erit absolutus, curabo ad te perferendum. Edidi iam commentarium in orationem pro Sextio, & proximis diebus in epistolas ad Brutum, & ad Quintum fratrem: quem tibi nunc utrumque mitto. maiora uellem, & fortasse possem; uerum infirmitas corporis facit, ut labore debilius; lippitudo autem, ne legere diutius liceat, aut scribere. magnam etiam mihi temporis par-

tem

tem eripiunt salutationes amicorum, magnam domestica negotia: sexcenta praeterea, quae me a studiis auellunt. sed feramus: humana sunt, nec praecipue nostra, sed communia cum multis. Tu me, velim, ames, & si par pari referre vis, amore non vulgari: Vale. Venetiis.

FABIO. STELLAE

Brixiam.

13

CUM tu ad me, Fabi, quem de facie nondum nosti, adductus humanitate epistolam miseris tam elegantem, distinctam notis non amoris minus, quam ingenii: ferreus sim, nisi te, patremque tuum sic amem, ut amare solemus ea, quae nobis in vita prima sunt. sed quid, si me ipsum etiam vestra causa plus amem? quid enim? cum ego me a parente tuo, magni nominis viro, summis virtutibus ornato, diligi videam, a te vero etiam laudari, excellentis ingenii adolescente. optime ad virtutem animato; non ipse mihi plurius sim? non gaudeam haberi a vobis, qualis esse semper volui, & ut essem, laboravi; sed voluntati exitum respondisse numquam dixi? Equidem, cum natura sum, tum valetudine & morbo subtristis; nec ad hilaritatem facile traducor: tuae tamen litterae, patrisque tui, vix credas, quid animo meo iucunditatis instillarint, qua voluptate, qua laetitia perfuderint. itaque officii vestri memoria sustentor: eaque sic fruor, ut beneficiis omnibus anteponam. quod vixnam adire ad vos, ac studio vestro satisfacere liceret. nihil esset optatius: & esset
uer

iter Pastorio comite iucundius. verum nescio quo fato contigit, ut, quo primum huc die perueni, cum tota pæne familia coeperim aegrotare, uxor quidem grauissime, nec dum ualet; ego satis leuiter, sic tamen, ut iaceam. corpori enim imbecillo quæuis incommoditas uix ferenda. quæmobrem, affectus morbo, a uiribus infirmus, equo me non auderem committere, uel placidissime incedenti. leſticam, inquis, mittemus. hac equidem ueherer commodius: sed, mi Fabi, hoc genere deliciarum mei ordinis homines uti non solent: ad fortunatos pertinet. itaque differam per aliquot dies, quoad uires colligam, idest, quoad equo, aut etiam rheda liceat uti. equos quidem hic, quales infirmitas nostri corporis requirit, idest qui alterno gressu crura molliter explicent, quos gradarios antiquitas appellabat, facile possum inuenire: sed insolentiam huius caeli nonnihil metuo: rheda autem, uereor, ne succussu laedat. omnia tamen, ut uideo, moderabitur humanitas uestra. Vale, & patri tuo, præstanti uiro, multam salutem meis uerbis. *Asulæ.*

E I D E M, Brixiam. 14

AGNOSCO tuis in litteris & patris tui, summi uiri, singularem humanitatem, & Pastorii nostri, hominis integerrimi, nec eloquentia minus, quam doctrina, præstantis, egregiam disciplinam. & cum ego te propter illos diligam: (est enim, ut scis, uterque mei, & ego nem utriusque amantissimus) tum uero ad meam in illos beneuolentiam quæ summa est, non nihil tamen tua causa uidetur accedere. Patet, atque

F clucei

elucet in epistola tua pudor ille, ingenuo dignus adole-
 scente, qui maxime commendat aetatem: patet etiam,
 quo fit pudor amabilior, plusq. sibi gratiae conciliat,
 ingenium. quae perspexeram equidem in te, ac lauda-
 ueram, quo tempore diuersatus Brixiae sum in aedi-
 bus vestris, exceptusque, & cultus à parentibus tuis om-
 ni genere officii: sed nihil praestantius, nihil admira-
 bilius, quam laudis in adolescente perpetuitas. pri-
 mum enim lubrica ipsa aetas est; nec reperitur facile,
 qui consistat: deinde, tenduntur saepe bonis, quibus
 capiantur, insidiae: & multa sunt ad deprauandum pa-
 rata, improborum consilia, aequalium exempla, vo-
 luptatum illecebrae. hae sunt illae Syrtes, quibus in-
 certo cursu nauigantes absorbentur: haec illa saxa,
 quo salutis cum aperto discrimine impingitur. nec vero,
 poetas, cum & haec, & huius generis alia cecine-
 runt, simpliciter locutos, velim existimes. vtuntur si-
 militudine rerum, quae subiectae sensibus sunt, vt
 animos erudiant, moribusq. nostris, ac famae consu-
 lant. itaque sapientem appellarunt eum, qui maris pe-
 ricula, voragines, & scopulos, & dubiis agitata ven-
 tis loca vitauisset, atque illa perdendorum hominum
 anida monstra, virginum facie simulata, praedulciq.
 cantu blandientia, contempsisset. quae sunt omnes, mi-
 hi crede, imagines humanae uitae: qua nullum est ma-
 re difficilius, & in qua, nisi rationis quasi gubernacu-
 lo regamur, quam facile fluctuemus, quamq. multa,
 & quam graua rei familiaris, existimationis, ac vi-
 tae naufragia contingant, si te propter aetatem non-
 dum vsus docuit, disce a libris, vel disce a parente tuo,
 spectatae

spectatae
 tamquam
 quodq. b
 totum id
 imitatis
 voluntat
 re te ai
 te sunt
 leuia d
 esse litt
 vel qui
 gnition
 medita
 falus o
 non a n
 peritua
 habe g
 voribus
 non iden
 abditu
 arema
 hil even
 te mult
 ad nos
 an, secu
 diuinis
 mittere
 mam d
 tiam t e
 dantur.
 . . .

spectatae sapientiae viro; qui se ex hac tempestate
 tamquam in portum recepit sacrarum litterarum:
 quodq. habet a foro, quod a publicis muneribus otii,
 totum id in theologia libentissime consumit. quem tu
 imitaris, ut audio, si minus in studio doctrinae, at in
 voluntate, in moribus, vitaeq. instituto. contemne-
 re te aiunt, quae ceteris ab adolescentibus cum volup-
 ta te fiunt: abhorre a lusu, venatione, cursu, alea:
 leuia ducere haec, inania, indecora, turpia: deditum
 esse litteris, vel quibus ad humanitatem informamur,
 vel quibus ad excellentem liberalium disciplinarum co-
 gnitionem aditus aperitur: maxime vero solitum ea
 meditari, & curare diligenter, quibus aeternae vitae
 falus comparatur. diuina sunt haec munera, mi Fabi,
 non a nobis profecta, aut elaborata, nec omnibus im-
 periita. tibi contigit, ut ita sentires, & ita uelles:
 habe gratiam Deo, qui te tantis in tenebris, atque er-
 roribus praecipuo quodam lumine illustrauerit. aliis
 non idem contigit: mirari noli, neque causam quaere.
 abdita sunt, nec humanis comprehensibilia mentibus
 areana caeli. stet illud modo, nihil usquam fieri, ni-
 hil euenire aut insciente, aut nolente Deo: quaeq. il-
 le uult, & quae permittit, ea nequaquam reuocare
 ad nostrum iudicium debemus, neque, recte ne fiant,
 ansecus, interpretari. Et omnino uelim, te cum de
 diuinis rebus cogitas, minuere opinionem scientiae, de-
 mittere animum, ac mentem, unamq. putare certissi-
 mam doctrinam, pietatem in Deum, aut beneuolen-
 tiam t & studium erga illos, qui nobis a Deo commen-
 dantur. Quare non dubito quin saepe ita cogites, ut cre-

das; nec te ita puto credere, ut re ipsa non praestes; cum te omnes ita viuere confirmet, ut a tuis moribus procul absit arrogantia. verumtamen, si tibi laudo id, quod amas, & quod amandum existimas, non a te gratiam in eo? non haec tibi, licet parum necessaria, iucunda tamen commemoratio est? Sequitur illud. Ipse mihi satisfacio. nam, quae laudatio videtur, eadem, si attendis, cohortandi etiam vim habet. quo genere, pro mea in te beneuolentia, magnopere delector. Atque etiam in huiusmodi sermones ego soleo libenter ingredi; quia, si nihil aliud, ipse mihi fructum fero, dum ea tracto, quibus amore summi boni, studioq. incendor. Te autem, cum haec legis, laetari oportet vel tua causa, qui tuum intelligas iudicium nostra sententia comprobari; vel mea, quem sentire tecum videas, & iisdem gradibus parare adscensum ad ea, quae quanta sint, ex eo conicitur, quod ipsa tantum spes tranquillitatem parit animis nostris, eosq. non a malis modo, sed a malorum quoque metu vindicat. Maeste igitur ista voluntate, & isto sensu. mature vidisti, quis esset rectus ad gloriam cursus. sequere iudicium tuum; nec tamen contemnes nos, si quando hortamur: & ipse nos vicissim, ubi languemus, hortare. sic erit mutua gratia: sic amabimus, etiam magis inter nos, mutuo beneficio prouocati. Vale. Venetiis. ∞ D L I X.

IOAN.

IOANNI. BAPTISTAE

PASTORIO

Brixiam. 15

*E*GO vero te, mi Pastori, tua causa dilexi semper. habes enim, quae tibi amorem concilient, doctrinam, & humanitatem. munera, quae mittis, me tibi obstringunt magis, benevolentiam in te meam augere non possunt. quae enim a virtute profecta sit, non his tanquam adminiculis nititur, sed consistit ipsa per se, eoq. iam processit, ut ad summum peruenisse videatur. praesta te mihi obsecro, qualem adhuc cognoui, amantem mei, & in amicitia constantem. munus hoc erit omnium munerum praestantissimum. quod ego, qui sum mei erga te animi ipse mihi conscius, quasi debitum expecto. Vale. Asulae.

VINCENTIO. STELLAE

Brixiam. 16

*S*UPERIORIBVS diebus, quo magis incitabar cupiditate veniendi ad te, visendaeq. urbis, ut audio, pulcherrimae, qui essem litteris & tuis, & filii tui, idest utriusque tuis amantissime inuitatus; eo me reuocabat magis pudor meus; neque tam, quid tua permitteret humanitas, quam, quatenus mihi per modestiam meam progressi liceret, cogitabam ac saepe mecum sic. An tu ad hominem, quem numquam allocutus? quem ne vidisti qui-

F 3 dem?

dem? adde:quem uirum,quam nobilem,quam grauem,
 quam districtum magnis rebus? ego autem quis? infirmus
 natura semper, nunc etiam ualitudine impeditus, exqui-
 sita quadam ratione, & cura tuendus. Contendebam
 equidem cum animo meo: nec uici facile, sed uici tamen
 aliquando, & decreui omnino ad uos primo quoque tem-
 pore me conferre. uereor enim, dum ualitudinis commo-
 dum exspecto, & id ago, ut, quas morbus ademit, uires
 colligam, in hiemem ne incidam, idest in imbres, & fri-
 gora: quorum altero uiae corrumpuntur; alterum scis esse
 ΛΕΠΤΩ ΧΡΩΤΙ ΠΟΛΕΜΙΩΤΑΤΟΝ. nam illud, in quo tibi fortasse,
 vel domesticis tuis, incommodare mea mollities, & paul-
 lo fastidiosior in victu consuetudo potest, id non specto.
 aut enim exiguum quiddam erit, & feretur facile; aut,
 si magnum, illustrabit benignitatem tuam. Statutum igitur
 de re: nec est, cur sententiam mutem: videndum
 de ratione itineris: quam tu ad meam voluntatem,
 meumq. consilium, quae tua est humanitas, totam reiici-
 cis. ego autem nihil puto commodius, nihil aptius ad vi-
 rium infirmitatem sustentandam, quam lecticula gesta-
 ri. sed habet species illa, quod ad Fabium tuum scri-
 pseram, quiddam nimis honorificum: nec ego is sum,
 qui, quod superat fortunam meam, eo libenter utar.
 verum ignoscetur valetudini: quam satis infirmam, at-
 que imbecillam, concussus & vexatio facile frangerent.
 rheda quidem, qua mearum bene perita curationum an-
 cilla cum filiola & puero uehatur, opus est. haec si
 habebo, vel potius cum habebo; (vis enim me a tua li-
 beralitate omnia exspectare) dabo me statim in viam,
 & ea quidem spe, ut aliquem e caeli mutatione fructum
 capiam,

capiam, m
 tavi ab om

Qv
 defcat h
 ac terpi
 triduo
 incom
 pinquit
 mora,
 rio abri
 quodidi
 me dom
 idest in
 rias aut
 nere. qu
 tium tui
 hricula pe
 rigae rhe
 bente; e
 tem acc
 te, man
 dentiam
 ob hum

Ee
 uimime

capiam, maximum quidem ex tua humanitate, quam car-
tari ab omnibus audio. Vale. Asulae.

E I D E M, Brixiam. 17

QVOD veritus sum, fieri video, ut imbribus ma-
descat humus, & pulvis in lutum coacta vias impediat,
ac turpi foedet adpectu. frigoris etiam acres morsus hoc
triduo sentire coepimus. quae cum sint iter habentibus
incommoda; tum vero, maiora ut timeantur, hiemis pro-
pinqvitas facit: ut mihi vel mature, nulla interposita
mora, veniendum ad vos, vel totum consilium necessa-
rio abiiciendum intelligam. febricula omnino tentamur
quotidiana: sed, opinor, decedet, cum primum ex hoc
me domestico maerore ereptum statuam in tuis edibus,
idest in aliqua, ut spero, incunditate, atque laetitia. iniu-
rias autem caeli, lectica circummuniti, possumus contem-
nere. quamobrem, quod tuo commodo fiat, dabis nego-
tium tuis, ut Saturni die, aut, qui sequetur, proximo, ve-
hicula perducant. Lecticario mandetur, atque etiam au-
rigae rhedam moderanti, ne quid appropere, nisi me in-
bente; & omnino rationem itineris ad meam volunta-
tem accommodent. hoc tu, scio, Stella, vel me non scriben-
te, mandasses. nihil enim te praeterit, ob eximiam pru-
dentiam: nihil porro non vis amicorum tuorum caussa,
ob humanitatem prudentiae parem. Vale. Asulae.

*

18

Ego vero, comprimere te mea caussa librum tuum,
minime volo. quin, si ad me refers, ut edas quamprimum

F 4 mm

mum, suadeo: rogo etiam pro eo, quantus est amor in me-
tuus: quem non esse mediocre, tuae litterae significant.
an ego ita sim bonis artibus infensus, ut industriae tuae
impedimenta opponam, & excellentis ingenii fructus
cum bene maturi sint, condi potius, ac domesticos intra
parietes asseruari, quam in publicum afferri, & commu-
nicari cum omnibus velim? Illa de tuis hortis, & nostris
fontibus, eleganter a te, nec sine sale, prolata sunt. verum
agam tecum perliberaliter, atque hanc partem libenter
dissimulabo, tibiq. totam largiar. in reliquis etiam habe-
bo rationem amicitiae nostrae, nuper institutae, maiorem
tamen fortasse veritatis. Tua scripta, proxime edita, do-
ctrinam habent, et accurratam antiquitatis obseruatione.
itaque vigeant omnibus, & laudabuntur. quod si quid
est, quod desiderari possit: primum id leue est, deinde,
ut scis, non imminuit, sed auget naeuus in formoso cor-
pore pulchritudinem. Vale. Venetiis.

E I D E M, * 19

NOLI officium litterarum a me requirere: nun-
quam scripsisti, quin rescripserim. quod si contra,
quam res est, videtur; alieno vitio fit; a me quidem
prorsus abest culpa. De horologio quod iterum iam
scribis, vincit pudorem meum humanitas tua. iam
enim statueram oneris tibi nihil imponere, publica ex-
planandi iuris cura occupato, quotidie aliquid scriben-
ti, unde ad nos utilitas, ad te ipsum gloria permanet;
negotium amico dederam: & ille curaturum promi-
serat:

ferat: nec tamen biennio fidem soluit. quare accipio libenter, quod das. tu mihi, quod tuo commodo fiat, horologium Augustae elaboratum; ego tibi, quantam scripseris, pecuniam statim curabo. quale velim, iam antea significavi, factum eleganter, artificio non vulgari. Audieram, quae ducuntur egregia, minoris triginta scutatis emi non solere. Hoc quidem esset nimium: nec rei familiaris ratio ferret; cui consulere, quia copiosa non est, videor debere. porro genus hoc ornamentorum ita soleo cupere, ut non insaniam: cupio autem valetudinis, non libidinis causa. cum enim me satis tristem natura finxerit, accersenda extrinsecus iucunditas est, quam a me ipso petere non possum; eoq. magis, quod plurimus in cubiculo sum, affectus iam quadriennio per totam hiemem oculorum morbo, molesto tamen potius, quam acerbo. nolim igitur impensam esse supra decem scutatos, aut omnino quindecim, eamq. ita fieri, si horologium probetur oculis eruditis. itaque uide, cui negotium mandes. nam neque omnes intelligunt: & aliis alia probantur. ego formam, & artificium, non materiam, cupio emere. De tuis Instit. egi diligenter: hortatus sum, lucri maximi spe proposita. ubi ad pretium uentum est, audire se negarunt itaque tibi auctor sum, cum iis transigas, quos facile s iam habuisti, & in tuo merito satis, ut audio, liberales. Vale. Venetijs.

*

20

VOLFANGVM Uerter, cum aliquot abhinc annis Patavij adolescens daret operam Bonamico, dile-

xi

xi multis nominibus plurimum. nam, ut omitam,
 quod et in adpectu species quaedam index nobilitatis, et
 in sermone, atque in moribus probitas elucebat; incen-
 sus literarum studio colebat me, atque observabat dili-
 gentissime, sic, ut in magna frequentia amicorum nemo
 tamen mihi esset illo carior, nemo iucundior. tueor il-
 lum amorem, & quoad viam, tuebor, eique absenti
 memoriam, benevolentiamque, quam debeo, fratribus
 praesentibus officia, quae potero, accurate praestabo.
 hoc cum mea sponte facturus essem, quantum, optime
 *, mihi accessisse voluntatis existimas, quod eos tu, vir
 inter maximos summus, & in exercenda virtute sem-
 per occupatus, commendandos mihi tuis litteris puta-
 sti? nam, si quis est, qui de tuo ingenio, de doctrina, in-
 primisque de eloquentia bene & sentiat, & loquatur;
 is ego sum; planeq. meos eo sensus libenter conferam,
 ut, qui tibi cari sunt, eosdem ego quoque diligam. Qua-
 re, si vis, da mihi ornandos, atque amandos, qui ad nos
 veniunt, amicos tuos. officiis eos, si potero; sin minus,
 studio certe, & humanitate complectar. ac ne dubita-
 futurum, ut, quo tu sis apud me pondere, cum intelle-
 xerint, gratias tibi, quod eos tua commendatione sis pro-
 secutus, diligenter agant. Audio te quiddam pangere
 in Rhetoricos Aristotelis libros: quod, quate expecto,
 auguror futurum, praeclarum scilicet, ac te dignum.
 urge igitur; ut & communi utilitati, & tuae gloriae
 consulas. Vale.

EIDEM,

EIDEM, * 11

Nos hic, optime * (ordiar a re tristi, quando
 laetae non suppetunt) annum habemus pestilentem; &
 pulcherrimam ciuitatem quotidianus deformat adspe-
 ctus mortuorum. furere iam coepit morbus, & insul-
 tat in omnes palam, sine discrimine, qui antea repebat
 sensim, & latenter, nec fere quemquam, nisi obscuri
 loci, infimaeque sortis, attingebat. quare diuina sunt
 imploranda remedia: humana quam iaceant, saepe do-
 cuit euentus. Vobis recte istuc esse audio, perpetuoque
 sit opto, tum ab huiusmodi morbo, qui non modo priua-
 tas domos exhaurit, verum etiam vrbes deuastat, tum a
 cunctis discordiis, ac bellis. & intestinis, & externis.
 Te vero florere omni laude, valere auctoritate, valere
 gratia, esse unum, ad quem omnes confluant consilii au-
 xiliūq. caussa; nisi plurimum laeter, male sentiam de vir-
 tute, unde tibi ista fluxerunt; male etiam de me ipso,
 quia tuam vitae rationem probaui quidem semper, secu-
 tus autem sum, quatenus licuit: licuit enim certe mul-
 to minus quam volebam. unum si addis, vt ingenium
 tuum, quo nullum vidi praestantius, languere non si-
 nas, & oīi tui rationem constare velis, hoc est, vt ag-
 grediaris ad scribendum illa praeclara, quae te audio
 tuis familiaribus esse pollicitum, aut, si iam habes insti-
 tuta, perpolias, nobiscumq. & cum posteritate commu-
 nices: nae tu *, omnium fortunam vincis, & solidam
 plane possides felicitatem. Equidem, quod ad me atti-

net,

net, idem conor pro mea uirili parte: & haereo, quoad possum, in scribendo: sed mea ratio quam non sit eadem, quae tua, cognosce. Valetudine sum ea, quae facile in morbos incurrat, imbecilla prorsus, & incommoda: itaque saepe in cursu institutorum meorum, cum progredi maxime uellem, consistere sum coactus. Accedunt, quae temporis haud exiguam partem auferunt, salutationes multae multorum: in quibus uidetur esse honor, & est omnino quaedam species: sed ualeat ambitio: odi omnia, quae detrimentum studiis afferunt. Quid domestica? non enim tantum a me pendent ii, qui meos intra parietes uiuant, uxor, liberi, familia: sed fratres quoque suas in me uocationes habent sitas: uterque meis consiliis, alter etiam meis opibus, quantulaecumque sunt, nititur, ac sustentatur. Vides rerum mearum imaginem, ut in tabula depictam. nec tamen obrui me sino fluctibus molestiarum; sed enitor saepe, & consequor interdum, ut ex omnibus curis, atque occupationibus emergam, meq. saltem per aliquot horas in portum recipiam litterarum. quo si frui diutius liceret, in caelo essem: quia non licet, hortor te, cui otii satis est, ingenii uero, scientiae, iudicii multo plus, quam mihi, ut haec omnia studioforum ad utilitatem conferas. quod si facies; gloriosum tibi erit ex ipsa re, quem uideo praestare posse maxima; ceteris non modo re, uerum etiam exemplo fructuosum. fortasse enim te praeiunte, alii, quoquo modo poterunt, inuitati laude subsequenter. Ego meas Antiquitates, etsi, ut ille ait, spissum opus est, aliquando tamen, ut spero, pertexam. Vale. Venetiis.

GRATAS

GRATAE mihi tuae litterae, gratissimus uero qui te ad scribendum animus impulit. atque ego te antea diligebam; quod, ingressum esse minime nulgarem, in uiam litterarum, longeque per eam processisse, intelligerem: sed auxit amorem in te meum haec, a me nunc minus expectata, eoq. incundior, uoluntatis erga me tuae minime dubia significatio. soleo enim amare in hominibus humanitatem haud paullo plus mehercule, quā doctrinam. ac doleo factum esse antea, casu dicam, an uoluntate tua? ut oriatur inter nos quibusdam ex opinionibus dissensio, iis tamen de rebus, quae si dilucide pateant, quod accidere potest utroque nostrum disputante, studiosis fortasse non nihil in eo consulatur. id quod est in meis consiliis, & fuit semper antiquissimum. Nam quod mea quaedam improbas: si recte sentis, habeo gratiam: errare possum; & corrigi uolo. sin, ubi de meo sensu iudicas, tua te fallit opinio: ego tamen, quae a studio ueritatis culpa manat, libenter ad laudem conuerto. itaque, quod ad hanc partem spectat, nemo audiet me querentem: excusabo te potius, atque etiam, quoad licebit, ornabo. Quod autem, quae meis in scriptis non improbas, ea dissimulas, & in tuos commentarios, meo nomine praetermisso, quasi noua transfers: miratus sum, & requisui paulisper in eo modestiam tuam. agam enim tecum libere, sicuti natura mea postulat, & inter bonos uiros aequum est. Illa de iudiciis extraordinariis, quae te scribis edidisse, si dederis operam, ut ad

ut ad me perferantur, etsi ea discrepare significas a sententia mea, gratissima tamen erunt. & gaudeo te tam esse diligentem in meis scriptis peruolutandis, & occasionem mei admonendi, & corrigendi tam libenter quaerere. sic enim intelligam; ubi corrigendi finem feceris, nihil mirum, quae supererunt, a te omnia probari. unum peto; sit condicio par: des mihi, ut idem liceat per te, quod licere tibi per me volo. si quid ego de tuis itidem non probaui, noli grauius commoueri. iudicemus pariter, ego de te, tu de me utram in partem libet: amemus tamen inter nos, ut boni viri solent; et, si quid fortasse de iudicio, nihil tamen de beneuolentia, detrahatur. Libros quos petis, habeo nullos, Cicerone excepto. nec eius generis, nunc quidem, tibi quidquam polliceor. quae uero ipse composuerim, paucis mensibus habebis, si ualebo, commentarium in epistolas ad Quintum fratrem, & librum de legibus Romanis: qui est antiquitatum mearum sextus. De Sextiana oratione, si scriptam contuleris cum impressa, quaeq. loca varia sunt, miseris; amabo te: idque ut facias, rogo. Vale. Venetiis.

HIERONIMO . FVRNARINO

Rauennam.

23

UIDES me tibi satisfacere, & quod olim petieras, id nunc, tuae memorem voluntatis, re praestare? non enim, ut solebam, plebeio sermone tecum ago; sed eo, quem in quadam epistola patricium appellasti, qui quā tibi sit in deliciis, quantumq. in eo studiū posueris, & industriae,

austeritatis, facile ex ea ipsa epistola potui conicere. verum,
 quod ad me attinet, non ego meas litteras eius esse gene-
 ris intelligo, ut ab homine patricio scriptae videantur es-
 se. quid enim habent, ut ita dicam, nobilitatis, quid splen-
 doris aut in sententiis, aut in verbis? conor equidem; &
 huius me cupiditas laudis multos iam annos incitat: sed
 moratur rei difficultas, occupatio domestica, valetudi-
 nis infirmitas: scribo tamen assidue, quantum licet, &
 quoquo modo licet. animos videlicet mihi facit, quod in-
 ter nos dictum sit, multorum inscitia: cum quibus inter-
 dum me confero non sine voluptate; sicuti contra, cum in-
 antiquitatem ipsam intueor, contemno me, planeque ipse
 mihi displiceo. vera enim illa fuit, suisque absoluta nume-
 ris eloquentia: nostra infantia est, mi Furnarie; nos balbi,
 nos elingues paene sumus in Latina lingua. Sed quid
 ago? dum tecum suavissime loquor, nulla certa re propo-
 sita; paginam, verbis undique sua sponte confluentibus,
 impleui. erit igitur, quod initio scribere statueram, idem
 clausula mearum litterarum. Mitto ad te munuscu-
 lum tenue, amoris tamen significationem in te mei, com-
 mentarios, a me nuper editos, in epistolas ad Brutum,
 & Quintum fratrem: quos cupio, diligenter legas. id si
 assequor a te, & a tui similibus; honestabor, & gratia
 meis laboribus optima referetur. Vale. Venetiis.

 LAEVINO. TORRENTIO

Leodium.

24

MIRABAR, cum in tuis verbis tanta sit huma-
 nitas, quae tuo mehercule etiam elucet in vultu, cur de-
 beri

beri mihi tam diu paterere tuas litteras, quas, ubi Leodidum peruenisses, missurum statim pollicitus eras. hanc admirationem, in qua molestiae quiddam inerat, sustulit prorsus epistola tua, scripta sane elegantissime; in qua causam tui silentii confers in peregrinationem, & negotia. quod si iam in otio consedisti, exerce ingenium tuum praecclaris in studiis, non ut amicus tuus, qui nihil unquam parit, cum tamen parturiat semper, sed ut edas aliquid, quo tuum nomen, aeterna cum laude coniunctum, ab hominum oblivione, omniq. prorsus interitu vindices. Leodiensem Episcopum, de quo multi multa narrant, omnia praecclara, summoq. digna principe, si quid habeo artis, aut facultatis, ornabo laudibus: sin, quod suscipiam, praestare non licebit; amabit ille tamen, ut opinor, voluntatem. tu me interim de meliore, ut ille inquit, nota commendabis; eiusq. in me beneuolentiam, si qua est, ea, qua apud illum vales, gratia fouebis. Vale, nosque saepe litteris, si otium est, saluta. Venetiis.

SEBASTIANO. LEONI

CORDVBENSI

Romam.

25

SOLES in nostris sermonibus, humanissime Leo, quod mihi maximum est argumentum amoris tui, monere me, atque etiam rogare, ut pro tenuitate valetudinis meae litteris utar moderatius, & in studio virtutis, quod difficillimum est, temperantiam adhibeam: amabiliter tu quidem, & officiose admodum: sed, hoc mihi persuadere si vis,

si vis, prius illud persuadeas oportet, non magnopere
 esse de gloria laborandum: inanes esse nostras cogitatio-
 nes, stulta consilia, quae ad eam dirigantur. ad quam
 causam non tu quidem umquam tantam afferes elo-
 quentiam, ut in re tam praestanti mihi quidem probes
 modum esse seruandum. quamquam, quod ad rem atti-
 net, tu quoque mecum sentis, vel potius ego tecum. in
 litteris affirmas esse viuendum, & optandum in primis
 scientiae cognitionem, sed cum eo tamen, ut salutis ra-
 tio habeatur. obsecro te, mi Leo, quid tu existimas
 de iis, qui diuitias immoderate appetunt? num errare
 videntur? certe. at ipsi aliter putant; itaque per-
 sequuntur institutum. quid de iis, qui honores sitiunt?
 non dubito, quin hos quoque sentias peccare. &
 peccant sane: timida est enim ambitio, ideoque misera:
 neque tamen pauci sunt, quos inficit haec labes. ego &
 cum his intelligo me errare, & praeterea cum multis:
 sed diuersa ratio est. illi eas res plus aequo appetunt,
 quas consecuti, meliores numquam, deteriores etiam
 plerumque efficiuntur: ego in earum artium indagatio-
 ne sum nimius; (sic enim ipse existimas) quarum
 cognitio euellit ex animis vitia, inserit virtutes. itaque
 vides errorem aliorum cum turpitudine esse coniun-
 ctum, meum non modo non turpem, verum etiam lau-
 dabilem. At morbis saepe tentamur. Primum,
 hoc quidem non est praeter naturam: ars enim praesta-
 re non potest, ut recte semper valeamus: nam, si pos-
 set, ii, qui scientiam medicinae tenent, ipsi numquam
 aegrotarent. deinde, est praeclarum in maximis laborare:
 & quacumque re virtutem emas, paruo emas. non pos-

G se

se autem nos ad ea, quae summa sunt, sine sudore peruenire, indicat illud, quod poetae ne Herculi quidem, Ioue nato, nisi maximis exantlatis laboribus, caelum dederunt. Te ipsum rogo, qui me mones; quem ego studia doctrinae video numquam intermittere: ullam ne voluptatem ea cum voluptate putas esse comparandam, qua legentes, aut scribentes afficimur? potest esse tanta suauitas, qua non maior ea sit, quae perfundit animos nostros, earum rerum intelligentia fruente, quae sunt ad bene beateque viuendum necessariae? Quod si quis doctrinam contemnit: haud scio, quid iste curet. negligit animum; quo nihil potest esse praestantius: se ipse ignorat; quo nihil turpius: corpori seruit, ignaviae deditus; quod est illi commune cum belluis; quibus id praecipuum, ut alantur, ventrique indulgeant, a natura tributum. itaque sequar meum institutum; neque te, mi Leo, neque alios audiam, studiosissime monentes: quorum equidem amo voluntatem, iudicium tamen cogor paullulum requirere, & ut ipse quoque erga vos amici partes, vestro exemplo, suscipiam; sinite meam vocem in aures vestras influere, quae vobis artium studia optimarum assidue cantat; quae vestra vobis bona commemorat, eaq. ut agnoscat, & quantum licet, exerceatis, hortatur. cui si parebitis; fructum capietis eum, quem ipsi mihi, cum meam reprehenditis in colenda virtute constantiam studetis eripere. Vale.

Ex aedibus nostris.

MARCO

MARCO. ANTONIO

LOMBARDINO

Patauium.

26

SCIS, optime Lombardine, benignitatem a philo-
sophis, magis etiam a Christianis hominibus laudari: re-
cte id quidem: nihil enim est, quod hominem aequè cum
Deo coniungat: sed illa cautio requiritur, ut adsit cum
voluntate prudentia. thesauros plerumque videas in ali-
quem conferri ab iis, qui dominantur. quare causam:
laudabilem nullam reperies. quis igitur beneficium il-
lud praedicabit, in quo neque meritum accipientis, ne-
que iudicium dantis agnoscitur? Equidem pro magnis
opibus existimo hesternam illam animi tui significatio-
nem. quod enim ad me munus misisti, tum est ipsum
per se gratum, quia pertinet ad ea commoda, sine quibus
imbecilli valetudine qui sunt, aegre sustentantur: tum ve-
ro multo gratius, quia iudicii tui laude commendatur.
nisi enim tibi mae vitae ratio, nisi ea, in quibus assi-
due versor, studia probarentur; me tu certe, qui pro-
bitatem colis, qui doctrina ingenioque excellis, benefi-
cio non afficeres. quando igitur ex ista tua in me libera-
li voluntate, quid de meis moribus, quid de litteris sen-
tias, facile possum conicere, contemno Principum di-
uitias; beatus esse possum in tua benevolentia; unde ho-
nor, & decus, unde praeclara virtutis argumenta, un-
de etiam commoda manabunt. quare conserua mihi, si
vis me felicem esse, tuum amorem: quem certe intelligas
mihi deberi, si tibi, mea quae sint erga te studia, liceat
intueri.

G 2

intueri.

intueri. Illa vero, quae a tua benignitate proficiuntur, persuade tibi, hoc potissimum nomine, quia sum amoris argumenta, mihi esse carissima; neque ego te unquam ex beneficio, sed beneficium semper ex te ipso pendam. Librum de Magistratibus, quem petieras, habeo equidem absolutum, nondum tamen edendum: itaque comprimetur, usque dum accurate perpoliam. prooemium degustabis: quod ad te cum hac nocturna epistola statui mittere. Vale. Ex aedibus nostris, ante lucem.

PROOEMIUM. LIBRI
de Magistratibus Romanis.

QVOD in priuata domo paterfamilias, idem in ciuitate praestat lex. ille praecipit filiis, quid agant, & qua ratione agant: haec iura ciuibus mandat, & ad pietatem, ad rectum spe praemiorum inuitat; a delicto, proposita poena, deterret. quemadmodum autem rei priuatae non hoc uno consulitur, si sit qui imperet; verum illud praeterea requiritur, ut imperanti domestici omnes pareant: sic in ciuitate, nisi legem aliquis tueatur, & ut ei ciues, quasi parenti optimo filii, audientes sint, potestate imperioque perficiat; non est in ipsa lege praesidii satis; optimeque ac laudabiliter viuendi praescripta norma negligitur. quo fit, ut tam legi necessarius videatur esse magistratus, quam lex ipsa ciuitati. Ac mihi, hoc de genere consideranti, longe videtur optabilius esse, ut iniquae legi praesit optimus magistratus, quam ut improbus aequissimae. nam, si summam potestatem cum

optima



optima mente coniungas: vir bonus in iure dicendo, prae-
 ter aequabilitatem, & iustitiam, nihil spectabit: si quid
 erit in lege vitiosum, pro sua sapientia corriget: si quid
 ambiguum, in eam partem interpretabitur, quae ad
 pietatem, ad communem civium utilitatem, ad reip.
 salutem propensior esse videatur: sin autem, qui non
 optime sunt a mente constituti, iis potestatem addas,
 & voluntatem viribus confirmes: legis vocem magi-
 stratus non exaudiet, quid maiores voluerint, sanxe-
 rint, servarint, non attendet; ad suum arbitrium,
 suamque libidinem omnia reuocabit. quod cum faciet;
 reip. quae tota a iure, & aequitate pendet, non solum
 facto, sed multo etiam magis exemplo nocebit. nam,
 quia praeeruntem sequi non difficile est: propterea, qui
 imitentur, quam qui inueniant, plures non modo in
 rep. administranda, verum etiam in omni arte repe-
 rias. male C. Caesar; qui, libertate vi & armis op-
 pressa, ea, quae omnium erant, possedit vnus: sed lon-
 ge improbior, ac nequior L. Sulla; qui, ut auderet spe-
 rare Caesar ea, quae consecutus est, exemplo suo per-
 fecit. quod si, qui legibus praesuerunt, tales fuissent,
 quales eos, qui leges ipsas condiderant, fuisse legimus:
 steterisset in suo gradu resp. quaeque artes in ciuitate li-
 bertatem auxerant, eadem facile conseruassent. ve-
 rum, in hominibus, non in legibus, vitium fuit. primi
 omnium duo fratres e Sempronia familia, Tiberius &
 Caius Gracchi, malo publico eloquentes, & ingenio-
 si, serere inter ciues discordias coeperunt, infimaeq. ple-
 bis animos nouorum commodorum in spem turbulen-
 tis concionibus excitare. qui etsi decreto senatus iusta

ui oppressi, debitas eorum audaciae poenas exsoluerunt: tamen exitiosae consuetudinis initium attulit ille dies, qui civili sanguine gladios primus infecit. quod enim non modo iustum, sed nec usitatum antea fuerat, id postea ne nouum videretur, effectum est. itaque, cum aliquot post annis P. Sulpicius primum, ut visus est, non pessime animatus; deinde, siue ambitione inductus, siue iracundia concitatus, ab optima causa descisisset; eademque fere, quae duo Gracchi, in tribu natu pl. aut certe non dissimilia moliretur: facile ad vim & ad caedes prolapsa res est: neque prius arma quieverunt, quam, ciuium magna parte trucidata, aut erecta, vnius libido antiquis legibus par, atque etiam superior esse coepit. quod neque tunc, neque postea contigisset, si, quam sapientes in scribendis legibus maiores fuerant, tam in creandis magistratibus cauti posteri fuissent. nam, etsi non recte geritur publica res, nisi praestantibus viris, acrique ac magno animo praeditis committatur: tamen periculosa in primis haec est, & lubrica sane deliberatio: propterea quod non languentibus in animis, sed in erectis mentibus, ac maximis ingeniis dominandi cupiditas exoritur. honorum spe, fa-teor, ad labores, ad industriam, ad subeunda etiam pericula homines excitantur: sed in libera ciuitate est, quatenus cuique credatur; & in danda potestate, si modus retinebitur, modus item ingerenda seruabitur. legitimis enim potestatibus, & moderatis imperiis alitur libertas: neque facile quisquam vult, quod se posse desperat: & qui tantum potest, quantum si consequatur, ceteri nihil possent, hic si malus est, potestate fit

fu deterior; sin ita moribus exploratis, ut antea nihil
 neque fecerit indignum bono viro, neque voluerit, in-
 terdum tamen, ut humana mutantur, a rectis cogitatio-
 nibus ad iniquas libidines traduciuntur; & peccat eo ip-
 so, quia peccare permittitur, ut possit. Quocirca pa-
 triam meam singulari sapientia institutam, ac diuino
 quodam consilio temperatam licet existimare in: qua ne
 que magistratus iidem continuantur, quod est seruandae
 ac diutissime retinendae reip. vinculum firmissi-
 mum; neque cuiquam tantum uni committitur, ut ex-
 traordinario iure elatus libertati, communique otio mo-
 liri periculum possit. qua moderatione factum est, ut
 post annos ∞ CXXIV. (tot enim ab urbe condita
 numerantur) non modo resp. sit, verum etiam ita sit,
 ut omnibus rebus publicis, quae nunc sunt, magnitudi-
 ne opum; iis autem, quae fuerunt, imperii diuturnitate
 antecellat. quae quibus institutis ac magistratibus
 usa, ab humili, tenuique principio ad tantam dignita-
 tem, atque amplitudinem peruenierit; n. que est hic nar-
 randi locus, & hoc argumentum viri sapientissimi ita
 non modo copiose, verum etiam perite ornateque tracta-
 runt, ut, si quid velis adiungere, idem sit, ac si in
 Apellis aliqua perfectissima imagine, puta in Venere
 illa Coa, labores. Nobis Romana ciuitas proposita
 est. quae quam multas habuerit partes ad imitandum
 praeclaras, ex eo patet, quod ita bello ac pace uiguit,
 ut illius uim & potentiam omnes reges populiue exti-
 mescerent, aequitatem & abstinentiam subiectae ur-
 bes nationesque diligerent. Formam senatus, quod in
 ea publicum consilium fuit, ordinem comitiorum, iura le-

gum tribus libris exposuimus. Nunc de magistratibus eorumq. potestate disputabimus; tum, quia locus ipse admonet, (hoc enim legibus adiunctum, & tamquam adnexum videtur) tum etiam, quia Ciceronem, cui video in iis libris, quos de Legibus conscripsit, hunc ipsum ordinem placuisse, libenter imitamur.

CAESARI. FERRANTIO

Patauium.

27

E G O vero istum erga me animum, istam. quae significatur in epistola tua, beneuolentiam amplector libentissime, & amo prorsus amore singulari. nam, ut omittam, quod ita postulat humanitas: tui te praeterea mores, tua modestia, & maior iam aetate virtus egregie commendat. quae cum ipsa me mouent: tum vero in affinem tuum, Episcopum Sueffanum, studium eiusmodi meum est, multis abhinc annis ex incredibili eius humanitate, doctrinaq. susceptum, ut eos etiam, qui modo aliqua illum necessitudine attingunt, quosq. ille caros habet, complectatur. quo tu in numero ut esses, affinitate primum, idest naturae quodam quasi munere, tibi contingerat: postea vero cum natura voluntatem, & cum voluntate studia coniunxisti, excolendis artibus iis, unde fluxit honor, ac dignitas affinis tui, unde eadem ad te manabunt, si te illi, immo vero si te ipse tibi quamsimillimum praebueris. quis enim tantos processus tam adolescens in philosophia fecit, quantos illa tua in aula perillustri Cardinalis Estensis celeberrima disputatio, multis
prae-

praesentibus, ostendit? Qua tamen de laude ita te sentire volo, ut maximam esse putes, si cum aetate tua conferatur; sin res ipsa spectetur, longe statuas maiorem esse posse; quodq. viae confeceris, id quidem esse multum, nec tamen tantum, quantum adhuc spatii supersit. sed mihi crede, omnis in eo tuorum studiorum sita perfectio est, si, quemadmodum nunc id cogitas, & id, opinor, agis unum, ut intelligas, humanae res quantum aliis aliae praestent, ita, quantum infra diuinas humanae prorsus cuncte sint, aliquando simul cogitabis. nae tu, Caesar, si te ad hanc, quam ignorari a plerisque video, praecclamam disciplinam contuleris, magistros habebis haud paullo meliores, quam quibus nunc vteris, aut etiam per omnem vitam vti potes. exstat sanctissimorum virorum multis libris expressa doctrina, qua instrumur, & erudimur ad aeternae vitae salutem. habes praeterea domesticum exemplum affinis tui; summi viri: cuius in vitam si inspexeris; excitaberis ad omnem laudem; coles autem praecipue veritatem; quam ille tuetur acerrime, habuitq. semper antiquissimam. neque uero impedio, quo minus, ut coepisti, Marco Antonio Genuae, & si cui praeterea uelis, operam des: eloquentiam quoque si adiunxeris, ut res graues & obscuras ornate ac splendide tractare possis, minime improbabo: sed illa praestantiora sunt, quo te hortor, ut aliquam omnino transferas industriae tuae partem. De libris ad te missis, habeo gratiam humanissimo, & in primis erudito iuueni, Sebastiano Leoni, utriusque nostrum aequae familiari: qui mihi hanc in-
 stituendae tecum amicitiae occasionem obtulit; quam
 amide

auide arripui. iam enim incenderat me studio tui, cum de ingenio, de studiis, denique de tua ad optimas res pro-
pensa voluntate multa praedicasset. quod si quid accide-
rit, in quo tibi opera mea vsui possit esse: id si ipse intelli-
gere potuero, mea sponte suscipiam: sin secus, a te admo-
nitus, efficiam, ut esse tuam apud me plurimi voluntatem
intelligas. Vale. Venetis.

VIDO. LOLGIO

Placentiam.

28

PAVLLO ante dederam ad te litteras; quas, con-
iectura dierum, putabam tibi iam esse redditas: hae nunc
alterae consequentur. Scripsi, te absente me cessare in lit-
teris, & omnino tuam operam, tuamq. illam in meis
rebus officiosissimam sedulitatem vehementer requirere;
sed meum consilium esse, te istuc ne prius commoueres,
quam ego alicubi confedissem. id ego volebam scilicet in-
uitus; qui te socium & administrum meorum studiorum
summe desidero: sed volebam tamen tui commodi caus-
sa primum, quod hanc equitandi iactationem, quae me
quidem delectat, tibi, cui cupido, suspicabar non place-
re: deinde, quod, si accidisset, ut istas regiones peteremus,
quod post balnea facturi videbamur; intelligebam fore,
ut adire commodius ad me posses intervallo minore.
nunc audi, cur sententiam mutauerim. Cardinali no-
stro, cui nimium saepe calculus molestus est, multis
iam remediis frustra tentatis, accedere nunc ad aquas Lu-
censes ualeitudinis causa deliberatum est; nosque, ut scis,
idem

idem cogitamus. iis aquis qui vii volunt, id maxime spe-
 Etant, ut sicco tempore utantur. haec est quasi methodus
 quaedam, quam seruantibus salubres dicuntur esse: permi-
 stae cum imbribus putrescunt, graui periculo bibentium
 nos porro, o Lolgi, qui didicimus a philosophis, bonam va-
 letudinem expetere, sapientis esse; valde in hac quidem
 parte sapimus, & ut optime ualeamus, accurate, quae-
 cumque uires tuentur, aut augent, persequimur; quae
 posse uidentur infirmare, ac minuire, declinamus. itaque
 ad balneorum medicinam prius non accedemus, quam id
 & tuto, & salutariter fieri posse intelligamus. nunc qui-
 dem alienum tempus est. uides, quae pluuiæ, quam pae-
 ne hiemales dies. haec dum ita se habent, nos opportuni-
 tatem exspectantes, in his opidis, & uillulis iucunde si-
 tis oberrabimus. quod quoniam quam diuturnum sit fu-
 turum, diuinare difficile est; & ego, dum te careo, mul-
 tis commoditatibus una careo; tuque, ut ternis iam lit-
 teris significare uideris, non abes a me sine molestia: mea
 causa rogo, tua hortor, ut quamquam nondum consedi-
 mus, mature tamen, nisi quid grauius impedit, reuertas.
 & ut scias, quo me loco conuenire possis, Pisis ad idus
 Iunias, & ultra, ut opinor, aliquanto, sed ad idus Iu-
 nias certe commorabimur. Vale. Pisis.

HANNIBALI. CARO

Rauennam.

29

FOROLIVIENSIBVS male sit, qui te lon-
 gius a me abstrahunt. sed istorum motus praefecti pru-
 dentia

dentia sedabit, tuque, ut scribis Rauennam breui recur-
res. ibi velim ne quid caussae sit, quo minus ad me quam-
primum. ego volebam ad te; sed impediunt multa, ma-
xime Ciceronis editio; cuius tempus aduentat, vel potius
iam adest. itaq. occupationem ouere valde premor. sed
mihi nulla res esse potest tanti, ut ab hoc scribendi offi-
cio diuellar. Nunc est, quod a te velim. Qui tibi has lit-
teras attulit, est & mihi, & fratribus meis valde fa-
miliaris. eius opera multis in rebus vsi sumus egregie fi-
deli. cum Rauennam venturus esset, quiddam ut exige-
ret, quod ibi habet in nominibus; petiit a me, ut se tibi
commendarem. dixi, cum causam optimam haberet,
commendatione eum non egere; tamen me esse factu-
rum. Si quid me amas, Care, vel potius, quantum me
amas, tantum hunc hominem adiuua. his temporibus,
cum fides ubique sit angustior; vereor, qui debent, ne
non facile dissoluant. si res in iudicium venerit, noli
pati, virum bonum, amicum meum, exhauriri longi tem-
poris impensa: beneficium non conferes in ingratum. me
morem enim cognoui. sed tu eum ne spectes: me vide,
qui a te peto. mihi enim gratius facere nihil potes. nam,
etsi, quod ad nos attinet, ipsi quidem inter nos magis,
quam amamus, amare non possumus: tamen valde la-
boro, in quo me ambitio quaedam mouet, ut homines no-
stram coniunctionem, tuamq. in me beneuolentiam per-
spiciant: quantum alteram vitae aequalem fore, alteram
eiusmodi iam esse confido, ut nihil addi posse videatur.
Vale. Venetiis.

EIDEM.

EIDEM, Rauennam. 30

VIRVM te duco, qui compedes illos frangere,
& aliquando te in libertatem vindicare potueris. id quod
ego, qui nervos ingenii tui bene cognitos haberem, pror-
sus ita fore sperabam. ut autem etiam cum Guidiccione,
idest cum homine doctissimo, & ad tuam naturam ap-
tissimo, tibi uiuere liceret; hoc uero ne optare quidem
umquam sum ausus. quod quando accidit; beneuolen-
tiae in te meae est, gratulari, quod euenerit; pruden-
tiae autem tuae, non committere, ut frustra euenisse ui-
deatur. Herum habes, Cave: herum autem, dico & cuius
ea suauitas est, is in te amor, ut potius aequalis, potius
germani fratris loco tibi sit: sed quoquo nomine appelle-
tur, eum certe habes, qualem uis. Quare, quod mihi,
aliorum arbitratu cum uiuebas, promittere solitus eras:
id ego nunc, quando tui iuris es, non a te petam, sed
exigam, ut operas Musis, iamdiu a te, non sane tua
culpa, tamen praetermissas. eo quicum es, permitten-
te, atque etiam cohortante, reddas. sed ita procul du-
bio te esse facturum, vel potius iam facere existimo.
itaque hoc ne monendus quidem es; illud autem etiam
rogandus, ut ad nos quamprimum uenias; ut possim ur-
banitatis tuae sales ex intervallo regustare. pedibus, pu-
to fore commodius: nam mari prae frigore obturpueris.
o dulcem congressum; in quem ego, uix credas, quam
multa reseruem, quae, litteris commissa, eandem suauitatem non habent. Vale.

EIDEM

FESTI VVM Molsae nostri poema libenter legi,
 explanationem vero tuam libentissime : & sum admi-
 raturus acumen ingenii tui summo iudicio coniunctum :
 quorum alterutrum non ita multis contingit, utrumque
 vero paucissimis. Quod scire vis, quid alii sentiant: idem
 quod ego, nihil esse in illo genere perfectius. quo magis te
 hortor, ut hanc facultatem ad grauiora studia transferas,
 & aliquando te, ab istis occupationibus vindicatum, in
 litteras totum abdas. quod si mature feceris; cerno iam
 animo, quanta tibi hoc consilium laudi, quanta nobis,
 qui te amamus, laetitiae sit futurum. memini, quid tu
 mihi te facturum esse dixeris: neque te arbitror obli-
 tum, quid ego tibi in eam sententiam responderim. Mi
 Care, induc animum, nullos praestantiores esse fructus,
 quam qui e virtute colliguntur. &, cum hoc feceris,
 quod & facis, & fecisti semper, tum illud tecum exi-
 stimato, ac pro certo habeto, incredibilem esse expecta-
 tionem, quam de te apud homines concitasti: quam si su-
 stinere, ac tueri vis, contende, dum integrum est, omni
 studio, ut ex hoc vitae genere, in quod olim te non tuum
 iudicium, sed vis quaedam temporum, tamquam in ali-
 quod pistrinum, detrusit, quamprimum te cripias. quod
 quia tibi deliberatum esse, mihi saepe ostendisti; non ero
 longior in te cohortando: tantum haec attigi amore im-
 pulsus; ut intelligeres, in summis meis occupationibus
 me tamen de tua laude cogitare. De ArdinghELLO nescio
 quid atrocius est allatum: quod ego sanequam pro eo ac
 debui

EPIST. LIB. III
debul moleſte tuli. hominem enim eruditum, & cum ti-
bi amiſſimum, tum a nobis, ut viſus eſt, non alienum
cognoui. velim, tu id ad me planius, quid fuerit, &
vnde fuerit, perſcribas. Vale.

EIDEM, Rauennam. 32

LITTERIS tuis, quas tu idibus Quinct. dede-
ras, ego nonis accepi, reſcripſeram, quo modo mihi tunc
occupatiſſimo licuit: poſtea, cum eas per otium in ma-
nus ſumpſiſſem, accuratiuſq. perlegerem; ſenſi me quaſi
dam partes, quibus nunc ex intervallo reſpondeo, impru-
dentem omiſſiſſe. quod etiam ſi ita non fuiſſet; ego tamen
aliquam ſcribendi ſententiam alicunde arripuiſſem: non
ſolum, ut quaſi tecum loquerer; quo nihil facio liben-
tius; ſed etiam, ut tuas elicerem, quarum ſermo & pu-
rus in primis eſt, atque ornatus, & humanitatis, ac be-
neuolentiae notis maxime inſignis. vel quas menſe pro-
ximo dediſti, quam amabiles, quanti conſilii, quam mul-
ti officii? quod munus, quae partes in iis a te ſunt homi-
nis amantiſſimi, prudentiſſimi, diligentiſſimi praeter-
miſſae? quam accurate, quam diſtincte, quam perite
tuam de meis typis ſententiam explicavi? quibus qui-
dem typis, ſpero fore, ut emendatiſſimis utar, quando
ad te & ad Thomam noſtrum miſſi ſunt: quorum alte-
rum in labore patientiſſimum, alterum in iudicio elegan-
tiſſimum cognoui. Quod autem ita ſcribis, homines hoc
animo eſſe, ut nihil a me niſi perfectum, abſolutumq. ex-
ſpectent: facis tu quidem officioſe, & peramanter, qui
ad me excitandum aliorum quoque opiniones, & iudi-
cia

cia colligas: sed hoc ipsum genus, quod perpoliri a me vis, ut perficiatur, in te est. Quare, quoniam ita casus tulit, ut unus fere hoc tempore tantum mea causa posses, quantum ego tua semper volui: etsi mei commodi, atque etiam honoris ratio postulare videtur, ut in te rogando pluribus verbis utar: tamen id non faciam, ne maiorem desiderii mei, quam humanitatis tuae, rationem videar habuisse. De artifice autem confirmando, quoniam in hoc vides esse omnia, & me longinquum nihil posse intelligis, omnem curam tu suscipias oportet: qui ut idem nobis sit, qui antea fuit, facile cum prudentia, tum commoditas illa tua praestabit. quamquam non dubito, quin ipse per se, vel sine ullo artificio tuo, ad id, quod reliquum est, persequendum ita, ut volumus, animatus sit. profecto enim constantiae rationem sibi habendum ducet: sed tamen, quoniam gloriae magis studio, quam emolumentum cupiditate, incensus, ad opus est aggressus; subiicies tu quoque identidem in sermone quasi igniculos, ut vehementius inflammetur. Ficus tuas quod ais te in apertum referre velle, ut aliquando venales circumferantur, quae quotidie ab omnibus, te insciente, degustantur: ego vero, ut id facias, magnopere suadeo. Quod autem meorum typorum expectationem nimis longam esse dicis; mihi quoque ita videtur; idque cum mea causa, tum tua non mediocriter doleo. Figurarum opus, quod te hortante sum exorsus, textitur illud quidem diligenter: sed vereor ne plus oneris susceperimus, quam quantum nostra imbecillitas sustinere possit. quod si ita erit; accurre, ut, parte aliqua nobis detracta, & in te translata, releuemur,

releuemur. Sed, amabo, quid sibi uult, quod in tuarum litterarum clausula posuisti? te, si quae essent inter nos ad significandum notae, quiddam occultius fuisse scripturum. equidem, etsi, quale sit, uideor mihi iam intelligere; tu tamen ut apertius declares, ualde uelim. De mandatis meis, ea, quod tuo commodo fieri possit, si exhauries; per mihi gratum, perq. iucundum fuerit; sed illud primo quoque tempore, de quo se Martellus tuus curaturum recepit: qui si fletit promissis, reliqua ego a te exigo: sin autem, quod pollicitus fuerat, nondum exsoluit; eum tu litteris appella. nam de ceteris non ita ualde urgeo: ages cum licebit, uel dicam etiam, cum licebit. in hoc autem nisi mihi quamprimum satisfacis; praedico tibi flagitatorem habebis acrem, & molestum: Vale, & amicis communibus salutem a me plurimam. Venetiis.

OCTAVIANO. MAGIO

Romam.

33

PROFECTO nihil tam accidit contra uoluntatem, quod aliqua demum iucunditas non temperet. sic sunt humana. angebar animi, (quid enim dissimulem?) tuis factum occupationibus, ne te complecterer discedentem: nunc idem gaudeo, euenisse quod nalebam: quando tu, arrepta inde tui purgandi occasione, litteras ad me misisti, officio primum refertas, & humanitate singulari, deinde Latine loquentes egregie, sic, ut eius urbis, in quam te cum Aloysio Mocenico,

H

prae-

praestanti viro, Venetae Reip. legato contulisti, ueterem
 eloquentiam redolere uideantur. Quare cum animo sum
 laetatus erga me tuo; fuitq. uoluntatis ad me amandum
 propensae graiissima significatio: tum uero ex ista, quam
 adolescens admodum consecutus es, Latinae linguae
 facultate, istoque, quo te uideo florere, ingenio, tan-
 tum accessit ad laetitiam, quantum ne conabor quidem
 uerbis explicare, sensu ipso uix, atque mente compre-
 hendo. Atque equidem tibi eo etiam gratulabor ma-
 gis, si tua bona noueris, idest, si &, quae habes iam,
 studio tueberis, & quae ostenduntur, ac deferuntur a for-
 tuna, magni facies; quantumq. in te erit, numquam di-
 mittes: non enim, mihi credas, tanti esse tibi Roma de-
 bet, quia Roma est, quae praestantes olim viros tulit,
 imperii terminos cum Oceano coniunxit; quanti ob
 unius hominis consuetudinem, cuius est humanitas do-
 ctrinae par, doctrina uero, quae potest esse maxima. is
 est Octavius meus; qui urbem, a qua ceteri honestan-
 tur, sua ipse uirtute nobilitat. Hunc tu virum nactus,
 cole, si sapis; & pete tuam gloriam ex illius consiliis;
 utere, quantum licet; &, ut liceat plurimum, exopta.
 ipse te, si vacabit, numquam a suo congressu, num-
 quam a sermone excludet. commendaticijs ad eum lit-
 teris minime opus est; nec fert hominis humanitas:
 & tu illi, quod epistola tua significat, satis iam no-
 tus, fortasse etiam familiaris. Quod reliquum est,
 non te fugit illud, Magistratus virum indicat. iti-
 dem haec legatio, qui sis, qui futurus aliquando,
 patefaciet. quamobrem incumbe ad laudem: ample-
 dere uirtutem: illa reuice, quae bonis artibus, ac
 mori-

EP. L. I. I. PAVL. MAN. IIS
 moribus aduersantur : quae te saepe in ista aetate,
 tuorum commodorum , tuaeq. tamquam hostes glo-
 riae , circumuenient , nec facile , nisi prudentiam
 summam adhibueris , depellentur . Vale , & salu-
 tem dic meo nomine exquisitae eloquentiae viro , Iu-
 lio Pogiano , cuius tibi amicitiam , & consuetudinem
 valde gratulor. Venetiis.

EPISTOLARVM

PAVLLI. MANVTII

LIBER. TERTIVS

HIPPOLYTO. ESTENSI

CARDINALI

Ferrariam.

I



ALDE me leuauit, in hac mea satis gra-
 uiter affecta valetudine, oratoris vestri,
 Hieronymi Faleti, viri praestantis, ora-
 tio: qui cum sermonem mihi, Ferrariae
 tecum habitum, exposuisset, multaque, ut solet, de in-
 genio tuo singulari, de summa grauitate, ac sapien-
 tia, nonnulla etiam de tua nequaquam a me, ut audie-
 ram, aliena voluntate narrasset; cepi laetitiam, quan-
 tam aliquis ex inasperata, exoptataque capere maximam
 possit; measque statim esse partes duxi, ut ad te scribe-
 rem, aegeremque gratias, quod in eo loco, unde me de-
 pellere fortuna conaretur, tua me retineret humanitas,
 quo sane mihi nihil optatius, nihil hoc tempore, cum
 infirmus langueo, ad animum meum sustentandum op-
 portunius potuit accidere. atque equidem ita statuo,
 actum esse mecum misere prorsus, atque infelicititer,
 quod meam ad te veniendi cupiditatem incredibilem pe-
 stilentia primum, deinde morbus impedierit; & in eo
 magnum studia mea, measque res aduise damnum: qui-
 bus a te, pro tuo instituto, veterique consuetudine, con-
 sultum

sultum iri optime, pro certo existimabam. quod quando
 ita accidit; & quando me a tuo conuictu non mea vo-
 luntas, non iudicium, aut vlla mentis inconstantia, sed
 corporis imbecillitas, atque haec anniuersarii, ac pae-
 ne iam perpetui morbi vis importuna seiungit; peto a
 te, Princeps humanissime, id saltem, quod in tua, non
 in fortunae manu situm est, tribuas, & largiare, ut
 beneuolentia mihi tua, & quae fuit antea, & quae,
 si ad te inuissem, futura erat, eadem conseruetur. hoc
 si assequor; beatus hac una re sum; cetera paruiendo.
 ea porro mihi ut conseruetur, ita postulo, si me, qualis
 in aula tua fuissem, talem esse absentem intellexeris, id
 est obseruantem tui, tuaque in laude omni studio & co-
 gitatione defixum. Quod si quibusdam litteris animus
 a me tuus est offensus, quod in iis dicar minus fortasse,
 quam decuit, de te, aut de tuis modeste locutus; quod cer-
 te secus est: sed si me tunc a mea consuetudine impetus
 quidam abduxisset iracundiae: nosti pro tua sapientia
 ingenium humanum: magna vis doloris est: impellimur
 saepe longius, quam ratio concedat; & facta quae
 sunt, paullo post infecta frustra cupimus. te tamen ita
 decet ignoscere dolori meo, si ex iusta, ut ego arbitror
 causa susceptus est: sin aliter tibi videtur, ignoscere
 tamen debes, ut eluceat magis in culpa humanitas;
 quae si omni digna Principe virtus est, te videtur Prin-
 cipe dignissima; quem ad omnem laudem natura genuit,
 disciplina erudiuit, multorum annorum consuetudo as-
 suesecit. Vale. Venetiis.

FRANCISCO . MOLLINO

Patauium .

2

QVOD meas epistolas descripseris, valde te amo: & custodiri a te malo, quam ad me mitti. Quod autem, non esse tibi scriptionem illam infructuosam, significas, prorsus non abnuo: verumtamen, quod tibi hoc in genere multo & plura, & meliora domi quotidie nascantur, hoc equidem nomine haud paullo magis tibi gratulor. quam tu, si sapias, agnosce, & opta diuturnam occasionem. viuis cum eccellente viro, adolescens, praestanti ingenio, optima valetudine: viuis Patauii, idest in vrbe scientiarum laude celeberrima: quo tamquam ad mercatum, virtutis cupiditate ita omnes confluunt, vt inanes redire turpissimum ducant. Plura non debeo. noui enim, ad quem: & haec ipsa minime neecessaria videbam: sed obsequendum amoris fuit in te meo; qui me tacitus, vt tecum de tua laude loquerer, hortabatur. Patri vero tuo, & optime de me merito, & iis virtutibus, quae nobilem virum decent, in primis ornato, quid est, quod a me deberi non intelligam? Exstabit igitur in te, si qua re potero, studium meum: illum autem colam sensibus intimis in omni vita studiosissime. Vale; & vt Mureti contubernio, ac disciplina dignum te praestes, quanti tuam laudem facis, quae mihi maximae curae est, tantum enitere. Venetiis.

MAR-

MARCO. ANTONIO

M V R E T O

Patauium.

3

BEASTI me tuo iudicio: si modo plus est a te veritati, quam amicitiae, tributum. quod ego, qui faueo meae laudi, facile mihi patiar persuaderi. sed, amabo te, vis ne mihi legem illam diutius deberi? ne scis, quam sim studiosus huius generis monumentorum? describe aliquando: aut, si, stantem in media via describere, minus honestum videtur, nec pudor tuus fortasse fert; da negotium homini diligenti; quando Achilles noster vel negat, vel certe prorsus agit eo modo, ut negare uideatur. salutabis tamen eum meis verbis: cui certe fortunam opto, qualem si magister eius haberet, omnia bona, merenti pessime, contingerent. Si quid peperit ingenium tuum, dignum paene dixi utroque nostrum, sed si quid te ipso dignum; mitte: ut constes humanitati tuae, atque etiam constantiae. es enim pollicitus. Quid Molinus meus, flos omnium leporum, omniumque virtutum? ut ualet? iube eum saluere quam potes humanissime. Charta me deserit, ut uides, tecum suauissime loquentem. Vale.

E I D E M, Patauium.

4

VNAM tragoediam duobus ipsis diebus, cum assidue scripserim, absolvere non potui. meorum oculorum, ut uideo, res non est, ac ne digitorum quidem. quid? ego habeo tuos articulos? hui, quantum interest. reliqua

H 4 igitur

igitur ad te reiicio . vinctes me facile celeritate ; aequa-
 bis in diligentia , si volueris . finge , operam te dare ,
 cum describes , homini litterarum & prorsus ignaro , &
 prorsus cupido . finge , amico singulari : quem explere
 officiis , si liceat , optabile sit . quamquam hoc non fin-
 ges . nam , cum a domesticis discessi , nihil habeo te ca-
 rius . verumtamen , haec si tibi proposueris ; de quo ro-
 gandus non es ; monere tantum volui ; nihil quidquam
 omittes in describendo . habes , quam ego in me desi-
 dero ; mentis constantiam , pectoris firmitatem . haec
 mihi morbi diuturnitas eripuit : quae video esse in te ,
 utinamq. diu videam , *ἐν τῇ ἀκμῇ* . habes oculos in le-
 gendo , manum in scribendo exercitatum : vacui vero
 temporis quantum vis : & his in rebus meis plurimum ;
 qui te saepe dixeris , professusq. sis ad meum arbitrium
 tua studia conferre . nam , quod ad gymnasii curam at-
 tinet ; nec dies instat publici muneris , & , si instaret , ope-
 ra haec bidui tota est , bidui inquam , tibi , nihilo lon-
 gior : mea vero & diuturni temporis , & laboris esset
 non ferendi . ad haec si accesserit voluntas , quae mi-
 hi non venit in dubium , & inductio illa animi , quae
 magnas res facile conficit : negotium habeo absolutum .
 serua , mi Murete , quod in te est , amicum tuum integet-
 lum : parce naletudini : nostram imbecillitatem , tuorum
 officiorum ope , sustenta . scis , *ἐμὲ βλέποντι* , quo amo-
 re , quo consilio , quo etiam praesidio fortunae tuae nitan-
 tur . *ἔστις ἐμὲ ζῶντι* , nosti reliqua . Haec aliena manu
 scripsi , cum paullulum languerem . tota enim fere nocte ,
 nescio quo casu , somnum oculis non uidi meis , aut vi-
 di tristium imaginum turba permistum . Tuum Euri-
 pidem

pidem remitto, unaque meum: quem cupio similem esse
tui. Ex acedibus nostris.

E I D E M, Patauium.

5

M O N S T R I simile, Muretus non respondet: im-
memor ne nostri? nefas credere; & hanc suspicionem lon-
ge animus respuit. at occupatus? hoc fortasse: verum vlla
ne cursum amoris interrumpit occupatio? omitto iocum.

Mi Murete, garrit saepe amor: at tu siles: cum tamē,
ut opinor, ita me ames, ut fortasse nemo magis: quod cer-
te facis mutuo. quod si, quia legem illam describere per
tua negotia non licet, ideo non scribis: rogo te, abice istam
curam. abrogentur potius omnes leges, quam tuarum lit-
terarum fructu diutius caream. nec tamen, detrahi mul-
tum de otio tuo mea causa, volo. scio, tempus quam utili-
ter ponas. illa satis erunt: *Mi Manuti*, valemus: &
valere te, valde cupimus. *ta idem* sunt in manibus. cum
Molino tuo, cum *Sofiano* saepe sum: plane viuo. Hac
sententia, sed aliis verbis, idest elegantissimis, quibus ipse
abundas, si scripseris; satis plane cupiditati meae, (quid
enim dicam voluntati?) satis etiam officio tuo feceris. Vt
deo te expectare aliquid de meo discessu. dies appropin-
quat, vel potius iam adest. iam, ut ille ait, sarcinulae col-
lectae sunt omnes; nec fere, quod agā, superest. itaque no-
nis Sep. cogitamus. Cum illo, qui mihi numquā placuit,
impuro homine, si quid aduersus me, suscipe, ego in tuis
iniuriis soleo, et sustine proelia. nervos enim habes. ille, no-
stram vicem, ulciscetur sua malefacta. nam inuidia rīpī

tur:

tur: & habet, quod intimis eum sensibus dies noctesque
excruciet. nos laudabilia cogitemus, et ad praeclara illa
studia incumbamus: de isto ne meminerimus quidem;
qui bonos omnes, hoc est sui dissimiles, odit iniquissime.
Vale, & amicis nostris (sunt enim fere communes) plu-
rimam salutem. Venetiis.

SCRIPTIS litteris, & iam obsignatis, hester-
nae tuae sunt allatae, Graece loquentes non minus ar-
gute, quam eleganter. qui possum paria paribus? si per-
gis, clamabo me circumueniri. mehercule non tam aquis
vlli fontes, quam ingenium tuum scatet Graecis & sen-
tentiis, & dictis. macle: extra iocum, amo te quotidie
magis; quia tu scilicet ad perfectam virtutem quotidie
acceas propius. Sed pauca de re. Vides ne, quam fa-
cile tum ferantur, tum abrogentur leges? Vbi sunt, qui
tribuniciam potestatem accusant? illa quidem, cum bona
mente coniuncta, salutaris. Sed haec ne nimium cure-
mus. utere fortuna tua. ego alias regiones spectro, inui-
tus nostri discidii causa; sed coniungemur animis, corpo-
ribus disiuncti. id est maximum, in maximo dolore, sola-
tium. De Philopono, quia comes futurus est itineris
mei, velim ineas rationem, si eum hic reliquisti, ut ad
me quamprimum. colligo omnia; ne quid me moretur
in discessu. non enim id agitur vnum, ut voluntati meae,
sed illud simul, ut fidei satisfiat.

E I D E M, Patauium.

6

T V vide, cui committas. ego enim binas tantum
accepi. prioribus respondi nudius tertius, meamq. tibi de
Bono-

Bononiensi re non modo sententiam, verum etiam volun-
tatem ostendi. his alteris, quae mihi redditae sunt he-
ri vespere, si rem spectro, rescribere nihil est necesse; sunt
enim eiusdem argumenti: sin tuam voluntatem; quae
quanta sit, ex tuis litteris apparet; sunt eadem iteranda.
sic igitur faciam. Affirmo tibi, Sigonium nostrum,
si Bononiam ierit, praesensque contenderit, certum fu-
turum. habet auctoritatem, ex huius loci dignitate par-
tam, mire suis amplificatam scriptis, praesertim his po-
stremis, insigni doctrina, iudicio, ingenio, diligentia re-
fertis. studia Bononiensium civium facile colliget. ciui-
tas enim est ad humilitatem nulla propensior. Acce-
dit, quod aut petet solus, aut cum iis, quos neque nomi-
nis fama, neque vero, ut a non nullis accepi, littera-
rum scientia magnopere commendat. Bargaenus enim,
ἐχ δὲ τυχὼν αὐτῆς, condicionem illam certe non spectat.
qui enim Pisis dominetur, & sua virtute, quam novi-
mus excellentem, & Principis gratia, cuius in ditione
natus est; quo consilio ad res novas animum adiiciat?
Ergo, si Bononiae Sigonius, vides, quid sequatur. diis
hominibusq. approbantibus in eius locum adscendes.
quo mihi nihil esset optatius. nam speciem habet Bono-
niensis condicio maiorem, ut in gymnasio Italiae celeberrimo:
emolumenti certe haud paullo plus hic video futu-
rum, atque etiam de dignitate videro. tractantur omni-
no litterae splendidius in publicis gymnasiis; & doce-
tur de loco superiore virtus maiore cum gloria: sed cla-
rissimum Venetiarum nomen quasi luminibus obstruit
Italicarum omnium civitatum: & hic ortum decus fa-
cile manat, ac diffunditur per omnes gentes, propter
huius

huius urbis communionem et quasi societatem cum orbe terrarum uniuerso. Hic venit in mentem: Cur tu igitur migras? alia ratio est. ego urbem linquo, non cum urbe emolumentum. quin hoc augeo vehementer; illam prorsus amittere non uideor, quia Romam spectro. Habes meam sententiam; quod quidem ad te attinet. De Sigonio autem, quia nihil est tam amplum, quod eius virtus non aequet, meam, ut opinor, diuinationem exitus non fallat. nisi si quid attulerit casus; qualia fert hominum vita. De Molini nostri valetudine, cum rescribes, adde verbum, si me amas. Vale. Venetiis, nonis Sep. quo me die discedere cogitantem nouares detinuit.

E I D E M, Patauium.

7

QV I D homini non timendum? cum te, tam validum, istis lateribus, ista aetate, nihil tale metuentem animus reliquerit. valde me percussisti tam graui nuncio, eoque magis, quod ignorare te caussam scribis. nam tuendi tui quam rationem inibis, si te morbus inuasit imprudentem? tuam continentiam narras. equidem ita credo. unde igitur fluxit vitium? parce tibi in studiis, mi Aurete, pro eo quanti ipse tibi es; aut, si te ipse non diligis, quem omnes paene diligunt, pro eo quanti ipse apud te sum: quem tu nisi magni facis, egregium simulandi tenes artificium. nescis modum esse retinendum in omni re? nescis, virtutem nimis appetere, virtutem non esse? age igitur, iam te respice, si minus antea: tibi consule, & eam quaere gloriam, quae te viuentem oblectet,

non

non quae discedentem e vita prosequatur. ita diu iucunde uiuam, ut acerbe nunc uiuo, quia sollicitus de te sum. medicos habes doctrina singulari, quorum consilio uti possis: caelo uteris clementissimo: in rebus tuis nihil, opinor, est incommode. genus enim vitae non honestum minus, quam utile delegisti. etsi te scio de re & lucro minimum laborasse, illa vero habuisse prima, quae nec mihi postrema unquam fuerunt, decus, & amicitias nobilium virorum. Haec cum ita sint; modo paullo minus mentem, & paullo magis corpus exerceas, rectissime tibi erit: nosque, tui peramantes, afficies maxima laetitia. quod auguror futurum: & ut meam spem, quantum in te est, exitu confirmes, te ipsum tua, nec minus mea, causa rogo. Kalendis Apr. omnino te, sin id minus, Catullum tuum exspecto. diem unum prorogari, ere mea non est. Vale.

E I D E M, Patauium. 8

PLANE non assequeris, ut uideo, quorsum illa de Momo scripta sint a me. non enim id spectavi, tuam ut remorarer industriam, sed ut acuerem potius, atque incitarem. tu autem ita commotus es, ita mecum uehementer, ac paene iracunde agis in epistola tua, ut uix tibi temperes, ac ne satis quidem, cum uelles, temperare potueris, quin aculeos etiam in me nonnullos emitteres. deinde quasi blandiris in extremo, uerbis utens amantissimis, atque honorificentissimis: cum ea mihi tribuis, quae si respuerem, ipse me non amarem. tanti enim mihi sum, quanti ab iis, quibus

quibus ego plurimum tribuo, fieri me sentio. Ac putabam, mi Murete, meos tibi sensus bene cognitos omnes esse: quod si paullulum a mente quandoque aberraret oratio, non esse facturum, ut eo mea verba detorqueret, quo neque meum iudicium, neque nostra iam paene fraterna necessitudo ferret. quod quando secus video contingere; aberit posthac a meis litteris omnis ironia, aberit iocatio, quidquid denique eius esse generis intelligam, ut in utramque partem flecti possit. de illo ne meminere quidem, si potero: hominem enim contemno: silentium quidem, quod potero, ipse mihi imponam. De Plauto videor tibi scilicet, quod aiunt, in alienam messem. sic enim illud interpretor, A me, ut scis, esflagitabatur. Tu vero, me perlubente, rem suscipies: si modo, quod contra mihi videbare, animum induxisti, ut esflagitantibus breui satisfacias. verum, si praeclaros de Finibus commentarios, ad exitum iam perductos, paucorum dierum studio perpolire non vis, & magno litterarum damno pateris iacere: qui sperem te aut vel le hoc tempore noui aliquid ordiri, aut, si ordiaris, posse pertexere? magni negotii est, quantum otii res exigat tuis occupationibus eripere; non mimoris, a te ipso, ut velis, impetrare. facio tamē aequissimo animo, ut in te reiciam, ac transferam hoc, quidquid oneris, aut laudis est. consulatur modo publicae utilitati. id, non modo a te, quem fero in oculis, sed si vel ab iis, quos & de facie, & de nomine prorsus ignoro, praestabatur, aequae laetabor. Quare non solum per me licet, verum etiam, si pateris, precibus tecum ago, ut ad emendandas, illustrandasq. Plautinas comedias tuam excellentem industriam

striam conferas. vereor tamen, ne, quod summe cupio, id frustra rogem, atq. expectem. Vale. Venetiis.

E I D E M, Patauium. 9

REM tenes: optime tres poetae coniungentur, ille, M. ANTONII. MVRETI. COMMENTARI. IO. ILLVSTRATVS; reliqui duo, si rem suscipis; quod ita liberaliter, ac benigne polliceris, ut a me non minorem verbis, quam re gratiam ineas; AB EODEM. EMENDATI. quod si, ut significas, ad emendationes aliqua praeterea fiet accessio: nae ego tunc, vere mutuam inter nos esse benevolentiam, intelligam, ac velle te mecum officiis certare: in quo antea (dicendum est enim) potuit esse illustrior amoriuus. Confugies videlicet ad occupationes: ego ad illud: Nulla potest esse occupatio tanta, quae amoris, & officii cursum debeat interruptum. me ipso quem quam ne tu magis impeditum a negotiis, districtum a curis unquam nosti? quis tamen amicorum (amicorum autem? immo vero etiam alienorum) negotia curat libentius? tua sane causa noctis etiam partem cogitando saepe consumpsi, cum tamen corpusculi tenuitas maxime quietem postularet. Sarcies igitur, si quid omissum: vel, si nihil, auge superiora; quod certe potes, et, si meum in te animum spectas, etiam debes. Vale.

E I D E M, Patauium. 10

REMITTO scholia, ut habeas corrigendi facultatem. quamquam est, cur addas potius, quam mutes. quid

quid enim? totus ne quartus liber ita mendosus aut obscurus est, nihil ut assequare, nihil scriptione dignum excogites? mihi non probabis, nec omnino cui quam, tuum in Catullum praestantem commentarium qui legerit. cōfice igitur, quantum quidem per te licet, licet autem tibi, quod, ut ego sentio, quam paucissimis. nos opus nostrum intermisimus tua causa, tuum ipse opus nostra causa ut urgeas, atq. absolvas. nec dubito, quin, si adniti volueris, & quasi cū ipsa re contendere, quod ego interdum soleo magna ex parte praestes id, quod praeter opinionem meā, ut aliquid ἐν τῷ αὐτῷ ἀδυνατῶν, abiecasti. De rebus tuis, quae mihi mehercule magnae curae sunt, consilium dies afferet: animus certe meus fluctuat: ita multa in utramque partem occurrunt. placet constantia, ita, sed si cum utilitate coniungatur. utilitatem porro non lucro magis, quam dignitate metiamur. quod tu quoque videris significare in illo loco, Vellem hic paullo ἐν τιμῇ τε γὰρ vivere liceret. Veruntamen, mi Murete, si quid agimus minus interdum splendide, contra quam nos praeclara liberalium disciplinarum studia docent, excusamur temporum iniquitate, & multorum exemplo; qui, cum affluant iis rebus, quae saepe a nobis, fortunae potius culpa, quam nostra, desiderantur, quotidie tamen aliquid ultra appetunt: quam meus magister Egnatius, si audires verba, summam stultitiam; si vitae rationem spectares, plane singularem sapientiam iudicabat. Vale. Venetiis.

EIDEM,

E I D E M, Patauium. 11

QVINCTILIS *Kalendae, quem tibi ego diem
definieram, praeterire iam, ut uides. naque, si quam ex
meis litteris de perpoliando Catullo tuo curam suscepe-
ras, ea te libero. temporis enim coactus angustiis, man-
davi meis, ut alia quaedam praelo subiicerent. mensem,
quod ad me attinet, uel integrum, eoq. amplius, licet in-
terponas. interim ad Terentium omnem tuam industriam,
suadeo, conferas. noui omnino te laudis in studio num-
quam languentem: sed in hoc libro, qui maxime omnium
uersatur inter manus, ipse te debes incitare, & eo ma-
gis, quod erit, qui editum statim arripiat, syllabatimque
omnia dimetiatur. admodum enim seuerè, ac studiose
iudicat aliena; sua uero premit, exire non patitur, diu
licet enigilata, acerbus etiam in se ipsum, minimeque in-
dulgens. Ego accingor ad Plautum. nec desperarem
aliquid a me, si minus ingenio, saltem diligentia, posse
praestari: sed interpellant salutatores à mane ad uespe-
ram, honesti illi quidem, cupidi uirtutis, officio, &
amore erga me, ut uidentur, incensi; tamen interpel-
lant. scis illa Ciceronis nostri, ad Sebosum, Arriusque
aduentum ingemiscantis. Hui, unum ne ego Sebosum,
unum habeo Arrium? uidelicet: sexcentos: quibus,
uelim nolim, horae dandae sunt omnes. ex quo quan-
tum molestiae, quantum hauriam acerbitalis, ipse, qui
meam consuetudinem, ac meos plane sensus tenes, fa-
cile potes coniicere. nam rem familiarem, etsi mini-
me abundo, iacere tamen aequo animo patior: studia uero*

I mea

mea negligere nullo modo possum. De tuo aduentu spē nonnullam inieceras: eam rursus extenuant postremae tuae litterae. ego illud scilicet primum, ut habeas rationem valetudinis; secundo loco, quod tuo commodo fieri possit, ut te nobis restituas, exopto. Quid Molinus noster quid agit? quid autem ego hoc quaero? nimirum ille totos dies tecum, id est in virtute totus est; nec tuam complexus doctrinam dimittit, iudicio adductus suo, meo consilio confirmatus. Vale. Haec ante lucem, cubans in lectulo, amanuensi meo, & iam meorum studiorum socio, dictavi, nobili adolescenti Cyprio, Herculi Podocatharo, qui cras Patavium cogitat, teq. meo nomine salutabit. illa superiora familiari meo, Sebastiano Leoni qui se forte obtulerat, dictaueram inambulans, quod erā paullo crudior: nec fere mea manu libenter uti soleo.

E I D E M, Patavium.

12

QVI mihi tuas attulit litteras, ei ego meam omnem operam, si qua in re vellet uti, atq. omnino quidquid valeo, tua causa detuli. visus est meam amicitiam plurimi facere, & a me, praeter eam, nihil expetere. quod illi facillimum fuit impetrare. nam cum omnibus natura pateo: tum vero, qui a te diliguntur, amore meo numquam excluduntur. Catulli quod apud te reliquum est, biduo si miseris, satis opportune facies. deinde mihi orna duos comites eius, utrumq. dignum, ubi neruulos ingenii tui contendas. etiam illud mihi tribuis petenti: quod ante omnia & vnum fortasse, spectare te puto. cras, ad summum per-
rendie

11
aduentu
t postmae
beas ratio-
modo sci
olimus noster
triam ille
tuam con-
suo, meo con-
lucem, cu-
orum studio
Herculi Po
meo nomine
ficio Leno
ms, quod tu
viri soleo.

EPIST. LIB. IIII 131

rendie triam Catulli folia mittam. Filiolum meum Hieronymum, nondum quinquennem, Aldo parem ingenio, valetudine firmiorem, mandare Epidaurum ad hominē eruditum, meiq. peramantem, Paullum Bosium, cogitabam. ibi moribus, et primis litteris imbuetur. nam ego me ad haec humilia dēmittere nullo modo possim. Quid praeterea? nihil scilicet: immo aliquid. Scribe, amabo te, mi Murete, ut instituisti, quam saepissime. mehercule, e summis, atque assiduis non modo negotiis, verum etiam animi curis, tātum in tuarum epistolarum elegantia, et suauitate conquiesco. atq. etiam, dum ipse ad te scribo, quia te mihi praesentem statuo, mutuumque inter nos sermonem fingo, incredibili voluptate perfundor. Vale. Ventiis. Hercules meus, quia festus hodiernus dies est, abest. ideo haec mea manu, decies interpellatus, exaravi.

12
E I D E M, Parauium.

13

an omnem
idquid va
m plurimi
od illi si
atura pa-
numquam
biduo si
duos co
iui con
omnia
m pe-
endie

A I s ne? Iannottus ita suasit? vix adducor, ut credam. tibi tamen cur non credam? ego mehercule, quod Iannottus probare videtur, id non solum probo, verum etiam mirifice cupio. quid enim mihi suauius tua consuetudine? qua nihil iucundius. tuo vero sermone quid utilius? qui solet esse tum eruditus, ingeniiq. notis adpersus, tum etiam beneuolentia refertus in me singulari. At, Ferrariensem condicionem ut acciperes, auctor fui. Id quidem (tu scis: facile enim potuisti coniicere) valde contra meam voluntatem: cui nihil potest esse molestius, quā a te diuelli. Sed quid? an ego paterer tuam fidem in du-

I 2 bium

bium vocari? qua maxime probitatis nititur opinio. Dixerat de Turulone, praestanti viro, non solum animi, verum etiam fortunae bonis ornato: cuius mihi fuit, item ut esse debet, auctoritas grauissima: nec ausus sum repugnare: dedi manus. ἰτέον, conclusi. quod si Iannottus, quem noui rerum agendarum usu peritissimum, antiqui hominem officii, pollicetur sese impetraturum: suscipio, quod abieceram, consilium; nec iam amplius ἰτέον, sed hic, hic nimirum φιλοσοφίῳ, idque nobiscum, summa cum animi voluptate clamo. Ergo, quod iam institueram, obseruabo omnia, omni enitar studio, omnibus inserviam. volo te bene sperare, me agente, bonis fauentibus, inuidis & obtrektoribus imbecillis. Molino, parum abest, quin vehementer inuideam. quid ni? artem memoriae tenenti. verumtamen impedit amor, a quo abesse solet inuidia: etiam ea spes, quod ille, quo eum bono alienus homo impertiuit, cui suo, homini amantissimo, fortasse etiam bene merito, certe numquam denegabit. esset enim sui dissimilimus, idest humanitatis expers, si recusat: allegabo ad illum, quem? quem putas? te scilicet, cui debet omnia: si modo in virtute omnia posita sunt: quam ille discit te magistro. καὶ εὐτε δὲ ἐρχομένη, quid non impetremus? Vale.

E I D E M, Patauium.

14

PROFECTO nihil est uberius amore in me tuo: nec amor cedit ingenium: itaque mea causa & vis omnia, & idem facile praestas. quod cum ita sit; nimis tamen facerem impudenter, atque adeo neque ipse te ama-

rem,

rem, nec amore tuo dignus essem, si plus tibi oneris imponerem, quam occupationes patiantur tuae. Scholiis, quae polliceris, contentus ero; quandoquidem video te commentariolo non vacare. tu modo qui Catullum expolieris, da operam, ut in Tibullo, & Propertio, qui locum illi proximum in elegantia verborum, atque in sententiarum concinnitate obtinent, quam simillimum tui te praebeas: ita tres pulcherrimi poetae, & sine dubio inter Latinos in illo festivo genere principes, veterem suum splendorē, ereptum vetustate, atque hominum inscitia, tuo maxime studio recuperabunt. ego autem ipse mihi gratulabor, & quadam modo gratias habebo, quia te ad hanc industriam excitaverim. nec desinam eadem ratione de litteris, quando per humanitatem tuam licet, bene mereri, cum eo tamen, ut tibi, homini occupatissimo, studiosorum utilitatem, id est tuam laudem, verecunde commendem. Molino meo salutem, & simul age gratias descriptis meis. Vale.

EIDEM, Patauium.

BINIS iam litteris de Martello: nec tamen a te verbum. valde te distentum esse oportet, qui tam longis diebus, tam pone tuas aedes habitantem alloqui non possis. at qua de re? primum mea, deinde ea, in qua non ultra sex aut septem verba sermonem continuare sit necesse. quare, si te nimis vrsi, velim ignoscas: tum, si per tuas occupationes licet, frustra ne vrserim, efficias. quid? Molino nostro negotium dedervis: non recusabit, nostra utriusque causa. in quo dan-

EIDEM

1 3 da

da opera est, ut omnino responsum ab illo aliquod exprimat. nam ex hominis diuturno silentio adductus sum in suspicionem, ne parum sincere mecum agat, & exactum neget, quod iam in usum suum erogauerit. quod equidem cupio esse falsum, et me de amico peruetere scelereste suspicari. Nunc audi, quod tua magis interest. quamquam nihil ad te pertinet, quod me quoque ipsum non attingat. nec te puto aliter esse animatum erga me. verumtamen audi, quod certe non expectas. Quatenam ei deberi a te putes euangelia, qui librum inuenerit antiquum, & illam aperuerit latebram, ubi, Caluier, illud sit aliquando deprehensum? equidem inCESSI omnibus laetitias, ut ait ille. sed abuntur enim illae turbae, & comprimetur quidquid erat sermonis aduersus te dissipatum. quod ego & tua, & eorum, quos dilexi semper, causa vehementer cupio. verum primum quidque explicemus. nunc Tibullus instat, denuo praelo subiectus. is, & qui sequitur, Propertius, absoluendi tibi sunt. deinde ad Terentium accingere. interim da operam, ut Bembi libro uti possis: cuius ope quin maculas eluas bene multas, & suos versibus numeros, aliena culpa perturbatos, restituas, etsi non dubito, tamen hortor ut adhibeas diligentiam. cupio enim de te omnes bene sentire: cupio comprimi os paullo liberius loquentium: qui non modo te, verum me quoque videntur ignorare, non sine causa ea, quae soleo, de tuo ingenio, ac indicio praedicantem. Vale. Venetiis.

EIDEM,

PAVLLVLVM nunc quidem ego exorior: postea quam mihi amanuensis meus, quem abduxerant aliena consilia, optans optanti restitutus est: cuius opera, & officio meis oculis, vel plane totius corporis valetudini cōsultum egregie. iam me labefactabat, iam nutare cogebat labor; stomachumq. deicere quotidiani vel operis, vel officii scriptio necessaria coeperat. & is, quem Bononia expectabam, differebat aduentum, usque eo, ut, venturus esset, nec ne, valde iam suspicarer, atque subdiffiderem. qui si venerit, erit omnino aliquid, sed, ut arbitror, nihil ad Herculem: quem scis meam non modo orthographiam, totamq. interpungendi, & distinguendi rationem tenere, verum ita manum quoque, cum velit, imitari, ut te ipsum, peritissimum litterarum mearum cognitorem, aliquando sefellerit. Scribe, inquis, ubi tantum necesse est: ita scribes raro. Non ita est, possem studia mea, quaeque habeo instituta, quae multa sunt, abiicere: litteris vero salutantium amicorum, aut aliquid a me postulantium quaternis in die minimum, saepe octonis, & denis, non respondere qui possum? ut omnino aut amittenda valetudo aut humanitas deferenda uideatur. Quare locum habes gratulandi. debes enim meis perinde commodis gaudere, ac tuis, magis etiam fortasse; quod ego minus, quam tu, possum incommoda sustinere. De Tibullo, cessator esse noli, etiam si tibi ego cessandi facultatem prolixè detulerim. est enim, ut scripsi antea, unius praeli opera, ne tibi crebra appellatione molesti essemus, intermissa. Ve-

rum istos ego quotidie poetas, quos in manibus habes, amo uehementius. causam quaeris? quia tuas, amantissime me ac disertissime loquentes, eliciunt epistolas: quarum non modo suauitate, uerum etiam fructu aliquo, occasione sublata, carerem. quod cum ita sit; cupio tamen, atque etiam, si pateris, rogo rationem habeas rerum mearum: quibus quo longior, eo grauius procrastinatio damnum inferet. Vale. Ante solis ortum, albescente die. Venetiis.

E I D E M, Patauium.

17

Tu uide, cui credideris. nam ad me nulla dum perluta sunt Catulli folia. quae si perire; damni factum est eo plus, quod nec ad illa, quae sunt apud te, licet transilire. quandoquidem ordo foliorum non seruatur; nec pagina paginae, nec uersus uersui respondet. itaque magnam utriusque nostrum causa sustineo molestiam; uereorque, ne, quod aliena culpa contractum est, nimis ego id grauius luam. tota enim typographiae ratio mutetur necesse est, nisi haec, quae ne funditus interierint, magnopere timeo, hodie folia recuperantur. quod utinam ex hac difficultate, in quam aliena uel socordia, uel perfidia coiectus sum, tuae me litterae eripiant: quas ad meas hesternas ceteris expecto, & ad has omnino perendie. Vale. Venetiis.

E I D E M, Patauium.

18

SEDATA iam tempestas omnis est, & nauigamus in portu. reddita mihi sunt hac ipsa hora, quae tui tribus ante diebus miseris, quinque Catulli folia, delata:

prius

prius ad eum, qui libros in *Asulana* tractat officina; ho-
 die tantum, ut ipse assenerat, an, ut ex litteris tuis opor-
 tuit, nudius tertius, diuinare non possum. hoc certe video
 per communes tabellarios non esse missa: quorum fides
 in reddendo desiderari non solet. sed! profecto fortuita
 multa; quibus perturbari, & fluctuare vitam hominum
 necesse est: quae cauere consilio, aut ratione si liceat; be-
 ne cum multis ageretur. penderet enim a prudentia feli-
 citas. nunc aequae omnibus occurrunt incommoda; us-
 quequaque casus, & fortuna dominatur. De filiolo meo,
 amabo te, quemadmodum animo, sic lingua faueas, pri-
 mum amoris nostri, deinde omnis etiam causa. auferet
 ille quidem omnem iucunditatem; & plane diuellat a
 me ipso; sed hoc tamen antepono, nisi fallor, salutare con-
 silium; & ut ei consulatur, animum vinco. Quod iterum
 iam ad me *Molini* manu, gratulor, paene etiam subinui-
 deo. meus enim a me, nec, ut puto, rediturus, *Tiro* disces-
 sit: quo consilio, de ipso cognosces. cum ad me retulisset;
 neque suasi, neque dissuasi; ne dissentirem in hoc ab ip-
 sius patruo, in illo autem a me ipso. suasi etiam potius. cō-
 tra voluntatem, inquires, & iudicium? sic sum. auertere a
 me volui, quae poterat exoriri, suspicionem utilitatis, &
 commodi mei. Clausula sit, quod initium epistolae fuit.
 Restitutus mihi videor, inuentis *Catulli* foliis. tu quoq. re-
 di ad tuam tranquillitatem, nec institutum omitte. Vale.

 E I D E M, *Patauium*.

17

Quid? tu me putas hoc in genere acutissimum?
 fuit, cum ipse quoque mihi plane ita persuaderem:

nunc

nunc nihil minus . nam hoc toto biennio prorsus nihil uidi : & , ut omittam cetera , meum illud tantarum uigiliarum munus , non tibi uenit in mentem , quam misere perierit ? itaque , qui mihi ipse tam male consuluerim , mutus adducor ut alteri consilium dem . uides iacere bonas artes ; illa sordere , quae praeclara ducebantur . cuius maxime uitii culpam sustinet eorum inscitia , qui putant scilicet in opibus esse omnia , & fortunae pedisequam esse uirtutem : stulte : nam illi & uiuentes audiunt pessime , uerissimisq. maledictis proscinduntur ; & , ubi e uita discesserint , aeterno silentio damnati , apud omnem posteritatem ignorabuntur . nos autem nunc quidem fruimur suauissima omnium , & iucundissima uoluptate , quae manat ex honestis cogitationibus , ac studiis : nec erit , opinor , ulla , quae nostrae uitae cursum definiat , dies . non in omni aetate decus , ac dignitatem pariet ea , quae nunc , auri , argentiq. uis . suus cuique aliquando pro animi ingeniiq. praestantia , persoluetur honos . interim uiuamus nobis , ac litteris , seimeti ab iis , quos nutu appello , idest ab ipsa plane barbarie ; ne quam ex eorum conuictu labem contrahamus . Munusculum tuum non uideo cui deferas . inania tibi nostra , mihi nec peregrina solida uidentur : si quidem ipse , quod iam significauit , diu perigrinatus , oleum , & operam . Nobilitatem , & uirtutem si quaeris , est Bononiae Camillus Palaeotus , Mediolani Bartholomaeus Capra , duo quauis laude , ut ego sentio , excellentes uiri . Capram numquam uidi , sed , hominum sermone , tantifacio , quanti si ille sciat , studio me , non dubito , quin mediocri complectatur , & in amicitiam plane intimam recipiat .

piat. Palaeotto, quae est hominis humanitas, usus
 sum, quam diu Bononiae fui, familiarissime. omnes
 in eo disciplinae sunt nobili viro dignae: morum autem
 elegantia, comitate, officio summus est. hi sunt nobis or-
 nandi, & diligendi: Crassos quosdam, ac Midas num-
 quam omnino nostra meliores laudatione faciemus. quin
 ita desipiunt, ita ipsi se ignorant, & ignorari ab omni-
 bus putant, ut in sinu sibi gratulentur; quasi sint, quos
 esse fingimus; cum nos ea ipsa, quae desideramus in il-
 lis, ad cohortandum, non ad laudandum, colligamus.
 Habes meam sententiam, quos vites, quos deligas.
 nominare praeterea multos possem: sed incerta ratio est:
 & illi duo excellunt. Occurrit illud. ad ignotos, non fa-
 cillima ^{ὁ τῶς} aliis, fateor: te quidem ab hac difficul-
 tate vindicat ubertas ingenii tui. Alterum est: ambitio
 nis, aut etiam leuitatis cauenda suspicio. Locus omni-
 no aliquis calumniae dabitur: sed omnia ne curanda?
 nimis misera condicio. valeant iniqui: recte sentientes
 probabunt: nec nos ii sumus, quia multitudinis deprava
 to iudicio pendere debeamus. Vale.

E I D E M, Patauium.

20

MIHI vero, ita viuam, etiam atque etiam pro-
 batur. & cum in quouis genere magnus omnino sis, in
 hoc maxime videris excellere. plane (ut omittam re-
 liqua) ingenii tui quasi quandam ^{δὲ τῶς} sum admi-
 ratus. ita concinne, ita apte, facili quodam sententiarum
 nexu, rem ducis, donec ad ipsum peruenias: in quo te,
 ubi

140: PAVLLI. MANVTII

ubi scis haerere multos, citra omnem adulandi suspicio-
nem, summa explicas cum dignitate. Gratulor tibi de ista
facultate. Et eo magis, quod, si locis imperitur gloria,
nouum decus accedet de Italiam nostram; in qua sedem,
auctore atque auspice me vno, ita locasti, ut cogitare ni-
hil prorsus de migratione videaris. nec verus secus de-
bes. valde enim ad litterarum elegantiam, planeq. ad om-
nem humanitatem tibi pro fuit hoc caelum, e quo iam per
quadriennium spiritum hauris. itaque noster eris perpe-
tuor mi Murete, si gratus esse vis: quod profecto vis: so-
les enim hanc virtutem praeter ceteros efferre. Tibulli
principium mitte; ut cum epistola coniungatur. Scho-
lia, non dubito te operam daturum, ut tua videantur,
id est lita luminibus ingenii, Et, quantum res patitur,
erudita. Vale. Venetiis.

E I D E M, Patavium.

21

GRAECOS typos, meumq. de Syriano edendo
consilium probari tibi non mediocriter, significas. sic pu-
taram: Et in utroque nunc mea tum opinio, tum volun-
tas, te approbante, qui mihi multorum instar es, magis,
magisq. confirmatur. De Catulli clausula, parum com-
mode: sed nihil, Mureto petente, recusandum. Video
te Propertium negligere: cum ego me illis verbis, quae
sunt in prima Catulli pagina, quasi praedibus obstrinxe-
rim, A B. EODEM. CORRECTI. SCO-
LIISQ. ILLUSTRATI. itaq. nec integrum
iam est: Et, si sit, cur tu poetam elegantem, maximeq.
omnium Latinorum fabellarum varietate, hoc est vere
poetica

poetica eruditione florentem, abiicias? Etiam illud: oblitus ne es, ei te commentarium publice esse pollicitum? scholia saltem, si commentario non vacas: & utrumque Torquato: aut, si uni utrumque non vis, Propertium cui videbitur: inops enim ab amicis non es; sed malim utrumque Torquato; qui nobilitatem a patre, virtutem habet a se ipso. Dices, tibi otium deesse. si hoc impedit; faciam, ut abundes. inibo enim rationem eiusmodi, ut operae meae, quarum tibi molestia nunc celeritas est, gradu testudineo pergere videantur. Germano tuo cupio mehercule satis fecere: sed aduersantur multa, maxime peregrinitas, haud satis apta nostris moribus, & ignoratio sermonis Italici. meum tamen illi studium nullo loco deterit, si monueri: sin ipse aliquid videro, in quo liceat eius rationibus consulere, aggrediar, & quantum in me erit, perficiam. Vale. Venetiis.

EIDEM, Patavium. 22

VEHEMENTER mihi arrisere tua scholia, sic inquam, ut fere se commentario aequare videantur. perges igitur, diis bene iuvantibus. Cupio tuum Plinium: quem dare poteris amanuensi meo: cui reditum patruus, nuper e Cypro aduectus, multis a me verbis impetravit. Exspecto reliqua; quod tuo tamen commodum fieri possit. nam, ut tuis consuleretur studiis, & commodis; cessare de duobus praelis unum maluimus, quam te nimis urgeri. attamen rogo, des operam, ne longius ducatur. Vale.

EIDEM,

E I D E M, Patauium. 23

OMNI Murete, quot me premunt onera, quibus angor curis. accedit imbecillitas valetudinis, quam, do equidem operam, ut omnino tuear, ac sustentem: sed vacillare interdum necesse est: ita multa incurrunt in nos, quae nec vitare licet; nec sumus ad sustinendum pares. tu me, tuus amor, tua virtus multum leuat. quod spero perpetuum, nec, ut ait noster, constantiae causa, sed voluntatis, ac iudicii. In erratis cur numeras Mae ror, & Flamma? quorum alterum vetustas vniuersa, alterum consuetudo probat. etiam, Saecula, tum scribebant. nam Varro in Etymologiis Varro non videtur: itaque & a Quintiliano merito ridetur. Exspecto Tibulli folia, quae supersunt, & scholia. Vale.

E I D E M, Patauium. 24

MOLINO dixeram, quae tibi si narrauit, iteranda non sunt; sin omisit, committenda litteris non videntur. nec tamen te diutius celabo; interim hoc vnum: quo fortasse contentus eris: ad alios potius, quam ad te, pertinere, nec ullam omnino tuae dignitatis, & existimationis partem attingere. Hic sermo increbuit, ex quadam tua, ut audio, ad Lambinum epistola, captum tibi iam esse de Ferrariensi condicione consilium. quod si ita est; magnopere gaudeo, ac tibi Deum ea, quae cogitas, vehementer cupio fortunare.

re. Sin autem haec inania sunt, ac temere iactata:
 aequae laetor; teque hortor, pro mea in te benevolentia
 singulari, ut habeas rationem in primis non modo tran-
 quillitatis, verum etiam constantiae tuae, velisque Pata-
 uinam commorationem esse quam longissimam. ego ta-
 men, quidquid egeris, meam non modo voluntatem,
 verum etiam sententiam cum tua coniungam: sed ve-
 reor, quod minime velim, ne quis, in te non recte anima-
 tus, sermonis materiam nactus, leuitatem obiiciat. iam
 enim quiddam inaudiui. In Tibulli quartum, aueo sci-
 re, cur nihil volueris. nam, posse te, certum est. nos
 opus intermisimus, donec a te plurima colligantur. scis
 consuetudinem praeli. urget te quo tempore minus ex-
 spectabis, & opprimet nec opinantem. quare cum otio
 nostro tuum negotium metiri non debes, sed, cum iace-
 re nos videmur, ipse nihilo minus ad industriam excita-
 ri. Amicus ille tuus, cuius ingenium, ut in adolescen-
 te, laudabamus, detulit quaedam ad *: quae si ille ue-
 ra putasset, incenderetur aduersus me, & institutam
 amicitiam, quam spero fore diuturnam, abrumperet. te
 vnum testor, quid ego de illius doctrina, atque ingenio
 & sentiam, & saepe praedicarim. ille tamen simiolus
 longe aliter; vel quod est, ut multi, insensus Italico no-
 mini; vel quod natura improbus, qui fingat ea de me,
 quae repugnant penitus iudicio meo, atque etiam natu-
 rae; cumque ornatus a me sit, detrabere tamen de mea
 laude conetur. nec tamen est nihil, quod ad te ipsum per-
 tineat. quae, quia sunt iniusta, contemnes; ut ego,
 quae sunt falsa. Vale. Venetiis.

EIDEM,

CUM antea, multis mihi declaratam argumentis, tuam prudentiam valde probaui. tum vero, lectis tuis litteris, laudaui te, ut hominem consilio praeditum excellenti, atque etiam, ut virum bonum, qui nihil antefert honesto, suaeque maximae fidei, vel cum rei familiaris ingenti iactura, sibi esse habendum rationem existimat. Opima tibi deferabatur, admodumque honorifica condicio a multis, & ambitiose petita. nihil occurrebat contra, quin accipienda videretur. tu tamen reuicis: & facis, meo iudicio, sapienter: primum, quia tueris officium, qui Cardinali Estensi iam promiseris; deinde, quia ne sic quidem tuam utilitatem deferis. quis enim illo ad liberalitatem propensior? quis paratior fortunae bonis? habes igitur in eodem cum voluntate rem. nec tu is es, in quem aliquid indigne conferatur. atque etiam, quo maior, ac praestantior adesse, ac se tibi offerre videtur occasio; cum summo Principi, singulari viro, tuam operam dices; eo tuam acues, atque excitabis industriam diligentius; ut ipse te vincas, & benevolentiam Cardinalis eximii omni tibi ratione concilies. in qua una si tuae vitae quasi tabernaculum constituas, & ita perpetuo senties; o te felicem, Murete, nec iam amplius a Fortuna pendentem, quae tui similes saepe iactat arbitrio suo. Nunc ego quidem a te fructus tuorum studiorum vberissimos, de quibus me saepe praedicantem audiere multi, non solum expectabo, verum etiam exigam. quamquam tu mea certe monita non expectabis. noui enim tuos sensus hac in re

cuna

cum meis optime congruentes, ut eam denique esse uitam ducas, quae uiuitur in studiis, cetera inania, speciosa multa, plerumque tamen falsa. Interim frui te rectum ipse, & quod aiunt, in sinu gaude tantae felicitatis expectatione: quam aequalem video fore vitae, ipso uiuente qui te exspectat: quem debes, vel si tibi Croesi opes ostendantur, unum sequi, & unum ornare tuis studiis, vel potius ex ipso tui ornandi, atque illustrandi capere argumentum. Vale. Venetiis.

E I D E M, Patauium. 26

LABORABAM vehementer de amico nostro: nunc animum meum constituit, aliquo interdum, ut ueredicam, metu fluctuantem, epistola tua. atque ad metum accedebat indignatio. quid? virtuti ne deerit ornamentum? aut etiam locus, ubi consistat? tanta ne est temporum iniquitas, & hominum in suis bonis ignoratio? haec ego quandoque mecum: nunc vacuis curam sum, & ex eo, quod significas, ut inexpectata fortuna triumpho. uelim igitur ei meo nomine gratuleris. Tuos versus tua fretus humanitate, iam promiseram. eos exspectabo, minima, si fieri, potest, interposita mora. nec tu uelim me diuturna expectatione ducas. Illa ad illos, qui te numquam amarunt, quos male scis audire suo merito, cur non transferas ad alios? equidem suadeo. quod si tene rem ὡς πρὸς δέ σιν, facile dicerem, ad quem. me a lusibus, ὡς ἀπὸ πάντων τῶν ἐπὶ τοῖς ἰσχυρίαι, plane reuocat non solum natura mea, sed aetas etiam, senectuti propior, quam adole-

K

sceniat.

scientiae. itaque, si quid ad me scribes, remoue, amabo te, omnia, quae dilexisse Plato videtur, & φειδίστη. Intelligis. opinor, quid significem: &, quod significo, petere me, vel cupere etiam, si me putas ingenium tuum nosse, existimabis. De beneuolentia tua, etsi numquam dubitavi, ex te tamen ipso ea, quae opto, libentissime audio. quamquam ad studium in te meum nihil addit studii tui commemoratio. non enim te amare coepi, ut ipse me amares, sed quod amabilem ipsum esse duxi multis nominibus; quae tibi ipse ne exponam, non modo meus, verum etiam tuus pudor impedit. Iactura te mouet rei familiaris in discessu repentino. noli laborare: lucrum erit in damno; si spectas eum, qui te excipiet, praestantem virum, erga tui similes optime animatum, cuius egregiam voluntatem non dissimilis fortuna comitatur. sarciet igitur ille, si quid ob subitam migrationem damni facies: &, ut spero, tuum te consilium quotidie magis oblectabit. Polam video te abiectisse, et laetor mehercule tua causa. verumtamen, si quando opus erit, secessum illum non contemnes: ut habeas tu quoque, exemplo Africani, & Laelii, tuum Lucrinum, cuius in litore, neglectis Regum thesauris, omni prorsus ambitione solutus, aut conchas legere, aut fluctus numerare possis; eoq. laetius, si me tibi tantae comitem voluptatis Deus obtulerit. Verum haec, ut quidem nostrae nunc utriusque res habent, inania: quae tamen, si perfecte saperemus, omnium fortasse prima. Sed vides me tecum garrere? captum voluptate sermonis, dum te quasi praesentem alloquor, & vtor manu eius adolescentis, quem iure Latii donatum, Cretense lus ademptum, affirmo tibi dignum aliquando fore nostro

stro contubernio. quod quidem studiose agit, tuo maxime exemplo incitatus. etsi nō te nostra domus, sed tua te industra, tuum nobilitauit ingenium. Libri aliquando exierūt, quos ad te mitto, iuuenis optimi, et insigniter eruditi, Onuphrii Panuini. non dubito, cum legeris, quin meum de illius praestanti virtute testimonium confirmes. habet alia in manibus, unde fructum studiosi capere vel maximum possint. quae ut edat maturius otium illi exoptare, qui rerum nobilium scientiam appetunt, omnes debent. Vule. Venetiis.

E I D E M, Patauium. 27

Vix credas, quam non facile mea manu litteras conficiam, & quam facile, cum vtor amanuensi, fluat oratio. itaque scripsi ad Seuerum laboriose, quod inambulas, ut antea solebam, minimo negotio dictassem. discesus ille meus, magnorum index malorum, ut ab amicis tunc, falsa coniectura ductis, putabatur, familiares meos, quorum uti opera consueueram, Podocatharum, Fasnardiam, postremo etiam Nicolaum Crentensem mihi ademit. filium habeo, sed puerum adhuc, & imbecillo corpore, & occupatum satis domestica cura. itaque posthac, nisi quid occurrat grauius, perquam raro, et quam breuissime scribam. venio ad litteras tuas. Reuersus e Foro Iulii, quo exieram non tam negotii, quam valetudinis causa, reperi librum tuum, Variarum lectionum, quem apud Sixtum Medicem, communem amicū, excellentem virum, reliqueras. noli expectare in-

K 2 dicium

dicium meum. malo enim te ab aliis, quid de tuis studiis, quid de ingenio existimem, quam a me ipso, cognoscere. unum tamen illud non minus vere, quam libenter dicam, nihil me adhuc in hoc genere legisse ornatius, nihil eruditius. Quod autem quibusdam in locis & a me dissemis, & egregiis idem laudibus me ad caelum tollis: parcius utrumque vellem: sic enim utrumque fortasse verius: ago tamen gratias, quod publicam utilitatem rebus omnibus anteponas: quam ego antea consuetudinem, acceptam a patre, seruavi mea sponte, & seruabo posthac, tuo inuitatus exemplo, diligentius. De nummis, cum lubebit, atque adeo ut lubebit. urgeri enim eum, qui cum tibi usus intercedat, ne si quidem ipse velis, facile permetterem. Dionysius paullo serius, quam putaueram, absoluetur. moram iniecit commissa inter operas rixa, absente me. neque tamen hac satis leui, sed aliis adductus causis, quae ponderis longe plus habebant, paene totum consilium abieceram. nunc, te hortante, ac monente etiam ut celeriter, quid agam? quid autem, nisi quod ipse cupis? quod certe mea causa cupis, urgebo igitur pro virili, nec impensae parceretur, aut labori. De Gallorum Rege, dolui sane grauius dolorem vestrum: sed humana quae sunt humaniter ferenda. nec vobis do-
Etrinae remedia, nec ea, quae sumuntur a rerum usu, deesse possum: & tu mihi miranda narrasti de Cardinalis pietate in Deum: quo ille se, vosq. omnes praesidio aduersus iniquitatem fortunae praeclare tuebitur.
Vale. Venetiis.

IOAN.

IOANNI. BAPTISTAE

RHAMNVSIO

XVIRVM. CONSILII. A. SECRETIS

Venetias.

28

CUM a nobilibus viris, in haec loca uel animi, uel negotii causa confluentibus, dignitatem illam, quae maxima est in nostra ciuitate, ut arcanis praeesse, praestantissimi Xuirum Consilii, summo omnium consensu tibi esse delatam accepissem; magnopere sum laetatus, tum pro ea, quae olim inter te ac parentem meum mutua semper fuit beneuolentia, tum pro mea in te uetere obseruantia, orta primum a meo de tuis uirtutibus iudicio, deinde a te multis, ac uariis, ut tempora tulerunt, erga me, meosq. officiis uehementer aucta. atq. ego meam tibi paene incredibilem laetitiam, ex honore tuo susceptam, statim literis declarassem, nisi, autumnus iam exeunte, breui futurum sperassem, ut, in urbem reuersus, praesens praesenti gratularer, neq. solum ex oratione, sed ex uultu, & oculis, qui sunt indices animi, de meo in te studio, intimoq. sensu indicares. hac ego me non multorum dierum expectatione cum sustinerem, ecce tibi amicorum litterae, ecce nuncii, proximis comitiis tulisse te fructum anteaetae uitae omnis, tot peregrinationum, quas in Galliam, ad Heluetios, Romam, etiam ad hostes armis infestos reip. causa suscepisti, tot consiliorum quae a te fluxerunt ad augendam, quantum in te fuit, patriae di-

K 3

gnitatem.

gnitatem. cum enim longo post interuallo in eum locum rediisses, unde magistratum designatorum nomina recitantur; consurrexit senatus vniuersus, ex tuo conspectu mirifica voluptate perfusus. quae tum animorum omnium perspicua significatio ita te commouit, ut illico magna vis lacrumarum exciderit, intuenti beneuolentiam tuorum ciuium, quos in omni aetate dilexeras, quibus iam, inde a prima adolescentia, parentis tui, summi viri, exemplo, omnibus officiis inseruieras, nulla tibi, praeterquam amoris, praemiorum spe proposita. Fuit igitur eo die mutuum, & aequale gaudium, senatus primum, ubi tuam, sibi vocem claram pariter, & suam, in pronunciandis magistratibus vidit esse restitutam, quam post obitum magni Cancellarii Francisci nimium saepe desiderauerat; deinde tuum, cum illa tibi cum incredibili gaudio, ac paene cum clamoribus vniuersa consurrectio, quid de te tui ciues existimarent, quo te studio, qua caritate complecterentur, ostendit. Enim vero laetari te puto, quod quidem iure facis, summo dignitatis gradu, quo te tua virtus extulit, ut arcana illa tractares, quae ad reip. salutem, & huius magnitudinem imperii pertinent. verum hoc saepe vidimus aliis quoque contingere, optime scilicet de patria meritis: nec enim honor in quemquam, qui sese magnis in rebus non saepe probauerit, confertur: studia vero tanta, testimonium tam illustre, consensum eius modi quando ulla omnino in re, vel in quemquam omnino hominem vidimus, aut audiimus? itaque cum ad meam priorem laetitiam nihil addi posse existimassem, nunc tamen accessionem haud mediocrem noui gaudii faciam esse confiteor: ut eam testari litteris, ac tibi, quoquo modo

modo licet, indicare *sim coactus*. video enim te uno die, atque una plane hora mercedem cepisse non modo meritorum tuorum, quorum habes testem uniuersam paene ciuitatem, verum etiam perpetuae tuae modestiae, cum amore, ac iudicio patriae contentus, nulla unquam commoda, nullum honorem tibi esse petendum statueris; ut admiratio simul & dolor propinquos, ac familiares tuos fere omnes afficeret, quod ista dignitate, quae tibi nunc in credibili omnium studio delata est, ornari antea nolisses. quorum te denique, ac simul omnium ciuium, voluntas, atque cohortatio vicit, & ad honorem exoptatus, atque accersitus accessisti, nulla usus prensatione, nullis precibus, tua virtute commendatus, quae tibi omnia omnium suffragia facile impetrauit. quando igitur, honore accipiendo, patriae satisfacisti; dabis eidem optanti, atque petenti, ut ad tuendam ac sustentandam senectutem, tuam quidquid curae, quidquid potes industriae conferas; ut & tu mirifico illius in te studio, & illa tuo excellenti consilio, tua rerum omnium publicarum scientia frui quam diutissime possit. idem te priuatim rogant necessarii tui, proprie vero filius adolescens, in quo videtur tua virtus efflorescere, tua iam probitas, tuae ad optimas res propensio voluntatis agnoscitur. Ego autem cum nemini in te amando, colendoque concedam, iisdem totor precibus, ne tuam aetatem, confectam iam annis, & laboribus pro rep. susceptis, rebus agendis nimium vexes. vereor enim, (ut omittam publici muneris curam) ne plus officii amicorum causa, quam sustinere fortasse possis, tua tibi imponat humanitas. quod si desidiarum odisti; & quae aliis quies videtur, laborumque, ac molestia

rum quasi portus expetitur, eam tu ignauiam appellas;
 nec homini quidquam vitandum magis existimas: habes
 in quo te exerceas: duo supersunt, aliquot iam annis insti-
 tuta, de itinerum & navigationum diuturno ac perdiffi-
 cili cursu praeclara volumina: quae si ad primum, quod
 omnes libenter, nec sine tua summa laude, legunt, aliquā-
 do adiunxeris; egregiam, & maioribus nostris, multisq.
 ante saeculis reconditam doctrinam, praeclaris imagini-
 bus expressam, orbi terrarum patefacies, tuoque nomini
 gloriam paries haud paullo maiorem, quam quae tibi a
 cunctis honoribus & magistratibus, vel magnificentis-
 sime gestis, manare umquam possit, eoque magis in hoc
 studium debes incumbere, quod omnem amoenitatem,
 quae solet ad scribendum inuitare, tua tibi Rhamnusia
 villa abunde suppeditat. itaque frueris eodem tempore
 Marsangi Musis, deliciis, ac amoribus tuis: & no-
 bis, posterisque, maxime vero Paulo consules filio tuo;
 cuius omnes egregiam indolem amamus, & exorientem
 uirtutem admiramur: quem a te, nisi graue sit, etiam at-
 que etiam meo nomine cupio salutari. Vale. Ex Ple-
 be Saccii, pridie idus Oct.

M. ANTONIO. NATTAE

Mantuam.

29

GRAVI ac diuturna oculorum valetudine impe-
 dius, feci tamen, ut litteris tuis, humanissime atque ele-
 gantissime scriptis, quamprimum responderem. Ego
 te, Natta, ex illo tuo praeclaro libro, quem de Pul-
 cyo

chro inscripsisti, iampridem coepi colere. mea tibi
 voluntas non patuit: ceteris, quid de te sentirem, sae-
 pe in sermonibus declaravi. Nec vero mirari satis pos-
 sum, qui potueris tantos processus in philosophia face-
 re, homo versatus, assidueque occupatus in tractando
 iure civili: in quo ipso te excellere, & audio de multis,
 & res indicat: quandoquidem certatim viri Principes
 te accersunt, summisque muneribus praeficiunt. Equi-
 dem, ut benevolentiam tibi meam praesens praesenti
 patefaciam, cupio Mantuam excurrere: sed me de-
 terret valetudinis infirmitas. tametsi affirmabat is, qui
 mihi tuam epistolam reddidit, posse me a meis laribus
 Mantuam usque non incommode navigare. ita-
 que audebo fortasse. igniculum enim desiderii vix
 iam fero: & si quid est in itinere difficultatis, homini
 praesertim imbecillo, vincet amor in te meus. De tuo
 libro, quid iam expectas ut rescribam? vides ne me
 in acre tuo totum esse? impera mihi quod vis; & ute-
 re me, quantum vis: subibo omnia, & perferam tua
 causa. Meum librum de legibus ad te mitto. us-
 dem typis, si tibi placuerit, utemur in tuo libro. sump-
 ptus omnino maior erit, quam si littera minor esset: ve-
 rum hoc tui consilii, ac voluntatis est. Statue arbitra-
 tu tuo: perpende magnitudinem libri: deinde signifi-
 ca, quid ualis. mitto etiam aliud characteris genus, ut
 alterutrum deligas. utrumque enim in solii, quod
 aiunt, formam apte conuenit. tametsi dignitas maior
 est in maiore. De ratione sumptus, si numerum pagi-
 narum tui libri significaueris, & simul versuum in una-
 quaque pagina, & litterarum in quolibet uersu; facile
 summa

summa fiet, & ad te scribetur. Num quid praeterea? hoc. de meo libro quid sentias, cupio significes. vix enim credas, quam a iudicio tuo pendeam. Vale.

E I D E M, Mantuam.

30

PRAECLARE Hec̃tor ille apud Naeuium: Laudari abs te pater cupio, laudato viro. possum ego nũc idem vsurpare. Video me laudari, a quo viro? a M. Antonio Natta, in quo sunt ingenii, sunt animi, ac virtutis ornamenta plurima. ego porro aliquid fortasse, si cũ aliis conferar, videri possim: cum vero ad te vnũ cogitationem conuerto, vix credas, quam mihi ipse displiceam. Quare permitte mihi, vt eas laudes, quas in me contulisti, reũciam; aut ipse maiores in te transferam. nam mihi, vtrumque nostrum aequa lance pendere, magni negotii non est. vt vt est, amo voluntatem tuam. ea mihi est, eritq. semper, vt debet, antiquissima. De aduentu meo, muto consilium in horas singulas. tu me allicis, vel attrahis potius reuocat, & retinet valetudo. cum ad te specto; nauim conscendo, vehor, appello Mantuam, tecum sum. sic est amor, & illae, quae fluunt ex amore, voluntates. rursus, cum ad me conuerto, & meam imbecillitatem intueor; qua macie sim, qua tenui cute, quam natura mollis, & procliuius ad morbos; relanguesco paululum, & quasi nauim incitatam leuiter inhibeo. vides ad huc, & sentis fortasse, tentari corpora frigore, leui quidem, sed tentari tamen: vides perflari caelum ventis; rationem esse temporis prorsus incertam, & inconstantem.

qua e

quae firmiores non timent: ego valetudinarius nisi timeam, parum videar me nosse, parum uitae consulere, quod nec humanitatis est, nec satis pium; cum nos iussit ille summus Imperator quasi suos milites in hac statione, donec ipse reuocauerit, permanere. Calores, ut spero, quae mea solet esse anniuersaria medicina, me mihi restituent. itaque Iunio ineunte, aut eo certe mense, te, ut spero, complectar. sin videbo sine meo periculo fieri non posse, ut in uiam me dem: docebo te litteris, quid consilii ceperim. Tuum librum tractabo qua licebit diligentia, animo certe erga te singulari. Vale. Venetiis.

E I D E M, Mantuam. 31

ADEO ne erravi, & lapsus sum in subducenda ratione, ut de foliis quinquaginta coniecero, quae nunc octuaginta fore uideo? pudet indiligentiae meae. uerum, ut ut est, commodo meo rem suscipere non possum, nec audeo recusare; ne mea fides in dubium apud te ueniat. itaque peto a te, ut cum tua ratione meam quoque ducas nec exigas a me plus, quam res & fortunae meae patiantur. Nam, quod ais, redituram ad me pecuniam cum fenore, libro uendito: uidelicet communi quada, non propria me regula metiris. non enim ego, ut alii, qui libros imprimunt, habeo statim certos homines, qui eos diuendunt, & longinquas in urbes, regionesq. disseminant. uenduntur hic statim a meis omnes ita paruo pretio, ut lucri quidem minimum, sed minimo simul labore, minima molestia fiat. Meum ergo librum iudem, inquis, uendes. De doctrina

doctrina libri tui, de elegantia possum ego facile iudicare: de venditione quis praestat? an nescis, libros Latinos, optimos veteres, ita nunc iacere, ut paene sordium in genere putentur; vix iam Ciceronem ipsum, Caesarem. Sallustium legi, a multis etiam ne legi quidem, planeque contemni? quare noli mirari me tam esse diligentem in iis rebus, quas me docuit usus paene quotidianus, & in quibus non licet esse sine magna mercede negligenti. De tempore, quod urges: facultatem imprimendi non concedunt, libro non inspecto. atque vinam, inspecto, concedant, quod si dixi eos me faciles habere: non significavi, posse me, libris non lectis, impetrare ius imprimendi, sed consequi, statim ut legantur: quod ita multis non contingit. saepe enim vidi nonnullorum scripta, apud eos, quorum potestatis haec tota ratio est, per multos menses custodita, neque legi, neque reddi. Mittas igitur librum oportet uniuersum: mecum autem amice ages, pro ea, quam tu doces quotidie praeclaris exemplis, aequitate. ita, si eravi, non luam grauius, quam debeo: sin error a me non est, a te uero aucti libri magnitudo tota pendet; ius tuebere pro tuo instituto, & amico simul consules. Vale.

E I D E M, Mantuam.

32

U T concludam paucis; quando nec mihi ad scribendum, nec tibi ad legendum otii satis est; si librum miseris, imprimetur. nolo enim meam apud te fidem in dubium vocari: nihil est tanti. de tempore, incertum est. pendet, ut saepe iam scripsi, haec tota res ab aliena uoluntate. crediderim tamen, in tre mensem confici & expediri rem

irrem posse, tum studio nostro, tum intercedentibus amicis, nobilibus uiris, & gratia florentibus. libro non inspecto, facultas imprimendi numquam dabitur. scio nullam in eo labem esse, quae legentium animos possit inficere. noui tuos sensus, mores, probitatem. quae ego pluris etiam in te aestimo, quam eam doctrinam, qua parum fortasse aliquem, superiorem certe habes neminem. uerum mos est gerendus consuetudini. communis haec est, non tua praecipua condicio. Ad me autem quod attinet, uoluntati tuae, in qua uim esse cupiditatis intelligo, nulla interiecta mora satisfiet. Vale. Venetiis.

E I D E M, Mantuam. 33

HODIE, tribus medicis adhibitis, accurate disputatum est de meo exeundi consilio. rem probant, sed illud addunt, totam aestatem dandam esse otio, iucunditati, exercitationibus modicis; nec redeundum in urbem ante mensem Octobrem, itaque uehementer animi pendeo: nec quid consilii capiam, satis habeo exploratum. in hac dubitatione uenit in mentem de tuo libro; quem, si exeo, uideo fore, ut serius fortasse, quam tua uoluntas ferret, imprimatur. quare monendum te litteris existimaui, ut aut statim eum mitteres, aut imprimendi consilium differeres. Ego hio uel tua unius causa commorabor, dum liber absoluat. quod si statuis de subita impressione; qua uelis forma, quo charactere, quo numero, significat. Suade rem omnino, ut aliorum opera, me absente, uteris sed ti meo mendas, & sordes; quibus inquinari, & corrumpi

tua

tua scripta per operarum incuriam, nolim: quod tu iam sensisti in libro de Pulchro; qui tractari non potuit indecentius. His litteris cupio a te primo quoque tempore respondere: ut, quod ad me ipsum attinet, certi aliquid possem statuere. meam enim uoluntatem ad tuam accommodabo. Vale.

E I D E M, Mantuam. 34

LITTERIS tuis perlectis, aggressus sum legere tuum libellum. legeram iam antea Venetiis, allatum ad me a Carreto tuo. mirifice semper placuit. genus enim scribendi non minus elegans, quam eruditum, complexus es. Quod ad typos attinet, uideo paullulum detritos esse uetustate: itaque specie illa, quam recentes habere solent, prorsus carent. & compactum nimis aramentum uidetur: ex quo fit obscurum quiddam, quod legentium oculos offendat. Menda quaedam deprehendi nimis foeda, nec eiusmodi, ut dissimulari possint. cuius incommodi causam puto tibi non latere. saepe enim hic, dum imprimitur, uel emendationi nemo praeest, uel praeesse solet homo mercenarius, & parum litteris instructus, & is, cui pecunia, quam fama, sit antiquior. nos tamen, et quia de existimatione laboramus, & quod te nimium diligimus ob tuam probitatem, nimiumque colimus ob eruditionem, enitemur, & contendemus, quantum feret acies oculorum nostrorum, ut satis in hoc genere fiat tuae uoluntati. ad quam tu me diligentiam tacite uocas in tuis litteris. laudas enim, & Aldi filium agnoscere te dicis.

quam

quam sunt haec acuta, quam me pungunt, atque excitāt ad omnem laudem, non modo hanc propriam typographiae, quae iam in nostra familia inueterauit, & quasi debita, postulatur. Sed heus: adhuc ne tibi meus liber est in manibus? atqui abiectum iam a te, & latere in angulis, obductum puluere, existimabam. nec tu is es, cui bonas horas male liceat perdere, homo assiduus curis, maximiſque negotiis diſtrictus. itaque peto a te, hoc mihi des, ne tuum otium a ſummis rebus ad meas ineptias conferas. ſatis iam obſeruantiae in te meae, ſatis humanitati tuae dediſti. hoc ſi plus cupiam; non agam ſatis modeſte; nec te noſſe, nec me ipſe uidear. Verbum optabam in epiſtola tua de Carreti uale tudine, optimi uiri, ut uiſus ſum, conicere, tui certe ſtudioſiſſimi. nam affectum peſſime, ac paene deſperatum dixeras, cum eſſem Mantuae. Mecum actum eſt in hac peregritatione prorsus infe liciter. incidit in morbos tota paene domus: ſed uxor cū periculo vitae integrum iam menſem miſerrime iacuit: nec dum video quid ſperem: cum iactetur acerbiffima febre, nec habeat ſpatium ullum ſeſe colligendi. ego, cum non optime valuerim corpore, neque nunc valeam, quo fuerim animo, quo nunc ſim, vel me tacente potes exiſtimare. fortitudinem laudo: ſed eam in me ipſo nunc re quiro. vincor enim aduerſis, nec poſſum plane, quod tu potes, a philoſophia illa vera, quam Ariſtoteles igno rauit, praefidium petere. Sed longius progredior. tuas litteras expec to. ſolatium fortaffe aliquod in malis affe rent. Vale. Aſulae.

E IDEM,

MEVM in reditu consilium hoc fuit: ut Mantuae conscenderem, idq. maxime tui salutandi caussa; tum, ut, quod antea de tuo libro imprimendo inter nos conuenerat, id comprobaremus. non licuit ob uiarum difficultatem, & frigora. scis enim, quam tenui cute sim, quam imbecillo corpore. Caneu igitur, & meo, & meorum consilio, tranquilla tempestate, conscendi Mantuamq. praeteruectus, uiginti, opinor milliariorum interuallo, Clodiam triduo incolumis appuli. hic me amici, & propinqui laetitia incredibili exceperunt, qui de reditu meo, saeuiente iam hieme, paene desperassent. negotia nunc repetimus: quae cum neque pauca sint, neque ponderis exigui; nullū tamen habeo prius, nullum antiquius eo, quod ad te pertinet. vide igitur ipse quid statuas. nam, si perstas in sententia: mittendus liber est ante medium Ianuariū: quo spatium habeamus eos alloquendi, ac rogandi. quorum iniussu nemo imprimit impune. urget etiam Philippi Regis orator de libro edendo, quem ei misit, homo, ut aiunt, Graece Latineq. bene sciens, arcanorum ipsius Regis particeps, Gonzalus Perez: cui roganti per litteras, ut omnino suus liber meis typis exeat impressus & in eo sitam ac locatam suae laudis aliquam partem, existimanti, deesse non possum, pollicitusq. sum: & persolui fidem. sed cupio tuum librum anteiri, si tu vis: sin commodius uidetur, in aliud tempus differri, quamprimum litteris significa. ego id unum specto, tibi ut satisfaciam. Vale.

EIDEM,

E I D E M, Mantuam. 36

NONDUM redditus liber est: nec mea tamen in ea re diligentia defuit. deuorandum est hoc utrique nostrum, quidquid est molestiae. nam me quoque mora longior incipit ita grauius afficere, vix ut feram: fero tamen quia Nattae negotium est. alioqui hastas mehercule, ut ille inquit, abiicerem. sed obduremus paucos praeterea dies. si res ducetur, librum repetam, & cum pecunia tibi remittam. Ama me; & tibi persuade, te mihi esse in animo assiduum, in oculis, in ore. Vale.

E I D E M, Mantuam. 37

NEQUE nihil respondebo, neque tamen id, quod tu exoptas vehementer, ego autem sic, ut tecum in cupiditate contendam. Librum habet in manibus homo eruditus egregia sacris litteris, & philosophiae scientia excellens Sixtus Medices: cuius omnia iudicio propter doctrinam, fidei vero ob integritatem recte committantur. is legit accurate; perscrutatur omnia: examinat, et pendit acerrime. nihil adhuc, ut saepe iam mihi significauit, alienum a recta sententia deprehendit; tuamque mire laudat perperam tam longo in opere eloquentiam, singulari doctrina coniunctam. is quid tuo de libro sentiat, suo testimonio, ac iureiurando cum ostenderit, aggrediemur: quod abesse iam longe vix potest. Te interim rogo, optime Natta, ne quid alienae culpa in me transferas; nec me curare parum grauius existimes ea, quae ad te pertinent; quibus afficior

L in

in utramque partem, non equidem aequè ac tu, sed, vno
te excepto, grauius certe, quam ceteri. Vale. Venetiis.

E I D E M, Mantuam. 38

ALIQUANDO is, qui tuum librum accurate
legit, absoluit epistolam eam, qua tuis litteris respondet.
de re tu iudicabis: de homine, sic habeto, virum esse bo-
num, praestanti humanitate, singulari doctrina, praeco-
nem vero laudum tuarum. quare est sane, cur ei gratias
agas, quod te ornet efferatq. laudibus: quod a me iam,
qui te vnice diligo, tuo nomine factum est. quamprimum
autem cupio a te responderi; ut, si quis remanet scrupu-
lus, auferatur, & exeat tuus liber bono publico, tua non
mediocri gloria: quod vtrumque fore confido. Bonami-
nus neque dum venit; nec, venturus ne sit, aut quando sit
ex eius ad me scriptis proxime litteris licet coniicere. tu
conoscas: eiq. ad me fasciculum dabis epistolarum mea-
rum; quas tamen, tu quoque, opinor, mecum sentis,
comprimendas potius, quam diuulgandas: sed efflaga-
tantibus, praesertim amicis, negari iam diutius non
possunt. Vale.

E I D E M, Mantuam. 39

PLVRIBVS tecum verbis agere non licet: ita
multis distrahor curis. vnum hoc: is, qui tuum librum
legit, idem tuis litteris, disertissime scriptis, respondebit.
quod ut celerrime faciat, operam do, quantum in me est.
tuam

tuam causam certe, ut mihi videtur, preaculare tueris:
& quantum tibi ex optima mente tantum ex ingenio,
& doctrina laudis accedit. Vale. Venetiis.

E I D E M, Mantuam. 40

PLACERE tibi argumentum de Republica, & eius libri partem, epistolis meis insertam, abs te, tali viro, tantopere laudari, vehementer gaudeo. tua vero cohortatio, ut absolvam institutum, animos illa quidem addit: sed, o mi Natta, si vides quibus premimur & curis, & laboribus, fortasse, si modo vis me vivere, aliter sentis. incitamur voluntate, consiliis, & hortatibus amicorum, gloriae nonnulla cupiditate: nec omnino diffidimus ingenio; verum illa, qua tu excellis, quae in tuis & dietis & factis elucet, prudentia dissuadet. me natura per tenui finxit corpore: studiorum accessit non mediocris labor; ex quo imbecillitas, & morbi. quid res domestica? quae, quo est angustior, eo tuenda diligentius est. quid typographia? quam ita mihi tractandam intelligo, non ut omnia ad utilitatem, sicut multi, sed pleraque ad meam existimationem referam, ac dignitatem. quo proposito, nihil est operae, nihil studii recusandum: ac saepe, ut ait poeta ille tuus, sudamus, & algemus. Amicis etiam vel salutantibus horae dandae sunt, vel aliquid petentibus officia tribuenda. qui si excludantur, aut reiiciantur; sane consuletur otio meo, rebus meis, valetudini meae; sed ubi humanitas? quae quam sit hominis propria, nomen ipsum indicat. Iacent igitur inchoata, plane rudia, temere vel dissipata, vel confusa, mea scripta; quae non-

L 2 numquam,

numquam, sicuti mater languentem filium, eum dolore tacitus adspicio; opem ferre, quam videntur postulare, non queo. Quare, si quid apud te hominis tui amantissimi salus est, non debes me ad scriptiorem vocare, tot assidue, tam variis, tanti momenti occupationibus distentum adiuua me potius consilio, si potes: aut minue molestiam consolando; opta saltem, (& hoc ipsum significa.) ut haec, quae nunc sustineo, perferam, & is, quem volumus, principis exitus respondeat. id quod, nisi fauente, qui fons est omnium bonorum, Deo, sperare non licet. Consultationes tuas, si quae nondum editae sunt, mire aueo legere. nam, cum in iis, quae iam sunt editae, praestare te omnibus, qui memoria nostra ius civile litteris mandarunt, cum scientia rei, tum sermonis elegantia, mihi persuadeam: intelligo posthac tua scripta longe fore meliora. non ago tecum blande: metior veritatem ipsa re, & ut sentio plane loquor. valde, mi Natta, hoc biennio in Latina lingua proficisti: quotidieque, ut ex epistolis tuis facile coniicio, ad veterem illam eloquentiam propius accedis. itaque videre mihi videor, ac prorsus video, quantus in iure civili explicando, si studium adhibueris, esse possis. quod ut facias, auctor tibi magnopere sum; si modo tu in tua laude quemquam, praeter te ipsum, auctorem, hortatoremue expectas. Vale.

E I D E M, Mantuam. 41

LITTERAE tuae, quas idem binas tabellarius attulit, facile tuam edendi libri, quem efflagitari iam a multis

multis audio, non mediocrem cupiditatem declarant. nec
 me tamen studio tibi concedere velim existimes. nam et
 εὐπικδεῖν quandam commonuit iam in sensibus meis
 virtus tua; & res ipsa, de qua tantopere laboras, com-
 mendationem habet a se ipsa, nec iuum officium apud
 me, aut omnino apud quemquam bona mente praedium
 desiderat. Unde igitur, inquires, tot dierum prolatio? Equi-
 dem culpa vaco: nec in officio praestando Sixti nobis hu-
 manitas defuit: sed ab eius voluntate pendemus, cui to-
 ta demandata facultas est. is cum Sixti primum, deinde
 etiam nostro se acquiescere testimonio confirmasset; Six-
 tum etiam ut optime de Christiana doctrina sentientem,
 sacrarumq. litterarum disciplina perfectum, laudibus
 extulisset; illud adiunxit; sibi tamen esse concedendum,
 cui ratio temporum paullo seueriorem, quam ipsius vo-
 luntas ferret, personam imponeret, ut librum leui-
 ter attingeret: quod esse perpaucorum dierum nego-
 tium pollicebatur. negandum non fuit. egimus etiam
 gratias, quod ita blande peteret, ut suam obliuisci po-
 testatem, humanitatis causa, videretur. Nunc tibi,
 mi Natta, deuoranda est haec non multorum, ut spe-
 ro, dierum mora. vides, hominum recentiarum libri,
 quicumque de sacris rebus loquantur, quam diligenti
 hodie trutina perpendantur: vides quam multi, nullo
 personarum discrimine, in iudicium vocentur, quam
 pauci mox elabantur. tolle, obsecro te, festinationem
 in re tanta: & habe rationem temporis: & utriusq.
 nostrum otio, (nam mea quoque res agitur) breui in-
 terposita mora, consule. Nam, quod iniecasti de tua
 laude, opinor ut quasi dormientem excitates, id mihi

L 3 nouam

nouam diligentiam non attulit, potius admiratione quam-
dam, cur ea, quae ad tuum decus pertinent, curari a me
frigide suspiceris. Etiam appellas me ob testimonia epi-
stolarum mearum. quasi vero ego te diligam constan-
tiae causa, non iudicii. quod si te non esse dissimilem tui
putaueris; cuius etiam probitatem, doctrinam, eloquen-
tiam assidua studia vehementer augent: me quoque, qui
aliquando in te sui, eundem fore semper, hoc est, amore
incensum, atque cupidissimum gloriae, debebis exstima-
re. Commentarios meos quod euoluas libenter, amice fa-
cis. si vero etiam, ut scribis, aliquid ad tuam utilitatem
excerpis; magni facio industriam meam: quam tu, vir
ingenio, & eruditione summus, modo non improbares,
satis habebam: fructum ut ex ea caperes, vix umquam
speraui. itaque scribam posthac paullo fidentius, iudicio
tuo confirmatus: & auctoritatem tuam, si quis contra sen-
serit, pro sexcentis rationibus opponam. Litteris tuis, ca-
ue putes, non esse a me responsum, quia neglexerim. ob-
stitit occupatio: quae diem quandoq. totum eripit a mane
ad vesperam. quod etiam si non scriberem, tamen opina-
ri, tuae prudentiae, & humanitatis esset. Vale.

E I D E M, Mantuam. 42

AD OCVLORVM dolores, quos diuturna con-
suetudine satis iam modice fero, accessit molesta febricu-
la, periculi tamen expers, ut medicus affirmat. itaque co-
nor breui respondere litteris tuis, elegantissime, & huma-
nissime scriptis. Liber statim traditus est viro optimo,
atque

atque eruditissimo, communi amico, Sixto Medici. is, licet occupationibus districtus, tamen & mea, & tua causa pollicitus est, operam se daturum diligenter ut eam partem, quam tu addidisti, ac mutasti, quam citissime legat. quod cum fecerit; rursus ex eius testimonio ius erit imperandum libri diuulgandi. scis enim, quam seuera hodie sit librorum omnium examinatio, quam sint, ubi quid scribimus, ambigua cauenda: ne qua omnino secus interpretandi, trahendiq. in deteriore partem. occasio praebeatur. Sixtus me diligit, meaq. causa valde cupit, de te autem honorifice & sentit, & loquitur. itaque quod ad ipsum attinet, nauigamus in portu. Academia tuum officium amplectitur, ac laudat; sua vero a te, singulari viro, probari & magni fieri instituta, mirabiliter gaudet. Plura volebam, ductus suauitate sermonis, cuius imaginem habet epistola: sed interdictum est, non modo ne quid scribam mea manu, verum etiam ne multa, nisi necessario, dicam. Vale.

E I D E M, Mantuam. 43

HABEO, quod petieram. sedasti animum meum consolatione, consilio iunxisti. nihil sapientius, nihil humanius epistola tua. & cum multa sunt a te grauissime, atque ingeniosissime commemorata: tum vero mirifice sum exemplo tuo commotus, quem statuo imitari, quantum in me est, licet meae probe quidem conscius infirmitatis: cui si Deus aderit, quod equidem spero; vincemus humana omnia, & triumphabimus in aduersis. Afferet ad te tabellarius cum his litteris iudicem, quem petis, mis-

L 4 sum

sum ab Academia, tui studiosissima. tradidi enim legendam epistolam tuam: nec improbavit quisquam. quid? nemo non extulit amplissimis laudibus. ego autem & qua sim ex eorum iudicio effectus laetitia, & quid ipse de tuis existimem scriptis; quia te puto illud, vel metacente, pro amore nostro suspicari, hoc autem ex meis superioribus litteris cognovisse; non exponam hic pluribus verbis. tantum agam gratias de ista tam in me propensa voluntate, excellentique industria: quarum alteram longitudo litterarum tuarum, alteram elegantia declarat. Vale.

E I D E M, Mantuam. 44

B I D V M hic futurus sum: nec enim diutius licet per valetudinem: nec venissem leuibus caussis. Liber tuus propediem praelo committetur, & diligenter emendabitur. angor equidem, quod abesse cogar, quod accidit profecto non minus contra voluntatem, quam praeter opinionem: sed haec in manu nostra non sunt. ducimur enim, vel trahimur potius fatorum vi. itaque humana omnia ferenda quamquam non haec tibi, quem religio probum, doctrina prudentem facio, sed mihi ipsi, ab iis praesidiis, quae te muniunt, parum instructo, tamquam intus cano. De rebus meis, de valetudine, de studiis, exigit omnino amicitia nostra, ut aliquid significem: sed neque nunc satis otii suppetit: neque, ut uere dicam, libenter scribo, quae tu non libenter legas. meliora tamen omnia paucis diebus fore videbantur: itaque ueriores a me litteras exspectato.

ſpectato. Haec dictavi propere, multis diſtriſtus nego-
tiis, animo curis impedito. Vale.

E I D E M, Mantuam.

45

LEG I, quas remiſiſti, epistolae meas, & correxi
leuiter, ut homini licet occupato. de editione, quod hor-
taris, ut omnes potius, quam, ut ego ſtatueram, vnā,
aut alteram: ita faciam, non ſpe laudis, (ſcriptae ſunt
enim, quod res ipſa indicat, indiligenter, ac raptim) ſed
quia notari eſſe aequis & iniquis noſtram amicitiam vo-
lo: quae me ornat iudicii tui teſtimonio. cum tamen ad iu-
dicium ſingularis accedat humanitas. Vale. Venetiis.

EPISTO-

EPISTOLARVM
PAVLLI. MANVTII

LIBER. QVARTVS

ILLVSTRI. COMITI

MICHAELI. TVRRIANO

CENETENSI. EPISCOPO

Cenetam.



NGEBAR animi, nec fieri quidquam
posse me vno miseriùs opinabar: ita mul-
ta hoc anno praeter expectationem, prorsus
aduersa meis rationibus, obtigerant:
fratris primum amantiùs, deinde filioli suauissimi inte-
ritus, vxoris morbus, inualetudo mea, rei familiaris in-
commoda. quam facile, nullo paene strepitu, rerum mea-
rum conuersus orbis est. de fratre, & filio iam fero mo-
deratius; vel quod, vt solet, medetur dies; vel quia, quod
aeterna lege Deus constituit, id abrogare velle non so-
lum iniustitiae, verum etiam imprudentiae videtur esse.
vxor conualuit: ego satis firmus. domestica vero damna
quae sarciri vix vmquam arbitrabar posse, facile com-
pensat amor in me tuus; cuius mihi recordatio molestias
omnes diluit; quandoquidem vis me ad omnes casus (re-
cordor enim tua verba) subsidium in tua benignitate ma-
ximum constituere. itaque leuatus a te grauissimis curis
premi iam onere officii me sentio: in quo sustinendo viri-
bus enitar cunctis & animi, & ingenii: tantum ne im-
mo

mo etiam iis, quas beneuolentia erga te nostra, & singularis addet obseruantia. quid porro tam difficile, aut tam amplum est, quod incitata studio voluntas non assequatur? verumtamen in hac re sentio esse haud paullo difficilius mihi satisfacere, quam tibi. te enim nihil in conferendo beneficio spectare praeter ipsam virtutem, quae suis gaudet ac fruitur bonis, nihil extrinsecus assumit, satis mihi multo antea persuasum est; praeterea nulla re indigere, non gloria, quam iam pridem abundas, non diuitiis, quas & possides iam, & contemnis. ego vero, qui & ante annos sex, quo te primum die sum allocutus, eo ipso die benignitatis tuae praestantiam non vulgari munere sum expertus; & nunc ab eadem benignitate multo etiam maiora, te iubente, cogor expectare; prorsus anticipi cura distrahor, qui neque gratiam tibi umquam referre, neque nuda voluntate contentus esse possim. Succurrunt enim multa, quae libenter cogitem: primum humanitas tua, qua me semper complexus es; deinde liberalitas, qua subleuasti; postremo consolatio illa, Christianae pietatis, & sapientia plenissima, qua me quidem proximo Quintili mense, cum ad te honoris causa Cenetam accessissem, afflictum erexisti. atque haec quibus meis erga te officiis? nullis omnino, salutatione excepta, quae ipsa mihi tum utilis ex prudentia, atque eruditione tua, tum etiam ex dignitate perhonorifica fuit. Quae cum omnia colligo; eximiam istam, planeque diuinam beneficentiam, insitam tibi, vel potius ingeneratam a natura, auctam doctrina, usu confirmatam, atque perfectam, satis admirari non possum. Et simul ad quosdam, opibus affluentes, multis imperantes nationibus

bus, cogitationem conuertens, doleo vicem bonarum artium, quae deferantur ab iis, quorum patrocini si uterentur, fructum retribuerent eum, qui est omnibus imperiis anteponendus. quid enim est immortalitate praestantius? quis autem eam, nisi beneficio litterarum, consequitur? laterent in tenebris, obruti vetustate, Caesares, & Alexandri, plane omnis antiquitas, nisi rerum praeclarissime gestarum, quas cum audimus, imitandi cupiditate accendimur, testem haberemus historiam. Quo magis tibi gratulor, & idem Princeps egregie, qui hanc verae laudis paene vacuam hodie possessionem tam libenter occupes, veteremque maiorum tuorum de omnibus bene merendi consuetudinem, nulla prorsus tuarum fortunarum ratione habita, constantissime retineas. Quod vero istam virtutem multis praeterea virtutibus, usu rerum maximarum, prudentia, doctrina, eloquentia, maxime vero humanitate cumulas, atque exornas, iccirco & antea Romae, atque in tuis legationibus, Ecclesiae causa susceptis, magnificentissime gestis, & nunc in urbe tua, quam diuino simul, & humano iure temperas, concursus ad te quotidie sunt optimorum virorum & eorum maxime, qui aut ipsi ingenio, litterisque praestant, aut saltem de ingeniorum, litterarumque praestantia iudicare possum. in quo saepe fortunam accuso, quae mihi facultatem veniendi ad te, quod eram hac aestate pollicitus, & cupio vehementer, adhuc quidem eripiat. quod cum licebit, accurram. quid enim ista amoenitate iucundius, isto caelo salubrius? quid porro ad beate viuendum deesse potest ei, qui tecum viuat? cuius in aedibus primum oritur ex tua disciplina virtus, deinde excipit

virtu-

virtutem liberalitas. Hoc igitur, cum per negotia licebit: & vinam mature liceat. interim memoria tui fruar teque, licet hoc terrarum spatium distinetum, colam ut praesentem, nec ullum erga te, quod ab homine tui studiosissimo possit expectari, aut officii genus, aut studii praetermittam. Vale. Venetiis.

ANTONIO. VERANTIO.

EPISCOPO.

Agriensi

CUM, tui studiosissimus, praeclarae non solum indolis, sed iam etiam virtutis adolescens, proxime reuersus e Pannonia, tuo me nomine salutasset; atque hoc officium iis verbis, quae facile tuum de me iudicium declarabant, subsecutus esset: cepi sane voluptatem incredibilem, nec mediocres habui gratias Deo Optimo Max. cui soleo, si quid optabile contigit, acceptum referre, & a quo, si quid contra, sperare meliora. nec vero tua mihi quidquam amicitia vel ad meam laudem illustrius, vel omnino amplius possum existimare; cuius audio fortunam a multis ita laudari, atque extolli, ut nemo tamen sit, quin fortunae virtutem anteponat. atque ego te cum ante aliquot annos, commotus fama laudum tuarum, diligere, & observare coepissem; animumque meum probare tibi litteris vehementer vellem: pudor vetuit, non omnino fortasse improbandus; meque ab hoc detertere consilio, & quasi reprehendere natura mea maxime semper est visa.*
quid?

quid? tu ne talem virum, grauissimarum rerum onera sustinentem, deditum studiis praestantissimarum artium, inani scriptorum genere appelles? reuocabat ratio, & habendam mihi tum dignitatis tuae, tum modestiae meae rationem intelligebam. Sed profecto a rectis mentibus non ambitione, sed officio incensis, diuina numquam benignitas abest. qualem enim ego certe vix umquam sperare ausus essem, ea mihi nunc a te ipso oblata facultas est. cui de mittendo ad me emblemate, elegantissime, & in quo summam laudem statuo, admodum pie conscripio, venerit in mentem. quo sum dupliciter affectus officio, laetitia primum ex ipsa re: debet enim iucunda vehementer esse amoris, ac iudicii, a tali praesertim viro profecta, significatio: deinde molestia quadam, quod, qui humanitate vinci non facile patiar, nunc quidem a te captus, atque oppressus, tantum in hac virtute, qua nulla magis hominem decet, tibi concedam necesse est, quantum in aliis, quibus te Deus ornauit, & industria tua, minime paucis: quarum fama non Germaniae, aut Panoniae, continentium regionum, ambitu terminatur, sed Europam, quanta quanta est, ac paene terrarum orbem iam peruolitat uniuersum. verum tamen, si tibi, magis locorum spatiis disiuncto, singularem animi mei ad te amandum, colendumque propensionem ostendere minus possum; apud eos saltem, qui meam vocem audiunt, meisque saepe sermonibus intersunt, tuam doctrinam, eloquentiam, in primis vero puram ab omni labe religionem assidue praedicando, profecto ipse mihi aliqua ex parte satisfaciam. nec tamen ita sterilem cognouimus industriam nostram, licet mihi laudem ingenii nullam ad-

scisco

scisco, quin ea fructum aliquem, qui ad tuum decus per-
tinet, nec sine tua gloria peruulgetur, aliquando ferre pos-
sit. quod aggrediar ita libenter, & ita studiose curabo, ut
euentus futuri laetitiam anide praeripiam, deq. eo, quod
nondum praesitit, iam nunc, perinde ac si praesiterim, ip-
se mihi gratuletur. & huius quidem veluti praedem pro-
missi, meae testem voluntatis, hanc ad te mittendam epi-
stolam putavi. Vale. Venetiis.

ANDREAE. ZEBRIDOVIO

EPISCOPO. CRACOVIEWSI 3

VIDE, quae sit vis etiam apud alienos ignotosque
homines verae solidaeque virtutis. Aliquot ab hinc an-
nis, cum egregios viros, qui te non de facie solum, verum
etiam e sermone assiduaque consuetudine optime nouerant
omnia de te summa praedicantes audirem, studio tui sum-
incensus incredibili. nec meam demde obseruantiam dies
extinxit, aut imminuit, sed auxit potius, ad summumque
perduxit. atque equidem nihil habui antiquius, nihil ex-
spectavi magis, aut obseruaui diligentius, quam ut haec
ad te amandum, colendumque an mi mei propeusio aliquo
tibi non vulgari pateret officio; sed meam expectatio-
nem fesellit euentus, nec ulla umquam satis opportuna
voluntati respondit occasio. nunc igitur, quod mihi a for-
tuna denegatur, statui a me ipso impetrare. Praeclarum
aliquid praestare, dignum videlicet ea, quam tu sustines,
persona, dignum tua virtute, cupiebam: non licuit: at, quod
licet, demus operam, ut id consequamur. licet enim certe
studii

studii erga te mei significationem quandam, non expressam omnino, sed quasi leuiter adumbratam, ostendere & e quercu etiam quandoque exculptum placet, non modo ex ebore, simulacrum. Effigiem domi habeo parentis mei; quem tibi unum, cum familiari olim tuo, & in ore, & in amore esse, homo insigni eruditione, moribusque sanctissimis, Andreas Patricius non semel affirmavit. eius exemplar venienti ad te Patricio dedi. Putabis igitur, cum patrem meum quasi praesentem adspicies, agere tecum, ut auditus mihi, & quasi fores aperiantur ad amicitiam tuam. quod si assequor; additum ad fortunas meas ornamentum, commodique plurimum existimabo. quid enim speciosius, quid ad laudem praestantius, omnino ne viilius, quam Principum, hoc est, tui similium virorum, frui beneuolentia? atque hoc video totum esse positum in humanitate tua, quam Patricius ferebat in caelum. nam ego quidem, nullis plane meritis, animo tamen adhuc te colui. sed, ut spero, merita quoque accedent. conferam enim ingenium ad tuam laudem: & apparebit in tuo nomine, approbante Deo, quo nihil abnuente perficitur, opus aliquod industriae nostrae, eiusmodi fortasse, (certe hoc enitemur) quod posteritas haud omnino contemnat. Vale. Venetiis.

PETRO. MISCOVIO
SARMATARVM. REGI
CONSILIARIO

AMO valde probitatem, & secundum eam, eloquentiam, non quae verba tantum colligit, & inani vocum

cum sonitu auribus obstreperet, sed quae maxime rem
 continet, seq. ipsa non minus gravitate sententiarum,
 quam elegantia verborum & splendore commendat.
 haec te audio simul expetere, Petre Misconi, expete-
 re autem? immo iam esse consecutum. quibus orna-
 mentis magnum te esse, atque illustrem apud homines
 vere sapientes existima, sic inquam, ut illa, quae ple-
 rique, quasi sola bona, specie decepti admirantur, quae
 ipsa quoque in te non mediocria sunt, opes, auctoritas,
 amicitia clarorum virorum, addo etiam gratiam apud
 Regem omnium potentissimum, nullo pacto conse-
 renda videantur. nam haec licet aliquando virtutem
 consequantur, ut in te ipso contigit, minime tamen ip-
 sa virtutem indicant, neque semper ad laudabilia stu-
 dia, tamquam ad causas euenta, referuntur. qui ve-
 ro pietatem, qui iustitiam colit, qui & ingenio valet,
 & qua valet, ad res egregias, maximeque ad instru-
 etam praeclaris doctrinis eloquentiam totus incumbit:
 hunc vere se ipsum, quod esse difficillimum constat,
 ac sua bona nosse, hunc optime exercere instrumenta
 illa, quibus homines brutis animantibus praestant,
 mentem, atque rationem, hunc denique gloria dignum
 immortalis, dignum qui feratur in oculis, ornetur lau-
 dibus, nemo omnium hominum, nisi qui hominis no-
 mine indignus haberi velit, umquam negabit. quod
 ego cum a prima pueritia, domestico patris instituto,
 natura etiam quasi suadente, sensissem, confirmatus
 postea magnopere sum clarorum virorum exemplo:
 nec venit umquam in mentem, quod ita senserim: pae-
 nitere: laetatus etiam valde sum, ac laetor equidem

M nunc

nunc eo magis, quod accedit ad meam sententiam iudicium tuum. in iisdem enim studiis elaboras: eadem tibi artes curae sunt: quaeque hinc emanant laudes, eas esse veras laudes, & earum ita semper florere gloriam existimas, ut numquam exarescat. idem putamus, & idem uterque sequimur, optime Miscou: sed tua clarior industria hominis in excelsa dignitatis gradu constituti; fortasse etiam felicio, quia secunda ingenium fortuna excitat, aduersa debilitat. quam multa enim nobis obstant: quam saepe recta mens, optimorum consiliorum in cursu impedita, cogitur consistere. tibi vero, qui propensam vehementer ad laudabilia quaeque voluntatem in te laudant, iidem fluere ex voluntate omnia confirmant, nullam aduersari, nullam pugnare tecum ex iis rebus, quae sunt inimicae virtuti: versari te assiduum in aula Regis, ipsi Regi carum, summis & infimis iucundum, apud exterarum gentes illustrem, ac per honoratum. quae tibi esse perpetua, maximeque propria, non solum cupio, communi studiorum causa, quorum decus tua dignitas auget; sed facile etiam adducor, ut sperem. quidquid enim es, a te ipso es, & ideo tantus, quia talis: nec tu desines umquam esse, qui fuisti; nec ea, quae virtus constituit, casus euertet. tantum igitur, quod & facis, & facere minimo negotio potes, retine consuetudinem tuam: intueri te ipsum; vitam ante actam imitare. sic augebis quotidie tua merita; & idem quotidie meritorum praemia tuorum sumes a te ipso; eritque virtuti merces virtutis usus; quo nihil esse iucundius, profecto iam sensisti: nihil autem ad memoriae perpetuitatem

tem utilius, docemur exemplis eorum, de quibus post
 tot saecula litterae loquuntur. Et, quoniam sequitur, at-
 que comitatur, ut umbra corpus, gloria virtutem, nec te
 latet, praeceptis imbutum antiquae doctrinae, improba-
 ri eos ab excellentibus in philosophia viris, qui, prae-
 ter sua commoda, nihil spectent, seq. sibi tantum ipsis es-
 se natos arbitrentur: non dubito, quin statuas, quan-
 tumcunque vel habes iam facultatis ad bene merendum
 vel in omni tua vita praeclara tibi animi tui bona pepe-
 rint, non ad rei domesticae fructum, aut ad angustae
 benignitatis usum illud esse revocandum, sed esse totum
 ad alienas utilitates, maximeque ad artium liberalium
 ornamenta quam latissime porrigendum, atque expli-
 candum. quod si fiat, simul illud fieri necesse est, ut,
 quam plurimis in tua laude consentientibus, par benefi-
 centiae celebritas nominis, & fama consequatur. At-
 que ego te ita sentire, proq. tuis opibus iam praestare,
 non inani aliqua coniectura ductus existimo, aut ideo ad
 te scribo, ut in tuam gratiam blandae orationis artificio
 mihi liceat irrepere: sed credidi hominum honestissimo-
 rum ac prudentissimorum, istinc ad nos vel studiorum
 causa, vel cognoscendae Italiae studio commeantium,
 testimoniis; maxime vero familiari meo, nihil temere
 affirmanti, Andreae Patricio: cuius eo pluris iudicium
 facio, quod egregiam eius doctrinam, id quod perquam
 raro contigit, adaequat integritas. addebat etiam, quo
 sum unice delectatus, quodque mihi, ut vere dicam,
 huius epistolae causam attulit, studiosum te esse scrip-
 torum meorum, & mihi aliquid, atque adco tantum
 tribuere in Latina lingua, quantum optavi equidem.

M 2 semper,

semper, affecutum me esse numquam duxi. nunc, si tu, ista vir auctoritate, isto pondere, ita de me sentis; in dubium paene reuoco iudicium meum; nec me prorsus audeo contemnere, ne a te dissentiam; enitarq. multo etiam quam antea, diligentius, ut accedam proxime, si ulla ratione potero, quo tu me peruenisse iam existimas; ut aliquando veritati iure des, quod fortasse nunc humanitati magna ex parte largiris. fateor enim, iudicii de me tui famam mihi esse periucundam: quid oneris tamen eadem imponat, quoq. redigar necessitatis, intelligo. latere nullo modo potest, quem clari viri testimonium indicat: nec me iam ad vigilantiam, omnium scientiarum parentem, laudis cupiditas magis, quam infamiae metus impellit. quae licet perdifficilis, admodumque dura videatur esse condicio, tamen, quia gratus, hoc est vir bonus esse volo, amplector libenter officium tuum, ab excelso quodam animo, liberaliq. profectum; quod si compensare meis officiis non potero, memoria tuebor, & prosequar etiam laudibus, quam diu vita fruam: ut ex optima saltem voluntate, quae boni, & sapientes viri metiri beneficia consueuerunt, aliquam tibi relata esse gratiam existimes. Vale.

IO. VINCENTIO . PINELLO
Patauium . 5

MAGNA fuit, atque etiam nunc inter homines est de genere vitae controuersia: cum alios ita doctrinarum cognitio delectet, ut ab agendis rebus, abhorreant; alii

alii, non sibi tantum, verum & amicis, & patriae,
planeque omnibus hominibus, homines esse natos, exi-
stiment; ex quo sequitur, ut scientiarum studiis usum
rerum anteponant. hoc discrimen, in quo valde pro sen-
su partium dubia veritas fluctuat, tu quidem, quod ad
te attinet, optime Pinelle, optimisque & eruditis vi-
ris merito carissime, egregia quadam, vulgo non sa-
tis cognita ratione sustulisti. simul enim utrumque
studium complexus es, tum earum disciplinarum, qui-
bus exculta mens uberrimos in omni fortuna ferre fru-
ctus solet, tum iuris civilis, quod alienos ad usus ma-
xime porrigitur. ardua res, & operosa: quod exemplo-
rum declarat inopia: sed ingenio tuo nihil difficile: &
ut se praebent initia, futurum nemo dubitat, ut insti-
tuta perficias, consiliisque tuis breui respondeat euen-
tus. in philosophia quidem processus tuos admiramur:
qui tanti sunt, ut euolare potius, quam excurrere vide-
aris. quamquam cur miremur? ingenio si quis valet, in
studio fere languet. qui utrumque coniunxit, optimam
quandoque disciplinam, & rectam studiorum viam
ignorat. fac in uno tamen haec inesse omnia; quid as-
sequetur aduersante fortuna, subsidiis destitutus iis,
quae cum adsunt, fertur animus proclivi cursu ad egre-
gias res; sin absint, haeret in filebra, nec facile pro-
greditur. Quae igitur singula tanti sunt, quemuis ut
possint a sperata literarum gloria penitus auertere;
haec tibi cum suppetant vniuersa, iure istam, quam
alii vix tuentur, Spartam quotidie magis illustras; ne-
que tam nobis hoc, aequalibus tuis quod sis virtute
maior, quam illud, si te ipso minor esses, admirandum
videretur.

videretur. In philosophia quidem cum operam studio-
 se des *M. Antonio* Genuae, cui veterum doctrina-
 rum arcana patent, quo nemo peritior *Aristotelis* inter-
 pres, nemo vir melior usquam viuit; nihil mediocre
 neque nos a te expectamus, neque tu praestas. quo no-
 mine tibi gratulor plurimum, & eo magis, quod illius
 viri voce publice cum multis, consuetudine, ac sermo-
 nibus, quae humanitas eius atque amor in te est, prina-
 tim & proprie frueris. hauries enim ex eodem fonte non
 ea solum, quae vel olim in Lyceo, vel etiam in *Acade-*
mia disputabantur, sed id, quod longe praestantius est,
 christianam pietatem, a qua manat una, & in qua item
 una philosophia perficitur. Habes igitur, diuinitus oblata
 virtutis adipiscendae facultatem: quam te video arcte
 esse complexum, nec vereor ut dimittas, qui te ita fla-
 grare cupiditate cognouerim, ut renocandum potius a ni-
 mia contentione, valetudini vix ferenda, quam acuen-
 dum, & incitandum intelligam. Nam, quod ad ius ciui-
 le pertinet, ubi tu philosophiam, idest totum, scientia
 comprehenderis, quid in parte cognoscenda superesse
 negotii putas? minimum, si sapientes viros, & in iis
 eum, quem ego omnibus iudicii laude antepono, docto-
 rem tuum Genuam audies. quamquam sermo tuus, ha-
 bitus interdum, praesente me cum eruditis hominibus,
 tractasse te iam satis diligenter ea, quae excellunt in uni-
 uerso iure ciuili, idest veterum iurisperitorum praece-
 pta, declarabat: ut vel eadem facile possis, quandocum-
 que libuerit, recognoscere, vel, si qua restant, quasi race-
 mos aliquos confecta vindemia colligere. non enim te ar-
 bitror studiorum tuorum elegantiam ineptissimis planeq,
 barbaris

barbaris quorundam scriptis inquinare velle: quae cum
immensa sint, pleraque tamen inania, laboris & mole-
stiae plurimum, utilitatis, & oblectamenti minimum
habent. Interim, ut facis, Graeca cum Latinis, & elo-
quentiam cum philosophia coniunge: ut, politioris do-
ctrinae copiis instructus, remissiora etiam studia colen-
tibus aliquando satisfacias. non enim vivimus omnes
in Atticis gymnasiis: nec ubique de rerum causis quae-
stio est: & quibus contemplatio naturae vehementer
placet, iisdem tamen animi causa tamquam in hortos
Musarum divertere non iniucundum est. qua de re
quia nonnumquam inter nos locuti sumus, & ut spero
breui colloquemur, nihil addam, te praesertim, quod fa-
cile intellexerim, meam sententiam comprobante. cu-
ius consilii, non dubito, quin maiorem quotidie volupta-
tem capias. Ego hic, genere vitae molestissimo, quas
Patauii utiliter satis, incunde quidem certe, in libris, et
in tuis tuorumque familiarium sermonibus traducebam,
horas perdo. itaque, cum primum domesticas tricas,
quibus teneor inuitus, expediero, aduolabo istuc, si-
tiens vestrae consuetudinis; qua si frui perpetuo liceat,
beatissime viuerem. Interim amorem mihi tuum, cuius
equidem memoria valde recreor, cupio conserues. & si
tua patitur humanitas, etiam rogo. Vale, & fami-
liarem tuam, cuius doctrinam, & ingenium in Lucre-
tiana interpretatione mirum in modum probo, saluta-
meis verbis. Venetiis.

VIDO. PANCIROLO

Patauium.

6

CVM alia me in ista vrbe, quam tu praeter ceteros tua virtute nobilitas, & ornatissimorum iuuenum coetu frequentas, oblectare vehementer soleant: tum nihil est, aut esse omnino potest, * quotidiana consuetudine, iucundius: non solum, quia probitate, modestia, morum elegantia, omnibus denique animi bonis excellit: sed etiam, quia paucorum annorum studio praestantia videlicet ingenii, quam ego semper amavi, consecutus est, ut exquisitam, ac variam sermo illius eruditionem praeseferat, scripta vero ad Ciceronianam eloquentiam sic accedant ut cum iis, qui suum nomen hac laude celebrarunt, qui pauci admodum sunt, conferri iure possit, aequalibus vero cunctis facile antecellat. Hunc ego tibi iuuenem, quē olim mihi adolescentulum vir omni laude summus, Reginaldus Polus Cardinalis, magnarum virtutum indole commotus, accuratissime commendauit, etsi necesse non arbitror, commendo tamen eo studio, quod quia verbis exprimere mihi non licet, tu quoque, tantum esse, velim existimes, ut exprimi nullo modo possit. is cum antea philosophiam, praesertim quae de Graecis fontibus hauritur, & humanioris doctrinae studia diligenter, eximiaq. cum laude coluit; tum hoc tempore in cognoscendo iure civili totus est. quā illum cupiditate quotidie magis incendit admiratio tuae virtutis, quam in omni fere sermone ad caelum fert, exterisq. etiam gentibus, licet illustrem satis, elegantissimis

gantissimis declarat epistolis. pertinet igitur ad humanita-
tem tuam, qui te tam ualde amet, tantiq. faciat, eum re-
damare, eique reconditos illos, omnium purissimos, tuae
scientiae fontes aperire: pertinet etiam ad fidem, qui se
totum in tuam disciplinam tradiderit, opibus eum im-
pertire ingenii tui, quas ille Regum opibus & sua spon-
te, & meo iudicio, cui tribuere aliquid videtur, prae-
stantiores existimat. Haec ad impetrandam magna sunt
praesertim apud optimum virum, quam in tuis laudi-
bus praecipuam agnoscimus. verum accedit amor in te
meus, qui fraternam necessitudinem aequat. is te rogat,
is prensat, cum studiose, quam blande potest, pro
meo: ut eum, quem ego merito eius in oculis fero, tu,
quem amicitiae nostrae denegare nihil decet, quando nec
studio tuo quidquam abnueret voluntas mea, omni be-
gnitate complectaris, planeque in clientelam tuam, atq.
adeo in sinum aequae ac filium meum, aeq. ac me ipsum
recipias. quod si feceris, obstringes tibi non vulgari be-
neficio iuuenem summo loco natum, dignum maiori-
bus suis, qui Pannoniam, ut ego auguror, sua virtute
aliquando Italiam faciet; a me vero gratiam inibis eam
quae, si quid accedere ad meam in te beneuolentiam po-
test, quod equidem vix arbitror, id ipsum una possit ad-
iungere. Vale. Venetiis.

*

Patauium.

7

O. DVLCEREDITUM, o amandas litteras, quae
mihi id significant, quod, non modo spe, sed nec suspi-
cione

cione attigeram. sed, quando te ipsum, mi *, videre,
 quando licebit amplecti? oculos mehercule tuos, dum
 haec ad te scribo, intueor, indices probi animi tui, indices
 humanitatis. hoc mihi spectrum fingit amor: (quid enim
 aliud?) & haec me cogitatio iucunditate perfundit in-
 credibili: quid putas, cum erimus una, dabiturque, ut il-
 le inquit, Veras audire, ac reddere voces? nemo unquam
 perinde laetatus est inuento thesauro, ut ego, te reuerso.
 videor enim amissum recuperasse: & plane amiseram.
 nam, etsi reliqueras hic memoriam tuae suauitatis, tuiq.
 ingenii: tamen, quod attinet ad adspectum, ad consuetu-
 dinem, ac sermonem, quibus nobis, tui amantissimis, ni-
 hil potest esse optatius, totus abieras. ac verebar, ne, vel
 precibus tuorum victus, uel honorum cupiditate illectus,
 totum te dederes aulicis muneribus, multa nobis, fortas-
 se etiam litteris, salute dicta. nunc te tuus bonus, tuus,
 inquam, mihi crede, bonus genius reduxit, sicuti malus
 abduxerat. quid enim sumus, nisi adsit humanitas, &
 litterae? quae petuntur in otio, tranquilla mente. otii au-
 tem ubi plus, quam in isto secessu Patauino? nemo quem-
 quam interpellat nolentem: inuitant ad virtutem, si mi-
 nus vocc, exemplo certe quamplurimi: patet aditus ad
 doctores in omni liberalium disciplinarum genere prae-
 stantes: quid praeterea? caeli mira clementia; rerum,
 quibus alimur, suauitas incredibilis, & copia. Haec ti-
 bi, optime *, iure prima sunt: iure tot montes superasti,
 tot flumina transiecisti, ut haec dimissa statim repeteres.
 viues tibi, solutus ab omni cura: viues Deo, contemptis
 diuitiis, abiecta illa gloria, quam falsa prorsus, & inanis
 honorum species ostentat. quod nisi Deo viueres, nec tibi
 certe

certe posses viuere . in illo enim vno vera, ac solida virtus, haec, quam quaerimus in libris, aut discimus ab hominibus, umbra est. quocirca hortor equidem te, vt libros euoluas accurate, vt magistris assidue operam des: sed minimum in vtriusque pone, nisi tua studia diuino cum amore coniungas. Atque haec me scribentem magnopere delectant: tibi non puto fore legenti necessaria; scribo tamen, & quia te mirifice diligo, cupioq. esse, qualem pater filium; & quia commemoratione ipsa rei omnium optimae, ac praeclarissimae afficior sic, vt nullam ex vlllo sermone, aut ex vlla cogitatione maiorem hauriam voluntatem. nec tu debes officium meum aspernari, aut in deteriore partem trahere, si tibi, etiam rectissime viuenti, (sic enim existimo, planeq. mihi persuasi) constantiam laudo. lubrica est enim adolescentiae via: labuntur multi, cum aliquantum iam processerint: cursum vero conficit is, qui nititur optimis cogitationibus, ducemq. sequitur eum, qui numquam errat, communem humani generis parentem; qui tibi omnia bona pollicetur, & dabit, quae nec ab Imperatore tuo sperare, nec ab vlllo Rege licet. De Episcopo Agriensi, agnosco tuam in me beneuolentiam. cui de emblemate gratias agam. Mariani Lezentii, iuuenis ornatissimi, & Andreae Patricii, conubernalis tui, talem in me animum amplector: quos cupio a te meo nomine salutari, itemq. Polonos ceterosq. militares tuos, quorum nobilitas, & vt audio, virtus Patauinum gymnasium illustrat. Vale; & quando nos adpectu tuo priuas, minue saltem litteris, non hac recentiore Italica, sed illa vetere, omnium elegantissima, Romana lingua scriptis, desiderium nostrum.

E I D E M,

EIDEM, Patavium.

8

OPTIME *, quid tibi, obsecro, in mentem uenit? nostra ne imagine tuum putas cubiculum ornari posse? pudet me studii tui: & erubui, mihi crede, cum hanc partem legerem litterarum tuarum. nec tamen, quia tuam facile cupiditatem intelligo, deesse tibi possum: & coeptares est, & agitur, ut video, satis diligenter: quae cum erit absoluta, mittetur illico ad te. ac vellem, posset artifex eodem penicillo animum in te meum una cum vultu exprimere: non dubitarem, quin hanc tu multo magis imaginem diligeres. non necesse est, inquires. libenter credo: &, quod ita sit, acceptum refero tuae humanitati; quae mihi a te impetrat id, quod meritis, aut officiis consequi nondum potui. His diebus facultatem ad te scribendi permolestae occupationes eripuerunt. ignosce: & puta, numquam abduci meam ab officio voluntatem, licet opera non exstet. Heri adiit ad me contubernalis tuus Stanislaus Fogeluetrius Cracouiensis. probum adolescentem, praeditum litteris, & tua plane consuetudine dignum e sermone iudicaui. amanter illum excepti, ut natura mea fert; iucunde non potui, quia uoletudo non concedit. cuius beneuolentiam si, te, ut arbitror, conciliante, sum adeptus: peto a te, mihi ut eam conserues. & omnino, quicumq. a te diliguntur, eosdem mihi cupio mutua beneuolentia coniungi. Epistolam ad Episcopum Agriensem, quando interdiu otii nihil suppetit, dictaui ante lucem amanuensi meo. eam ad te mitto. Signum tuum,

cuma

eum legeris, imprime. De gentilibus tuis, negotium dedi, & curabitur diligenter. Vale.

E I D E M, Patauium. 9

V I D E O te in iungendis amicitiiis praeclarum artificem esse: uerum caue, ne quid alterutra de parte promittas, quod praestari uix possit. aut, si promittes, ipse ne spondeas, ne quando praeter opinionem cogaris dependere. de me ipso loquor: quem tu si putas esse, qui non sum; quod ad me attinet, facile patior: fruatur hoc amicitia nostra praeuilegio, ut inter nos omnia liceant: sed uereor, ne tua apud alios praedicatio plus nobis imponat oneris, quam sustinere possimus. Patricio tuo scripsi, multis districtus negotiis: & eram animo conturbator, accepto nuncio de fratris mei summa corporis, aliqua etiam mentis inuالتitudine. Gentiles tui latent adhuc: eruentur aliquando, si qui sunt: curat enim homo tum mei cupidus, tum ad hoc diligentiae genus uehementer aptus. De libris, putabam e silentio meo te conuicere, nihil esse: sed, quando appellas, crebro, scies nondum neque ad Iunctas, neque ad alium quemquam peruenisse. tu uide, cui rem commiseris; & urge litteris, ut sine mora mittantur. Imago coloratur, designatione iam perfecta. ueritatem, nisi fallor, egregie simulatam dices. Vale.

E I D E M, Patauium. 10

A M O te, quod uerecunde petis: sed istam posthac uerecundiam abiice, obsecro, si quid aliquando mecum ages. nescis, apud me quo loco sis, aut quo ego apud te esse

esse cupiam: quod si nescis, aut etiam, si dubitas; iniuriam facis utrique nostrum. Scripsi ad Sophianum, libenter equidem tua causa. sed inuitus ea gratia, quod laborantem, ut audio, graui morbo, vexari tuo studio nollem. Equidem discrucior, cum ita affectum audio probum inuenem, mihi amicissimum, Graecarum litterarum scientia sine dubio singularem. sed, quia te fero in oculis, idq. sane tuo merito, litteras ad eum conscripsi; quas in hunc fasciculum coniectas cum legeris, si reddendas non putabis, conscindes. Ego nunc, si quid de me scire vis, iaceo, corpore satis afflictus ob capitis grauedinem, sed erectus animo propter spem, atque adeo expectationem vitae laetioris. iam enim didici contemnere, quae amabam antea: qua te quoque in sententia cupio esse. Saluta meo nomine contubernales, & amicos tuos. Vale.

E I D E M, Patauium.

II

RESPONDEO serius litteris tuis, impeditus febricula, robustioribus haud valde metuenda; sed in hac nostra corporis imbecillitate etiam ea, quae mediocria sunt, non mediocriter timenda. Locum videbis in epistola ad Patricium, ubi ea, quae mones, interposui; de quo quid sentias, aueo scire. Gratias tibi agerem de ista voluntate; sed hoc plane respuit amicitia nostra; nec tuum erga me officium assequi umquam possit oratio mea. merui enim loco semper apud me fuit bene merendi cupiditas, etiam si res, quod saepe solet accidere, nulla consequatur. Vale.

E I D E M,

E I D E M, Patauium. 12

QV I D tibi ego praestare possum de iis, qui fortasse nulli sunt? quaesitum est perdiligenter: nec tamen vllum omnino diligentia fructum tulit. fingere tibi eos ex argilla possumus, animare non possumus. quod si liceret, fieret, atque adco factum iam esset. nec enim mediocre tuum esse studium intelligo: & ego, ut fatear quod res est, diligo istam in te bonitatem qui de genilibus tuis, nulla tuorum commodorum spe proposita, humanitatem modo quandam secutus, tantopere labores. certe, qui honoribus, aut diuitiis, aut opinione virtutis emineant, nulli reperiuntur. quod si quos obscura condicio, aut fortunae tegit humilitas: de iis quaerendum ne sit, videris: me si consulis, omittes. De pictura, lenium negotium: sed illud te non praeterit, Pictoribus, atque poetis Quidlibet audiendi semper fuit aequa potestas. ita facile mentiuntur verbis, ut coloribus fallere consueverunt. hic, qui rem suscepit, diu me promissis duxit, varias nectendo causas ut ei culpam largier ignaviae. nunc imbres accusat, quod recentes colores minime patiantur exsiccari. hoc puto verum, illa non puto, concedo tamen, ut eo utar facili, & impetrem, quae duo simul a nobis exoptantur, festinatio nem cum diligentia. Vale. Venetiis.

E I D E M, Patauium. 13

I T A mihi optata contingant, ut commentariolo tuo nihil umquam legi eruditius, nihil sanctius, aut retinendum Catholicae

Catholicae religionis cultum accommodatius . itaque, cum in ortu Solis legere coepissem, absolui facile ante horam prandii, opera numquam intermissa. ualde enim delectabar ordine, ualde etiam genere orationis tuae. res uero ipsa ita me affecit, ut quasi semina quaedam uerae pietatis, quae fructum profecto non mediocre aliquando ferent, in animo meo reliquisse uideatur. quod quanti esse apud me putas? quanti mehercule immensam auium non aestimo. quid enim cum aeterna salute conferatur? quod si meis apud te precibus locum aliquem reliquit humanitas tua: rogo te etiam atque etiam, ut hoc genere scriptorum, quo quidem ad studium summi boni, perpetuaeque felicitatis mirifice excitor, impertiri me quam saepissime uelis. quod si feceris; additum me tibi multis nominibus obstringes eo beneficio, cuius delere memoriam obliuio nulla possit. Quod me reuocas ad consuetudinem tuam: stimulum scilicet currenti. sed, mihi crede, non plane totus abs te discessi; neque te mihi prorsus eripiunt, aut eripient umquam locorum interualla. absens tecum sum, tacitus loquor, et loquentem audio. sic leniter imagine periuicunda desiderium nostrum. quod cum ita sit; opera tamen studiose dabitur mature ut excurram quo ire necesse est, si meam fidem tueri uolo, et quo tamen, quia disiungor a te, minime libenter eo. Vale. Venetiis.

E I D E M, Patauium. 14

Cum de tua ualetudine sollicitus essem, curam auxit filioli morbus, quo etiam nunc laborat, nec satis explorata salute. me quoque leuiter febricula tentauit,

uit, qua triduo sum, sine medicorum interuentu, temperata dumtaxat victus ratione, liberatus. Nunc expedien-
dis negotiis operam do, ut, si amicus noster, bonarum ar-
tium patronus, summum illum dignitatis apicem attige-
cit, quamprimum possimus accurrere. saepe enim & lit-
teris, & praesenti sermone cupere se consultum rationi-
bus meis, amantissime declarauit. mihi autem omnia sunt
in eo, ut otio litterato frui liceat, nulla rerum domestica-
rum cura interpellante. quod si assequimur; valeat ambi-
tio; viuemus nobis, et Musis, et eo quidem animo, ut om-
nia referamus ad Deum, a quo vno felicitas vera pen-
det: quod idem tibi videri, ex tuis litteris facile coniicio.
Miro tereor desiderio veniendi ad te: sed hanc faculta-
tem multa eripiunt, praesertim aeger filius, quem tibi,
& pro nostra amicitia, & pro noua coniunctione, esse ca-
rissimum, plane mihi periuadeo. te quidem a morbo con-
firmatum si audiero, aequiore animo domestica patiar in-
commoda. itaq. dabis hoc amoris nostro, quem tua virtus
peperit, alit humanitas, atq. auget, ut nostra etiam caussa
tuam valetudinem studiosissime cures. Vale. Venetiis.

EIDEM, Patauium. 15

SILENTII mei causam ex iis litteris, quas
heri ad te scripsi, quas hodie mane puto tibi esse red-
ditas, iam cognouisti. quod nisi ita declarassem; tamen
mihi dubium non est, quin tu pro singulari tua sapien-
tia & humanitate de mea meorumq. valetudine con-
iuceres. quid enim aliud me a scribendo abduceret?

N quo

quo equidem nihil facio libentius: idq. tibi, si praesenti fortasse non potui, absenti certe probabo. Tuum aduentum auide exspecto: cuius mihi significatio tum eo nomine gratissima, quia te uidebo, tum eo gratior fuit, quod optime te ualere, etsi tu de eo nihil significes, facile tamen possum intelligere. quod si ita est, opto perpetuum esse: & quod opto, id etiam ut sperem, facit continentia tua, quam ego in uictu (plane loquor, ut sentio) ualde sum admiratus, & conor etiam imitari. Rerum Romanorum, Pontifice mortuo conuersus orbis est. itaque, qui decesserant, omnes ad urbem redeunt. pecuniae pro Maecenate illo, ut affertur ad nos, libentius, quam pro ceteris, deponuntur, & ad eum denique, fore suspicor, ut omnium Cardinalium uoluntates inclinent. uir optimus est, egregie litteris excultus, ingenio miti, & quod caput est, cum factiones duae dicantur esse, aequus in utramq. primum contenditur acerrime. quid mirum? Neque enim, ut ait poeta ille summus inter nostros, leuia, aut ludicra petuntur Praemia. & scis, omnes homines, quod maxime cupiunt, itidem facile adduci ut maxime sperent. ergo multis quasi aleam iacere, & fortunam placebit experiri. quid euenturum sit, & quid magis expediat, uni Deo patet. certe, nisi firmioribus, quam antea, praesidiis muniamur; prauarum opinionum in cursu uinea Domini dissipabitur. quod te quoque & suspicari, quia prudentia excellis, & metue re uehementer, quia pietatem diligis, aliquando in nostris sermonibus cognoui. Vale. Veneris.

EIDEM,

E I D E M, Patavium.

16

CUM de tuo reditu ex tuis, amicorumq. litteris cognouissem; persusus uoluptate sum prorsus incredibili. subueiebar enim, ne te patria tua, experta iam in magnis rebus & animi, & ingenii tui praestantiam, abesse diutius minime pateretur. etiam illud occurrebat, ne te iam satietas Italiae cepisset. multa cogitabam, ut amor est, quae cupiebam esse falsa, & fuisse valde nunc laetor. ca pro tamen hanc in iucunditate molestiam, quod ad te, quamprimum accurrere non licet. nam, ut omittam de uxore, cui deesse non possum aegrotanti; confirmare studio res domesticas, quae vacillant satis absente me. cum enim, referre me totum ad litteras, quarum est mihi consuetudo iucundissima, plane deliberatum sit: prius haec, quae ad alendam familiam pertinent, ita constituam necesse est, ne quando me, quod antea saepe contigit, de medio studiorum cursu reuocare possint. iam ego in meis consiliis, optime *, ambitionem coepi excludere. video res humanas sursum deorsum ferri, numquam consistere: celeriter omnia fluere, & exstingui, praeter bonam famam ad quam omnes peruenire cupiunt, sed ignoratione viarum plerique aberrant. non enim in opibus, aut magistratibus, Regum ve aulis verum decus habitat. petendum aliunde est, a rectis cogitationibus, honestis laboribus, studio, & exercitatione virtutis. haec mihi in animo sunt: quae si colam arbitrato meo, multa consequar. primum, ab iis negotiis, quae mihi negotium facessunt, uacabo prorsus:

N 2 sus:

sus: deinde, (ne me putes desidia causa otium cogitare) scribam aliquid quotidie; quo nihil soleo, ubi curarum expertus animus est, facere libentius: denique, etiam posteris fructum fortasse aliquem pariet industria nostra. Quid relinques, dicet aliquis, liberis tuis? Non exiguum patrimonium, imitationem mei, & aliquam, ut spero, virtutis hereditatem, eadem scilicet, quae reliquit mihi pater meus. Non abundabunt. Nec id postulo; nec illi, si sapient, postulabunt. modica poscit, ut honeste, id est feliciter viuatur, hominis natura; reliqua sunt instrumenta nequitiae. Cupio tibi, mi *, qui aetatem tuam prudentia anteis, probari meum sensum: cupio meum iudicium tua sententia confirmari. quamquam quid expecto? index animi sermo est. porro in sermonibus quotidianis quid tu habes in ore, quid extollis, praeter studia doctrinae? quae te video, cum tecum loquor, vel cum tua scripta lego, tractasse diligenter. verumtamen hoc ipsum, quod habeo satis exploratum, mecum te sentire, si significabis. pergratum erit. Ego, nisi occupationibus premerer assiduus, quas animo potius, quam corporis viribus sustineo, explerem te crebritate litterarum. verum ne sic quidem, pro tuis in me officiis patiar in hoc genere prorsus abs te requiri studium meum. Vale. Venetiis.

E I D E M, Patauium.

17

VOBISCUM ut agatur, scire cupio, Patavii commorantibus. nos hic languemus, afflicti caloribus perpetuis, quibus equidem grauiore non memini. uxor mea nondum ex puerperio conualuit: infans bellissime
habet,

habet, & incipit iam blandientibus arridere. quid quaeris? admodum scitus est; quodq. amare solemus in pueris, hilaritatis habet multum. De tuo aduentu, suadeo cō filium mutes, neque te istinc, furente Canicula, aestu non ferendo commoveas. faceres enim valetudinis incommodo: ac, si valetudo, studia tamen tua non ferrent. verum hoc prudentiae tuae totum sit, in qua tibi neminem antepono. ego, pro mea in te singulari benivolentia, non modo quid vellem, verum etiam quid sentirem, testatum esse volui. Aristotelem cum Cicerone mitto, utrumque satis apte compactos ab artifice perito. video, quid agas. inanem eloquentiam contemnis; & indifertam philosophiam non amas: utramq. vis coniungere, ut misceas, quod ait poeta Venusinus, utile dulci. quo minus me, eadem cogitantem, & recessum oīi causa quaerentem, reprehendere debebis. Vale. Venetiis.

E I D E M, Patauium. 18

VALDE probo industriam tuam, quam ad ornandum commentario aureolum Demeirii libellum τὸν τῆς ἐκείνου contulisti: sed, antequam institutum absolvas, fore arbitror ut exeat is, quem Petrus Bargaeus, qui Pisannum gymnasium politioris doctrinae professione illustrat, ante aliquot menses, ut audio, confecit. itaq. malim ad Diodorum Latinitate donandum operā, studiumq. tuum conuertas: ne, quod aiunt, actum agas. nam Bargaeo, quē tu fortasse non nosti, nec ingenio, nec doctrina, nec eloquentia quisquam praestat: quodq. paucis dum contigit, tum

N 3 oratoria,

oratoria, tum poetica laude pariter excellit. absit igitur
 omnis aemulatio ab iis, quos ego vnice diligo, et a quibus
 item diligi me sentio. Calores hic nihil remittunt: seruent
 omnia. quod nisi terrae, iam perustae, vberimis imbribus
 cito madefiant; caritas multarum rerum, & morborum
 vis ineunte autumno videtur impendere. Ego, ut anni
 tempus est, non incommode valeo: negotia curo: otium,
 & studia cogito. Kalendarium Romanum vetus, cum
 opinione mea de ratione veterum dierum, & necessaria
 litterarum interpretatione, saepe iam a te rogatum, quia
 nec ipse habebam, nec reperire facillimum fuit, mitto se-
 rius, acceptum a familiari meo, viro probo, & erudito,
 Rophaele Cyllenio. describes, & remittes: quoniam, quae
 sunt olim impressa cum Sigonii fastis, nullum ex iis iam-
 pridem venale superest. in hoc autem, ut aliquid a me
 praecipuum haberes, iidem ut ego te praecipue diligo,
 quaedam videbis immutata, nec, opinor, improbabis.
 Vale. Venetiis.

¶ Kalendarium, de quo in superiore epistola mentio-
 nem fecimus, cum in Orthographiae libro Aldi filii im-
 pressum legatur, visum fuit hoc in loco omittere: eosque,
 qui id legere volent, ad Orthographiam reuocare.

ANDREAE. PATRICIO

Patauium.

19

N A E tu rationem tui indicandi percommo-
 iniisti. ego enim, non curates homines sint, quibus ve-
 terris ac regionibus profecti, sed quibus moribus. quo
 ingenio, qua doctrina praediti, soleo quaerere: & ut
 olim

olim Hannibal, qui hostem feriret, Carthaginensem sibi fore dicebat, sic ego totum in una virtute constituo. Epistola tua ita loquitur, ut nullam in te patiatur aut humanitatis, aut doctrinae partem desiderari. itaque ne te posthac Sarmatam potius, quam Romanum, dixeris. tamen si Sarmatia iam ita feritatem, si qua olim fuit, & quaecumque fuit, abiecit, ut ex transalpinis nationibus nulla nunc neque ad litteras, neque ad benignitatem, mutuaque officia dicatur esse propensior. Italia vero nostra, in qua vgebant olim artes bonae, in qua summis ornata praemiis eloquentia primas aliquando partes obtinuit, ita veterem illam quasi formam videtur amisisse, vix iam ut agnoscatur. simulacrum dumtaxat aliquod in libris reliatum est; cuius excellentem pulchritudinem animo intuentes admiramur, & studemus imitari: praesentem effigiem oculis frustra quaerimus. Tu autem, doctissime Patrici, si qui nunc antiqua Italia digni reperiuntur, qui quā pauci sint, quaque id accadat culpa, non dubito quin intelligas his se ut adiungeres, praestantiumque virorum numerum augeres, plane mihi, cum tua scripta lego, et cum eos, qui tecum viuunt, de te loquentes audio, videris esse consecutus. quo nomine tibi gratulor plurimum, & patriae tuae, in quam referes gloriam, omnibus thesauris, omnibusque omnium Regum triumphis praefendam. Ego autem, cuius amicitiam in tuis litteris blanda quadam mearum laudum commemoratione videris aucupari, cum tua merita, quae ego sentio esse maxima, modeste nimis dissimulas, & extenuas, mea vero nimis liberaliter amplificas, atque extollis, nisi te tam nostri amantem redamem, nisi multis ornatum virtutibus omni studio colam, quis me

fit inhumanior? quis iudicii magis, aut etiam rationis
expers? equidem, quid de te sentiam, quantiq. apud me
sis, officiis conabor ostendere: sint, ut mea tenuitas est,
hoc praestare non potero; tu tamen, ut spero, de mea vo-
luntate tibi persuadebis id, quod cupere videris, te mihi
esse, ac semper fore carissimum. in quo profecto, nisi ego
meam in amicitiiis diligentissime tuendis consuetudinem
dediscam, tua te numquam fallit opinio. Vale.

E I D E M, Patauium. 20

O' PRAECLARAM ὑποδίσκω, nec vero tuam
humilem, aut obscuram orationem, sed erectam piis affe-
ctibus, mirificeq. sententiis, ac verbis illustratam. nunc
demum te, Patrici, vere cum, qui vocaris, agnosco, hoc est
a plebe seiunctum. quae libenter oculos ad terrena demit-
tit, nihil altum, nihil homine dignum suspicit. nam certe
reliqua studia opinione potius, quam re, nituntur, speciem
quandam inanem, solidi nihil habent: haec vero, quae te
video arte esse complexum, nec, puto, umquam dimit-
tes, aeternam non modo famam, sed salutem quoque
pariunt. Agnosco in tuis institutis praeclaram consuetu-
dinem, egregiaq. studia, numquam satis laudati, Craco-
uiensis Episcopi, Andreae Zebriouii; cuius ex perpe-
tuo multorum annorum conuictu, quotidianis sermoni-
bus, consiliis, probitate, doctrina, quasi diuinis legibus,
formaſti animum tuum, atque excitaſti ad excellentem
rerum aeternarum cupiditatem; ut facile conſtet, cum
tua te ad verum decus natura duceret, doctissimi tamen
ac

ac sanctissimi viri exemplo vehementer esse incitatum. Equidem, ut tibi vehementer gratulor, cuius omnis in amore Dei defixa cogitatio sit: ita, cum in eos intueor, qui, falsa rerum imagine decepti, toto pectore contendunt ad ea comparanda, quae saepe molesta possidentibus, interdum etiam perniciosae sunt; misereor, & ingemisco. quod utinam industriam aliquando meam, & si quod in me est, ingenium simili in argumento liceat exercere. nam nunc quidem voluntas, optima spectans, & in qua debet partem propensa, multis tamen impedita rebus languet. sed speremus. sic enim nihil difficile, si consenserit Deus; ut nihil facile, si abnuerit. is porro, cum abesse putatur longius, & destituisse nos in mediis calamitatibus, tunc adest proximus inscientibus, & ereptos ex miserrimo statu collocat in solio regum. Haec ego saepe mecum solatii causa, quo saepe indigeo: & capio voluptatem, quod epistolae quasi allocutio tulit, ut eadem tecum. Remitto orationem. lege amicis tuis, & quam potes multis communica; ut recte sentientes confirmentur; si qui autem ab optima causa desciverunt, ad sanitatem traducantur. Vale, & * contubernalem tuum, summi adolescentem ingenii, meo nomine saluere iubeas.

*

Patauium.

21

AMO veritatem, deinde me ipsum. illam spectare ante omnia soleo, mihi autem libenter quidem, quatenus tamen liceat, indulgere, itaque nec accipere debeo, quas in me laudes contulisti, nec, ut ingenue confi-

teat

tear, reuicere plane possum. nam bonis viris, artiumque liberalium scientia claris, equidem placere velim, cum eo tamen, ut nolim quemquam nimis esse in mea laude liberalem. tu autem in tuis litteris ea mihi tribuis, quae non modo si agnoscam, sed propemodum si optem, modeste parum agere mihi videar. At Muretus ita sentit. Utinam quidem; sed officium potius, quam sententiam, esse puto. quis enim me minus ignorat? qui, quam diu Venetiis fuit, vel mecum habitauerit, vel mea consuetudine frequenter admodum sit usus. nec is est, quem iudicium fallat, praesertim in litteris, quas tractat assidue, nouit egregie: verum ei facile persuadet humanitas ut iudicium amicitiae largiatur. sed, siue te Mureti oratio, tam honorificam de me opinionem ut susciperes adduxit; siue mihi hoc abs te, ut tu scribis, mea studia, ut ego sentio, tua bonitas impetrat: persuade tibi, non exiguum me statuere ornamentum in amicitia tua: cum & ipse possideas illas virtutes, quarum fama beneuolentiam conciliat, nomenque nostrum, ab interitu vindicatum, cum aeternitate coniungit; & principum virorum, doctrinaque praestantium, floreas amicitia; quodque me non leuiter mouet, in Gulielmi Budaei, eruditissimi hominis, ac de litteris optime meriti, contubernio per aliquot annos vixeris. ac vellem mihi parem voluntati suppetere facultatem. fructum ferres haud mediocrem studii erga me tui: obseruantiae vero in te meae, quam tua virtus peperit, satis esset illustris, ac minime dubia significatio. quod ipsum tamen, ut ut est, fortasse consequar. nam & studio nitar: & ad perficiendi spem plurimum quidem, velle optima, solet afferre. Vale.

DIO-

DIONYSIO. LAMBINO

Patauium. 23

NEQVE negare audeo tibi, homini eruditissimo, cuius ego plurimi semper amicitiam feci; neque, si pollicear, praestare possim id, quod a me petis. premor enim domesticis oneribus, & typographiae cura, sic mehercule, vix ut sustineam. vacuae tantum ab opere mihi relinquuntur horae vespertinae: sed eo tempore, tum defatigatus laboribus, ac fractus, quietem quaero necessariam; tum vero succedit oculorum dolor, isq. ita grauis, non modo ut legere, aut commentari, sed nec domesticos audire sine magna molestia possim. ita nobis traducitur dies, atque adeo noctis maior paene pars. non enim prius hac leuamur capitis grauedine, quam Sol, medio iam Antipodum orbe decurso, incipit ad nos recurrere: & in ortu suo demum valetudinem mihi, alacritatemque restituit. quod si respirare aliquando licebit; aures tibi meae patebunt, non in horas modo, sed integros etiam dies. quid enim mihi iucundius, quid etiam utilius, quam tecum de litteris agere, tuaque maxime tractare scripta; de quibus quid existimem, Muretus noster testis est? nam, cum ad me, octauo, opinor, abhinc anno, in Iudaeae suburbano habitantem, ignotum antea de facie, voluntario adductus officio, adiisses; humanitatem simul & doctrinam tuam eadem hora perspexi. tunc ego te coepi & diligere, & praedicare: nec desinam utrumque facere, quam diuturna mihi dabitur vsura vitae: quandoquidem

doquidem nec tu defines esse tui similis, idest, cum optimus vir, officioq. excellens, tum vero tantus in virtute, quantum cum egregia natura singularis industria potuit efficere. Interim peto a te, meis vt occupationibus ignoscas, & voluntatem in te propensam, licet absit res, tamen ames Vale.

*, Patauium.

23

NIHIL mihi pro mea in te beneuolentia, meoq. de te iudicio potuit accidere, quod minus vellem, aut quod minus opinarer, quam id, quod proximis diebus audiui, cum diceret nescio quis, non te perinde, vt solebas, in optimarum artium cupiditate versari, sed languere quotidie magis: adeoq. praeclara illa principia, quae, me qui dem saepe, & multum cohortante, ac monente, posueras esse labefactata, nihil vt a te eximium, nihil, quod vulgare non sit, expectari posse videatur. equidem neque plane credidi, quod a tua consuetudine tam valde dissentiret neque tamen plane non esse credendum id existimaui, quod vt accidere possit, cum in aetatem tuam intueor, verisimile mihi fit. quod si, contra quam ego cupio, factum est, vt paululum a te virtute disiunxeris, & in dubia, ac perdifficili iuuentutis via quiddam offenderis; agnosce tuam culpam, & corrige, dum licet. non enim, quae dies confirmavit, facile mutantur. En habes, qui te suo excitet ad virtutem exemplo, aequalem tuum, exquisiti adolescentem ingenii, Antonium Lauretanum, quem debes, cum nobilitate pares, nec naturae, fortunaeq. bonis dissimiles

diffimiles admodum sitis, aequare etiam, aut imitari saltem in studiis artium optimarum. Sin autem est, ut volumus; & ista, quae de te rumor dissipauit, inania sunt: noli laborare, quid alii loquantur; cogita, quod ipse facias; & a te ipso pende. magna solet esse incunditas, quae manat ex optima conscientia. hac tu frui, & perge, ut coepisti, in studiis liberalium disciplinarum: quarum est cum possessio vitae aequalis, tum fructus eiusmodi, ut etiam ad posteros pertineat. Vale.

ROMULO. CERVINO

Patauium.

24

ITAN ego tibi ex animo effluxi, ut unam tribus mensibus epistolam ad me dederis? occupatus, inquis, sum. quo in genere? nempe in litteris. num igitur tibi a litteris animum videris abducere, cum epistolam texis? mihi quidem numquam minus. quin hoc ipsum, quod ego nunc in te desidero, si contemnis; id est si ita legis, ut numquam scribere animum inducas: litterae iacebunt. quod si me a principio rectissime monentem audire voluisses; teq. si non quotidie, saltem alteris diebus scriptioni dedisses: Pii immortales, quos tu nunc fructus ederes, quam praestantes, quam uberis, quam & te ipso dignos, & fratre tuo, in omni genere laudis excellentissimo nunc, quos progressus hac in re secisti, non ego quidem illos quasi tardioris ingenii, reprehendo, neque reprehendere quisquam potest: sed tamen illud, quod ego a te olim expectavi, maius aliquanto fuit, quam hoc, quod tu nunc praestas neq. vero id, quo te iam pridem sumus hortati, & quo breui esse

ui esse peruenturum credidimus, eiusmodi est, ut facile
 quivis posse consequi uideatur: sed cogita, praeclarum
 fere nihil esse, quod idem difficile non sit: & tamen dif-
 ficultates omnes ea, quae in praestantibus ingeniis faci-
 le existit, gloriae cupiditas vincit. cuius rei noli exem-
 pla petere ab antiquitate: adspice fratrem tuum; qui, ut
 Antimacho poetae Plato, sic tibi omnium instar esse
 potest. numquid igitur illum existimas tantos labores
 aut suscepturum fuisse, aut, cum suscepisset, ferre po-
 tuisse, nisi verae laudis eum spes aliqua identidem qua-
 si allenasset? quam quidem spem dum sequitur, uides quo
 peruenierit. gradum tenet dignitatis, qui est a summo pro-
 ximus: & de summo quid homines augurentur, intelli-
 gis. Perge, mi Romulae, iisdem itineribus ad decus. ma-
 gna sunt bene agentibus praemia constituta. quam tu fa-
 cultatem quando habes maximam, noli contemnere; ne
 paullo post, amissam, frustra queraris. haec enim, quae
 nunc habemus, quis scit, quam diu simus habituri? ui-
 des, ut auolent horae, quaeq. nobis commoda praeterla-
 bentes auferant. Itaque opportunitates, dum adsunt, ita
 debemus amplecti, quasi non eadem semper affuturae
 sint. qua in sententia te quoque existimo esse, cupio qui-
 dem certe; ut cum expectationi de te concitatae, tum fra-
 tris tui, summi uiri, laudibus aliquando respondeas. quod
 facile consequeris, si te ipse colliges, & quo consilio Pa-
 tanium accesseris, quam urbem scis habitam semper esse
 doctrinae domicilium, assidue cogitabis. & quamquam
 non dubito, quin memoria bona sis: tamen, quoniam haec
 posterior epistola tua, quam ad me x v. Kal. misisti, cui
 ego x i v. respondi, non tam est luculenter scripta, quam
 uellem,

uellem, potius multo minus, quam uellem, uereor, ne tibi illa, quae ego tecum olim de Latinae linguae obseruatione sum locutus, quaeque ipse mihi te esse facturum pollicitus es, penitus exciderint: quae, si putas e re tua esse, ut a me iterentur; excurrere ad nos, & hoc quidem animo, ut, quam diu Venetiis futurus es, (cupio autem, ut diutissime velis) apud me diuerferis. Ac noli vereri, ne ego te Patanum crudiores remittam. non ita de nostris hospitibus male meremur. Cenae erunt, quae te lautitia delectare, non quae copia possint offendere: quae quidem in primis sermone bono, & perfamiliari conditur, quod tu quanti facias, ignoro: ego quidem huic incunditati nullam antepono. Vale.

VICENTIO. GILIANO

Venetias.

25

QVAM multa non modo contra voluntatem, verum etiam praeter opinionem homini contingunt: numquam putavi fore, ut humanitatem tuam requirerem. adeo mihi & multa, & perillustria studii erga me tui dederas argumenta: nunc, aliis me quotidie salutantibus aut certe consolatoriis in meo casu, opemque pollicentes, litteras mittentibus, ipse tamen neque scribis quidquam, neque mecum habendi sermonis facultatem quae ris. quod viris nobilissimis concessi, tibi, pro multis ingenii tui suauitatibus, proque nostra non nuper instituta, sed iam inueterata necessitudine, numquam denegassem. Optavi, inquires; sed optanti pudor obstitit. Agnosco modestiam

modestiam tuam, nec mediocriter probo; verumtamen
 decet aliqua ortam a virtute amicitiam confidentia. Erāt
 autem, cur me conuentum cuperes, causae minime vul-
 gares; primum Iasonis mei de Nores, viri omnium, quos
 ego in vita nouerim, optimi, atque humanissimi; reditus
 in hanc urbem, deinde Dauilae nostri, quem ego quanti
 faciam, & tu, & omnes paene iam norunt, aegrotatio:
 quae cum hesterno die cognouerim; cupio tamen certius
 abs te aliquid significari. varie enim afficior, & amicissi-
 mi hominis aduentu: cuius in consuetudine plurimam,
 mihi statuo incunditatem; & eius viri morbo, cui debere
 omnia videor, quia, quod in ipso fuit, operam dedit, ut
 me sibi non exiguo propinquitatis vinculo in perpetuum
 obstringeret. neque enim, licet mutuam utriusque volun-
 tatem frustrata fortuna sit, iccirco tantam in me beneuo-
 lentiae significationem parui pendendum existimo. ani-
 mus mihi pro re erit: meq. ille sui memorem beneficii (sic
 enim appellare debeo) aliquando sentiet. Haec sunt, mi
 Giliane, cur te velim. accedit illud, Affines suos Cardi-
 nalis Carpensis, qui de studiis meis non pessime existi-
 mat, cupit elegantibus litteris expoliri. optima condicio,
 nec minus honorifica. itaque statim de te cogitavi: quem
 ex cultum liberali doctrina, moribus emendatis, comem,
 & facilem in conuictu cognoui. nec tamen audeo spera-
 re. urbis enim Venetae tranquillitatem nimis amas, &
 otio libenter fruere erudito. sed, si a te non impetro; odo-
 rare saltem, & indaga, si quem eo loco dignum alicunde
 licet eruere. mibitur a Cardinali gratia non vulgaris. de
 quo tibi hoc affirmo, patronum esse bonarum artium his
 perditis temporibus prope singularem: qui si, ut auguran-
 tur

11
tur plurimi, ad illa summa peruenerit, redibunt, mihi cre-
de, aurea tempora, & debita litteris aliquando praemia
persoluentur. Vale.

FRANCISCO. MORANDO
Veronam. 26

ITA valeam, itaq. tecum viuam, quod utrumque
pariter exopto, ut cydonite tua nihil adhuc gustau-
i suauius, versibus autem, quos una misisti, nihil um-
quam legi purius, nihil ornatius. quare gratiam habeo
tibi quidem, ut debeo, maximam, aliquam tamen
etiam imperito artificii superioris anni, cuius culpam,
de qua tecum eram questus, lucro meo non mediocri
tua compensauit humanitas. quod si artifex idem est,
quemadmodum verba tua significant: non ab eius in-
genio, sed ab amore in me tuo nouum genus artificii,
noua fluxit industria. itaque magnam ad officia erga
me tua quotidie fieri accessionem intelligo. ex quo vo-
luptatem equidem capio tantam, quantam eius, qui
doctrina, ingenio, omni denique laude libero homine
digna excellat, perspecta beneuolentia afferre maxi-
mam potest: verumtamen, quia me prorsus omnis in
summa remunerandi voluntate facultas deficit, angor
nonnumquam intimis sensibus, & iniucunde uiuo.
sed neque futurum despero, ut, quo in te sum animo,
re ipsa aliquando perspicias: & si parum optatis meis,
ut fere consuevit, fortuna responderit, memoria sal-
tem, perpetuoque erga te studio, non officiis modo er-

O 82

210 PAVLLI. MANVTII

ga me tuis, sed virtutibus etiam eximiis debito, cumulare mihi satisfaciam. De tua valetudine, quae mihi perinde ac mea curae est, a patre tuo, prudenti viro, quae cupiebam, fere cognoui: de studiis ex te ipso. idest ex litteris tuis, quarum elegantia mirifice delector, aliquid cupio scire. Orationem in funere habitam doctissimi, ac nobilissimi hominis Ludouici Nogarolae, cuius obitu non mediocriter dolui audio laudari. sunt etiam, qui tuam existiment. quod libenter credo: sic enim faueo tuae gloriae, ut fratribus fortasse tuis, praeterea quidem concedam nemini. Vale.

LAEVINO. TORRENTIO

Leodium.

27

P V T O tibi molestum iam esse silentium meum: at mihi silentii causa longe molestior. nam toto fere biennio neque corpori valetudo, nec animo quies contigit. ita qui absentes amicos litteris saltem colere consueui, incūdis simam mihi consuetudinem intermittere, & in officii cursu languere sum coactus. quod si secus existimas; nec tibi mea fidem faciat affirmatio: testes habeo studii erga te mei non equidem valde locupletes, sed eos tamen, quibus tu libenter credas, probos viros, communes amicos: a quibus & quaesitum est aliquando, me mandante, de tuo statu, & cum id, quod auebam maxime, cognouissem esse te in oculis Leodiensi Episcopo optimo, eidemq. Principi eximio, auctum esse commodis, ornatum dignitate, factum est, quod ignorare te arbitror, ut leuationem malo

rum.

rum meorum in tuis bonis aliquam inuenerim. Atq. equidem reuocare me ad institutum meum, & aliquid ad te scribere cogitabam, cum tuae me litterae opprefferunt, quibus commendas mihi modestissimos & summae spei adolescentes, Ioannis Cauchi filios, doctissimi & ingeniosissimi hominis, ut equidem sentio, tuo primum testimonio, deinde scriptis illius; quae qui legerit, nullius praeterea testimonium requirat. quo libentius operam meam filiis eius & pollicitus sum, & detuli. qui cum ad me adeunt, te simul intueor, & impellor magis ad omnem humilitatem memoria tui: nec potest esse quidquam incundius, quam ut eorum studiis, commodisq. seruiam: & si praestabo aliquid, ita laetabor, quasi beneficium acceperim in officio meo. Erat in iisdem litteris tacita quaedam admonitio promissorum meorum: quae si non persoluo; mihi crede, tanti viri virtute, tanti Principis dignitate deterreor. nam, ut egregium aliquid moliamur, consequi tamen neque per ingenii nostri tenuitatem, neque per fortunam licet. hanc excusationem probari a te cupio, nec omnino despero; sin urgere pergis, auctore te aggrediar, utcumque cadat. potest enim fieri, ut, quemadmodum multa, contra quam speramus, item hoc fortasse, contra quam timemus, eueniat. quod si quid offenderimus; primum, illud fore non dubito, tua nos ut subleuet auctoritas; deinde, te ipso culpae socio, feram leuius. haec mihi cautio placet, utinam tibi, sed, si mihi in amore respondes, tibi quoque: de quo tuas litteras expecto. Vale. Venetiis.

LAVRENTIO . GAMBARAE

Patauium .

28

BASILII Zanchi, poetae summi, hominisque non vulgariter eruditi, miserabilis & indignissimus interitus hilaritatem mihi prorsus omnē eripuit. quem enim donare summis praemiis ob excellentem virtutem, decorare honoribus ob singularem integritatem, atque innocentiam aequum fuit; eum tam ignominiose vexatum, tam acerbè, tam crudeliter exstinctum, quis non ferat iniquissime? equidem, ut audiui, etiam dolore tuo vehementer dolui. nam & vixistis una semper coniunctissime, alter alteri egregie carus: & fuit uterque vestrum ad poeticam facultatem natura propensus, ac mire factus, ingenio vero ita pares, ut, cum nemo tam bonus poeta sit, quin vobis primas in componendis versibus partes tribuat, quam confessionem etiam ab iniuitis exprimit poematum comparatio, uter tamen utri praestet, nondum satis iudicare quisquam possit. magnam igitur, planeque fraternam inter vos tum ingeniorum similitudo, tum studiorum communio beneuolentiam excitarat: nec dubito, quin te, licet humanae condicionis minime rudem, obitus eius valde perturbaret, animumque tuum ita deiecerit, ut extolli sortasse ad aequitatem neque celeriter, neque facile possit. quo grauius morte illius afficior; & ut omnia mente peruestigem, nullam tamen inire doloris alleuandi rationem queo. unica, opinor, illa consolatio superest, quam tibi quoque fore gratissimam scio, ut, si conuictu perpetuo priuamur, tamen inter nos ita crebro colloquamur, ut hanc

EPIST. LIB. IV 213
hanc maeroris acerbitem, qua parit affligimur, quoti-
dianae consuetudinis mutuaeque benevolentiae suauitate
leniamus. quod ut quam maturime consequamur, tu pro
tua, ego pro mea parte diligenter operam dabo.
Vale. Venetiis.

NICOLAO NATHANAELO
Venerias. 29

PERCVLERAT me grauer acerbus ille nun-
cius de naui a piratis abducta, qua vehebatur in Cretam
exquisita, multorumque nummorum bibliotheca parentis
tui: cum ex eo casu iacturae plurimum tulisse res & for-
tunas vestras intelligerem. nunc me prorsus ab eo maero-
re, quae mihi vestra calamitas attulerat, ad laetitiam incre-
dibile reuocarunt litterae tuae. scribis enim erudiendi cu-
ram adolescentis nobilissimi, Aloysii Mocenici, tibi esse de-
mandatam. in quo sane, pro ea qua te sum complexus be-
nevolentia, multis nominibus tibi gratulor: primum, quod
eum, qui facile possit illustrare disciplinam tuam, excel-
lentis ingenii adolescentem, mirifica, ut audio, virtutis in-
dole praeditum, sapientiozem etiam, quam aetas ferat, na-
tus sis: deinde, quod ab eius patre, Leonardo Moceni-
co, Equite clarissimo, quo nullum in hac urbe vel pru-
dentiae, vel liberalitatis, vel omnium denique virtu-
tum, quae nobilem virum deceant, exemplum habemus
illustrius, fructum diligentiae tuae minime vulgarem
potes expectare: postremo, quod in ea domo viues, in
qua omnia, vetere maiorum norma, ad honestum, &
ad dignitatem referuntur, quo praestantes & usu ma-
gnarum

gnarum rerum, & doctrina viri quotidie confluunt, unde prudentiam, unde optime viuendi rationem petes. Persequi omnia, quae tibi diuina benignitas obtulit, difficile est: sed mihi crede, quem tua causa velle, tuisque fauere commodis non ignoras, nihil isto munere ne fingi quidem a te potuit aut fortunis tuis utilius, aut studiis accommodatius. itaque, si me audies, omnia, quae frustra saepe expetuntur, bona in una Leonardi Mocenici beneuolentia constitues: cuius tibi comparandae caue tempus amittas: confer huc omnem industriam, ut eius filium, tuae diligentiae commissum, in quo pater tali filio iure fixit omnes curas, ita instituas, atque excolas, ut eam laudem, ad quam natus praecipue videtur, adiuvante illius ingenium studio tuo, breui consequatur. habet autem hoc virtus, ut, a quibus illam accepimus, eos in omni vita diligere cogamur: & est optandum, ut ab iis maxime diligamur, qui non opibus modo valeant, sed ad benignitatem etiam natura propendeant. quae si in vlla ciuitate, profecto in hac nostra, & si in vlla familia, in ea potissimum, & in eo viro, cui tuam in re praeclara operam addixisti, summa cognoscitur. Vide igitur, quid susceperis, cuius familiae gloriae seruias, quid fides, quid existimatio tua, quid honor etiam meus quodam modo postulet: qui tibi saepe, nec tamen gratiae causa, sed adductus iudicio, testimonium impertiui probitatis, & scientiae non modo Graecae, verum etiam Latinae linguae: quarum alteram magistro patre tuo, Ioanne Nathanaelo, sacrarum litterarum peritia, vitaeque innocentia cum antiqua illa Graecia, quam numquam fama deseret, conferendo

alteram

alteram non nihil e sermonibus fortasse nostris, e studio quidem tuo, tuisq. vigiliis maxime cognouisti. Haec si tibi omnia, ut spero, ante oculos pones; vinctes te ipsum in diligentia; operamque dabis, ut in familia nobilissima, cuius patrocínio nullum certius ad eas temporum procellas, quae humanae vitae impendent, persugium reperiēs, egregium virtutis & industriae tuae monumentum relinquas. Vale.

*, Patauium. 30

FALSUS hic etiam de Ramutii Farnesii Cardinalis obitu dissipatus rumor erat: quo sum grauissime commotus. nam in illo viro, qui se iam inde a puero ad exemplum aui sui, Pauli III. Pontificis omnium sapientissimi, totum finxit, non adumbrata, ut in multis, sed expressa signa virtutis elucēt: & nunc, ut audio, suas omnes in Christianae pietatis cultu cogitationes, curasque defixit. quo mihi erat, bonisq. omnibus acerbior illa fama, quae, multorum sermone, de immaturo, & inopinato illius interitu percrebuerat. angebar etiam fratris eius, eximii viri, Alexandri Cardinalis nomine: cui multis iam annis eam viam ingressō, quae ducit ad verum decus, artiumq. optimarum studia suis opibus hac aetate praeter ceteros fouenti, tantum eripi praesidium, tantum auferri domesticae laudis, magnopere dolendum videbatur. Gratulor igitur, illo incolumi, liberalibus disciplinis; gratulor omnibus, qui virtutem, & probitatem prima ducunt; praecipue vero tibi, quem & Ale-

G 4 xandri

xandri Farnesii Cardinalis valde studiosum, & erga suos
similes, hoc est erga eos, quibus illa, unde manat honesti
sola placent, praeclare animatum cognoui. refrixit iam,
vel plane extinctus euannit peruulgatus ille rumor; vi-
uit, & valet, cui lacrimas tamquam mortuo dedimus;
quem, si fieri posset, immortalem esse omnes cuperent.
Te quoque bene firmum esse, & ex illo valetudinis in-
commodo emeruisse, represso iam sanguine, qui tibi ex
oculo dextro multus effluerat, mirabiliter gaudeo. de
quo mihi cum narraret familiaris tuus, prima statim au-
ditione sum percussus: postea, cum idem reliqua persequere-
tur, animum recepi, & ab omni metu, curaque respiravi.
huius morbi causam non dubito quin medici, quos ha-
bes istic scientia instructissimos, usu peritissimos, in studia
conferant. quod si ita est; remoue, obsecro te, libros omnes
ab oculis tuis. nam, donec eos videris, certo scio, quod mi-
hi saepe contigit aegrotanti, temperare tibi non pote-
ris. Vale.

E I D E M, Patanum.

31

NARRO tibi: iam non amo verecundiam. cum
enim mihi potius nihil esset, quam ut filium meum (libet
enim de mare ominari) ad sacram baptismatis aquam
susciperes: tamen, dum obsequor pudori meo, nec te talem
virum, maximarum rerum occupatione distentum, appel-
lare audeo, commisi imprudens, ut officii laudem ipse prae-
riperes. in quo sane & peccasse me, & luere merito pec-
cati poenam confiteor. quid enim mihi non permisit, quid
iam elargita non est humanitas tua? quam a me aliis prae-
dicatam

dicatam ignorare ipse fortasse tibi sum visus. valde tamē
 recreor significatione amoris tui: & nostram amicitiam,
 quam studiorum similitudo peperit, hoc etiam affinitatis
 quasi vinculo adstringi, vehementer laetor. nam & res ip
 sa eiusmodi est, ut benevolentiam utrimque augeat: &
 mihi ad hominū opiniones, accidere speciosius, aut hono
 rificentius nihil potest. totus igitur in aere tuo sum. ita de
 me meritus es, ita quotidie mereris. quod si tibi pateret
 animus meus: profecto non locari pessime tuam gratiam
 intelligeres: quam si non possumus remunerando, (nec
 enim aut fortuna tua patitur, aut voluntas expectat)
 praedicando saltem illustrabimus. mihi certe ipsa memo
 ria, perpetuoq. erga te studio satisfaciam. De reditu meo
 verbum scilicet expectas: iam discedo: itaque per aliquot
 dies litterae cessabunt. Amanuensem tuum amo pluri
 mum. videor enim mihi agnovisse manum optimi, atque
 honestissimi adolescentis, Francisci Secundi: cui de tua
 consuetudine etiam atque etiam gratulor. nam invidiae
 locum amor non reliquit. Vale. Venetiis.

*, Ferrariam.

32

ET ME laudas in epistola tua, nec mediocriter
 quidem; & meam amicitiam, quae tua humanitas est,
 valde videris expetere. Ego autem, etsi me delectat, ut
 ait ille, laudari a laudato viro, tamen ea, quae mihi
 tribuis, cum esse verissima cupiam, non agnosco. dile
 xi equidem adolescens veterem eloquentiam: nec volun
 tatem aetas, studium occupatio, saepe etiam vale
 tudo

tudo minuit: sed, excellere in re omnium, ut ego sentio, praestantissima cuius negotii sit, cuius ingenii, non modo experiens ipse intelligo, verum etiam ex inani multorum industria coniicio. non enim, qui seuerior in me ipso sim, nec mihi amicior, quam veritati, aliis blandiri gratiae causa debeo. vnum hoc in nobis fortasse iure laudes: si modo laude dignum est: equidem, quasi aliquid sit, interdum mihi gratulor; quod, & quales olim fuerint ii, quos in oratione Latina cupimus imitari, quibus ingenii, qua doctrina, qua etiam exercitatione praediti, & quis ego sim, vel potius, qui hodie simus omnes, facile possum existimare. Quocirca, si vetera spectas, mutes licet sententiam de me tuam. floruit antiquitas eloquentiae gloria: nos iacemus. sin haec recentia tibi proponis: non omnino me, quantum in hoc studio profecerim, paenitebit. nec tamen tibi assentiar, ut me omnibus Latine scribendi facultate confitear antecellere. possum aliquid, vel etiam multa in aliis desiderare, neminem in hoc genere laudis eximium ducere: (est enim haec fortasse non ingeniorum culpa, sed temporum) non ideo tamen sequitur, ut insolenter arripiam, & induam ipse, quae aliis tamquam spolia detraxerim. ut in musicis, artem ipsam exercere, non facillimum est: artificem autem peritum ab inscio distinguere, tacito aurium sensu plerique omnes solent; item ego, quam legendis assidue, ac perattente hominum eloquentissimorum libris conceptam in animo recte scribendi formam intueor, eam exprimere, & assequi scribendo nunc quidem nullo modo possum, ac vereor etiam, ut unquam possim. verum enim vero, quod a sapientibus

viris proditum legimus, numquam male ponitur indu-
 stria praestantibus in rebus. laudatur enim vel sine re
 voluntas. qua ego interdum spe incitor ad studia. & si
 nihil aliud, tu me certe, * optime, atque eruditissime,
 hoc ipso, quod tantopere laudas, ad laudem vehemen-
 ter impelleres. magni enim facere videris Romani ser-
 monis elegantiam: & quod tibi leue non est, eximia-
 rum artium scientia instructissimo, id a me nequaquam
 esse contemnendum intelligo. Accidit illud, quod episto-
 la tua ita loquitur ornate, ut a rhetore, non a medico,
 quem te esse profiteris, & quem praestas egregie, scri-
 pta uideatur. quod indicat ingenii tui praestantiam. cum
 enim, ut audio, philosophiam sis uniuersam animo com-
 plexus; praecipue uero medicinam trahes, & ita tra-
 hēs, ut cum paucissimis excellas; ualde sum miratus,
 unde istam Latinae orationis tam concinnam, tam ube-
 rem, tam illustrem facultatem sis consecutus. Quare,
 quo tu nomine subuereri uisus es, ne ego tuam ad me
 amandum ualde propensam uoluntatem parum libenter
 exciperem; cum eloquentiam tuam uerbis dissimules, re
 ipsa ostendas: eo ipso nomine sic incensus tui studio sum,
 ut ad meam instituendae tecum amicitiae cupiditatem ac-
 cedere nihil possit. Quod autem negas esse quidquam ad
 amorem conciliandum amore ipso efficacius: ita tecum
 sentio, si uirtus cum amore coniungatur; sin eum, qui
 dirigit, nihil, praeter nudam uoluntatem, commen-
 det, non probitas morum, non doctrina, non ars ali-
 qua liberalior: ualde uidero. sed istuc quidem tua mi-
 nime refert. quis enim te uel non amantem amare nolit,
 quem esse tam amabilem, literis, humanitate, inte-
 gritate,

gritate, sentiat? sed videlicet Socratice mecum agis: ironia te delectat: cum in eo ipso, quod tibi detrahis, tua te refellat oratio. Ego tuum erga me animum pari animo complector, & fauebo officiis, quantum in me erit: neque me patiar, cum reliqua apud te omnia superiora esse concedam, etiam humanitate vinci. Vale, & Ioanni Baptistae Pignae, homini in primis erudito, & ingenioso, cuius de Imitatione poetica egregios libros auide exspecto, salutem meis verbis. Venetiis.

MARIO. CORRADO

Brundisium.

33

MVLTIS iam mensibus nihil ad te litterarum dedi: nec mihi tamen uenit in mentem subuereri, ne quam tibi nostra indignam amicitia suspicionem silentii mei diuturnitas attulerit. mihi quidem nihil scito esse iucundius epistolis tuis: quas cum lego, delector mirifice amore in me tuo, delector etiam ingenio, & scribendi elegantia in qua tibi (non loquor *ἐξ ἐμῶν ὁμῶν*) paucissimos comparo, antepono neminem. atque equidem, si per utriusque fortunam liceret, nihil malim, quam assidue tecum esse, totosque dies in tuo sermone consumere. quod tamen quin aliquando sit futurum, cum in tuas litteras intueor, imaginem animi tui nonnullam ostendentes, prorsus non despero. Ego satis diu feriatum a studiis sum, inuitus, sed quis necessitati non pareat? nam, quae me causae non modo libros, sed patriam quoque relinquere coegerint; aut habes fortasse iam cognitum, litteris edoctus familiarium tuorum,

tuorum, qui adire interdum ad me officii causa solent; aut, si ignoras, quid ego tibi exponam; cui si quid a me accadat inuicundum, dupliciter angar, incommodo meo, molestia tua? Nunc id commentor, ut certam aliquando rationem ineam otii consiliuendi, et uiuam humaniter: quod te quoque uideo cogitare, & si uolueris, assequere. Bouios fratres, tua praedicatione commotus, amo uehementer, & obseruo. qui si mihi, ut significas, aliquid tribuunt: est, quod gaudeam, placere me praestantibus uiris, quorum in iudicio, & beneuolentia ornamenti, & commodi mihi statuo plurimum. tu uelim, quod ad amorem, studiumque attinet, de me illis omnia promittas: ego, quae promiseris, praestabo. fructum etiam fortasse aliquem degustabunt studiorum nostrorum. liceat modo esse otiosis; id quod agimus, & futurum speramus. Vale.

PETRO. CELSO

Viceriam.

34

VNA, eademque manus uulnus, opemque tulit. plane enim mihi uideor, quod de Achillis hasta in Telephi uulnere traditum est a poetis, idem ad tuas epistolas posse conuertere. affeceris me grauius, nunc idem recreas, & abstergis omnem molestiam incundissimis literis, in quibus elucet humanitas tua, quam obscurauerat paullulum animi tui subita commotio, indigna certe meis in te neque paucis, neque uulgaribus officiis, quorum testes apud me custodiuntur litterae tuae. itaque, rediisse te ad eam comitatem, quae cum

tua

tua natura, & cum iis studiis, in quibus totos dies eximia cum laude versaris, magnopere congruit, ita laetor ut nihil umquam senserim hac uoluptate iucundius. quod si tibi meum ingenium aliquot mensium consuetudine satis exploratum non est; non dubito, quin absens intelligas, & eo cernas illustrius, quo longiora nos terrarum interualla disiungent. non enim in te fortunam diligo, quam soleo contemnere, sed quia fortunam tua virtute superas: contra quam multi; quorum oculos auri, argentiq. splendor ita praestinguit, ut pulchritudinem virtutis intueri nullo pacto possint. quo equidem sensu, ac iudicio meo delector multo magis, quam Ciceroniana illa eloquentia, quam tu mihi, ioco fortasse, obieciisti: cum tamen, tibi quoque eam minime displicere, tuorum scriptorum eloquentia significet. De discessu tuo, quamquam ad tuam uoluntatem accommodare consilia mea minime liceat, cupio tamen mihi tempus definiri. Vale.

I O A N N I . S A M B V C O

Patauium.

35

NON mediocre amoris argumentum, quod de filiolo gratularis, & sperare te significas, ut patri etiam orationis Latinae facultate antecellat. quid? ergo ille tibi magnum uidebitur praestare, si opinione, & fama nos anteierit eloquentiae? ego illi, qua primum hora editum in lucem uidi, bonam mentem precatus a Deo sum. hoc nobis debet esse antiquissimum; & hoc ei si contigerit, reliqua iure contemnet, aut, si uoluerit, facile consequetur.

tur. mea uero studia si imitabitur, quae certe, quod fa-
 teri sine arrogancia possum, ad honestum referuntur: adi-
 tus ad laudem difficiles non habebit; quo mihi studiose
 contendenti fortuna semper nescio quo meo fato uiam
 interclusit. ueruntamen, mi Sambuce, cum tua, tuiq. si-
 milium fruar beneuolentia, quid desiderem? quid potest
 esse amicitia incundius? quid etiam fructuosius? cum &
 amant inter se boni uiri; & est inter eos quasi certamen
 amoris, & officii. equidem, de te quid sentiam, si ad te
 ipsum scriberem, certe scio, qui tuus pudor est, legeres
 inuitus. testem tibi do iudicii mei grauem adolescentem,
 (& adde si quid uis: nihil enim tribues immerenti)*:
 quem cognoui tuis laudibus, me narrante, etiam atque
 etiam laetari. quod si tenerem artem eloquentiae, sicuti
 ut in epistola tua, amore potius in me, quam iudicio
 effusus, existimas; sane coloribus egregiis imaginem
 tuarum uirtutum exprimerem: uoluntatem uero illam,
 & praeclaros conatus ad augendas fortunas nostras,
 de quibus postridie, quam a nobis discessi, quiddam in
 sermone* significauit, mehercule sic ornarem, ut nihil
 esse posset illustrius. de quo quia tam amanter cogitasti,
 gratias agerem; & ut perpetuo cogitares, atque age-
 res, cohortarer; si hoc humanitas tua, illud amicitia no-
 stra pateretur. ut ut autem res ceciderit; (a te enim prin-
 cipia sunt; exitum praestare non potes) partes meae non
 requiruntur: prosequar enim uel beneficium laude, uel ani-
 mum certe tuum memoria sempiterna. Vale. Venetiis.

EIDEM,

E I D E M, Patauium. 36

E G O vero, accepto nuncio de obitu filioli mei, ita sum perturbatus, ut me tamen hominem esse meminerim, et illum in hanc vitam, tamquam in hospitium, ita esse ingressum, ut, accitu summi Dei, aeternum illud caeleste domicilium petiturus, aliquando discederet. quod si me casus iste nec opinatus ita perculisset, ut omnino iacerem: excitarer tamen prudentia litterarum tuarum, in quibus de luctu minuendo disputas egregie, tuamque declaras tum homine Christiano dignam bonitatem, tum erga me benevolentiam singularem. verum ego, optime Sambuce, multis iam infortuniis hoc sum affectus, ut fortunam ipsam didicerim contemnere. quae mihi, ut eripiat reliqua, numquam adimet ea, quae nec ipsa dedit, nec dare cuiquam potest, rectam mentem, optima studia, pietatem in Deum. Praetlare actum opinor cum filio meo. fruitur conspectu, & consuetudine caelestium animorum: non angitur curis: non spe ducitur: nihil timet aduersum. at nos, qui dicimur vivere, quibus hac falsae lucis usura nihil est carius, quam multa exercent? quid laboramus, quid cupimus, quod etiam si contingat, animus acquiescat? itaque vere sapientes homines, non ut diu, sed ut recte, & cum virtute viverent, optare soliti sunt. quod equidem conor, & ut spero, consequar. nihil enim magis cogito, nihil specto, quam ut seruiam studiis meis, & ita viuam, ut vitae rationem Deo simul & hominibus aliquando possim reddere. Quare, cum me vocas ad scribendum, confirman-

confirmantur consilia mea iudicio tuo . ac tu quidem in
 hoc officio cohortandi facis idem, quod multi: quibus fa-
 cile possem satis facere, si per domestica negotia liceret.
 sed, obsecro, nolite ex otio vestro meum spectare . nobis
 enim certa, & expedita sunt omnia: mihi unicum est
 vestigal industria mea: qua liberos alere, tueri fami-
 liam cogor. & si negligam, deseretur humanitas: sin,
 ut debeo, diligenter curem, iacere studia necesse est; quae
 solutum curis omnibus animum postulant . At inquires:
 ipsa tibi studia fructum ferent . Cane aliis cantilenam
 istam, mores, ac tempora ignorantibus: mihi non persua-
 debis experto. vetus illa Principum virorum benignitas
 exaruit . inania pleriq. sequuntur, nihil solidum amant,
 nihil magnificum, nihil illustre . Vides alios, quasi per-
 dendis tantum frugibus nati sint, immanibus epularum
 sumptibus opes exhaurire: alios, quasi etiam homines
 ipsos, non modo fruges, perdere pulchrum sit, thesau-
 ros effundere, collectos acerbissime, in ea bella, quae
 vastitatem agris, urbibus incendia, humano generi, alie-
 na stultitia miserrimo, cladem, & exitium importent.
 Musae interim ubique locorum algent, neglectae ab
 iis, qui fouere eas ut maxime poterant, ita maxime de-
 bebant. Etiam illud indignum, quod existunt, qui specie
 liberalitatis gloriolam aucupentur; & eam virtutem, a
 qua longissime absunt, quasi familiarem suam, sic in ore
 habeant, ut amare uideantur . Verum . haec satis, aut
 etiam nimium fortasse multa . Vale . Venetiis.

GASPARI. CONTARENO

CARDINALI

Romam.

37

CVM neque haberem, quod tua magnopere interesset a me scribi; & te scirem summis occupationibus assidue esse districtum: tamen faciendum mihi putavi, ut aliquid omnino ad te litterarum darem. ad meum enim officium valde pertinet, te, de nobis optime meritum, intelligere, & quo te studio colam, & qua tuorum in me meritum memoriam religione conseruem. quod, ut spero, consequar litterarum bono. nam, ut remunerare umquam possim, sperare audeo: ita multa sunt, quae ad me iuandum officia sunt a te profecta. ut enim omittam, quam honorifice de parente meo & loqui, & sentire solitus sis, cum ita dicas, tibi nullius olim iucundiores consuetudinem fuisse, nullius cariores nunc esse memoriam: ut igitur hoc omittam, quod in summi beneficii loco soleo ponere: quanti illud apud me debet esse ponderis, quod olim me adolescentem vir clarissimus, non tu quidem sopitum, sed tardiores fortasse, quam oporteret, ad studium summae laudis excitasti. cuius temporis recordatio mirifice me delectat. sic enim argumentor: te, cuius iudicium est acerrimum, numquam me ad virtutem fuisse cohortaturum, si te frustra id facere existimasses, tantum autem virum, quantus ipse omnium consensu gentium & es, & haberis, de nobis non pessime sperare, mihi periucundum est cogitari, apud alios, si qui audient, etiam honorificum.

Quare

Quare nunc quidem id, quod mihi pro tua summa humanitate facillimum est, ago, ut, quem pro tot ac tantis officiis animum debeo, eum me praestare tibi persuadeam. quod si per eam viam, qua ad praestantissimarum artium cognitionem iter est, tantum procedam, quantum profecto, nisi me aliqua res impedierit, procedam: nae illud etiam aliquando efficiam, ut, te de nobis esse bene meritum, magnopere laeteris. Te interim si rogem, ut, quem admodum instituiisti, me diligas, faciam imprudenter. neque enim dubitandum est, quin tu velis in eadem erga me voluntate, cum humanitatis, tum constantiae causa, permanere. magis illud mihi est elaborandum, ut omnes res, quae ad te colendum pertinent, studiose faciam: quarum si ullam sciens praetermiserim, nefarie me peccasse confitebor. Vale. Venetiis.

BENEDICTO. ACCOLTO

CARDINALI

Ferrariam.

38

CUM primum Venetias reuertere, etsi eram & fessus aliquantum de via, & eo morbo, qui me Ferrariae satis grauius afflixit, nondum plane leuatus: tamen magnitudo meae in te obseruantiae, tuaeq. in me beneuolentiae recordatio me adduxere, ut ad te scriberem. quo genere officii quam mihi saepe apud te sit utendum, intelligo. nam cum eo ipso die, quo mihi aditus ad amicitiam tuam patuit, de meis commodis & ornamentis non cogitare solum, sed agere etiam coeperis: omnino, si velim id,

P 2 quod

quod maxime velle debeo, quibus me studiis a pueritia dedidi, iis haberi non indignus, diligenter ineunda mihi ratio est, ut istam tuam ad me augendum tam propensam voluntatem plurimi apud me, & esse, & semper fore significem. id hoc tempore nisi litteris mittendis, qua re alia consequar, non video. facultatem maiorem si umquam nactus ero, actissime complectar, neque dimittam prius quam id tibi saltem aliqua ex parte persoluam, quod interea a me deberi non solum non dissimulo, sed etiam apud omnes libentissime praedico. Quid enim mihi esse potest, non dicam honestius, sed gloriosius, quam te, virum omni genere virtutis excellentem, summa dignitat praeditum, acerrimi in cognoscendis hominibus iudicii, num officii nenus, aut studii, quod quidem ad meam siue utilitatem, siue laudem pertineat, praetermittere? mehercule nulla res fuit, quae nos ad probitatis, & doctrinae opinionem commendare magis posset. itaq. quod ante faciebam domestico tantum exemplo commotus, ut per eam viam, quam mihi pater meus iritam reliquisset, expedito cursu ad summam laudem, gloriamq. contenderem, id multo acrius facio nunc iudicio de me incitatus tuo, cui vereor equidem ut respondere possim; & est sane difficillimum: sed tamen, quoniam ita tempus omne meum traduco, ut, quantum valetudinis ratio patitur, in litteris uerser, & quasi diuturnam sitim explere cupiens, iisdem e fontibus, unde illa fluxerunt, quae sunt laudum tuarum maxima, diligenter hauriam: non despero fore, ut & homines officia tua bene posita existiment, & tu, qui tibi a me fructus debentur, eos non contemnendos aliquando percipias, cuius rei maturitas dum veniat,

niat, est inteream mei officii, tui memoriam summa cum beneuolentia sanctissime, ac religiosissime colere; tuae uero humanitatis, eam uoluntatem, quam ad me iuuandum tua sponte contulisti, perpetuo retinere. quorum alterum ego quam potero diligentissime faciam; alterum tu ut facias, propter incredibilem naturae tuae benignitatem, ne admonendus quidem es. Vale. Venetiis.

E I D E M, Ferrariam. 39

SUMMO studio maturabam Ciceronis editionem. omnino id erat causae, cur ego rarius, quam debeo, ad te scriberem. sed mehercule nec res erat, de qua possem scribere. de publicis enim non licebat: de priuatis autem quid est, quod delectare te possit? grauibus morbis anno- na, & bello, uniuersa fere ciuitas affecta contabescit. in his malis pacem omnes, tamquam unicum remedium, ex petebant: quae si daretur, amissas uires recuperare diffi- cile non erat. Arbitrabar, cum Ciceronis epistolas emis- sem, fore, ut Ferrariam possem excurrere. id ego, primum honoris causae ut te uissem, optabam; deinde, ut tuis do- ctissimis sermonibus fruerer, quantum per humanitatem tuam liceret, per quam certe licuisset plurimum. noui enim, quae tua sit cum facilitas, tum in me beneuolentia. sed nostrae uoluntates, ut nauigandi cursus, quandoque commutentur, necesse est, nisi fortunarum nostrarum fieri naufragium uelimus. itaque, ut exirem, meas res cum uidi non ferre, mutavi rationē; et, quamquam eram occupatus, tamen feci, ut hanc epistolam mitterem;

P 3 quas

quae te, meam vicem, quasi salutaret. ea ne hoc officium loco non praestaret, ad Octavianum nostrum, iis litteris, quas ad ipsum dedi, alligatam misi, qui tibi redderet, cum vacuus esses. quod ille, qui & commodissimus, & prudentissimus est, non vereor quin effecerit. De meis rebus si quid audire vis: ut in aduersis, pessime non habent: haberent optime, si pietas esset in iis, in quibus maxima, si quid merita ualent, esse debebat. Vale. Venetiis.

E I D E M, Ferrariam.

40

SUMMA tua facit humanitas, ut, etsi me argumentum deficiat, litteras tamen ad te mittere ne dubitem. non enim uereor, eae ne tibi molestae sint. quin ita te interpretaturum confido, ut hoc meum studium existimes esse non obscurum signum pietatis in te meae. cui quidem pietati, quod uix fieri posse credebam, magna sane accessio facta est lectione tuarum litterarum. nam, cum antea pro tuis maximis & singularibus erga me studiis effecisses, ut plus, quam tibi, deberem nemini: nunc propemodum es consecutus, ut ipsi tibi plus, quam debeo, debere non possim. quanti enim illud, quo epistolam clausisti, apud me esse potas? te non dubitare, quin ego, omnesq. mei, quanti amorem in te meum, atque doctrinam facias, aliquando simus intellecturi. ego uero iam intelligo; neque quisquam est meorum, qui aliter sentiat. sed de amore quod scribis, uere tu quidem facis; est enim is certe summa cum obseruantia singularis. de doctrina uero, neque prorsus assentior, ne me ipse, qua in re minime debeo, nimium uidear

videar amare: neque valde repugno, ne, quod est in me honorificum, stulte reiiciam, ut ut tamen est; sine tu amoris, & humanitatis abundantia, quod interdum adducor ut credam; siue iudicio, quod mihi persuaderi libenter patior; siue utraque re permotus tantum mihi tribuisti, quantum ego postulare sine rubore non ausim: maximas tibi gratias habeam, necesse est: quod ad eius ipsius, quam in me esse dicis, doctrinae studium, quo antea naturae inclinatione propendebam, vehementer me impulisti. ita enim usu fere venire solet, ut, quae laudes a tui similibus, id est ab iis, qui ipsi in laude viuunt, proficiscuntur, eae nos, vel si simus hebetiores, in primis acuant, & quasi necessitatem quandam imponant, ut, quales esse dicimur, tales aliquando studeamus esse. quod ego, quantum possum do operam ut consequar. a quo studio cur me vlla res debeat abducere, non video: cum tu, istis opibus, ista amplitudine vir, litterato otio nihil anteponas. temporibus enim turbulentissimis, dum plerique fere, ambitionum fluctibus iactati, optare magis, quam sperare, tranquillitatem animi possunt; securus in portu te oblectas, viuisque iucundissime in tuis perennibus optimarum artium studiis: in quibus totos dies ita ponis, quasi tibi eae res, quibus abundas, et quarum spe tu alios excitare ad laudem potes, praemio sint futurae. Quod cum ita sit; & cum ego hoc animo sim, ut antiquius tuo commodo nihil habeam: noli credere, me, cum ad te scribo, tuarum litterarum expectatione id facere: quae etsi me incredibiliter delectant, textae verbis elegantissimis, plenissimeque amoris, & suauitatis: tamen ego te mea causa a grauissimis studiis ad nugas auocari nolo. satis me habere abs te puta-

P 4 tabo,

232 PAVLLI. MANVTII
tabo, si & meas tibi esse redditas, & tibi, ut cupimus,
esse intellexero. vtrumq. Octavius noster, quod & tui
studiosissimus est, & nostri amantissimus, cum libenter,
tum diligenter efficiet. Vale. Venetiis.

IACOBO. GRIFOLO

Romam.

41

QVOD tu, homo occupatus, prior ad me litteras
misisti; hoc sane es affecutus, ut officii plus apud te re-
sidere confitear; illud assequi nequaquam potuisti, ut
amoris plus, quam in me est, in te esse concedam. atque
ego ne in officio quidem passus essem ut antecuerteres,
nisi me scribere cupientem non occupatio mea, quae ta-
men summa est, sed cura tuorum mandatorum impe-
disset. Scis, ante quam discederes, qua de re sermonem
inter nos habuimus; cum tu, ut eam susciperem, a me pe-
tens, ostendisti, quantum & fidei, & diligentia tri-
bueres meae. in quo ego, opinionem tuam ne fallerem,
operam dabam. itaque, te profecto, cum intelligerem
quantum damni fecissem, adempta mihi tuae consue-
tudinis usura; cumq. id omnino litteris mittendis refarci-
re uellem; tamen, diem e die expectans, ut aliquid
ad te de tuo negotio, cuiusmodi tu velles, possem scribe-
re, in maximo desiderio me sustinebam. nunc, quoniam
eius rei ne vestigium quidem apparet in epistola tua;
siue quod, a quo tempore discessisti, ut illud consilium
abiiceres, rationes tuae tulerunt; siue quod, eodem
animo cum esses, committere tamen litteris nihil uo-
luisti,

iuisti, quod elatum nocere tibi posset; puto me non in-
 commodum esse facturum, si quam tu rem in tuis litte-
 ris intactam omisisti, ego item in meis silentio praeter-
 mittam. Quod scire vis, rerum mearum status hoc
 tempore quid sit: ne te multis morer, is est, quem re-
 liquisti, paullo etiam melior, quam reliquisti. nam &
 domestica quaedam sanauimus; & eum, de cuius acer-
 bitate queri solebam, ita facilitate quadam nostra, atq.
 obsequio mitigauimus, ut paene dulcis esse videatur.
 De Ciceronis editione, hoc de me spondeas, atque etiam
 in te recipias licet, ut, diligentia, confirmes, me non
 esse usurum multo minore, quam qui in hoc genere lau-
 dantur. haecenus confido fore ut praestem, & praesta-
 bo certe, nihil ultra. mihi enim tantum non arrogo,
 neque arrogare debeo, ut, quemadmodum scribis, eas
 sordes, quibus veterum scripta sunt foedata, putem
 omnes eluere me posse. magni id esset ingenii, ma-
 gni iudicii: quibus ego rebus & indigeo, & si abun-
 dem, sine libris tamen antiquis nihil audeam. qui mi-
 hi sunt omnino multi, sed neque quot vellem, neq. cu-
 iusmodi. coniecturae autem, intellexi, & didici, quam
 saepe sint fallaces. neque bonos libros vlla magis labe
 inquinavit. quibus nunc in veterem splendorem, atque
 integritatem restituendis, primum mihi est negotii, &
 erit, ut puto, post me multis: ut inde laudis materies
 deesse numquam possit. Te rogo, ut, antiquiorem librum
 sicubi istic esse rescueris, si prece ipse, aut pretio non
 potes, aliorum auferas gratia. Litteras autem, quam
 valde me amas, tam saepe mittes. nam & otii puto te
 habere, quantum velis; & argumentum Romae vi-
 uenti

venti deesse non potest. mihi utrumque minus est. magnis enim districtus occupationibus, temporis ad scribendum non habeo satis, argumentum autem unde sumam, cum omnium, qui hic sumus, ea ratio sit, ut rerum novarum si quid alicunde ad nos affluxit, de eo nec scribere, nec loqui sine gravi periculo possimus? Relinquitur, ut privatis de rebus possim scribere. sed hoc quoque genus vereor ne me deficiat. raro enim solet accidere, quod scriptio dignum sit. Quapropter, quoties ita eueniet, ut a negotiis liceat discedere; properabo statim ad epistolas. quod eo libentius faciam, si tu mihi sententiam scribendi aliquam dabis: sin minus, inanes tamen potius, quam nullas, mitam. Vale. Venetiis.

HANNIBALI . CRUCEIO

Mediolanum.

42

AMORIS in Octavianum Ferrarium mei causae sunt veteres sane multe, eaeque non leues, sed recens haec est gravissima, quod eius opera video factum esse, ut tu me amares. quod ego, non possum satis explicare, quanti faciam. certe optatius nihil, ac ne vilius quidem potuit accidere. nam me molestae quaedam cogitationes exercebant. eae fecerant, ut subtristis essem. hoc malum Ferrarii litterae sanarunt. eas enim legens, cum venissem ad eum locum, ubi ille, quam tu me diligas, quamq. diligere a me cupias, diligenter & officiose narrat; sensi mihi quiddam instillari, quo plane sum exhilaratus. adeo tui similium amicitia augeri gratum est. in qua commoditate incommodum tamen illud inest, quod mihi valde sentio.

tio esse laborandum, ut benevolentia, & opinione de me
 tua non indignum me praestem. quod utinam possim effi-
 cere; conabor certe: ac ne despero quidem fore, ut efficiam
 modo, quod tu iudicium de me habes, id eiusmodi ne sit,
 ut ego ei respondere nullo pacto possim. nam mihi inter-
 dum venit in mentem vereri, ne tu me, Ferrarii praedica-
 tione commotus, eum existimes esse, qui non sum. men-
 dax, mi Cruciei, amor est; nosque saepe ita solet affi-
 cere, ut in sermone, prout amicorum e re est, & affinge-
 re falsa, & detrudere vera, religio non sit. quare Ferra-
 rium, cum de me loquitur, non est quod audias. amore vi-
 ctus, cui repugnare iudicio non vult, ea dicit, quae fortas-
 se non sentit. At idem de tua virtute multa in suis lit-
 teris. habes igitur, dices, ei fidem, cui haberi a me non
 vis? habeo, & quidem maximam. mittit enim ingenii
 tui monumenta, quae mihi de tuis laudibus, ut ille scribit
 ita esse probant. Memorem igitur interea me velim
 existimes humanitatis tuae. gratum cognosces, cum fa-
 cultas erit. ac video me tua causa non eas res praesta-
 re posse, quas vellem; sed, quas possum, ita volo, ut om-
 nes, sine ulla exceptione, libenter ad te deferam. licet
 iis arbitrato utaris, atque etiam abutaris tuo. Vale.
 Venetiis.

 ANTONIO. MERLO

Vicetiam.

43

EGO quoque quiddam inaudieram superioribus die-
 bus, sed contempsi. nunc me mouet, quod audies. Arti-
 bus effectum nescio quorum, (de Petro nostro certe vix
 opinor:

opinor : vix, autem ? prorsus non opinor) ut hic rumor
 serpat longius. primum haec vulgo iactata : ferebam :
 post etiam ad Cardinalis aures pervenerunt : quod mihi
 accidit molestissimum : nec dubito, quin is iam non idem
 sit . quod si ille eadem cum Episcopo , cuius ingenium
 praeclare novi , communicaverit : actum est . Me qui-
 dem & illa angit cura , quod vereor ne fama diffuat ,
 & Perusina condicio, satis opima , satis honorifica, for-
 tasse in dubium vocetur . Cornelius rem curat diligen-
 ter, ut video, fide certe, & amore singulari. In hac sum
 sententia: si spes non dubia, ut urgeamus; sin, desistamus
 ab incepto; ne cupiditatem nostram sine fructu, fortasse
 etiam cum aliqua mercede, prodamus. Mitto ad te Gra-
 tii poema de Venatione, paullo durius, nec omnino cum
 Petri Bargaei carmine conferendum, qui hoc argumen-
 tum sex libris non minus eleganter, quam copiose, per-
 secutus est. Vale. Venetiis.

MICHAELI. SOPHIANO

Patauium.

44

SI nostrae necessitudinis initia repetas; nemo, opi-
 nor, istic est, qui mihi vetustate praestet. sin apud te
 vetustas pondus non habet; ipsam per se benevolentiam
 pendis: ne sic quidem iure mihi quemquam antepones.
 Ego te primum, cum abesses, memoria colui diligentis-
 sime, tuumq. nomen crebris usurpatum sermonibus or-
 nati laudibus, quantum in me fuit: deinde, cum de
 amunculo tuo, viro optimo, tuiq. amantissimo, miserrimi-
 man

nam in seruitutem a barbaris gentibus abrepto, cognovissem, ingemui saepe tua causa, quem, orbatum domestico praesidio, maximas in difficultates immerentem, fortuna coniceret. postremo, cum Patavium te aliquando retulisses, valetudine ita perditā, ut humana vix ope restitui posse videretur: quam id moleste, quam acerbè tulerim, testes sunt communes amici, quibus & periculum tuum, & eodem tempore dolorem meum dolori fuisse certo scio. Veni Patavium aliquanto post: vidi te, quem optabam potius quam sperabam, habitu corporis non illo quidem optimo, eo tamen, qui vitae spem minime dubiam afferret. deinde quotidie meliora, accedente ad remedia medicorum temperantia tua: quam ita laudant omnes, ut in studiis tamen paullulum eam desiderarent. quo de genere praecipere quidquam difficile est, praesertim mihi, qui cum ab eadem culpa longe non absum, tum etiam, nisi priores tibi partes in prudentia concedam, ignorare scilicet videar utrumque nostrum. verumtamen, cum te penitus philosophiae dedideris, ut eius praesidio fortunae tela depelleres; debes eam sequi ducem in actionibus tuis. quod si feceris; extrema vitabis, & omnem in medio laudem constitues. At mediocritatem mens in suo munere non amat: progreditur enim meditando, & , quo longius, eo iucundius. Vere: sed immoderatis rebus natura frangitur: & , quamquam corpori mens dignitate praestet, utriusque tamen incolumitas ab utriusque pendet officio. ut herus imperat servis, nec tamen eos negligit, sed consulit quatenus liceat, commodis eorum: idque facit etiam sua causa: tam diu enim herus est, quam diu habet quibus imperet:

ret: sic mens rationem corporis habeat aliquam, oportet. nam, si negligat eam sedem, in qua summus opifex illam constituit: primum faciet iniuste; deinde, corporis compagine, qua ipsa includitur, breui dissoluta, vsum tractandae quaerendaeque virtutis amittet. quod cum accurate vitandum omnibus est, iis maxime, quorum & infirma valetudo quietem quaerit, & ita viget industria, ut mediocri etiam labore non mediocre ipsi gloriam, ceteris utilitatem asferre possit. Cui porro ignota est vel ingenii tui, vel memoriae praestantia? quibus, non modo ut emineres in Graeca lingua, id quod omnes fatentur, sed ut, quacumque re proposita, peritissime disputes, facile consecutus es. itaque iure expetitur a nobilissimis viris amicitia & consuetudo tua: iure te diligunt ac laudant quicumque in Patauino gymnasio doctrinis liberalibus excellunt. quorum tu virtute frueris, & illi vicissim tua, si valebis: et, ut valeas, in te ipso magna ex parte situm iudicamus. obsequere igitur in tua salute multorum studiis: parce valetudini satis imbecillae, & quod libenter facis, da operam simul ut diutissime facias. ita gloriam tuam, laetitiam nostram, dignitatem etiam litterarum augebis; quibus ornamentum plurimum e tuis aliquando scriptis, si valueris, accedet. Vale. Venetiis.

IO. BAPTISTAE. PIGNAE

Ferrariam.

45

ALFONSO Duce creato, gratulatus Ferrariae sum: quae tum ex noui Principis eximia virtute fructus capiet

capiet egregios; tum ipsa quoque ad omnem virtutem eius, a quo regitur, exemplum secuta, diligentius incumbet. mores enim ciuitatis ex Principis moribus effinguntur, & ut ait Plato: *QVAE* apud eos, qui dominantur, studia vigent, eadem reliqui ciues amplectuntur, et colunt. Ergo florebunt in vestra ciuitate liberales disciplinae, ac debita iampridem ingenuis artibus praemia persoluentur. quod equidem tua potissimum caussa, doctissime Pigna, magnopere gaudeo. nec enim dubitat quisquam, aut dubitari omnino potest, quin, quantum ingenio eruditione, iudicio, quantum etiam consilio vales, tantundem apud sapientissimum, optimumque Principem & auctoritate valeas, & gratia. quod si, quam adhuc in cognoscenda, eandem posthac in ornanda virtute industriam locabis: quis te uno felicior, quis omni laude praestantior? quod ut facias, ne monendus quidem es. nec enim te dissimilem esse tui vel natura tua, vel consuetudo vel studia patiuntur. hoc igitur tecum agendum non est. illa me potius, ut vere dicam, et simul omnes, qui te diligunt cura sollicitat, ne te nobis eripiant prorsus aulica negotia, sic, ut, iis disciplinis, quarum usus aeternum decus parit, salute dicta, iacere patiaris ea, quae multis ante mensibus instituta si quando perficias, maiorem in modum & posteris, & gloriae tuae seruias. quam multos enim egisse mecum diligenter existimas, ut hortarer te ad absoluendam poeticæ imitationis artem, aut, si absolutam habes, continuo diuulgandam? quibus ut aliquando satis facias, etsi languere te in tua laude vix opinor, tamen peio abs te, quantum humanitas tua permittit. nec tamen, etiam si tua res non augetur, amicitiam nostram, quam

ego

ego sanctissime semper colui, nihil a te impetraturam
 considerem. equidem nihil ei denegarem: idq. te, quod ta-
 men secundissimis rebus, ac sine molestia tua fiat, cupio
 experiri. Ego me ad litteras, a quibus inuitus discesse-
 ram, reuocare coepi, adeptus usum oculorum, quem an-
 tea desperabam, diuina primum ope, in qua statuere
 omnia consueui, deinde Gabrielis Falloppii scientia sin-
 gulari: cui viro, quanti hanc lucis usuram, idest quanti
 vitam facio, quanti etiam praeclara litterarum studia
 mihi sint, quibus vix ipsa vita pluris est, uni plane to-
 tum acceptum refero. siquidem eius doctrina, humani-
 tas, exquisita cura praestinatam mihi ualitudinem, omni-
 no profligatam, ac perditam conspectum liberorum meo-
 rum, amicorum colloquia, librorum suauitatem resti-
 tuit: ut, si quam optimis artibus industria nostra fru-
 ctum feret, ei gratiae debeantur, cuius ope, ac studio
 factum est, ut intermissam diuturno, ac perdifficili
 morbo posteritatis adiuuandae consuetudinem aliquan-
 do repeterem. Tu mihi de tuo statu, maximeque de
 Alfonsi Ducis conatibus egregiis ad honestandam vir-
 item, de quibus fama iam percrebuit, si quid significa-
 ueris; argumentum erit amoris in me tui, quo laetari ve-
 bementer soleo. Vale. Venetiis.

 IOANNI. SAMBUCO

Patavium.

46

QVOD fratrem tuum Georgium Bona, florenti ad-
 huc aetate exstinctum, immoderate luges; ignosco
 maerori

maerori tuo, nec tamen laudem tribuo. dolere enim
fratris interitu, & eius fratris, quo nemo amabilior,
nemo fuerit virtute praestantior, hominis est: modum
autem dolori nullum constituere, numquam lacrimis
abstinere, numquam ex animo maeritiam pellere,
Sambuci non est. Perit frater: iure commoueris:
aegre enim diuellimur a natura coniunctis: quod ego quo
que sum expertus. Perit is, qui familiam vestram,
qui patriam, qui provinciam uniuersam ornare vehe-
menter suis laudibus, & illustrare poterat. hoc qui-
dem expectandum ab eius uirtute fuit: sed magnam
habet Fortuna uim: ea saepe, nobis ad eximiam lau-
dem contendentibus, transuersa incurrit, saepe nostra
studia debilitat, saepe moritur industriam. quo de
genere quid ego te doceam, doctissimum uirum, cui
prope infinitam exemplorum uim uel Graeca monu-
menta, uel etiam Latina suppetunt? florem igitur uir-
tutis amemus: erepto ante maturitatem fructu, quan-
do hoc singulare non est, sed commune cum multis,
modice feramus. Quid, si ne dolendum quidem est?
omitto enim historias, ad philosophiam te uoco. Quid
igitur illa praecipit? si quid casus afferat, leniter acci-
piendum: nec enim, ut aliter accidat, in nobis est: si
quid culpa contractum, angustaeque esse: certe enim
qui ad praeclare agendum nati sumus, ideoque mente,
& ratione, praeter ceteros animantes, instructi, tan-
tis bonis abuti, & quasi a natura desciscere turpissi-
mum est. An tu igitur, mori, quasi aliquid turpe,
reprehendes? quod si non turpe, nec dolendum. nisi
si quis ita uixerit, ut nihil umquam homine dignum

Q. prae-

242 PAVLLI MANVTII
præstiterit. quod abest longissime a fratre tuo: qui
probitate, ingenio, studiis artium optimarum, pru-
dentia etiam adolescens ita excelluit, ut eum Pannonia
paene cuncta viuentem vnice dilexerit, mortuum lau-
dibus, & memoria prosequatur. Quae cum tibi ve-
niunt in mentem; iniquus profecto nimis in te ipsum
es, nisi luctum minuis, & ex animo dolorem penitus
euellis. Quin te decuit maxime, qui totos dies ponas
in iis libris, unde vitae moderatio unde animi tranquil-
litas petitur, ad propinquos, ad amicos in Pannoniam
eiusmodi litteras mittere, in quibus illi sitam esse non
minimam sui doloris medicinam intelligerent. nam vir
eximius, Nicolaus Olabus, Archiepiscopus Strigo-
niensis, qui Georgium, & quia sorore sua natus erat,
& quod in eo summa virtus enituit, in oculis gestabat,
non dubito quin tanti vulneris remedia sumat a se ipso
quem non modo aetas, & usus maximarum rerum
erudierit, verum etiam prudentia quaedam naturalis,
quae plane vincit omnem artem, numquam a constan-
tia discedere patiatur. Nec tamen vereor, ut, qui mi-
hi paucis ante mensibus in filioli mei obitu consolatio-
nem adhibueris, idem tibi in tuo casu mederi aliquan-
do non facile possis. quod si facies; fructus apparebit stu-
diorum tuorum; & Georgii fratrem agnoscemus; cu-
ius ingenium, ac mirificam prudentiam oratio illa,
luculenter in primis a te scripta, declarat. Vale,
Venetiis.

Pata-

* Patavium. 47

PERCVSSISTI me de Mariano Lezentio:
 quid ais? optimus adolescens, maiorum nobilitate,
 sua virtute clarus, omnibus animi, corporis, fortunae bo-
 nis ornatus, ereptus repente nobis est? o miseram huma-
 nae vitae condicionem. quid ames, cum omnia fluere,
 ac labi, nihil intra orbem Lunae firmum esse, nihil idem
 a mane ad vespertam, quotidie cernas? quae te arbitrabar
 antea cognovisse in sermonibus Reginaldi Poli Cardina-
 lis, & Alosii Prioli, quibus probiores, aut sapientiores
 viros non modo nostra, sed nec superior aetas tulit: nunc
 quando te biduum scribis lacrimando consumpsisse, pro-
 fecto tibi exciderunt illa praeclara de contemptu mor-
 tis, quibus in illo diuino contubernio, in illo plane caele-
 stium animorum coetu aures tuae saepissime persona-
 bant. Quod si, quid doleas, cogitabis, aut quid dolendo
 proficias: non dubito quin istum luctum abstergas, &
 Lezentio nostro etiam gratuleris, quod, inspecto Hieroso-
 lymae summi Dei monumento, quo illum, dissuadenti-
 bus amicis, pietas, & religio duxerat, statim ad eiusdem
 Dei conspectum, praeditus optima mente, purus ab om-
 ni labe, in caelum euolarit. quod qui optant, sapientes;
 qui adipiscuntur, felices iure ducuntur. Haec tibi a me
 pauca pro nostra necessitudine consolationis loco dicta
 si attendes, vim habere maximam senties, & eam dolori
 tuo medicinam, quam dies aliquando asferet, ratione re-
 praesentabis. quod cum omnes deceat, tum vero ab ex-
 cultis doctrina viris, quem te ad numerum aggregamus
 praecipue postulatur. Vale. Venetiis.

Q 2 LAV.

LAURENTIO. GAMBARAE

Ciliuerge.

48

CILIVERGE numquam videram, amabam tamen, amoenitate sua iucundissimum, domino honestissimum, Lanterio Appiano, praestanti viro non humanitate minus, quam eloquentia: nunc & elegantiam villae ut in tabula pictam, in tuis versibus vidi; & mehercule non mediocri eius visendae, atq. etiam tecum fruendae studio sum incensus. quod si quando contigerit, digito caelum attingam. quid enim isto otio beatius? quae species urbis, quae dignitas cum ista rusticatione, cum ista surgentium virgultorum siluula conspici possit? equidem, cum te mihi ante oculos pono, modo inter angustis distincta semitis fructeta declivi colle spatiantem, modo arborum proceritatem, atque ordinem in viridario mirantem, eadem paene voluptate absens tecum fruor. coniungit enim animos nostros mutua benevolentia; nec est aut tibi quidquam sine me, aut mihi sine te iucundum. gratulor tamen tibi potius, quam mihi, & istos Ciliuergenses dies ita multorum annorum instar esse puto, si modo nec otiosus in otio, nec in solitudine solus es. id autem qua ratione consequi possis, opinor me tacente intelligis. Patauii dum eras, habebas in manibus egregium illud poema de novis insulis a Columbo inuentis: cuius ego cum exordium multis praesentibus, legissem, admiratus gravitatem, & elegantiam carminis, exclamaui, Cedite Romani. in quo, adhuc, qui a me dissentiret, inueni neminem. quo magis te hortor, quamquam, ut spero, currentem, ut appropere, habeasq.

11
RAE
48
habere. rationem non expectationis modo nostrae, ve-
rum etiam gloriae tuae, cuius habes a natura praeclaris
seminarium, quod etiam studio excolis, ingenium tuum.
Urge igitur, nec institutum dimitte: quodq. adhuc huma-
nissime fecisti, in eo perge, ut nostrum tui absentis deside-
rium litteris aliquando lenias. Vale. Patauii.

LAZARO. BONAMICO
Patauium. 49

Ego vero & audiui de tuo casu, & tuam vicem
mirifice, neq. minus publicam dolui; veritus enim sum,
ne tecum simul litterae concidissent. nunc, quando te
iam ambulare scribis, ita tamen, ut scipione utaris; gau-
deo, eoq. magis, quod in ista aetate morbi diuturnitatem
perimueram. sed, quia non plane animum meum liberas
a cura, cum pristinas vires nondum recuperaueris, rogo
te, Bonamice, quanti optima studia facis, quae tibi facien-
da sunt plurimi, quandoquidem ab iis tuae laudes ema-
narunt; tantum adhibe in te curando diligentiam. vides
enim, neminem fere esse, qui, si quid tibi acciderit huma-
nitus, rudem barbariem a Latinae linguae finibus arce-
re possit. Plautum a me emendatum, quem a me petis,
dabo operam ut cum his ad te litteris mittam: sed, ut eū
in multiplici meorum librorum cōgerie statim reperiam
sperare vix audio. Ego, ut scis, hanc satis grauem provin-
ciam suscepi. tenui condicione, inquires. fateor; sed ne tua
quidem, si tuarum virtutum merita spectentur, satis
opima. quid agas? his temporibus anguste virtus ha-
bitat.

Q 3

246 PAVLLI. MANVTII
bitat. bene tamen de suis ciuibus mereri, praeclarum
est. Vale. Venetiis.

GVLIELMO. PACCIO

Patauium.

50

SILENTII mei, quo tecum diu satis vsus sum,
non exponam hic tibi causam pluribus verbis: ne si id fa-
ciam, videar & tibi ipsi, qui nihil adhuc ad me scripsisti,
eandem quasi legem imponere. itaque hanc partem
praetermittam: in qua si peccatum est, utriusque certe
est. ego autem spero me posthac & beneuolentiam tibi
meam, & diligentiam hoc genere officii probaturum:
modo ne litteras elegantes, quales videlicet Patauii, a
summis ingeniis elaboratae, tibi ostenduntur, a me ex-
spectes. ita scribam, non modo ut quod in mentem, sed
plane quidquid in buccam venerit, in epistolam conii-
ciam. non enim is sum, qui unumquodque verbum ad
trutinam, ut dicitur, renocare vel soleam, vel possim.
aliorum ista superstitio sit, mea quidem non erit, praefer-
tim in epistolis: quae si, ut ait ille, nihil habent simile
neque iudicio, neque concioni; quid refert, utrum dicto-
raeo conclusus, an aliter, verborum ambitus insistant?
Splendidior, inquit, nec paullo aptior ad mouendum
si numerosius desiderat, oratio videtur. Recte: nec ego se-
cus existimo: verum, quem tu tanti facis, eum ego magi-
strum sequor. quid igitur ille? EPISTOLAE. NO-
STRAE DEBENT. INTERDVM. ALVCI-
NARI. nempe, quod iis negligentia quaedam, cum ad
familiares scribitur, etiam ornamento sit. Ita igitur te-
cum

cum agam, ut si essemus una; & quemadmodum praesentes quacumque de re sermones familiariter ferere soleamus: sic in scribendo, nulla certa proposita sententia, libertatem illam, & quasi negligentiam imitabor. quod si reprehenderis, tacitum non feres. praestat enim male scribere, quam omnino, quod a te fieri video, nihil scribere: cum hoc voluntatis fortasse vitium sit, illud ingenii, quod ipsi nobis fingere non possumus. Vale. Venetiis.
 ∞ DXXXIII, pridie id. Iun. qui mihi primus dies est anni XXI.

PAVLO. MAGNULO

Patauium.

51

Cum me vides praeter institutum meum litteras ad te non tam saepe, quam solebam, mittere, nimirum, etiam me tacente, quam sim occupatus, intelligis. Ternas te dedisse scribis. omnes accepi: nihil amabilius: his autem recentioribus etiam nihil elegantius. sic enim censeo, recte eum, & Latine scribere, non qui pauca multis, sed qui multa paucis. quo ego in genere aliquando posse cupio, tu, ut video, iam potes. tribus enim versiculis quid non complecteris? tuam narras in scribendo diligentiam meam obiurgas negligentiam: de meorum librorum instauratione te me admones, de tuorum venditione aperte. denique otiosi nihil est: sententiae numero prope, quot verba: ut mihi, quemadmodum promiseras, argumentum satis superq. dederis. Sed meae cessationis causam ut dixi, coniucis ipse per te, libros autem meos, prope adest, cum editurus sum. de tuis egi diligenter, & ago. si

Q 4 quaeris,

quaeris, quid profecerim: nihil adhuc: sed spem non abieci. quamquam incredibile est, quam difficile sit ab istis pecuniam exprimere. quem euentum res habitura sit, ignoro: a me nihil omittitur, quo minus & ex sententia conficiatur, & quam citissime. Vale. Venetiis.

E I D E M, Patauium.

52

PVTASTI fore, ut ego te abeuntem litteris prosequerer? non tu id quidem umquam. conuenerat enim, ut argumentum a te expectarem. argumentum igitur potest expectare meus in te amor? quo nihil uberius nec est, nec umquam fuit. itaque statim, ubi tu profectus es, cum me repentina quaedam voluntas excitasset, arripui calamum, neque sum veritus, ut me scribentem sententia deficeret. hui, quam multa iam nunc mihi veniunt in mentem. sunt, quae possim scribere, leuitates amatoriae. quor sum, inquis? mecum habebō: neque tibi, neque cuiquam edam. volo enim parcere amicitiae, qua mihi sunt coniuncti, qui tam suauius, ut ipsi putant, viuunt: ut ego sentio, delirant. sunt item *σκληρα* quaedam, & militaria munera a populo data, taurorum venationes, saltatorum lusus, personatorum ineptiae. quid quaeris? sexcenta: quae mihi, & beneuolentia nostra suppeditat, & familiaritas permittit ut scribam. quia tamen leuiores sunt, omitto, ne grauem philosophum offendam. Porro, de meis rebus quod exspectes, nihil est. mutationem nullam fecerunt a discessu tuo. De te, quae scire velim, haec sunt, quo modo te redeuntem amici illi tui, libri scilicet, acceperint, num eo ipso die ad eorum consuetudinem

rudinem te dederis; an potius, dum haebacchationes defer
ueruescant, in hortis cum Epicuro, quam in gymnasio cū
Aristotele, velis uiuere. Et, cum haec scripseris, adde
verbum, si me amas, de pugiunculo illo tuo: quo ego te
impeditum, & alligatum ense cum vidi discedere, non te
mirisum. ac volui pungere, te dicto; sed veritus sum, ne
tu rustice me gladio. Epistolam habes iocationis plenam
qua te esse delectatum cognouero, si miseris ipse melio-
rem. Vale.

E I D E M, Patauium. 53

NON facile dixerim plus ne voluptatis, an dolo-
ris ex epistola tua suscepim. est enim mihi gratissimum
cum & me a te amari, & te amore in te meo delectari
prospicio. ex quo fit, ut litteras tuas, beneuolentiae ple-
nissimas, & officii, iucundissime legam. Cum vero te vel
angi video, vel aliquid triste cogitare; sic afficior, ut acer-
bissime viuam. sed utinam, quanti ego consilium tuum
semper feci, tanti item ipse meum fecisses. profecto in has
molestias, in quibus hodie uersaris, non incidisses. At,
inquires, illa perpeti malum erat. Malum, nisi, istos fer-
re longe peius sit: quorum quidem iniurias tum ex eorū
qui istinc ueniunt, sermonibus, tum ex litteris tuis facile
cognoui. Quae quo magis intolerabilia sunt, eo clarius
 tuae prudentiae lumen ostendas oportet: neque commit-
tas, ut inuidorum, maleuolorumq. peruersitas plus apud
te, quam existimationis tuae ratio, ualuisse uideatur.
Quamquam ego, cum haec scribebam, satis intelligebam
quis ad quem: sed amorem meum, qui tibi praesenti per-
spectissi-

speciosissimus fuisset, etiam apud absentem, quoquo modo licuit testatum esse cupiebam. Atq. hoc loco mihi veniunt in mentem, quae tibi proficiscenti futura praedixerim. quae ego, non aliquam somniorum imaginem, aut alitis tantum secutus, augurabar: sed, quod istiusmodi hominum naturae plus etiam, quam vellem, exploratae mihi erant, ideo, ne illa acciderent, quae nunc evenisse audio, timebam. Sed videris, ut spero, fortitudine animi tui: et, quae iniqui ad ignominiam tuam comminiscuntur, ita feres, ut non solum in vetere optimorum studiorum cursu, fractus animo, ne consistas, sed vehementius etiam verae gloriae cupiditate incitatus, propositum tibi decus assequare. Me in omni fortuna tui amantissimum, tuaeq. laudis fautorem, atque adeo, quantum in me erit, amplificatorem habebis. Vale. Venetiis.

SEBASTIANO. LEONI

CORDVBENSI

Romam.

54

ROMAE te nunc esse, in ea urbe, ubi multorum amorem, ac studium tua tibi iam antea virtus peperit, tantum abest, ut doleam, ut etiam summe gratuler. nec enim dubito, quin sedem studiis tuis non modo commodam, verum etiam honorificam, adnitentibus amicis tuis, facillime consequaris. Me quoque, ut ille inquit, mirum desiderium tenet urbis: verum aduersantur multa: quae si Deus aliquando sustulerit, accurram statim ad nos, ea spe, ut in vestra benevolentia, in consuetudine, ac sermo-

ne

ne conquiescam. Saluta interim amicos, Octavianum nostrum, Sirtetum, Gyllium, Phaernum. nam Episcopum Alifanum abesse audio. Nicolaus Nathanaelus, egregie moratus adolescens, magnos in Latinis litteris processus a discessu tuo fecit. is cum mihi per se carus est, tuam eo magis, quod de te saepe loquitur amantissime, tuamque erga se, patremque suum, insigni probitate, atque doctrina virum, perpetuam benignitatem sic in ore habet, ut in eius memoriam numquam sinat intermitteri. Vale. Venetiis.

SILVESTRO. ALDO.
BRANDINO. 55

IN. IIS litteris, quas ad Angulum nostrum XVI. Kal. Sext. dedisti, valde mihi scripta urbane visa est illa pars, in qua nescio quid de me per iocum, sed cum quadam tamen amoris nota significasti. gaudeo, me tibi usque eo esse familiarem, ut etiam facilius laceffas: quo in genere si perges, gratiam referemus: ne tu homo ingeniosus nos tardiores impune commoueris. mihi cum amico tuo recte conuenit. doctum hominem cognoui, bonum virum esse audio. haec cum sunt in hominibus transalpinis amorem conciliant: quanto magis in nostris? At in litteris aliquando dissensimus. ego vero non nihil etiam a parente meo: neque tamen parentis manibus eam, quam debeo, pietatem minus praesto. opinionum enim dissimilitudo tantum abest a simultate, ut saepissime, non modo qui sententia discrepant, in amore consentiant; sed etiam qui simultate exercent, iudicio congruunt. Quare a moue
istam

istam ex animo tuo suspicionem, meq. cum illo ita crede
 esse reconciliatum, vt posthac ab eo, etiam si dissentendi
 causa sit, dissentire tamen nolim. Hic, vt in tantis calo-
 ribus, non iniucunde viuimus: urbis mirifico elegancia:
 caeli summa salubritas: si quando aestus maior est, quam
 vt ferre possimus, confugimus ad aquas; innixi vtribus
 inflatis, remoto loco, nos inter nos ludibundi flumina
 perambulamus. quid quaeris? si te haberemus, ad sum-
 mam uoluptatem nihil deerat. sed animus tamen meus,
 quem tu, credo, contionibus quibusdam tibi addixisti,
 peruolat magna spatia terrarum, & te insciente, saepe
 tecum est. itaque non ego prorsus te careo: nam, si mi-
 nus sermone, adspectu certe tuo fruor, dum de te cogi-
 to. quod si aliquando contigerit, vt etiam sermone possim;
 nae ego collocationum nostrarum fructum, interuallo
 temporis amissum, ita repetam, vt ne studiis quidem par-
 cam tuis. in quibus audio te post nostrum discessum ma-
 gna quaedam effecisse. Caput etiam illud litterarum tua-
 rum Cardinalis Accoltus mihi ostendit: in quo ita scri-
 ptum est, paginas te circiter octingentas iam impleuisse
 commentationibus iis, quas in Pandectarum libros tex-
 is. puto magni laboris esse, magnaeq. difficultatis: sed,
 si considerabis, quae tibi praemia proposita sint; vinces
 omnia. petis immortalitatem; quam multi sequuntur, tu
 iam paene manibus apprehensam tenes. Vale.

EPISTO.

EPISTOLARVM
PAVLLI. MANVTII
LIBER. QVINTVS

Scripsit hanc, liberalium disci-
plinarum nomine,

PIO. IV. PONTIFICE
CREATO.



*VM tibi, Pontifex optime, ad istam digni-
tatem nuper diuinitus elato, qua sublimius
aut praestantius inter homines nihil est,
mortales quamplurimi, alii absentes lite-
ris & nunciis, alii coram vultu & verbis gratulentur:
non dubitamus, quin nos quoque, altrices tuas, in maxi-
mo gratulantium numero ad tuos sanctissimos pedes offi-
cioso proiecetas, excipias, & eo benignius, quod alii, quia
peruenisti ad eum finem, infra quem ceteri fines sunt, gra-
tulantur; nos autem, quia scilicet, ut peruenire posses, ip-
sae perfecimus. Non est ad gloriam lata quaedam, &
communis via. per angusta fuit semita, paucorumq. nota
ta vestigiis, qua ierunt & herores illi veteres, in Christia-
na militia fortissimi viri; & maxime quidem omnium,
patrum nostrorum memoria, Pius ille Pontifex, cuius
tu nomen, in eadem sede merito collocatus, & cum no-
mine virtutem refers. in istam olim semitam, ferentem
ad aeternum decus, nos te puerum adhuc, sed puerum
praeclara*

praeclara cupientem , manu prehensum duximus : ne-
 ue quis te error auertere , ne qua morari posset offensio,
 cupide procedenti quasi lumen praetulimus . conse-
 ctum iam iter est : ultra , quo progrediaris , non habes .
 inter te , & opificem aeternum , cuius ministrae nos
 sumus , nulla iam interiacent humana . quare , quo-
 niam eo te perduximus , quo sine nobis peruenire feli-
 citatis non est ; & quando de longa via ita fessas esse
 intelligis , ut consistere vix possimus ; redde praemium
 bene merentibus ; & permitte nobis , ut in tua bene-
 ficentia nixae conquiescamus . nam , si tibi Deus Opt.
 Max. hoc elargitus est , ut in omni tua vita , praeter
 rectum & honestum , nihil spectares : quis te laudabi-
 liter antea cogitasse probauerit , nisi nunc , cum est ad
 voluntatem adiuncta facultas , id ipsum , quod cogita-
 sti , re perficias ? si te ambitio delectaret , proponere-
 mus illa inania , quibus ii , qui ex hominum sermoni-
 bus pendent , excitari solent : fore , si nos iacentes ere-
 xeris , ut orbem terrarum tui nominis fama pervage-
 tur : ut oratorum & poetarum de te praedicantium
 vocibus aures tuae personent : denique , ut imaginem
 tuarum virtutum , aeternis excellentium virorum scri-
 ptis expressam , ipsa posteritas intuens , cupiat imita-
 ri . speciosa ista videntur : & sunt omnino : sed a splen-
 dore tamen verae laudis absunt . nam , recte facere ,
 non ex iis , quae consequuntur , sed ipsum per se sapien-
 tibus uiris amabile videtur . qui cum innocenter san-
 cteq. viuunt ; minime illi quidem de praemiis cogitant ;
 ne probitas mercenaria videatur ; aut , si cogitant , non
 ad haec humana , quae sunt locorum & temporum
 angustis

angustis sane terminis circumscripta, oculos demittunt; sed ad illa diuina suspicientes, beatam immortalēq. vitam & expetunt unam, & unam expetendam esse persuasum habent. hoc tu semper institutum probasti: probauit Paulus ille III, omnium saeculorum memoria celebrandus: qui de humano genere uel hoc potissimum nomine optime meritus existimatur, quia in suo Pontificatu effecit, ut tu Pontifex esse posses: probarunt, hodieq. probent sodales olim aliquot tui: quorum alii, non, ut uulgo uocantur, mortui, sed, ut sapientes proprie loquuntur, mortali uita liberati, nunc incolae caeli, Deoq. fruētes, non tam quia te Pontificem intuentur, gaudent, quam quia facturum ea prospiciunt, quae sunt optimo Pontifice dignissima: alii uero, nondum sane ab hac terrestri materia discreti, aut simplicem naturam assecuti, sed ita tamen in terris commorantes, ut bonitate simplices animos referant, non dubitamus, quin tibi nostram causam unanimes commendent; & eo studiosius, quod, & ipsi alumni nostri cum sint, officio non solum laudabili, uerum etiam debito fungentur. satis iam exagitatae, satis inopiam & solitudinem passae, ab omnibus sepe Principibus neglectae, supplices ad te confugimus: quid petentes? honestum otium, a quo petentes? a Pio Pontifice. Pius ne ille noster, cuius animum ac mentem saluberrimis praeceptis ad omnem laudem conformauimus, atque effinximus; cui comites in omni aetate, atque in omni fortuna non solum iucundae, sed etiam perhonorificae fuimus; qui ut hoc tempore plus, quam omnes homines, prodesse nobis

nobis unus possit, id ipsum a nobis habet; is ne nos, aliquam tanti benefici gratiam reposcentes, ab sese reiciet? non hoc illius natura, non doctrina, non consuetudo feret. Sint sane mutabiles eorum animi, neque satis in colenda uirtute sibi constant: fit enim saepe, ut uoluntates simul cum fortuna commutentur: in te, Pontifex optime, non cadit huius inconstantiae suspicio; tua est bene agendi perpetuitas: nihil in uita tua uarium, nihil flexibile, nihil mistum cognouimus, semper idem tibi, semper directum quiddam placuit: & simplex. non te rerum humanarum ficta & fucata forma, non illae, quibus plerique falluntur, insidiosae uoluptatum illecebrae ceperunt. non tu in tabula picta, inani colorum specie captus, oculis immobilibus haesisti. non sericam uestem, non argenteum uas, non aurata teeta puullo cupidius adspexisti. denique; ne singula persequamur; cum plerique hominum siue gratie, siue metu ab officio deducantur: numquam te uel ita gratia deleniuit, uel ita metus deterruit, ut pietatem religionemque desereres. quid mirum? uirtutum radices non ita leuiter bonorum in animis inhaerent, ut eas euellere aut commodi spee, aut periculi dubitatio possit. quare tuae consuetudinis & constantiae memores non petimus a te, ut aliquid agas nostra causa, quod cum egeris, non consentire cum tuis superioribus factis uideatur: sed id petimus: quod a te non modo ipsa res, sed etiam consuetudo tuo postulat; ut in uetere illo tuarum actionum laudabili cursu pergas. quod cum facies, (facturum enim, quia te nouimus, non dubitamus) complecteris nos eodem studio, quo ipsae te aluimus; & in eum locum restitues, unde

EPISTOLARUM LIB. V. 257
unde nos aduersariae nostrae, in se itia simul & auaritia,
comites perpetuae, detruferunt. Vale.

CAMILLO. PALEOTTO
Bononiam. 2

EPISTOLA tua, suauiter, & amanter in primis
eademq. elegantissime conscripta, memoriam mihi no-
strae consuetudinis, tuaeq. virtutis, & humanitatis, ve-
hementer auxit. non enim dicam, renouauit: qui te mihi,
& ea, quibus omnibus carus es, ex animo numquam ex-
cidisse, vere possim affirmare. sic enim velim existimes,
nihil umquam, a quo primum die mihi cognitus es, aut
cogitasse me iucundius, aut curasse diligentius, quam ut
me tui cupidissimum, tuorumq. officiorum, si non referen-
da, quod opinor fieri vix posse, habenda tamen gratia me-
morem, atque gratum agnosceres. quod si sum affecutus,
mirifice laetor: sin minus, delector tamen studio meo, &
ipsa etiam voluntate mihi, utinam tibi quoq. satisfacio.
Equidem, cum illa, quae te video animaduertisse, ad Mu-
retum scripsi, notum ei esse volui iudicium de te meū:
ipse vero ut ea aliquando legeres, vel ut omnino quis-
quam, fore non putauit. Postea, cum a nonnullis,
bonas videlicet horas male collocantibus, describi
epistolas meas audirem; veritus, ne quando mendo-
sius etiam impressae, quam a me scriptae, vel negligē-
tiae culpa, vel fortasse etiam improbitatis, (late enim
patet hoc vitium) ederentur; collegi quas potui; emi-
si, non quas probaui maxime, (nam huius generis
R inopia

inopia certe me ab omni prorsus edendi consilio reuocasset,) sed quas improbaui minime. ex eo numero sunt ea, quae de te loquitur, vel potius balbutit epistola. nam ea, quae tibi vel natura tribuit, vel adsciuit industria, vix aut mihi liceat, aut iis etiam, qui plurimum eloquentia valent, non modo litteris familiariter scriptis, sed nec elaborata oratio complecti. Quare non ego, mihi ut agas gratias, exspecto, quod te tamquam pictor bonus illustraue- rim; sed potius, quod quasi decolorauerim, ut ignoscas, rogo. quod quidem, si te probe noui, impetrabo facile vel a sapientia tua, vel ab humanitate: quarum altera facit, ut ab una totus virtute pendeas, de sermonibus hominum non labores; altera, ut nihil umquam a te non modo amici, & familiares, sed nec alieni frustra petant. Amoris in me tui, licet minime necessaria, periucunda tamen commemoratio fuit. cui quidem amori, vel si absint officia, deberem plurimum: quid putas, cum & accesserint iam merita non vulgaria, quae nulla mihi ex animo dies euellet, & ea tamen aliis cumulare ita studeas, ut in beneficio dando beneficium videaris accipere? Vel hoc ipsum, quod me tam crebro, tam diligenter, iam amanter Bononiam inuitas, quantam habet significationem beneuolentiae tuae? quae si mihi omnia com- moda omniaq. ornamenta, nihil tamen afferet, mihi crede, se ipsa carius, nihil, quo gaudeam, ac triumphem magis. Ad te vero, quem videre ita cupio, ut cupiditate etiam tua vehementius incendar, noli dubitare, quin ad- uolem, cum primum per anni tempus, & , ut spero, per valetudinem licebit. nam frigore vires imminutas te- por vernus, & caeli purioris adspectus restituet. Inte- rim,

259
EPIST. LIB. VII
rim, si quid scire vis de rationibus meis, eo loco sunt, ut
mihi, in summa animi aequitate, abesse potius multa,
quam deesse videantur. Vigemus amicis: quo nihil opta-
bilius, excepta sapientia, & ego existimo, & tu quoque
ut video, mecum sentis. Oculis, quibus aegre diu fuit,
nunc quidem utor optime, uiribus autem corporis non
pessime. reliqua in congressum nostrum reservabo. Va-
le, & propinquo tuo Francisco Bononietto salutem a
me plurimam. Venetiis.

OCTAVIANO. FERRARIO

Mediolanum.

3

AMOR inter non mutuus, meaq. de tua uirtute
opinio facit, ut mihi nihil esse committendum putem,
quod a tuis consiliis abhorreat. itaque, licet dolorem
meum, ex interitu filii susceptum, ualde iam & ratio ip-
sa, & communis condicionis recordatio leuare; uix ta-
men credas, quantum profecerint litterae tuae. An
ego te non audiam, cum ad animi uocor aequitatem? te
inquam, cuius mihi grata semper uoluntas, grauis au-
toritas & fuit, & esse debet: quem dilexi unice a pri-
ma adolescentia, quem respondere in amore, ac studio
facile perspexi. quod utinam, quam diu seiuncti fuimus,
una uiuere licuisset: essem omnino tua consuetudine me-
lior, & doctior; tu autem ex officiis meis fortasse ali-
quam, ex beneuolentia certe in te mea non dubito, quin
maximam uoluptatem, laetitiamq. cepisses. quod quan-
do non contigit; usus essem, pro mea quidem parte, litte-

R. 2

rarum

rarum bono; nisi me non tam occupatio mea, quam tuæ valetudinis infirmitas, cui laborem imponi mea causa nolui, a scribendo retardasset. nunc, si est, ut optime valeas; quod ut credam, adducor non solum crebritate, verum etiam subtilitate, atque elegantia epistolarum tuarum; gaudo: quodq. habes ex animi tui sententia, id ut perenne, propriumq. sit, vehementer cupio. litteris, ut amissi temporis usura sarciantur, colloquemur interdum. nec deerit argumentum, si tibi placuerit idem, quod mihi, συμφιλολογεῖν de studiis nostris, quibus uberius nihil est. Atque equidem, (ut a privatis ad publica diuertam) quando χαρακτήρ tuus eiusmodi est, ut ab recentiorum philosophorum inquinato sermone longissime distet, auctor ubi sum, ut in scribendo totus hæreas. nimium diu comprimis ea, quæ selecta habes, quæ scio quam sint præclara, in omni genere doctrinae. ede, & auge utilitatem nostram cum gloria tua. nam hic liber, qui propediem exhibit, de disciplina encyclo, studia multorum accendet, quibus a te satisfieri æquum est. quam vero in eius libri editione diligentiam exigis, ea præstabitur, quatenus licebit. totum enim in vno me positum non esse, aut iam scis, aut mihi velim credas affirmanti. Vale. Venetiis.

LAEVINO. TORRENTIO

Leodium.

4

SANE permolestum mihi, pro mea summa erga te benevolentia, contigit, quod tuorum comitum, ut ais, impor-

importunitate factum sit, ut veniendi ad nos susceptum
 antea consilium deposueris. nihil enim potest esse iucun-
 dius, quam tui suauitatem sermonis, tuamque mirificam
 humanitatem, tum etiam doctrinam ex intervallo re-
 gustare. sed huius incommodi molestiam fere absterfit
 omnem scripta peramanter, atque adeo pereleganter epi-
 stola tua, quā mihi heri reddidit familiaris meus, idemque
 studiosissimus, plane iuuenis eruditus, Andreas Sil-
 uius. Oda vero in Pium Pontificem, quam epistolae ad-
 iunxeras, ita mihi placuit, nihil ut umquam legerim li-
 bentius, aequē libenter pauca. omnino, mi Laeuine, cum
 ad omnem excellentiam, tum vero ad hoc scriptorum ge-
 nus ingenio te natura finxit aptissimo. itaque nosce tua
 bona, poeticamque facultatem, si tuae gloriae consultum
 vis, ne dimitte. Carissimum quo die primum vidi, ut edere
 tur, optaui. idque plane Cauchis adolescentibus consilio tuo
 commotis, & communium studiorum, & sane ipsorum
 etiam causa gaudeo. aliquid enim ad eos ex paterna lau-
 de redundabit, & aperietur fortasse aditus ad gratiam
 principis viri, misso, ut mos est, libro cum eorum episto-
 la. putabam fore, ut Romae liber ederetur. si Venetiis
 malunt, nostra, quaecumque est, industria non deerit: qua
 condicione, & qua tempore, scripsi ad optimum uirum,
 Octauium Pantagathum. De Censorino, & Prudentio
 mox uidebimus. non enim tam facile, quod praestare non
 possim, soleo promittere, quam, cum promisi, diligenter
 praestare. premor autem oneribus multis, quae sustinere
 cogor in aliquot menses: abicere si uelim, nec honor
 meus. nec res domestica patietur. Quod reliquum est amo-
 rem in me tuum cupio conserues: quod erit humanitatis.

R 3 ego,

ego, quod erit officii, te colam diligentissime, deq. ingenio tuo, de doctrina, de probitate quid sentiam, ut ipse aliquando intelligas, quod hic, mihi crede iam intelligunt multi, operam dabo. Vale, & Cauchos fratres, moribus, ac litteris ornatos, meo nomine saluere plurimum iube. Venetiis.

PETRO. MISCOVIO 5

QVOD a me postulari uidebatur, ut tibi, de studiis meis non pessime existimanti, (sic enim audiebam) per litteras gratias agerem; in eo dedi operam, ne desiderari posset officium meum, atque equidem restitui nonnihil a principio cupiditati meae, ueritus, ne prudentis hominis non esset, ista dignitate, ista uirtute uirum, cui nullum a publico munere tempus uacet, appellare litteris: sed meam cunctationem uiri optimi, atque eruditissimi, Andreae Patricii, omnia de humanitate tua pollicentis, discussit oratio. Scripsi igitur ad te, non, ut tibi rescribendi onus imponerem, sed, ut, quoad possem, testificarer obseruantiam meam. quod si sum assecutus, & si tu, quanti faciam iudicium de me tuum, intelligis: ita leator, quasi bona omnia contigerint, & cum hac mea uoluptate uix puto uoluptatem ullam posse conferri. Quod autem silentium etiam tuum excusas, & ea commemoras, quae te a scribendo antea retardarunt: hoc equidem e te numquam expectaui; a quo libenter legi meas litteras, de quo dubitare mihi non licuit, satis superq. habui: sed quae
exspe-

expectaui minus, eo scilicet magis agnosco, quae
 constanti omnium sermone praedicatur, benignitatem
 tuam. Gratulor autem, ut debeo, uehementer, & te
 a febris conualuisse, qua laborantem in reditu suo Pa-
 tricius offendit, & exitiali illa lue provinciam esse libe-
 ratam. Occupationes tuas puto, & audio grauissimas
 esse; sed leuiiores sunt gloriae fructu, quae tu quoti-
 die percipis, tuis debitum uirtutibus, amplissimum.
 Porro, quam sit homine dignum, de multis, ac, si
 fieri possit, de toto hominum genere bene mereri, quid
 ego te doceam, nihil, quod ad honestum pertineat,
 ignorantem, quem ita semper ad decus natura impel-
 lit, ut omnia tamen consilia, omnes actiones ratio, &
 sapientia moderetur? Quare, istis curis, istis laboribus,
 quos esse tuae laudis segetem, ac materiam uideo, igno-
 sce, obsecro, Misconi humanissime, si te sero admodum
 cupio liberari. nam, quod ad studia literarum attinet,
 idest, ad eum animi cultum, unde oritur artium in-
 genuarum praeclara cognitio; primum, cum tu habeas
 iam, quae petuntur a literis, & cum eloquentia, do-
 ctrinaq. ex superiorum temporum uigiliis excellas;
 non intelligo ualde esse, cur labores: deinde, tanti ne
 putas librorum consuetudinem, aut ullum cum ulla
 doctrina commercium, quanti difficillimis tempori-
 bus, in summa bonorum, & sapientium ciuium inopia,
 requirenti consilium, operamq. tuam patriae subuenire?
 quo in munere uersanti, non committam, ut longiore mo-
 lestus epistola sim: & haec ipsa, fortasse nimis mul-
 ta, amoris largieris in te meo: cui dum obsequor,
 teq. alloqui praesentem uideor, oblitus occupationis

64 PAVELI. MANVTII
tuae, memor humanitatis, prouectus imprudenter sum.
Vale. Venetiis.

ANDREAE. PATRITIO 6

MI. PATRICI, non te fugit, morosos esse, qui
amant. quo me vitio laborare non infitior. adpectu, & cō
suetudine praesentium amicorum carere non possum. si
absunt, igniculum desiderii ita non fero, ut litteras ab iis
exigam potius, quam expectem. hinc illae interdum, va
cuae prorsus iracundia, quae abest a natura mea, amoris
plenissimae querellae. de quibus audisse te aliquid gau
deo, ut ego quoque in querella tua mutuam erga me be
neuolentiā, qua nihil habeo carius, agnoscerem. quod e
quidem laetari te quoque arbitror. quae enim humanitas
tua est, certe totus abesse non vis: nec eiusmodi tuum in
discessu consilium videbatur: nec nos, qui te longinquum
memoria colimus, diligimus, laudamus, digni videmur,
quibus nullam suauitatis, ingeniiq. tui partem restituas.
Officium autem in rescribendo meum, non committam,
ut desideres; nec desiderari antea passus essem, si litteras
tuas, a me vehementer expetitas, quas misisse te signifi
cas, accepissem. Prouocessē etiam, mihi crede, pro meo
in te singulari studio, si vacassem, & si vacare te ab iis ne
gociis existimassem, quorū onera grauissima, vigilantibus
& magna praeditis virtute viris, idest, tui simillimis, im
poni aequum est. Quod ais, omnia te conferre ad dignita
tem meam: dupliciter gaudeo, et quod me ames, (quam
quam hoc antea perspexeram,) & quod id ex officiis er
ga

ga me tuis homines intelligant: idq. non mediocriter ad
 existimationem meam statuo pertinere. Miscouii quidem
 in beneuolentia, cuius habeo testem, refertā humanitatis,
 elegantissimā epistolam, scito me omnia ponere; eamq. ut
 videor summo hominis beneficio consecutus, ita triumpho,
 quasi nihil iam aduersa virtutis aduersaria fortuna possit
 euenire. tibi autem, qui mihi ad amicitiam viri aditum pa-
 tesecisti, gratias tuo fortasse merito pares habere possum,
 & habeo sane quam maximas, referre certe nullo modo
 possum, ac ne agere quidē: quod tamen humanitas tua nō
 ferret, et, si ferret, quae mihi umquam verba, ab intimo li-
 cet artificio deprompta, satisfacerent? Vale. Venetiis.

STANISLAO. FOGELVETRIO

Patauium

7

ME quoq. torquet expectatio * litterarum; de quo
 mihi, me quidem inuito, tamen aduersa quaedam amor
 fingit. nec enim adduci possum, ut oblitum nostri, aut pa-
 rum in colendo officio diligentem existimem: qui & huma-
 nitate omnes vincat, & quaternas iam a me litteras ac-
 ceperit, utinam valeat, atq. in illis negotiorum fluctibus
 utatur secundis ventis: reliqua feremus facile, eademq.
 absenti beneuolentia perpetuo praestabitur. Cum litteras
 Italicas meas ad te misi, nihil scripsi, ne tibi rescribendi,
 praesertim de re minima, onus imponerem. ac tu, gratia-
 rum actione non contentus, etiam me laudandum puta-
 sti, & iis quidem verbis, nihil ut esse possit illustrius. in
 quo probaui vehementer elegantiam ingenii tui: in indi-
 catio,

cio, nisi me ipse diligam, desiderare aliquid cogor. aliquid autem? plane hoc totum, mi Fogeluetri, humanitati tuae tribuo: de qua tamen ipsa valde te amo: ac velim existimes, te mihi haerere in animo tum tua sane causa, cui ne minem probitate, ingenio, studio bonarum artium antepo-
no, tum quod in uno te nonnullam Patricii, ac * etiam imaginem videor agnoscere. idq. tibi aliquando fortasse, Minerva, ut spero, non inuita probabo. Vale. Venetiis.

DIONYSIO. LAMBINO 8

NOLI existimare, mi Lambine, cum fructu consuetudinis tuae caream, quidquam mihi tuis epistolis esse iucundius. facit hoc sane qui mutuus inter nos amor est, ortus a meo de tuis virtutibus iudicio, tua vero de meis ad eandem laudem conatibus opinione fortasse non nulla: sed scriptorum etiam tuorum subtilitate, & elegantia mirifice delector. vel haec, quam accepi idibus Iunii, raptim a te, ut video, exarata epistola, quam loquitur pure, quam nullis illustrata pigmentis, nullo, ut tu scribis, fucio, tamen nitet. itaque nihil umquam legi libentius. Quaesieram autem per litteras a sororis meae filio, Iulio Catone, ecquid parturiret ingenium tuum, non tam, ut meae, quae summa est, quam ut eorum, qui ad me adeunt quotidie, cupiditati satisfacerem. scito enim, admirabilem hic esse quandam de studiis tuis opinionem cum e sermonibus meis, eximia saepe tua cum laude habitis, tum vero ex illa praestanti industria, quam in conuertendis Aristotelis de morali philosophia libris ita col-
locasti,

locasti, non modo ut eorum, de quibus diu bona hominum existimatio fuit, errata patefaceres, sed ut ipse maximam & iudicii, & mihi quidem ut videtur, qui eam cum Graecis diligentissime contuli, eloquentiae laudem ferres. quod a te institutum retineri, & eandem operam ad reliqua conferri, si quis est, qui valde cupiat, ac te etiam tacita saepe cogitatione hortetur, is ego sum. Publica, fateor, me mouet utilitas, cui te video Graecae, ac Latinae linguae peritissimum, praeterea instructum iis artibus, a quibus perfecta intelligendi, ac iudicandi ratio manat, vnum in primis posse consulere; sed mehercule etiam gloriae tuae pro amicitia nostra vehementer faueo. vides enim profecto, (quid enim, quod ego videam, tu non perspicias?) paucos omnino ex iis, qui populari fama celebrantur, sine exceptione posse laudari, & hac tanta quotidie exeuntium librorum copia impediri potius, quam adiuvari studia nostra. quare suscipe onus pro tua parte. nervos nouimus industriae tuae; quos si contendere volueris, nihil est, quod sustinere, ac perferre non possis. Nam de Lucretio. suadeo equidem, ut absolvas; poeta est egregius, vel Ciceronis nostri testimonio; & in eo maximam a multis, nec a me ipso minimam gratiam inibis: sed voco te libentius ad illa praestantiora: nec tu meum consilium, atque etiam studium, si modo tibi aut sapere aliquid, aut velle tua causa videor, debes in tua laude contemnere. Si nauigatis in Galliam, quod a te scriptum confirmant multi, opto vobis facilem cursum, & secunda omnia; teque rogo, nisi me ineptum esse censes, & nimis impudenter petere, ut Cardinali Turnonio, Principi sapientissimo,

tissimo, optimarum artium patrono, me in gratiam ponas quem hic honoris gratia salutare, cum maxime vellem per inuoluntatem numquam licuit. Sigonius, plane, uais, vir doctissimus, addas licet humanissimus, cui tu in transuerso litterarum tuarum versiculo salutem adscripsisti, valde gaudet, amari se, ac laudari a te, de quo ipse honorifice in primis loquitur, & sentit. is te resalutat amantissime, euntque in Galliam, incolumitatem, & reditum precatur. Vale. Venetius.

IULIO. POGIANO

Romam.

QUAM libenter, & quam saepe de te cogitem, Pogiane doctissime, conscius ipse mihi sum: mea uero quae sit, ac fuerit semper, ubi temporis ratio tulit, de tuis virtutibus oratio, cum honestos, & graues viros, iis, quibus ipse excellis, doctrinis excultos, habeam testes, non conabor tibi litteris exponere. nec tamen amoris erga te meo, quem fateor impetrare a me posse omnia, tribuere quidquam in te laudando velim existimes. tua me scripta, in quibus excellentem quandam eloquentiae praestantiam elucere vidi, maxime vero praeclara illa pro illustri Rhodiorum Equitum societate ad Pontificem habita oratio, quam efferre laudibus numquam desino, in hanc sententiam facile perduxit. Accedit humanitas, probitas, opinio de me tua, nec ea significata obscure, sed aeternis ingenii tui testata, atque expressa monumentis: ut, si nihil ipse, contra quam adhuc laborauim.

laboravi, memoria dignum praestem, me tamen ex testi-
monio tuo posteritas ignorare non possit; sin aliquid a
me sum, tibi tamen debeam plurimum, cuius ad eam,
quaecunque de me est, existimationem accedat auctori-
tas. quod si te antea, naturali quadam animi mei propen-
sione, & communi erga omnes, qui optimis in artibus
cum laude versantur, officio, non mediocriter diligebam
nunc, propria cum addantur in me merita, nisi totus amo-
re flagrem, ac studio tui, nisi, quam excelsa in loco si-
tam video, illustrari etiam magis omnium praeconiis
tuam laudem exoptem, malam referre gratiam litteris
iis, quarum consuetudine ad humanitatem excolimur,
& omnino hominem ex homine videar exsueri. quam-
quam, mi Pogiane, non ita mei dissimilis esse possum.
ut agnoscam ea, quae tu in illa omnium elegantissima
epistola, ad eximiae tum indolis, tum etiam virtutis
adulescentem Octavianum Magium proxime scripta
verbis amplissimis in me contulisti. scilicet ego in elo-
quentia magnus, quis, & quā in arte? illa quidem,
ut res indicat, omnium difficillima, ipse autem vix me-
diocri instructus ingenio, otio certe, sine quo ne summis
quidem ingeniis valde proficitur, numquam abundans,
adversa etiam per annos multos modo valetudine,
modo fortuna vexatus. sed absuerit nihil eorum, quae
laudem in aliena lingua cupientibus requiruntur: me
tamen vobis, qui Romae in ista luce, summa omnium
virtutum ingeniorumq. praestantia viuitis, qui pedem
quotidie ponitis in vestigia clarissimorum virorum,
qui spiritum ducitis e Romano illo caelo, seminibus
eloquentiae referto, anteponendum esse numquam
duxi;

duxi; fortasse, ut comparari aliquando possem, ope-
 ram dedi. sed hoc quidem nondum contigit, ac vereor,
 ut contingat unquam. me enim in hoc studio, quo mi-
 rifice delectabar adolescens, rei familiaris occupatio
 non siniebat esse diligentem. aetas etiam nescio quo modo
 gloriae cupiditatem, si qua fuit in nobis, videtur extin-
 guere; qua sublata, non minimum languescit industria.
 Contra vobis, ab omni cura expeditis, tibi praesertim,
 non aetate minus, quam ingenio, florenti, quotidianum
 esse cum libris usum, & cum omni liberali doctrina,
 non ignoro. Quanti vero illud est, quo quidem nos ca-
 remus, locorum admonitu excitari ad decus? quanti
 etiam illud, haurire aliquid posse omnibus horis ex mu-
 tuo sermone, praecipue vero ex perennibus illis, uber-
 rimisque optimarum scientiarum fontibus, Octauio
 Pantagatho, & Gulielmo Sirletto, familiarissimis tuis
 a quibus, ut opinor, acque diligimur; sed acque tamen
 eorum doctrina frui per intervalla locorum mihi non li-
 cet. itaque tot, ac tantis, quae suppetunt vobis, desti-
 tutus adiumentis, tantum abest, ut gloriosi palmam
 certaminis audeam sperare, ut hastas etiam non inuitus
 abiiciam; qui praesertim facile futurum intelligam, ut
 ad te, quem plane in oculis fero, & a quo mutuam mi-
 hi tribui voluntatem libenter credo, primae partes in co-
 gnitione, & usu Romanae linguae omnium iudicio de-
 ferantur. Quare primum illud te rogo, ne mihi tua prae-
 dicatione, quae tota, ut ego interpretor, ab amore pro-
 ficiscitur, plus oneris imponas, quam mea sustinere
 possit infirmitas; existimesque non minus me moleste
 ferre, si quando mihi falsa laus affingitur, quam non-
 nullos,

mullos, cum vera detrabitur: deinde, si ego abs te in mea laude dissensio, ne propterea meum in tua iudicium improbes: quod, ne si quidem ipse prorsus a me dissensio, immutare, cum multis iam patefecerim, aut velim, aut possim. Vale, & Sirletto nostro, ac Pantagatho meo, vel potius utrique nostro, dic salutem meis verbis plurimam. Venetiis.

HORATIO. VRSINO

Romam.

10

VT video, Magius, amores utriusque nostrum, optimus adolescens, nec litteris tantum, sed humanitate etiam perpolitus, exquisitum ad conglutinandas amicitias tenet artificium. nam ille me primum, iam antea commotum ea fama, quae de tuis laudibus percrebuerat, suo testimonio vehementer in tui benevolentiam impulit: deinde, ut integrum officii sui fructum ferret, te quoque de meo erga te studio litteris admonendum putavit. quod etsi praeter opinionem meam potius, quam contra voluntatem, factum esse confiteor: tamen eo mihi nomine abs te gratias agi moleste ferrem, nisi epistola tua, distincta luminibus ingenii, index amoris in me tui, quo equidem antiquius habeo nihil, omnes animi mei partes ea voluptate persunderet, ut molestiae locus esse non possit. adeo rat, cum eam attulit Magius, legitque me concedente, semel & iterum Carolus Sigonius; qui quantum iudicio, & eloquentia valeat, neque tu, nec, ut opinor, iam ignorat quisquam. is ornavit ingenium tuum divinis laudibus

dibus, me prorsus assentiente: nam quid, *Magio*, dicam? qui te, qualem ipse antea in omni sermone praedicauerat, talem nobis videri, mirabiliter ob eximiam in te beneuolentiam, fortasse etiam iudicii sui causa, laetabatur. Nimirum habet hoc nobilitas, ut quamcunque se in partem dederit, insigne quiddam praestet. sed, quo libentius de spatio curriculoque maiorum plerique defleunt, eo praestantior apud omnes homines et gloriam, et gratiam, si qui cursum tenent, assequuntur. quod tibi gaudeo contigisse: qui cum multis tum naturae, tum fortunae donis abundares, natus in ciuitate, orbis terrarum olim domina, nunc religionis, pietatis, iustitiae domicilio, ortus ex ea familia, cuius nomen praeclaris partum et studiis, et factis multis iam saeculis per omnes gentes fama disseminauit: tamen, quasi haec ad te non pertineant, id agis, ut una te nobilitet virtus, et, quantum honestatis a maioribus tuis accepisti, tantum ipse posteris relinquant. quod etsi difficillimum est, praesertim his temporibus, cum aduersentur multa, et, ut vides, ad inania quaedam, neglecta solida gloria, mores incubuerint: tamen a te, freti prudentia et ingenio tuo, freti etiam constantia, summa omnia exspectamus. Quae porro laudabilior industria, quae cura praestantior, quam quae in animi cultu consumitur? cum scilicet id quaerimus, ne quando impendentem fortunae vim, optimarum artium praesidio muniti, pertimescamus; ne iactemur huc, et illuc, vel cupiditate, vel metu: sed in tantis vitae quasi tempestatibus, tranquillissimo, ac iucundissimo litterarum portu perfruamur? quae qui non videt, nec de adipiscenda

da virtute, quae rationis absolutio est, assidue cogitat: nae ille eo ipso rationis munere, quo vno ceteris praestamus animantibus, iudignus est. quod quidem semper sensi; licet, quo contendere non peruenirem. te & sentire idem, & posse consequi quod vis, intelligo. quod si de praemiis cogitas; quae proposita sint, vides, aeternum decus, & bonorum amor; quem debes omnibus rebus antepone: equidem in eo summam felicitatem ab adolescentia constitui. ex quo quanti faciam amicitiam tuam, quem nemini aut probitate, aut studio liberalium doctrinarum audio concedere, facile potes intelligere: idq. ut re ipsa aliquando experiaris, operam dabo. Vale, & Iulium Poggianum familiarem tuum, praestantem omni laude virum, ac Hieronymum Lippomanum, eximia spe summae virtutis adolescentem, salutes, rogo, meis verbis diligenter. Venetiis.

OCTAVIANO . FERRARIO

Mediolanum.

II

NOLI putare, me tantum amici tui προσλιμασ⁶ tribuisse, ut adhuc rem ducerem. nam, etsi de illius ingenio, doctrinaque semper optime sensi, idque primum litterarum tuarum testimonio, post etiam iudicio meo commotus: tamen de tuo libro ita iudico, nihil fieri posse non modo eruditius, in quo meam de studiis tuis opinionem aequavit industria tua, verum etiam elegantius: quod ab excellentibus in philosophia viris, qualem te iam omnes praedicant, hodie non admodum expectatur. Quid igitur obstitit, cur non aggredere?

S caussam

causam si quaeris; de qua te, si res pateretur, celatum vellem: pituita, repente commota, satis per se molestā, mox etiam, cum tussis accessisset periculosa, moram iniiecit: biduum iacui, medico non admissō, accurata vi-
 ctus ratione contentus: in qua tu quantum ponas, ignoro: ego utilissimam experior nunc, quae supersunt morbi reliquiae, do operam, ut eas depellam. quod eadem, ut spero, abstinentia consequar. Filio iam, & domesticis omnibus recte est. Liber tuus, quemadmodum ex paginis, & diebus rationem duco, video fore ut idibus Sext. aut plane absolutus ab operariis nostris, aut inibi sit. itaq. velim significes, quot ad te eius exempla, & cui dari velis. chartam probabis: habet enim amplitudinem, & elegantiam: spero, item reliqua. mitterem Io. Antonio, bibliopolae vestro; sed homo est, quod inter nos dictum sit, paullo ad rem attentior, quam vellem. nisi remittat aliquid de sua consuetudine, vix puto inter nos posse convenire. verumtamen quid ad nos? utamur alio, qui se praebeat aequiorem in transigendo, deinde bonum virum in fide praestanda. quod totum prudentiae tuae committo. Vale. Venetiis.

E I D E M, Mediolanum.

12

Ego vero nihil minus volo, quam, nisi vacas, a te responderi. nam, etsi mirifice delector ingenio tuo, cuius imaginem in iis, quae a te scribuntur, epistolis magna saepe cum animi mei iucunditate contemplor: tamen, ne me putes in ea haerere esse, quae ad se ipsam refert omnia, aliorum causa minimum laborat. cogito valetudinem tuam: cogito maximarum doctrinarum studia: amicis, & propin-

propinquis horae dandae sunt: inuitat humanitas, pietas
 cogit: cur ego te ista velim deferere tam laudabilia, tam-
 que necessaria, studium ut expleas meum crebritate lit-
 terarum, quod expleri tamen nullo modo potest? De li-
 bro teneo iam quid velis. Typis, quos probas, & charta,
 qua vis, utemur. initium fieri ante quam redierit is, qui
 totam officinae curam sustinet, omnino vix potest. erat
 autem in Forum Iulii, sui negotii causa, profectus. eius
 porro diligentiam cum in charta, tum in toto hoc genere
 utilem, & necessariam esse, saepe sum expertus. quo
 aequius hoc, quidquid spatii interponitur, uterq. nostrum
 ferre debet. atq. etiam, ne quid celerem, paullo eram con-
 turbatior, aegrotante filio, quem de viribus unum habeo
 reliquum. O mi Ferrari, quantam tu debes philosophiae
 gratiam, quae te a tot curis ad iucundissimum vitae ge-
 nus abduxit. quamquam fortasse hoc melius: & in agen-
 do positam esse virtutem, ne tu quidem Peripatetici ne-
 gant. sed haec omitto. In pecuniae permutatione agnosco
 tuam in me beneuolentiam, paene dixi liberalitatem.
 quod si arcae meae consultum aequae omnes vellent;
 quanto mecum ageretur commodius. nunc, mihi crede, se-
 cus est, nec me tamen reclamante. Vale. Cruceio, &
 Caprae salutem plurimam. Venetiis.

IO. ANTONIO. TVRONEO
 Vrbinum. 13

Si quisquam est, qui ex aduersa bonorum virorum
 fortuna sollicitudinem capiat: eorumque mederi studeat.
 S 2 incom-

incommodis; eum ego me esse profiteor. sed, cum ad opem ferendam nihil mihi suppetere praeter voluntatem intelligo; sic afficior, ut me ipso miserior esse nihil putem. quod si antea sensi, certe id in tuo potissimum casu mihi contigisse, nisi vel meam consuetudinem ignoras, vel ignorari a me tuum ingenium, tuam probitatem putas, debes opinari. Quamquam cum recordor, & eadem saepe accidisse optimis viris, & ubique virtutem honestissimum habere domicilium; nec fieri numquam, ut calamitas etiam gloriae sit; nec ullum in te dedecus, aut facinus turpe conferri; cum hoc aeternae naturae lege, unde humanae leges, tamquam ex archetypo, describuntur, sancitum esse videatur, ut vim vi liceat repellere, & sua cuique incolumitas prima sit: haec, inquam, memoria, & cogitatione dum pertracto; id quod, quasi solatium quaerens, saepe libenterque facio; lenitur aliquantum doloris acerbitas, atque etiam tibi, quantum licet, in medio dolore gratulor: cui nisi loci mutatio grauis est; cetera, quae videris amisisse, leuiter ferenda esse censeo. In loco autem quid te torqueat? species urbis? at ea, quae ad oculos pertinent, nemo umquam sapiens neque in malis, neque in bonis esse duxit; & ego, qui longe a sapientia disto, haec tamen prorsus non amo inania, solitudine fruor, quantum possum: in hac mihi viuo, & Deo: quod unum est beate viuere. Amicorum consuetudo? quid? absentes non diliguntur? non, si volumus, & quoties volumus litterarum sermone coniungimur? equidem, postea quam discessisti, nescio quo modo crebrius etiam, quam cum aderas, de te soleo cogitare: & mihi scito amico-

amicorum spectra, praesertim quos virtus, & integri-
tas commendat, esse iucundissima. sin utilitatem ali-
quam, tuis necessariam rationibus, cogitas, non dubito,
quin istuc, quidquid iacturae factum est, breui maiori-
bus etiam commodis resarciatur. Nec vero, si me au-
dies, utilitatem ullam cum ea doctrina conferes, quam
tu auges quotidie in isto otio, neminem curans, prae-
ter te ipsum: quod hic certe non contingit. magnum est,
studia posse colere quae velis, & quantum velis: tibi
vni sementem iacere, tibi vni fructum colligere. at quam
fructum? cui nec imber immoderatus, nec aestus, nec
ulla calamitas noceat, nec suauitatem detrahat, sed
augeat, quae cetera omnia corrumpit, dies. Quod si
tibi, multorum philosophorum exemplo, vitam in pa-
tria ducere, ob doctorum hominum paucitatem, non
per placet: an dubitas, quin te ista cura nos amici tui,
si quid noster in te amor, si quid pietas valebit, ali-
quando liberemus? quod tamen eiusmodi est, ut non
tam laetandum videatur, cum euenerit, quam non do-
lendum, si sero, vel si etiam numquam eueniat. nos
enim in delectu rerum saepe fallimur: errore mentis
tamquam salutaria, quae noxia sunt, adsciscimus: unus
euenta rerum prospicit, unus igitur nostra consilia
gubernet, ac moderetur Deus. cui si te totum permi-
seris, si minimum in te ipso, in eo posueris omnia: mi-
hi crede, ex istis molestiarum fluctibus emerges; ni-
hilque posthac aut mali metues, aut boni frustra cupies;
multa etiam, quae non cupies, nullis accersita labori-
bus, aut studiis, ad te sua sponte confluent. Ego tibi
opera, cura, diligentia, quae numquam in me desidera-

S 3 bis,

278 PAVLLI. MANVTII
bis, fortasse etiam consilio prodesse aliquid possum: Rafarius, qui publicam personam gerit, etiam auctoritate adiuvabit; quem licet existimem, quantum valet, tantum tua causa velle, tamen, suadeo, litteris eum interdum appelles, rogesque, ut respiciat fortunas tuas, & aliquid eis, atq. adeo multum cogitationis impertiat. Calvino optimo viro, mihiq. vetere benevolentia coniunctissimo, amoris, & studii erga te sum ipse optimus testis: sed aetas iam obstat, quo minus ea, quae res postulat, obire, et exsequi possit omnia. itaque, nisi me fallit opinio totum in Rafario est. nam ego, ut scis, vel infirmitate valetudinis, vel diuturna iam consuetudine, & voluntaria quadam desidia, loca publica non admodum frequento: quo familiaritates intermitti, & ex eo amicitias, si quae penitus virtute non haerent, paulatim dissui necesse est. testimonium tamen iudicii de te mei nullo loco deerit. & de doctrina quidem, ut spero, fidem faciet oratio nostrae eloquentiam vero, in qua tibi quantum tribuam, cum alii, tum omnium modestissimus, & ingeniosissimus adolescens, Franciscus Vianellus a me saepe audit, tua scripta facile probabunt. Vale. Venetiis.

FEDERICO. GALLO

Vrbinum.

14

INTERVM iam te purgas, quod in discessu tuo, menses fere quattuor absuturus, ad me non adieris, quem, ut opinor, tui cupidum ac peramantem cognoveras. ego autem, etiam si repentinam illam discedendi necessita-

necessitatem litteris minus excusasses; tamen, uide,
 quam faueam amicitiae nostrae, & quam non stricto iu-
 re tecum agam; numquam mihi persuaderi passus essem
 hoc abs te salutationis officium uel nostri obliuione, uel
 contemptu, uel ulla omino inhumanitate tua fuisse prae-
 termissum. quare accipio excusationem tuam: speroque,
 te operam daturum, ne utaris ea posthac: idq. mihi fore
 iucundissimum. nam, cum semper dilexerim pluri-
 mum, a quo primum die mihi cognitus est, parentem
 tuum; cui te cupio, & spero simillimum fore in iis
 artibus, quibus honestius, aut gloriosius esse non ni-
 bil potest: tum uero studia tua, ingenium, quiq. lu-
 men, & ornamentum ingenii sunt, mores ita me ti-
 bi adiunxerunt, ut omnibus te laudibus libenter cu-
 mulem, nihil de te, quod indecorum, aut turpe ui-
 deatur, ne suspicari quidem uelim. Equidem mirifico
 tenebar desiderio tui, tum ut mandata darem, de qui-
 bus ageres cum parente tuo; tum etiam, ut, quo tibi
 studiorum genere totum aetatem in patria traducendam
 statueres, a te ipso cognoscerem; ut uel ex optima tuo-
 rum consiliorum ratione uoluptatem caperem; uel, si
 quid contra sentirem, indicarem sententiam meam.
 quamquam, cum domi habeas, unde discas, & unde
 praeclara quaeque sumas; neque te meis, neque cu-
 iusquam egere praeceptis intelligo, uerumtamen uerus
 amor latere non potest; ostendat se, ubi etiam minime
 opus est. Ac tu quidem percommode feceris, si,
 quod coram non licuit, fortunae potius culpa, quam
 tua, id tibi agendum per litteras exislimabis, ut ali-
 quid de quotidiana tua tum lectione, tum etiam, sine

lectio paene inanis est, scriptione significes: non enim te puto vel desidia quidquam loci relinquere, vel iis lenitatibus, in quibus plerique adolescentes insaniunt, operam perdere. scis, quod sapientissimi homines prodiderunt, imitricem boni voluptatem falsa specie decipere, illecebram esse turpitudinis, escam malorum omnium, qua capitur aetas improvida, nec se captam sentit, nisi cum imprudentiae poenas luit. atque hoc in genere labi, & errare, cum ceteris turpe sit, iis videtur esse turpissimum, quibus ad amplectendam honestatem praecepta non defuerunt. & praecepta si valent, quae tibi ego, pro meo in te singulari studio, deesse non patiar: quanto plus valere exempla aequum est, praesertim quae posita ante oculos sunt, quae tibi nunquam intueri non licet, quaeque familiae tuae quantam quotidie laudem pariant, facile potes intelligere? itaque non a te mediocre aliquid, sed summa omnia expectari, nec expectari solum, sed exigi etiam quasi debita, debes cogitare. quae si praestas; laetitia quidem parentes tuos, quibus potissimum, & patriae natus es, afficies incredibili, te ipsum autem perpetuis instrues, maximisque bonis; nec illa timebis externa, quae casus, & fortuna inuehit; sed, a te ipso pendens, nullis obiectus iniuriis, firmissimo artium optimarum praesidio munitus, vitam deges beatissimam, aeternamque posteris tui nominis memoriam reliques. Vale.

Venetis.

OCTA.

OCTAVIANO. FERRARIO
Mediolanum.

15

O. PRAECLARAM *παλιωδῖαν*. at ego, tuarum litterarum memoria, contuleram in eum perpetuo quodam studio, quidquid praestare poteram officii, operae, diligentiae, nec me tamen paenitet, eo processisse, unde nunc tu ipse paene reuocas. mutare autem consuetudinem, praesertim in benemerendo, vix licet. nam illa superiora, si doctrinae non vis, in quo me fefellit opinio, humanitati certe dedimus. nunc dandum esse aliquid constantia, ne nostrum damnemus institutum, profecto vides. verum absit iam hoc argumentum a litteris nostris: valeant ea, quae iucunditatem non habent, quam equidem non modo ex tuis elegantissimis epistolis, verum etiam cum ipse ad te scribo, capere mirificam soleo. nihil est tanti, quod cum sermonibus nostris permutari debeat. Nec, de nobis ipsis quod scribamus, deesse umquam patietur mutui amoris abundantia. De libris tuis, dedi negotium homini domestico, ut a peritis de ratione vecturae cognosceret, eosque quamprimum istuc mitteret. quod ille, ut est omnibus fere iucunda negligentia, fortasse nondum fecit. urgebo litteris, & mandata renouabo. Suilla farcimina curaturum te significas: in quo amo voluntatem tuam: quod autem addis, non ante, quam extremo mense; ne, cum recertia sint, inclusa corrumpantur: consilium probo: &, quoniam uestra istius generis obsonia, qui palato sapere putantur, sine exceptione

ceptione laudant; nec artes quaestuosas officinae temere dediscunt; puto fore suauissima. Sed audi, quod esse totum aliud intelliges, id est aliquando magis ad me pertinere. κακός μ' εἰμι sumus, & cruditate laboramus. id quidem a pueritia: sed auxit vitium assiduus litterarum usus: quo adempto, quae nobis, qui vulgaria contemnimus, delectatio, vel potius quae vita superest? quare ignosce, si mihi non impero: quod ne tu quidem, opinor, facis. quaesitum inter medicos est, ecquid adiuuenti aquae sulphureae potus asserre posset. varie sentientibus, recusavi; ne, quod aiunt, de sorte etiam in dubium venirem. de gutta capiti instillanda sermo fuit. ne hoc quidem placuit: ne memoriam periclitarer. ventum denique ad victus rationem. praebui me facillimum, quidquid vellent. in primis radicem probarunt, quae Irios vocatur: quam condiri apud vos egregie, sciunt. eam igitur, quod tuo commodo fiat, velle inquiras, inuentamque, & mediocri vasculo diligenter inclusam, cures aliqua ratione perferendam. quidquid erogaueris, bona fide, cui voles, hic numerabitur. Alexandri ὁ πρῶτος nondum ab eo, cui. frater commendauerat, extorqueri potuit: nec ego vrsi vehementer, posteaquam, non ab Aphrodisiensi, cuius in eo libro mentio fit, sed a posteriore Alexandro scriptum cognoui: quod etiam καὶ ἐκ τῆς declaratur. Vale, & Cruccio, Capraeque, communibus amicis, familiaribus tuis, quos vltimam aliquando complectar, salutem plurimam. Patavii.

AMO
bi ita pla
ne causan
gie probat
mo de illi
hil credan
Floritam
ri, cum int
so nomine
neam; cu
dere: idq. m
tute semper
singulari s
epistolam; u
quam tecum
simulationi
simpliciter
sa nulla sub
uideor agno
fensi labora
eritq. ut spe
tis, ex tui
tuis in illu
litteris acc
omino in

IO. BAPTISTAE. RASARIO

Venetias.

16

AMO te vehementer de Ferrarii epistola; quae mihi ita placuit, ut nihil umquam legerim libentius. sane causam suam diligenter agit, & mihi quidem egregie probat. quamquam multis iam annis eam imbibi animo de illius ingenio, doctrinaq. opinionem, ut errare nihil credam, si quis multorum rationibus unam eius auctoritatem anteponat. quam tibi quoq. sententiam probari, cum intellexerim antea: cumq. ut uere dicam, hoc ipso nomine plurimum accesserit ad beneuolentiam in te meam; cupio te nunc ne leuissime quidem a te ipso diffidere: idq. mihi tum facile, pro eo iudicio, quod de tua uirtute semper habui, tum etiam, pro meo erga Ferrarium singulari studio, libenter persuadeo. Sed, ut redeam ad epistolam; uides, quam erudite, quam ingeniose disputet: quam tecum amice, quamq. (ut apertius, nec ulla tectae simulationis labe suffusus eius animus est,) ingenue, & simpliciter agat. alienatae uero a te uoluntatis, cum causa nulla subsit, ne signa quidem ulla in eius litteris mihi uideor agnoscere. de quo quia te non nihil ex epistola tua sensi laborare; nec iniuria; uetus inter uos amicitia fuit, eritq. ut spero, uitae aequalis, maximis illius in te meritis, ex tui mihi praedicatione cognitis, non uulgaribus tuis in illum officiis culta: purgabo te apud eum primis litteris accuratissime: nec ab illo probata damnaſſe, aut omnino in dubium reuocasse, sed quaesuisse non nulla tamquam

quam a magistro tuo, veteremq. in eo consuetudinem retinuisse, si uolueris, ostendam. non dubito, quin, si quae ei de tuo sensu, quod equidem vix opinor, suspicio haesit, amoueatur, ac se tibi quam primum restituatur. noui hominis lenitatem: beneuolentiam in te uidi: isq. meae in te beneuolentiae fons, ea primum origo fuit. nec enim, quae de te olim ad me scripserit, possum obliuisci, nec, si possim, velim. Illud a te, mi Rafari, si quid nostra etiam caussa vis, etsi necesse non arbutor, tamen uehementer peto, & si, pateris, rogo, non ut optimum uirum, doctissimum hominem, Ferrarium, tuae laudis auctorem, quod is tibi ad philosophiam aditus aperuit, uiamq. munuit, obserues, ac diligas; quod a te fieri, certo scio; sed ut in omnibus officiis, quae ad illius non modo dignitatem, sed etiam uoluntatem pertinebunt, certare mecum uelis. in quo te mihi parem esse percipio, uinci numquam patiar. Vale, & Magium nostrum, singulari adolescentem ingenio, tibi pro sua doctrina, mihi pro meo in eum non mediocri studio deditum, saluta. Patauii.

HAEC dictaui, ut soleo, filio meo: nam, ut scriberem ipse mea manu, neque per medicum licebat, nec sane stomachi ferebat imbecillitas.

ANTONIO.ROLANDO. 17

STVDIVM tuum in exhauriendis mandatis meis, celeritas in rescribendo, quorum ego a te alterum pro nostra coniunctione expectabam, alterum autem pro
tuis

tuis occupat
bent signifi
ribus non
deam, ope
que etiam,
esse consec
game offic
aut non af
die, cum
meo, &
ingenui m
tamq. pri
nostris del
studiis, co
namq. tua
nio excitat
ter nos exor
stri sensus
naturae uis
diuitis tua
amicitiae no
netas ratio
uocantur st
is, qui fuer
corum, an
quod nisi n
neret; ang
es: sed, m
tate, frui c
quem iamq

tuis occupationibus postulare uix audebam, magnam habent significationem amoris in me tui: cui quidem, si paribus non licebit officiis, pari saltem ut amore respondeam, operam dabo: nec dubito, quin consequar: atque etiam, quod mihi uel iniurato uelim credas, me iam esse consecutum intelligo. qui enim, tua quae fuerint erga me officia, meae quae sint partes, ignorare possum, aut non assidue cogitare? Ego, Rolande, quo primum die, cum lectissimo adolescente, familiari tuo, itemq. meo, *, accessisti ad me, dilexi mores tuos, in quibus ingenui multum pudoris, qui probitatis index est, multamq. prudentiam clucere uidi. paucis diebus, cum de nostris delectationibus, idest de communibus litterarum studiis, colloqueremur, probasti mihi ingenium, doctrinamq. tuam, & ad meam de te opinionem, * testimonio excitatam, plurimum addidisti. postea facile inter nos exorta familiaritas: uel quod multis in rebus nostri sensus congruere uiderentur, & latentis quaedam naturae uis animos utriusque coniungeret: uel quod assiduitas tua paene quotidiana, ususq. domesticus nihil amicitiae nostrae deesse pateretur. Me deinde Venetias rationes meae, te non ita multo post Lutetiam uocarunt studia tua. manet amor tamen, in me quidem is, qui fuerat praesente te, uigetq. memoria tui, nec locorum, aut temporum interuallis umquam euanesceat. quod nisi me tuae laudis magna quaedam cupiditas teneret; angere, quod abes, &, ut audio, absfuturus es: sed, uersari is in ista eruditorum hominum celebritate, frui consuetudine, doctrinaq. Hadriani Turnebi, quem iampridem omnes cantant, ego orno, quantum possum,

possum, in sermonibus meis, nisi vehementer gaudeam;
 te non amem, nec quem ames ipse, quod in primis
 cupio, dignus sim. Quare nostra etiam causa contende,
 ut, quo consilio Lutetiam petiisti, id quam maxime,
 quamq. licet celerrime consequaris. refer ad nos
 illa praeclara, quorum gratia discedendum tibi a tuis,
 perferenda longi itineris incommoda, asperrimarum
 alpium perpetuis obsessa niuibus iuga non sine magno
 periculo superanda existimasti. Quo de genere te-
 cum agam breuibus; quia, sensus cum optime tuos
 habeam cognitos, non dubito, quin saepe tibi veniat
 in mentem, ex ista urbe, quo, tamquam ad amplis-
 simum artium ingenuarum mercatum, libenter omnes
 confluunt, inanem redire, quam non deceat. Quod si
 te, studio cognitionis incensum, cetera, quae istuc
 habes plurima, liberalium doctrinarum adiumenta de-
 ficerent: unus tamen idem ille, quem paullo ante no-
 minavi, qui praeter ceteros cum litteris humanitatem,
 Graeca cum Latinis, antiquae philosophiae scientiam,
 quod e scriptis eius facile cognouerim, cum elegantiore
 doctrina coniunxit, unus, inquam, tibi instar esse om-
 nium Turnebus, unus & suo te commouere exem-
 plo, & suis adiuuare plurimum documentis, consi-
 liisq. posset. cuius ut a latere, quoad hominis permittet
 humanitas, ne umquam discedas, & istam urgeas oc-
 casionem, diuinitus datam, adipiscendae virtutis, si tu
 is esses, qui naturam humanam sola perfici virtute ne-
 scires, hortarer etiam, atque etiam: idq. libenter tri-
 buerem amicitiae nostrae: sed cauendum intelligo, ne
 γλῶττ' εἰς Ἀδύνας cum tu ibi sis, unde ad alios prae-
 clara

clara institi-
 tia fere ma-
 bendi, ob
 quo ego v
 Cicero pa
 aliquod te
 si tenerem
 ipso, cog
 pi, & ad
 oneris imp
 est, & id i
 valetudini
 citationibu
 tium patro
 gitum ad ex
 cam equide
 arbitror, n
 ries. exstat
 leges: aut, s
 fles, quem r
 pore non est
 bendi, & in
 sli, pergratu
 praestabis,
 ut me plurim
 pio: plurim
 fiant, non
 se aliquid vi
 xelux xepu
 nio Glauco

clara instituta, unde laudabilis vitae ratio, & sapien-
 tia fere manat omnis. Viam, & rationem Latine scri-
 bendi, obsecro, mi Rolande, cur a me petis, cum is,
 quo ego uno magistro sum usus, & tibi, & omnibus
 Cicero pateat? an tu me vel huius generis reconditum
 aliquod tenere artificium putas, a quo longe absum, vel,
 si tenerem, posse fieri, ut ab ullo, praeterquam ab hoc
 ipso, cognouerim? nec tamen, vilitate quaedam praeci-
 pi, & ad artem posse redigi, negabo: sed mihi ne tantum
 oneris imponis, cui nec a domesticis curis otii multum
 est, & id ipsum, quod est, vel amicis officii causa, vel
 valetudini necessario tribuitur? Scripsi olim de meis exer-
 citationibus nescio quid, a nobilissimo viro, bonarum ar-
 tium patrono, Stephano Saulio rogatus: & fortasse di-
 gitum ad eum fontem intendi, quo si accesseris, non di-
 cam equidem istam eloquentiae sitim explebis, sed, ut
 arbitror, nihil inde non purum, nihil inquinatum hau-
 rires. exstat ea, cum aliis edita, epistola. si videbitur,
 leges: aut, si legisti, & queris amplius: a me cur exspe-
 ctes, quem respirare negotia non sinunt, hoc quidem tem-
 pore non est: pete ab istis, qui uacant, optimis, & scri-
 bendi, & iudicandi magistris. De Laertio, & quid egi-
 ssi, pergratum est; & quod acturum te ostendis, id si
 praestabis, maximam inibis a me gratiam. Turnebus,
 ut me plurimum diligat, quod certe mutuo faciet, exo-
 pto: plurimum ut mihi tribuat, quod litterae tuae signi-
 fificant, non postulo. quid enim ego sum? aut, si es-
 se aliquid videor, prae illo tamen quid sum? non enim
 χαλκεία χερσὶν εἶδος umquam conferam, ne cum Home-
 rico Glauco errem; sed χερσὶν αἰσθητοῖς anteponam sem-
 per.

per. Ille est, cui iure omnia tribuantur, qui iam peruenit eo, quo nobis adspirare non licet. Saluta eum meis uerbis, cum ueterrimo amico meo spectatae uirtutis, & industriae uiro, Carolo Stephano. Vale. Venetiis.

CAROLO. SIGONIO

Patauium.

18

E G I diligenter, quod mandaueras. praecise negavit, ac visus etiam nonnihil moleste ferre. sed, mihi crede, huius generis paene magistro, uestri sensus non congruerent. nihil morosius. o multa in omnibus intolerabilia: quae nobis tamen, mi Sigoni, qui a libris nescio quid plus, quam ceteri, sapere didicimus, ferenda sunt. quamquam tibi quidem, pro tua prudentia, atque etiam pro superioris vitae perpetua consuetudine, nihil difficile. Sed, Patauii te nunc esse, in celeberrimo Italiae theatro, ubi spectatur, & notatur acerrime, quicquid agas, quidquid dicas, & saepe mihi, nec umquam sine aliquo metu, in mentem venit. sic sunt, qui amant: omnia cupiunt, omnia timent. Vides, quo te in loco tua uirtus, quanta omnium expectatione, constituerit. nihil mediocre praestandum est: nec, ut cum aliis, quibus te iam doctrina, industriaque antecelluisse omnes iudicant, sed ut tecum ipse certes, teque ipsum, si licet, vincas, omniq. laudis genere cumules, elaborandum. quae, cum, ad quem scribam, considero; & cum mihi singularem tuam rectissimis in studiis cupiditatem, ac diligentiam propono; mirifice

fice laetor; nec me tamen paenitet hoc nostrae necessitudini tribuisse, ut ea legas a me scripta, quae minime necessaria duxerim. Hesternum diem puto te mutuis cum Pace Scala sermonibus incundissime traduxisse: quem volo a te amari plurimum: vel quod ab illo te quoque amari plurimum sensi; vel quod eo nihil humanius, nihil amabilius. praeterea, quod te vehementer mouebit, multis nominibus ego illum in oculis sero: nec in eo vinales habeo paucos. Faloppio nostro si discessum meum excusaueris, cum uxoris morbus urgeret; gratissimum exit. nec tamen diutius hic me commoraturum puto. tanti nihil est, ut nobis carere possim. Interim vale, & si vacat, scribe; non accurate, sed, ut ego nunc, quidquid in buccam: ne pereat omnino fructus nostrorum sermonum: quem si litterae restituent; paullo feram lenius absentis tui desiderium: cuius igniculum, e cubiculo meo cum discederes, sentire coepi: nec deinde tuum spectrum discessit ab oculis meis. Venetiis.

MARCO. ANTONIO

M V R E T O

Romam.

19

G A V D E O, mi Murete, quod profecto etiam me tacente existimas, te nauare operam Regibus, ingeniumq. tuum, quod ego semper vnice dilexi, extulique laudibus, a tanto Pontifice, & ab vniuerso Cardinalium Collegio vehementer probari. nam, si qui aliter sentiunt: quamquam quis est, qui aliter sentire possit? verumtamen si qui fortasse reperientur, quos liuor

T

impe-

impediat, quo minus recte ac sincere iudicare possint; de
 iis laborandum non erit: cum te praesertim ille noster,
 quem sequuntur multi, sed ille praeter ceteros, qui no-
 bis quasi ^{particeps} ^{reus} debet esse, non mediocriter ornet,
 atque diligat. Haec altera tua oratio priorem illam vel
 aequat, vel uincit, sententiarum, verborum, ordinis prae-
 stantia. quo in officio, ac munere cupio te pergere. simul
 enim perges in expedita, maximeq. directa gloriae via,
 per quam processisti iam longissime, nemine praecurrente,
 me fauente plurimum. De tua in me beneuolentia,
 cum recordor meam, dubitare non possum. meum in te
 animum expertus iam es eundem si & esse nunc, & per-
 petuo futurum arbitraris, non fallam opinionem tuam.
 nam & mea non solum consuetudo, sed etiam natura ita
 postulat: & tu perficis eas laudes, quarum principia me
 olim, expectantem id, quod praestare te nunc video, in-
 tui amorem impulerunt. Habeo summas gratias, quas
 agi a te cupio, Archiepiscopo Beccatellio: eumq. meo
 nomine, ut quam licebit officiose, quamq. plurimum sa-
 lutes, valde rogo. *, ut scribit ad amicos, floret hono-
 ribus in patria, carus Imperatori, iucundius omnibus.
 nostri humanitatem, & ingenium: doctrinam auxit a
 discessu tuo, quantum vix credas: itaque summa omnia
 de illo adolescente sperare nobis licet. Duareni obitu,
 de quo heri primum a Germano homine, qui ex Gallia
 recens venerat, accepi, damni plurimum in iure civili fa-
 ctum est. equidem dolui vel tua causa, quod eum a te
 amari senseram. quamquam haec, si ferret humanitas,
 prorsus dolenda non essent. quid enim proficimus? ang-
 quidem grauius, neque communis condicionis necessitas
 concedit,

concedit, &
 miserrime
 acceptum
 fore iucun-
 ditas qu
 itaque, &
 non posse
 coepi tex
 dixit
 tem, ides
 nuns. in
 ria decip
 in clausu
 triduo cep
 dentia. p
 cri sum a
 hil praete
 iam pluri
 te sum tam
 te studiis,
 listi. Val

HIP

SAN
 ex ingenit
 re literari
 persona de

concedit, & vitae commutatio, breuissimae cum aeterna
 miserrime cum beatissima, valde vetant. Ego nunc, quod
 acceptum diuinae benignitati refero, quodq. tibi puto
 fore iucundissimum, valetudine vtor satis commoda,
 oculis quidem optimis, quod aliquot annis non contigit.
 itaque, cum otium non ferrem, (scis enim me quiescere
 non posse) commentarios in reliquas Ciceronis epistolas
 coepi texere: & ut initia sunt, prorsus industria non
 exierat, absolui, ut mihi quidem videtur, maiorem par-
 tem, idest tres primos libros, & extra ordinem, octa-
 num. in quibus, ut dixi iam, nisi me communis philo-
 sia decipit, non videtur opera male collocata. Habebis
 in clausula de Petro Fabro, tuo dicam, an meo? ita me
 triduo cepit, sibiq. deuinxit ingenio, humanitate, pru-
 dentia. plane vixi, quam diu mecum fuit: nec medio-
 cri sum amore discedentem prosecutus: nae tu, si ni-
 hil praeterea mea causa velles, qui & vis, & egisti
 iam plurimum, tamen hoc vno munere, quod auctus per
 te sum tam ornatu adolescentis amicitia, meis omnibus in
 te studiis, quae tu merita vocas, optimam gratiam retu-
 listi. Vale. Venetius.

HIPPOLYTO. CAPILVPO

EPISCOPO. FANENSI 20

SANE postulabat mea peruetus in te obseruantia,
 ex ingenii tui praeclaris orta monumentis, ut aliquid ad
 te litterarum darem: sed me dignitas tua semper, &
 persona deterruit, verentem, ne, talem virum, tan-

T 2 tarum,

tarum rerum occupatione distentum, inanibus appellare litteris, pudentis hominis non esset. nunc, ut veredicam, paene accuso modestiam meam, quod, dum cogito ad te scribere, nec tamen consilium explico, interea tua fecit singulari humanitas, ut anteuerteres. quamquam cur ego apud te, maximarum virtutum laude praestantem, ad quas mihi adspirare non licet, plus residere officii moleste feram, cum praesertim hoc ipsum amoris in me tui, quo equidem antiquius nihil habeo, non obscurum argumentum esse videatur. Quocirca, ut interdum me pudet pudoris mei, quod nihil ad te scribere sim ausus, aum tamen maxime cuperem: sic ista tuae voluntatis erga me declaratione, istis etiam laudibus, quibus me ornat epistola tua, mirifice delector. noli enim existimare, si quid umquam meis laboribus ac vigiliis non contemnendum praestitui, me fructum ullum, aut mercedem praestantiozem expectasse, quam quae ex tuo, tuique similitum iudicio, ac testimonio percipitur. quod si assequor, triumpho. sin, quod suspicari facilius possum, ita me laudas, ut quasi deficientem in cursu tua voce impellas; ne sic quidem vulgari me munere obstringis, cum ad cohortandum, atque incitandum, si vlla res, certe tua plurimum valeat auctoritas, itaque enitar, ne tu me non bonum tuarum litterarum interpretem fuisse putes. incumbam enim paullo acrius ad ea, quae qui possidet, in re laudem fert. Tibi vero, quod ad me tam humaniter scripseris, quodque ultro ipse mihi diu exoptatum ad tuam amicitiam adiutrum aperueris, si, quam debeo, gratiam referre non potero, habeo saltem,
ut

ut priores officii partes re potius tibi, quam studio & voluntate concedam. Vale. Venetiis.

NICASIO. CASLETANO. 21

Q U A N T U M mibi uoluptatis attulerant litterae tuae, summae tum humanitatis, tum etiam doctrinae notis insignes: tantum postea doloris, ac molestiae, erepta ob aduersam ualeitudinem respondendi facultate, suscepi. nō enim aut is ego sum, cui quidquam prius officio sit; aut eum te esse ex * litteris cognoui, cuius amicitia contemnenda potius, quam appetenda uideatur. sed omitto * uel testimonium, quod apud me ponderis, sicuti debet, habet plurimum, uel uoluntatem, cui libenter omnia tribuerem ipsa, quam ad me misisti, epistola, quid est, quod intrare non possit? scripta primum humanissime, cum bene uolentiam in me tuam significes, meam exoptare uidearis; deinde ita eleganter, ac diserte, (ne uiam, si mentior) ut ego tibi in hac eloquentiae laude comparem sane paucissimos, anteferre debeam neminem. Quare cum istam animi tui singularem in me amando, atque etiam laudando liberalitatem libenter amplector: tum uero, me tibi parem in utroque uoluntatem reddere, idq. non tam officii tui magnitudine prouocatum, quam iudicio scire, uelim existimes. Tu uideris, quid de me sentias, et quo me loco reponendum statuas: non enim ita laudem aspernor, praesertim quae ab iis, de quibus bene omnes existimant, proficiscitur, ut quam de studiis meis opinionem suscepisti, eius deponendae, aut imminuendae,

T 3

tibi

tibi auctor esse umquam velim. Ego, quod ad me attinet si qua tui dabitur facultas ornandi, plena manu tuas uirtutes ad caelum tollam: studio quidem, & amore ne uincar, & enitar, ut soleo, diligenter, & ut spero, consequar. praesentem scilicet mutui sermonis suauitatem longinquitas aufert: litteris tamen, si ualebo, quod adhuc non contigit, ne prorsus abesse uideamur, operam dabo. Vale, & * meo salutem. Venetiis.

IVLIO . BELLOGRADO

Vtinum.

22

AMABAM te ante, mi Iulii, quod esses eo patre natus, cuius excellentem probitatem, atq. doctrinam non praesentes modo, sed longinqui etiam praedicant, ego summam in me humanitatem saepe sum expertus: nunc, ista indole, isto te ingenio praeditum esse cum intelligam, ut paternam uirtutem, tamquam amplissimum patrimonium, non modo conseruare, uerum etiam augere possis; an dubitas, quin omnia in te studia libentiss. me conferam? quibus addam officia, cum licebit: & ut saepe liceat, exopto. Perge, adolescens egregie, mihi carissime in isto ad laudem cursu. viam iniuisti, quae te ad immortalitatem feret, directam, expeditam, a vulgi erroribus longe remotam. quo tibi nomine gratulor, mihi gaudeo plurimum, & ut perpetuo gaudeam, futurum confido. species enim virtutis eximia, quo propius eam adspexeris eo te commouebit magis, & amorem sui mirabilem excitabit. interitus contemplare actiones prudentiss. mi viri parentis

parentis tui: ad eius te imitationem totum finge, atq. conforma; ut haurias ab eo laudem tuam, quam capere uberioriorem ex nulla disciplina potes. Me v. lim existimes omnibus de te maxima polliceri, & in te amando, si patrem excipias, nemini concedere. Filius meus te sibi maioris fratris loco ducit; nec ullum tui ornandi, quantum in ipso erit, locum praetermittet. Vale.

HIERONYMO. SERIPANDO

CARDINALI. CREATO

Romam.

23

A QVO primum tempore aliquid sapere, idest a vulgi opinionibus dissentire coepi, semper ita iudicavi, multo esse optabilius, multoq. praestantius, consequi virtutem ipsam, quam ornamenta virtutis. itaq. nunc allato de tua dignitate nuncio, quem hic ingenti laetitia boni omnes exceperunt, non sane tua causa magis, quam antea, pro communi quidem Ecclesiae bono, cui tantum ex honore tuo praesidii, tantum splendoris accesserit, magnopere sum laetatus. tu enim is es, cuius animus haec humana numquam spectauerit, semper omnem spem, omnemq. gloriam, ac felicitatem in vno Deo, & in illa caelesti vita, recte, ac laudabiliter agentibus proposita, collocat. Cui sunt occultae mirabiles ille tot annorum cogitationes, actiones, conciones tuae? quae si obscura fuissent, vno illo facto illustrarentur maxime, cum illa Praefecturae generalis insignia, quae libenter omnes assumunt, multo ipse libentius deposuisti. Quocirca non equidem magis, quia Cardinalis nunc es, quam quia semper ita vi-

T 4 xlii,

xisti, ut Cardinalium Collegio dignissimus esses, & mihi,
 & omnibus laetandum intelligo. nec vero singularem, ac
 diuinam Pii. I V. Pontificis Max. sapientiam admi-
 rari, & efferre laudibus umquam desinam, qui vexatam
 assiduo prauarum opinionum impetu, nec mediocri peri-
 culo fluctuantem Christianae reip. nauem, auctoritatis,
 et doctrinae tuae pondere constituendam putauerit. itaq.
 non iam illas a septemirione horribiles procellas, a qui-
 bus antea naufragium impendere videbatur, posthac ti-
 mebimus. Pio I V. gubernante, quod utinam diuina be-
 nignitas diuturnū esse patiatur, tua, Seripande, tuorumq.
 similium ope, summa tranquillitate perfruemur. id & spe-
 ratur, iam indicto Concilio, quod unicum tantis malis exi-
 mia superiorum Pontificum sapienti a remedium inuenit:
 et, mihi quidem si contigerit, ut ad eam diem spiritum du-
 cere liceat, cum sublatas in perpetuum exiiosi dissidii
 causas, vnā in communi salute voluntatem, vnum gre-
 gis vniuersi pastorem, ac moderatorem videam; satis
 me vixisse arbitrabor, & plane laetus ex hac vita disce-
 dam. Interim fruor expectatione; & tibi, tuisq. virtuti-
 bus, quas omnes laudant, utinam imitari multi vellent.
 eam, quam debēo, obseruantiam, beneuolentiamq. prae-
 stabo. Vale. Venetiis.

A L O Y S I O . E S T E N S I

CARDINALI. CREATO

Ferrariam.

24

M V L T A, & magna Principibus viris, inter
 quos, Aloysi praestantissime, tua praecipue nobilitas
 elucet,

elucet, ad studium eximiae laudis adiumenta suppetunt:
 quae si comitatur voluntas, excellunt facile, sic, ut ad
 immortalitatis praemia, cum quibus non opes, non impe-
 ria sapientes comparant, expedita quadam, & quasi cō-
 pendiaria via perueniant. Hoc tibi contigisse, cum om-
 nes antea faterentur, grauissimum accessit Pii 1 v. Pon-
 tificis Max. testimonium, qui te, diu expetitur, paene re-
 cusantem, non rogantem quidem certe, in amplissimum
 Cardinalium Collegium, ipso maxime comprobate Colle-
 gio, summa bonorum laetitia, proxime cooptauit. Restat,
 quod futurum nemo dubitat, & tua superior vita pollice-
 tur, ut istum honorem pro tua, maiorumq. tuorum digni-
 tate administres. quod facile consequeris, si te, quidquid
 statues, quidquid ages, Cardinalem esse cogitabis, id est
 ex eo Ordine, unde maximi, ac praepotentis Dei Vi-
 carii, rectores humani generis, Pontifices deliguntur.
 Locum tenes, quem summa dignitas illustrat, & in
 quo nullum neque dictum, neque factum obscurum
 esse possit. nec tibi aut a natura quidquam, aut a for-
 tuna denegatum est, quo minus amplissimo te dignum
 sacerdotio praebeas. operosum aliis, & perdifficile
 sit, ut est omnino, ac semper fuit, recte, & laudabi-
 liter agere: Aloysio Estensi, in tanta ingenii, animiq.
 praestantia, tam propensa ad honestum voluntate,
 tantis etiam opibus, quis aditum vere laudis non pa-
 tere, quis ueternae viam gloriae non esse facillimam exi-
 stimet? Gaude igitur tam excellenti bono; & in-
 cumbe totus in eam curam, ut antiquum familiae
 tuae decus, per tot saecula, tot Ducum, tot Regum, &
 Imperatorum virtute partum, non iucare solum, ve-

TUM

rum etiam vehementer augeas . nam nunc quidem eo tantum nomine tibi gratulamur, quod simul cum isto honore praeclaram saepe exercendae virtutis occasionem accepisti . cum ulabimur laetitia, & erit aptior gratulandi locus . cum haec honorum insignia, quae multis oneri suis se constat, iustitia, pietate, omniq. beneficentiae genere ita sustinebis, ut & optimi Pontificis iudicio, & bonorum expectationi, qua nulla maior umquam fuit, egregie satisfacias . quod euenturum breui, omnes confidunt: ego, pro meo in te singulari studio, quasi iam euenierit, praesenti gaudio cupiditatis meae fructum capio. Vale. Venetiis.

IO. BAPTISTAE . SARACIO

Ferrariam.

25

SEMPER equidem existimaui, quod tu quoque sentis, doctissime Saraci, non minimum fortunae praestare virtutem; in qua etiam una satis esse ad bene beatique viuendum putarunt multi: tamen incidunt quaedam tempora, cum ipsi etiam habenda fortunae gratia videatur. quod mihi nunc gaudeo contigisse. nam cum, aliquot abhinc annis, consentiens multorum sermo, eximias ingenii tui suauitates assidue praedicantium, in eam me voluntatem, ac mentem adduxisset, ut diligerem te vehementer, & colerem: casu accidit proximis diebus, ut auctoritas tua, magnis atque perpetuis erga Principes tuos meritis, virtutibusque parata, expedire me haerentem, atque impeditum perdifficili negotio, posset. hoc ego fortunae meae non vulgare beneficium

ficium esse duco. alterum est tuae virtutis, quod, cum tibi
 meam cupiditatem vir egregius, omniumq. humanissi-
 mus, Paulus Sacratuſ ostendiſſet, contuliſti ſtatim ad ra-
 tiones meas ſtudia tua, ſpemq. noſtram, iam prope lin-
 guentem, atque abiectam, erexiſti, & confirmaſti promiſ-
 ſis primum, deinde etiam officiis tuis. quo quidem in me
 ſingulari merito, quibus tibi verbis gratias agam, plane
 non reperiō. vincit enim, vincit prorsus, optime Saraci,
 ingenium meum humanitas tua. ſed hoc ipſo fit virtus il-
 luſtrior, cum in eos beneficia conferuntur, qui ſatisface-
 re non modo ipſare, ſed ne verbis quidem ullo modo poſ-
 ſint: quod tibi perſuaſum eſſe quis dubitet, qui conſuetu-
 dinem benemerendi tuam, a praeſtanti quadam natura
 ortam, liberalium doctrinarum ſtudio mirabiliter auctam
 cognouerit? verumtamen, quando mihi non ſimul cum
 facultate voluntas quoque eripitur remunerandi, non ni-
 hil in moleſtia gaudeo, & fructu tacitus officii conſcien-
 tia, nec tamen futurum deſpero, ut, quae mihi nunc ad
 grati animi ſignificationem deeſſe verba ſentio, eadem ali-
 quando abundet, ita benignitate apud alios praedicanda.
 Interim ſine me hoc impetrare ab humanitate tua, ut
 multo maiorem eſſe putes obſervantiam, ac beneuolen-
 tiam in te meam, quam ullo unquam a me exprimi, ac
 declarari officio poſſit. quod ſi, ut ſpero, facies; mihi cre-
 de, praesentem gratiam, quam ex primis Sacraſ mei lit-
 teris abſolutam exſpecto, haud paullo maiore gratia cu-
 mulaueris. Cupio, niſi grane eſt, a te ſalutari miſis ver-
 bis Io. Baptiſtam Pignam. Vale. Venetiis.

PAVL

PAVLO. SACRATO

Ferrariam. 26

SOLET interdum euentus esse gravior, quam causa, interdum etiam causa, quam euentus. me delectauit virumque pariter in litteris tuis. nam, & ut Latine ad me scriberes, homo tum domesticis curis, tum etiam sedandis, ut audio, multorum controuersiis assidue distentus, certe amor impulit, atq. humanitas; & epistola tua ita mihi ornate, ita copiose omnes non modo animi, verum etiam ingenii tui partes expressit, ut nihil umquam legerim libentius. Ego tibi antea, optime Sacrate, tribuebam sane multa, quae pauci consequuntur, prudentiam, integritatem, doctrinam, maxime vero praestantem quandam ad excolendas officii amicitias & voluntatis, & naturae propensionem: istam vero orationis exornandae facultatem, quae cum multi temporis, magnaeq. videtur esse industriae, tum vero, ut ego sentio, atque usu etiam didici, ab intimo quodam, planeq. recondite depromitur artificio, vix putabam tibi inter diuersa plane studia posse coniungere. sed videlicet id me fefellit, quod ingenium tuum communibus metiebar exemplis: nec mihi veniebat in mentem, auunculi tui Cardinalis, Iacobi Sadoleti, praeceptis, & consuetudine domestica aditum tibi ad omnem gloriam esse patefactum. nam, cum ille cunctis virtutibus, quas laudabit posteritas omnis, assequetur fortasse nemo, bonorum, ac sapientium iudicio virorum excelluerit: hac tamen in primis

mis. Latine scribendi laude ita floruit, ut veteres illos propemodum aequauerit, nos quidem, per eandem viam cupientes excurrere, longe reliquerit. sed, ut ex epistola tua coniicio, conseruabis hoc quasi patrimonium, familiae vestrae proprium; & haec tibi communis hereditas erit cum patrueli fratre tuo, Paulo Sadoletto, quem omnes homines ad egregia quaeque natum intelligunt. Equidem in hoc mihi ipse primum gratulor, qui tibi harum litterarum, quibus nescio an quidquam non modo humanius, verum etiam ornatius esse possit, causam dederim. nam Iosephum Fasinarum, quem ob eius doctrinam, et mores egregios vehementer amo, oblitum arbitror modestiae suae, cum de me loqueretur, & utrumq. vestrum in eo consensisse, ut ille, te libenter audiente, pro veris facta narraret, aut certe veris plurimum affingeret; tu illi, plena manu, ut saepe prodigus amor est, ea, quae prorsus non agnosco, in me conferenti, pro tuo in me studio libenter, & facile crederes. utinam quidem, qui vobis nunc esse videor, is aliquando esse possim: quod quia sperare non licet, ne cur optem quidem est. Meus in te animus (quid enim praetere polliceat?) officio erit, mihi crede, singulari: quaeque a te in meis rebus opera, atque beneuolentia nauatur, perpetuo quodam erga te studio ita compensabitur, ut mihi nemo omnium, excepto amore domestico, te vno carior, aut inuindior umquam esse possit. Franciscus Morandus, cuius ego contubernio, & quotidiana consuetudine mirifice delector, vir egregius, nec iuris tantum civilis peritia, sed poetica etiam laude, & litterarum elegantia vehementer excellens, mutuo te diligit, & qua ego tuis verbis eum salutem imper-

tini,

tuui, eandem tibi ut eius nomine his litteris adscriberem, diligenter mandauit. Tu saluere plurimum a me iubeas Io. Baptistam Saracium, dedum semper optimis disciplinis, maximeque cupidum ornandae uirtutis, itemq. * quem uidi numquam, amo tamen sic, ut mihi te riualem esse uix patiar. Vale. Venetiis.

FRANCISCO . ROBORTELLIO

Bononiam.

27

MAGNAM habeo gratia Hieronymo Seripando, optimo Cardinali, omniumq. uirtutum gloria praestantissimo, quod ab aliqua nos ob imitationem uirtutis exorta similitate ad summam beneuolentiam, coniunctionemque traduxerit. te quidem cum eximia doctrinae opinione, quam apud omnes merito consecutus es, humanitatis laudem uelle coniungere, tum mea causa laetor, qui tua consuetudine nimium diu molestissime carui, meaeq. in te perpetuae uoluntatis ipse mihi egregie sum conscius tum uero, quod inter te, & Sigonium meum, uiros tales, & plane duo nostrae Italiae lumina, non optime conuenire, ferendum uix erat. itaq. cum de nostra auctore Seripando reconciliata gratia ex ipsius Sigonii litteris cognouissem; feci statim, quae meae partes erant, ut animo te complecterer, meq. tibi, leuiter antea, nec sane medio cri cum dolore immutatum, libentissime totum restituerem. A te peto, non ut me mutuo diligas, quod te iam facere, perpetuoq. facturum certo scio: sed ut officiis etiam ita mecum certare uelis, quibus & cupide uincam, & uincar

vincar tamen non iniurius, ut nihil omnino neq. de mea
 in te uetere obseruantia, neq. de tua in me beneuolentia
 detractum esse uideatur. quamquam hoc, tua fretus boni-
 tate, & sapientia, cum sperauerim antea, nunc ut plane
 confidam, litterae tuae fecerunt, ad hominem bene doctum
 & utriusq. nostrum amantissimum, Raphaelem Cylle-
 nium proxime conscriptae: quibus in litteris partim de
 me, quo sum mirifice laetatus, amantissime loqueris, par-
 tim etiam typos Graecos fratris mei, nescio qua culpa
 amissos, benignissime mihi polliceris, ac defers. Ego, mi
 Robertelle, istam uehementer amo uoluntatem, quam ti-
 bi certe emetior: liberalitate uero tua etsi delector maxi-
 me, tamen, cur ular, non est; cum officinam satis ampla
 & pereleganti huius generis copia magnis iam sumptibus
 instruxerim. tibi tamen, quia de commodo meo tua sponte
 cogitaueris, quod sine summo erga me amore fieri profe-
 cto non potuit, aequae debeo, ac si rem omnium maximam
 meo perneccessario tempore detulisses. quod si a me paria,
 ac multo etiam praestantiora in omnibus rebus, quas ad
 tuae laudis, tuiq. commodi partem aliquam pertinere in-
 telligam, studia, & officia exspectabis; numquam te fal-
 lam. atq. huius quidem testem promissi, & quasi loco foe-
 deris, quod a me uiolari numquam patiar, hanc esse apud
 te epistolam uolo. Camillum Palacottum, cuius excellen-
 tem humanitatem, coniunctam pari uirtute, non dubito
 quin praeclare cognitam habeas, & communem ami-
 cum, dignum Romulo parente filium, Pompilium
 Amasaeum, rogo te, salutes meis uerbis diligenter.
 Vale. Venetiis.

ALE.

ALEXANDRO. CRISPO 28

HABET hoc virtus, ut amicitias nullo interces-
fore conciliet. itaque, cum de studiis tuis, & incredi-
bi li quadam ad liberales artes voluntatis propensione, ex
Sebastiani Leonis, familiaris mei, litteris cognouissem
dilexi te statim, idq. ut intelligeres, vehementer optavi
nunc, quando opinionem meam de ingenio tuo susceptā
epistola tua confirmat: ego quoq. aliquanto magis ad te
amandum impellor. quod vero etiam in amore mihi re-
spondeas, tuamq. operam, curam, & auctoritatem nullo
umquam loco defuturam promittas: utrumq. facio plu-
rimi, & esse perpetuum cupio. quod ut confidam, tua
probitas facit multorum sermonibus, praecipue vero
Leonis nostri testimonio comprobata. Hic ego hortarer,
pro mea in te summa beneuolentia, ut acrius te ad om-
nem laudis cupiditatem incitares. sed neque industria
tua cuiusquam indiget praeceptis: nec te res ulla magis
ad gloriam accendat, quam nobilitas tua, quam, non du-
bito, quin saepe mente & cogitatione contempleris. tan-
tum igitur te rogabo, ut istum teneas, quem coepisti, cur-
sum, nec te umquam aut voluptas, quae adolescenti-
bus maxime suis blanditiis, & ficta boni specie perni-
ciosas insidias tendit, aut fucatus rerum humanarum
splendor a studio virtutis, idest a vera, solidaq. gloria de-
ducat. Vale, & Leoni nostro, doctissimo atque optimo
viro, dic salutem meo nomine plurimam. Venetiis.

S CRI.

SCRIPSIT . HANC . ROGATVS

A . NOBILISSIMO .

Viro

29

CVM in summis molestiis, quibus me fortasse immerentem fortuna vexat, quae quidem tibi satis notae sunt, unicum mihi solatium fuerit benevolentia tua, quam opinabar me singulari quadam ac perpetua erga te obseruantia, & studio quodam incredibili consecutum: eo me solatio magna ex parte priuatum esse, ex eo sermone, quem habuit mecum proxime Drusus tuus, vehementer doleo. quod quidem eo patior acerbius, quia, si posset augeri amor in me tuus, augeri potius debere pro mea in te egregia voluntate, maximisq. studiis, existimabam. quid enim, a quo primum tempore aditus mihi patuit ad amicitiam tuam, de te senserim, ipse mihi optime sum conscius: quid vero praedicauerim, testes habeo, non leuissimos homines, sed praestantes viros, eosque minime paucos, quorum auctoritas, & probata vita vel sine iureiurando facile fidem facere possit. quae cum recordor, magnam ex officio meo voluptatem capio: propterea quod nihil umquam mihi grati animi memoria iucundius aut est, aut umquam erit. & quamquam animum tuum non nihil immutatum Drusi verba significabant; cum ego perpetuitatem amoris tui expectauerim; eamque tanti fecerim, ut ex omnibus rebus humanis nihil paene pluris aestimauerim: tamen, non ut animatus

V nunc

nunc in me sis, sed ut antea fueris, in omni mea vita incundissime cogitabo; quaeque in amicitia colenda a doctissimis viris constatae tributa laus est, eam ut omnino consequar, enitar quantum in me erit; non quod tua virtus cuiusquam hominis laudationem, vel tua fortuna cuiusquam opes, aut merita desideret; sed profecto apud sapientissimos homines, quem ego te in numerum refero, si gnificatio bonae voluntatis, etiam si merita non habet, pro meritis tamen est. Te vero, Principem egregium, omniumque virtutum apud omnes homines, maximeque apud omnes Principes laude florentem, praeterea ista ornatum dignitate, quae ad omnem laudem tacita quadam cohortatione videtur impellere, figmentis commoueri hominum improbissimorum, & alienis fortasse bonis invidentium, prorsus aequum non est. Quid enim? an ego tam prauus esse possim, ut optimo viro coner vim quam in sermone detrabere? an tam stultus, ut, qui mihi multis rebus prodesse, multis etiam obesse possit, eum in dignissimis laceffam iniuriis? an tam ingratus, ut, cuius erga me summam humanitatem, ac benignitatem senserim, de eo quidquam cogitem, aut etiam loquar iniquius? Quid honor meus? an apud me nullius est ponderis? ille vero mihi vel ipsa vita carior adhuc fuit, eritque in posterum. ita sum a puero educatus, ita natus: ita etiam didici ab exemplis maiorum meorum. an igitur honor meus tantam ferre posset inconstantiam? ille certe cum omnes maculas, tum hanc, quae turpissima est, leuitatis, & intemperantiae, respuit, ac reformidat. Quare, si peccarem in te, magne Princeps, simul in me ipsum peccarem. quorum alterum ab officio meo, alterum a voluntate mi-

mis

mis abhorreret. Quod igitur neque committere debeo,
 neque possum, id mirarer equidem a te credi; si plane
 quae ad me delata sunt, vera omnia putarem. sed pri-
 mum haud libenter id credo, quod iniucunditatem, ac
 sollicitudinem affert animo meo: deinde, quod indignum
 videtur bonitate tua, quam ego, ut maxime omnium,
 habeo cognitam, ita maxime omnium efferre laudibus
 ubique soleo: postremo, quod cum ipsa veritate pugnat.
 Quod autem, quiddam etiam de liberalitate mea glorio-
 se a me iactatum, iidem comminiscuntur: impudens
 mendacium est, ac, ne aliis utar argumentis, te ipso te-
 ste falsum. nam, fuisse me tui perstudiosum, omnia tibi,
 tuisque, quae potuerim, obsequia, atque officia praesti-
 tisse, vere dixeris, & multi sciunt: quo tamen ipse no-
 mine gloriari non soleo: contentus ipsa re sum; verum,
 fuisse me, cui multa desunt, in te, qui cunctis rebus abun-
 das, liberalem, & de meis riuulis paene aridis affluxis-
 se aliquid ad tuos uberrimos fontes, certe nemo dixerit;
 nec, si quis diceret, ego agnoscerem. Hoc igitur uno quod
 inaniissimum esse constat, reliqua, mihi obiecta, refel-
 luntur. patent insidiae maleuolorum; infirmatur, ut sae-
 pe: solet, a se ipsa, & suo quasi gladio ingulatur impro-
 bitas. itaque recreor paullulum in acerbissima molestia:
 ut etiam hoc sperem, si qua voluntatis tuae facta mu-
 tatio sit, quod quia meritis minime sum, ideo minime
 possum credere, me tamen ab humanitate tua facile
 impetraturum, ut te mihi totum restituas. nec enim
 decet, apud talem virum, tantumque Principem, natu-
 ra bonum iudicio, & consuetudine optimum, consiliis

Et artibus locum esse hominum perditorum. quam mihi spem, ut confirmet litterae tuae, peto a te pro mea pervertere non solum erga te, verum etiam erga tuos omnes obseruantia: idque a te summa tua, tuaeque familiae dignitas postulat. Vale.

EPISTO.

309
EPISTOLARVM
PAVLLI. MANVTII
LIBER. SEXTVS

FRANCISCO. RICHARDOTO
EPISCOPO. ATREBATEN.



VM antea tibi, ex hominis mihi amicissi-
mi, tuiq. studiosissimi, singularis viri, Octa-
uii Pantagathi, sermone tribuebam pluri-
mum, ac te, nondum mihi de facie notum,
colere tamen, & diligere non vulgariter coeperam: tum
uero, ut legi orationem tuam, nuper habitam in Synbo-
do Cameracensi, qua nescio an quidquam adhuc viderim
praestantius; dici vix potest, quantum ad meum de te iu-
diciū, quantum etiam ad amorem acceſſerit. vidi enim
ut in tabella pictam, atq. expressam, ingenii, doctrinae-
que tuae imaginem excellentem: quam intuens, amore
tui sum incensus incredibili, sic, ut ardentius esse nihil
possit. &, quamquam assiduus distinebar curis; feci ta-
men; studio scilicet impulsus; ut his tibi litteris aliquam
voluntatis in te meae significationem darem. nam, etsi
tu is es, cuius virtutes, quasi pleno theatro spectatae,
iam ita notae sint, ut nec augeri cuiusquam praeconio,
nec minui vituperatione possint; me tamen ita anima-
tum esse velim existimes, ut, cum multi certatim te
ornent laudibus, ego tamen in eo vel principatum appe-
tam, vel superiorem certe feram neminem. Nam,

P 3 quod

quod te de studiis meis non pessime sentire, & Ioannes Richardotus, praeclara indole iuuenis, natus ad omnem laudem, planeque te auunculo dignus, affirmat, & litterae tuae, ad illum scriptae, significant: valde triumpho, atque istam opinionem, mihi crede, beatorum hominum copiis, atque opibus non comparo solum verum etiam antepono. quid enim optabilius, quam iis placere, quorum virtus, & vita tum principibus viris tum etiam populo placet vniuerso? quid autem accidere cuiquam possit illustrius, quam a te laudari, qui ita viuis, ut nihil agas, nihil expetentum putes, nisi cum eximia laude coniunctum? notum enim genus est institutorum tuorum, nota industria, notae curae pro salute animarum vel tuenda, vel recuperanda. Scimus, quos ex ingenio tuo fructus Atrabates tui partim iam colligant, partim etiam expectent: dicerem, nobis inuidentibus, si aut in Christianum inuidia caderet, aut ex eo genere virtus esset, quae non longe distribui, non communicari passim facile posset. quod cum ita sit; non committam tamen, ut te horter, ut ad nos quoque tua scripta peruenire velis. quod enim publice profuturum videtur, in eo neque cuiusquam hortationi bonitas tua, neque consilio prudentia locum relinquit. laetabor potius quod ea sis & voluntate, & virtute praeditus, ut optime de Christiana rep. mereri, eamque miseris temporibus labefactatam confirmare maxime possis. quo facto, inibis maximam gratiam ab omnibus bonis, tibi que perennem gloriam, & ea, quae summis meritis proposita sunt, praemia consequeris. A me velim, si quid tua tuorum ve causa praestare possim, quamquam, & quā tu fir.

11
tu firmus ab omni re sis, & quam ego imbecillus, intelli-
go; verumtamen, si acciderit, ut vel amplitudini, glo-
riaeque tuae, vel eorum, qui tibi cari sunt, commodis
seruire possim: expectabis eadem a me, quae soles ab iis
quorum valde cognitam habes fidem beneuolentiam, ob-
seruantiam. dabo operam, & assequar, ut spero, ut opinio
ni tuae officia mea respondeant. studium quidem, si res po-
scet, exstabit eiusmodi, ut nec obscurum esse, nec me-
diocre videri possit. Vale. Romae, pri. Idibus
Sept. M D L X V.

NICOLAO GOTIO

Epidaurum.

2

MULTA virtus praemia, sed nullum habet seipsa
praestantius. itaq. nisi te ipsum prorsus ignores, valde te
laetari necesse est, mi Nicolae, tum doctrina, tum etiam
eloquentia tua: quarum alteram ex hominis mihi amicis-
simi, cuius testimonio plurimum tribuo, Pauli Bosii li-
teris iampridem habeo cognitam, altera sese ostendit in
epistola tua, sic, ut speciem egregiam veteris Romanae
linguae propemodum in te vno mihi videar agnoscere.
Quo circa patriae tuae gratulor, quam praeclaris institu-
tis, opibusq. florentem praecipua quadam scientiae tuae
gloria nobilitas. Gratulor etiam mihi de amicitia tua:
cum qua, mihi crede, neq. Regum opes, neq. vlla omni-
no fortunae bona confero. Nec vero Imperatores illos ve-
teres, quorum bellica facta historiae celebrant, tantam e
suis triumphis, atque ex insigni illa laurea cepisse volu-

U 4 ptatem

ptatem existimo, quantam haurire me sensi, cum eam partem legerem litterarum tuarum, in qua, rationem studiorum meorum probari tibi vehementer, significas. quod si tu aliter sensisses; mutassem institutum; meque ad consilium tuum, tuaque praecepta totum contulissem. Et, quoniam, quid praestare possis, video, cupio, te aliquid mandare litteris, quod ad posteros perueniat. Plura vellem, sed auocant negotia. vnum illud addam te mihi esse in oculis, idque tuo merito. ferus enim, ac ferreus nimis est, qui te amore singulari non amat, tot praeditum suauitatibus ingenii. Ego tibi a me singularem beneuolentiam, & perpetuam tui nominis obseruantiam polliceor. Vale. IV. f.d. Sext. M D LXI.

IOANNI. SARIO. ZAMOSCIO

Patauium.

3

SAEPE mihi antea litterae Caroli Sigonii, cui quantum tribuam non ignoras, praeclarum & humanitatis, & ingenii, doctrinaeque tuae testimonium dederant; itaque te eram complexus amore non mediocri, sic ut fauerem tuae laudi mirabiliter, idque ut ipse illustri aliquo signo intelligeres, vehementer cuperem. ut optabam, ita contigit. nam, cum tu animum induxisses valere me gratia apud Petrum Miscouium, florentem virum honoribus, opibus, omnique virtute, facile impetrauit a me Sigonius, cum tuo nomine rogaret, ut ei te commendarem litteris quam possem diligentissime. verum, ut est Miscouius in liberales doctrinas egregie animatus, & ingeniorum existimator intelligens: non dubito,

dubito, quin tibi plus apud eum virtus tua, quam mea commendatio profutura sit. ut ut erit, ego mihi interim facultatem esse datam testificandae benevolentiae in te meae, etiam atque etiam laetor. quod ita velim interpretaris, ut accepisse me beneficium, non dedisse: existimes: quando hinc vel orta inter nos, vel certe aucta amicitia est, & mutuo iam litterarum quae pignore confirmata. quod si ad hanc animorum consensionem, qua tamen coniungi absentes videmur, communicatio sermonis & suauitas consuetudinis posset accedere; id quod forsitan optamus pariter, sperare mihi per meas rationes, tibi per studia tua non licet: praestantes, opinor, fructus caperemus eorum studiorum communione, quae qui vere sapiunt, sola esse instar vitae putant. quamquam hanc mihi aliquanto iniquius, quam tibi, ferendam esse iacturam intelligo. tu enim istic & abundas otio, cuius mihi fructus, nisi commentarer interdum aliquid antelucanis horis, plane eriperetur omnis: & cum te Sigonio nostro, humanissimo viro non iis modo artibus, quae specie quadam alliciunt, & defessum grauib. curis animum recreant, verum etiam iis, unde ratio sumitur, & moderatio vitae, instructissimo, totum, ut audio dedideris, mihi crede, non est, quod aliunde quidquam petas, aut cuiusquam praeterea viam in hoc genere uocem desideres. Quare isto bono frui, dum licet: in quo tamen admonitionem, & consilium meum prudentia tua non expectat; atque hoc equidem nomine tibi plurimum, ut debeo, gratulor: me uero absentem dilige; itaq. statue de mea voluntate, ut multos credas usu, & familiaritate, quo-

quotidianisq. officiis coniunctiores tecum esse posse, quam
me; amore autem, & studio, prorsus neminem.

Vale. Romae, Kal. Nou. M D LXI.

PETRO. MISCOVIO. 4

A quo die, accitus a summo Pontifice, ad Urbem ueni, otioso numquam esse mihi licuit: & quantum diuino, eadem perpetuo erunt omnia: neque vero salutationibus quotidianis, quarum pleraeque mihi quidem voluntariae sunt, necessarias quasdam aliis ambitio facit, valde me deditum esse velim existimes. valeant haec, & si quid est generis eiusmodi: ego in ea cura, quam suscepi, ut emendati edantur sacri libri, mihi esse haerendum intelligo, & eo magis, quod ad res praeclaras, communemq. animorum utilitatem, ita Pontificis voluntas incumbit, ut excitet studia multorum, eaq. intermitti, aut languescere non sinat. quae si tibi, ut arbitror, iam nota sunt: non dubito, quin me, cessantem in officio litterarum, omni vel negligentiae, vel obliuionis amicitiae inter nos institute culpa liberes. sin ex me primum haec accipis; aequiorem saltem in posterum te mihi praebere debebis, & existimare id, quod res est. me tibi ex iis, quos in longinquis terris viuentes, similitudine mihi studiorum coniunctos, libenter coepi diligere, praecipuam uni praestare memoriam, atque obseruantiam, nec mei tam in hoc officio dissimilem esse posse, quando tu quoque, ut audio, quotidie tui similior es, idest earum virtutum laude praestantior, quarum fama tibi multos non mediocri voluntae,

me

me vero aliquot ab hinc annis plane singulari studio deuinxit. Ac vide, quid verus amor valeat. ego, cum tibi me comparare nulla re audeam, ne utrumque nostrum uidear ignorare, tamen, cuius in te animi sum ipse mihi conscius, in eo te respondere, libenter credo. fert hoc humanitas, postulat consuetudo tua, exigit etiam amicitia nostra, cuius equidem recreor memoria, honestor etiam nomine. hac spe fretus, a te peto, ut Ioannem Sarium Zamoscium, qui hanc epistolam cum suis litteris ad te mittet, ita complectaris, ut meam comendationem, quod ille sibi persuasit, valuisse plurimum intelligat. est in familiarissimis, atque intimis Caroli Sigonii: & excellit, ipso teste Sigonio, moribus, ingenio, omni denique indole virtutis. iam, quae mihi cum Sigonio intercedat necessitudo, quanta studiorum, animorumque coniunctio, quam consentiamus in litteris, aut quam suauiter interdum dissentiamus, ut ego mihi illum semper anteposuerim, ille mihi semper tribuerit plurimum, utriusque scripta declarant. suscipe igitur, si quid non modo mea, uerum etiam Sigonii causa uis, & orna, quantum potes, excultum doctis inuenem, praestantis animi, natum ad patriae suae decus, tui uero mirifice studiosum, atque peramantem. nos enim simul in illo ornabis testimonio beneuolentiae tuae, quam cognosci a quamplurimis, & nos aliquid apud te esse, quia uehementer hoc ad nostram laudem pertinet, propterea uehementer cupimus. Vale, & Patricio meo, nisi graue est, salutem meis uerbis plurimam.

Romae. x i v. Kal. Oct. M D L X I.

IOAN-

IOANNI. SARIO. Z AMOSCIO

Patauium.

EST, cur gaudeam, capere te fructum aliquem ex
 iis litteris, quas ad ornatissimum virum, Petrum Misco-
 uium, de te scripseram. quamquam hanc ego iam laeti-
 tiam animo praeceperam, quippe qui & Miscouii prae-
 stantem humanitatem cognitam haberem, & in te ipso
 esse multa, quae amorem concilient, non ignorarem. quod
 si te nobis, idest alienioribus, tua virtus ita commendat,
 ut cupiamus tua causa, quidquid possumus: cur eadem
 virtus omnia tibi a tuis, nulla cuiusquam commendatio-
 ne, non impetret? hoc te quoque existimare, cum intueor
 studia tua, facile mihi persuadeo; nec dubito, quin, ex
 quibus artibus manant haec, quae tibi proposita sunt,
 quaeq. adeptus in summo splendore ac dignitate viues,
 eae tibi artes cariores quotidie sint, cum praesertim excel-
 lere te intelligam industria, doctrina, eloquentia, sic, ut
 alios tua laude commoueas, exemploq. doceas, male suis
 rationibus consulere, si quem a sempiternis praemiis pau-
 corum annorum labor auertat. Patricius denuo cupit Ve-
 netiis imprimi sua Fragmenta. in ea re meam operam vi-
 detur exposcere, nec mihi voluntas deest: amo enim homi-
 nem amore non vulgari: sed, absens quid possim, non vi-
 deo: nec libenter suscipio, quod si parum succedat, amici
 animus offendatur, & ego illius angar molestia. scribam
 tamen ad eum, cum vacabo. nam nunc occupationibus
 valde vrgeor. Vale. Romae.

IOAN.

IOANNI. TURRIANO

Sermonetam.

6

ET SI eram valde districtus earum rerum cura,
 quae ad sacrorum librorum editionem pertinent; cui toto
 muneri, me esse a Pio I V. Pont. Max. non contemnen-
 da condicione praepositum, credo te audisse: tamen, acce-
 ptis literis tuis, humanissime scriptis, & elegantissime,
 vicit occupationes meas, nec a me responderi nihil est
 passa recordatio nostrae veteris amicitiae, quam a virtu-
 te ortam eadem postea virtus aluit, atq. conseruauit. Ego
 te, mi Turritiane, quo primum die cognoui, dignissimum
 duxi, quem omnes homines in oculis ferrent: ita sum de
 lectatus ingenio tuo, ita doctrinā, ita mores probaui. Con-
 suetudinem tuam, atque usum inter nos assiduū, cum ve-
 hementer expeterem, per utriusque rationes consequi non
 licuit. nunc, siue casus, siue nostra voluntas ita tulit, ut
 ego Romae, tu Sermonetae viueres; laetor plurimum
 hac locorum propinquitate, & spero futurum, ut maiores
 mutuae beneuolentiae fructus, si minus praesentes, litte-
 ris saltem consequamur. ego tibi omnia, quae potero, dili-
 genter officia praestabo, memoriam quidem, & beneuo-
 lentiam, ut debeo, singularem. De tuo statu audieram
 antea saepe a Laurentio Gambarā, proximis autem die-
 bus a familiari tuo, iuvene suauissimis moribus ornato,
 cognoui ea, quae mihi laetitiam attulerunt incredibilem:
 ualere te gratia, et auctoritate apud Sermonetanum Car-
 dinalem omni laude cumulatum, eiusq. fratrem, Bonifaci-
 um, Principem, maiorum suorum uirtute simillimum: in

Auditoris

Auditoris munere numquam te a iure, et aequitate discere, consequi tamen humanitate, & ingenii praestantia, ut summis, & infimis carus aequae iucundusq. sis: filiolum te habere indole optima, quem patris domestica uirtus ad uerum decus excitabit. Haec de te, ut optabam, quae spero fore perpetua. de me, praeter ea, quae ab aliis accepisti, nihil fere habeo, quod significem. ualeo satis commode: filius discit apud me diligenter: nec paenitet, quantum proficiat. uiuimus, mediocri fortuna contenti. Vale, & clarissimo Principi, cuius ego parentem, cum uiueret, auum autem pater meus omni obseruantia coluit, salutem plurimam, officiose manum osculatus, meis uerbis dicet. Romae, VI. Id. Nou. M D L X I.

ANDREAE. SILVIO

Venetias.

7

Vix credas, mi Silui, quam saepe in magnis occupationibus tangar desiderio tui. non enim tuae suauitatis, non ingenii, non etiam pudoris ingenui, quo delector in primis, exemplum facile reperio. moueor etiam promisso illo tuo interpretationis Horatianae, de qua te absentem interdum admonere possum, praesentem quotidie appellarem, ac paene conuicio exigere. quis enim, qui de poetis modo indicare aliquid possit, uni inter Latinos omnes Horatio, uel acumine ingenii, uel sententiarum grauitate, palmam non tribuit? quis igitur non magnopere tuarum lucubrationum cupiditate capiatur? dixeras, uelle te omnia, quae

quae ille a Graecis plurima transtulit, ut suam poësim, tamquam auro purpuram, illustraret, diligenter colligere, oculisque omnium, ut imitandi ratio pateat, subiicere. totum opus erit egregium: sed hanc maxime partem, in qua non admodum aliorum elaboravit industria, a te homines eruditi vehementer expectant, & augetur expectatio sermonibus meis. Quare velim, si quid ego apud te sum, vel potius, si tibi ipse carus es, ad urbem te conferas ineunte vere. nusquam certiora, aut maiora bonis artibus proposita sunt praemia. aliis in locis, tamquam peregrina, procul adspicitur virtus: hic statim colitur, ut domestica complexu excipitur, fouetur sinu. quis autem ipse sibi tam iniquus esse velit, ut, ubi aliquem possit, atque adeo maximum suorum laborum, & vigiliarum fructum ferre, ibi non & sedem ponere, & perpetuam vitam ducere animum inducat? Exemplum ne quae ras: undiq. enim suppetunt. Haec tantum scripsi raptim, in magnis temporis angustiis, ut intelligeres, me esse memorem amicitiae nostrae, & cum assiduis distinear curis, de tuis tamen commodis, & ornamentis cogitare. Vale. Romae. Idibus Nou. M D L X I.

IO ANNI. BAPTISTAE. TITIO

Florentiam. 8

CUM, quid ageres, ignorarem, nec iam, ut ingenuè fatear, tui desiderium satis ferrem: quippe tua mihi suauitas, tuum ingenium, tuae litterae saepe occurrunt: amore sum impulsus, ut haec in magnis occupationibus

320 PAVLLI. MANVTII
cupationibus ad te scriberem. Et, ut ordiar a rebus
Romanis, id primum cognosce, tranquilla hic esse omnia,
nihil turbulenti, nihil aduersi. ciuitas quotidie magis hoc
Pontifice reuiuiscit. ita non modo ipse excellit iustitia, pie-
tate, beneficentia, verum etiam suos omnes, egregiae il-
los quidem ad virtutem indolis, verumtamen suo etiam
exemplo, quales esse debent, tales praestat. quod in ma-
gna potestate, rerumque copia quam non facile cōingat,
viam veteribus tantum, nō etiam recentibus exemplis
cognitum haberemus. Multis locis aedificatur strenue.
nam Pontifex, ut praestanti animo est, antiquae illius
Romae speciem eximiam, & formam cogitatione, ac mē-
te complexus, excitari praeclara monumenta, vias resti-
tui veteres, nouas muniri, aquas etiam a longinquis fon-
tibus impensa maxima in urbem duci iubet. quae cum
erunt absoluta, nihil adpectu pulchrius, nihil magnificē-
tius, aut etiam commodius esse poterit. Ego, quamquam
tum aliis rebus, tum officio salutandi molestissimo quoti-
die fere distineor, iucunde tamen satis uiuo: si modo ho-
mini, scientiae cupido, sine librorum usu, quo careo perin-
uitus, iucundi quid quam esse potest. Prae la nostra, com-
paratis iam fere omnibus rebus, quae ad imprimendum
pertinent, propediem in officio erunt, & a Cypriani epi-
stolis, quod felix, faustumque sit, initium fiet. De tuo sta-
tu exspectabam omnino aliquid ex literis tuis: idq. postu-
lare videbatur amicitia nostra: sed, cum ea spes me felle-
rit, nolui committere, ut vicissim ipse officium meum desi-
derare posses. Vale, & salue a filio meo, cui raptim haec
mane distaui cum in Vaticanum negotii caussa, propera-
rem. Romae, nonis Dec. M. D. LXI. IOAN-

IOANNI. TVRRITIANO

Sermonetam.

9

IN magna iucunditate, quam tua mihi attulit
 epistola, molestiae nonnihil, ac doloris adpersit illa
 pars, in qua, Bonifacii Caetani nomine, Principis
 egregii, cuius caussa velle me omnia, atque etiam de-
 bere confiteor, accurate petis, ut ad eius filium libe-
 ralibus excolendum disciplinis conferam studium, &
 industriam meam. quod idem antea cum & saepe, &
 vehementer peterent Cardinales aliquot, optime de
 me meriti, inuitus equidem, tamen pernegavi: neque
 vero ob eam causam, quia, priuatim docere, preser-
 tim in urbe Roma, dignitatem non habere, arbitran-
 tur multi: quod mihi quidem videtur secus: quod
 enim scire honestum est, id cur docere turpe sit, non
 intelligo; sed multo magis, quia publici muneris cu-
 ra, libenter a me pro communi utilitate suscepta, va-
 cui sane temporis minimum relinquit: & id ipsum,
 quod relinquitur. iure quodam suo sibi postulant, at-
 que exigunt studia mea. quamquam ab his me saepe
 vel salutandi necessitas, vel amicorum auellit interpel-
 latio. ita traducuntur dies. honeste, inquires. fateor.
 addo etiam, satis iucunde. non enim me ^{μὴ δὲ δεῶν}
 quendam, abhorrentem a consuetudine hominum, &
 humanitatis expertem, natura finxit. verumtamen,
 cum illa, tibi non ignota, studiorum nostrorum suc-
 cuitate voluptatem nullam comparo. quod si nobilissimi

X

ado-

adoleſcentis confirmandum optimis artibus ingenium ſuſciperem ; valde mihi cogitandam eſſet , quid patri eius, & patruo, quid etiam aui memoriae, quem colui ſtudioſiſſime, quid familiae claritati deberem. ſaepe mihi occurreret mea fides, & ſuſcepti ratio muneris, & hominum quoque opinio, cui ſeruiendum eſſe non ignoras. quae proſecto vel ſingula tanti ſunt, vt maximam a me diligentiam flagitare videantur : cum in hac tot rerum occupatione tanta ne mediocrẽ quidem praeflare poſſim. Filius meus, cui te bene ominari gaudeo, mea voce iam, qua quotidie fere aures eius antea perſonabant, in diſcendo non vititur. ſic enim in utraque verſatur lingua, vt ſuo iam ſtudio potius, quam noſtra proficiat induſtria. Quare velim eo te eſſe loco ſingas, quo ego ſum : & ſi nec officii me putas ignarum eſſe; nec obſtare, quo minus officio ſatisfaciam, voluntatem vides ; tribuas hoc amicitiae noſtrae, & aequitati tuae, vt cauſſam meam apud optimum Principem diligenter agas ; eiq. de meo ſenſu & ſtudio ita fidem facias, nihil vt ſibi tam eſſe deditum ſentiat, quam operam omnem meam, atque curam, nec malle me quidquam, quã eius, cum poſſim, obſequi voluntati, & cum non poſſim, vehementer angi. hoc tu cura, & perfice, ſi me graui ſane ſollicitudinis onere leuatum viſ. facile, vt opinor, vel humanitas illius, vel ratio ipſa, quod cupimus, impetrabit. idq. a te, ne uidear humanitati tuae diſſidere, pluribus verbis petere non debeo.

Vale. Romae, xvi. Kal. Ianua. M D L X I.

COLAE.

COLAE. ANTONIO. CARACCIOLO

MARCHIONI. VICI

Neapolim.

IO

AVVM tuum, Marchionem Vici, uirum omni laude cumulatum, uita excessisse, amicorum litterae significant, quo equidem nuncio, primum vehementer sum commotus, cum mihi ueniret in mentem doloris tui, quem ex illius interitu, conspectu erepto carissimi hominis, & fructu amisso maximarum uirtutum, quibus in uita excelluit, iure suscepiſti: deinde, ut me collegi, occurrebant multa, quamobrem animus meus a maerore abductus non mediocri solatio conquiesceret. Quid enim est in hac uita exoptandum? uita ipsa, dixerit aliquis. num quid praeterea? uirtus, & bona existimatio, sine quibus ipsum, uiuere, sapientibus incundum non est; amplae fortunae, quas Peripatetici non neglexerunt; amicitiae, quarum usus in secundis rebus delectationem, in aduersis utilitatem semper, interdum etiam salutem affert. At haec aucto tuo, diuino quodam munere, omnia contigerunt, qui & ad ultimam fere senectutem uitam perduxit, & semper piternam laudem, militari scientia, ac fortitudine partam, posteris reliquit; opibus autem non abundauit solum, uerum etiam optime usus est, amicitias, & clientelas, officiis, & liberalitate quaesitas, coluit diligentissime. Quae cum ita sint; non tibi dolendum est eius interitu, quem sciebas natum esse mortalem; sed laetandum potius, quod ita uixerit, ut minimum ei mors, quae multo-

X 2 rum

rum nomina cum corporibus exstinguit, adimere posse videretur. viuet enim auus tuus, viuet, inquam, in hominum memoria, quamdiu probitati, consilio, virtuti locus erit. atque ille quidem laetari vehementer solebat, cum te nepotem suum, omni decore florentem, heredem sibi futurum cerneret non earum modo rerum, quae fortunae bona dicuntur, sed etiam virtutis, ac sapientiae, quae neque a fortuna dantur, nec eripientur umquam. itaque debes eniti, & curare, quod te iam egregie praestare audio, ut eius in te virtutes agnoscantur; & quam verae gloriae viam iam ingressus es, per eam celeri cursu eodem pergas. sic enim breui ad ea, quibus iam, bonis omnibus mirifice fauentibus, ac laetantibus, appropinquas, immortalitatis praemia peruenies. me quidem perpetuo praeconem laudum tuarum, si quid mea vox valeret fore pollicerer: studio tamen, & conatu, si minus re ipsa licebit, fortasse consequar, ut, quae mea sit erga te obseruantia, quae de tuis virtutibus opinio, quae tua simul in me merita, homines intelligant.

Vale. Romae. pridie Kal. Mar. M D L X I I.

IO. ANTONIO. SERONI

Neapolim.

II

ET SI non dubito, quin tu, pro tua prudentia, quibus assidue distinear curis, & quae negotiorum onera sustineam, praeclare intelligas: tamen peccasse mihi videor: nec a me ipso veniam facile impetro, qui, acceptis literis tuis, humanitate simul, & ingenio conditis, responden

di

di officium ad hauc vsque diem protulerim. hac enim me
 esse mente, velim existimes, vt nihil aut a fortuna conse-
 qui, aut ab industria possim, quod tui similitum amicitias
 anteponendum putem. itaque nullius mihi non modo cul-
 pae, sed nec erroris conscius, magno tamen in dolore ver-
 sor. appellasti me prior suauissimis litteris, ornaſti laudi-
 bus: amoris nulla significatio est, qua vacauerit epistola
 tua. quibus in rebus gratiae referendae facultatem non
 habeo: studio tamen, & memoria benignitatis tuae, par-
 tes meas facile tuebor. quamquam, quod ad laudes atti-
 net, quas in me plena manu congeſſiſti: vix possum con-
 ſtituere, laetitiae ne plus, an molestiae mihi attulerit iu-
 dicium de me tuum. nemo fere amat, nisi de quo bene exi-
 ſtimat: cur igitur, a quo amari vehementer cupio, ei me
 talem videri, qualis nunc quidem certe non sum, atque
 vtinam aliquando eſſe poſſim, non vehementer gaudeam?
 rursus, cum ad me ipſum cogitationem conuerto, meiq.
 vires ingenii cum opinione tua conſero, ſtatim illuſtrat ve-
 ritatem ratio, erroremq. mihi tuum cum pudore meo, at-
 que etiam, vt uere dicam, non mediocri cum dolore pate-
 facit. quamquam, cur ego errare te credam, qui ſtudio, &
 doctrina iam pridem eſſe aſſecutus, vt minime omnium in
 hoc genere falli poſſis? nec ſeruire auribus certe vis, ho-
 mo ingenuis diſciplinis eruditus. quid ergo eſt? Socratem
 videlicet imitaris, & ironia te delectat. nam, quod tua
 bona minuis, noſtra vero, ſi qua ſunt, auges; amo
 equidem in altero modeſtiam tuam, in altero huma-
 nitatem: uerum hoc ſcito, & patere aequo animo,
 me de te ipſo contra te ſentire, perſuaſum iam elegan-
 tia: & ſubtilitate litterarum tuarum: quas qui legerit,

quam longe per eloquentiae uiam processeris, intelliget. De me autem, utinam sententiam tuam scripta mea non refellant: quibus ut ingenium non defuerit, quod tu existimas, ego aliter statuo, diligentia certe, quae subleuare ingenium potuit, in magnis occupationibus, & ualitudinis infirmitate semper defuit. Quare omitte, quae so, ironiam istam, & aequa lance utrumque nostrum perpende. ita fiet, ut, quae in me ornamenta contulisti, maximam eorum partem in te transferas. Ego enim, si quis uoluntatem, uel si etiam industriam in me laudet, facile patiar, cetera non agnoscam. te uero, quamquam antea eruditissimi. & in primis acuti iuuenis, Io. Vincentii Pinelli testimonio magnopere credebam, tamen, ex una tua epistola, tamquam ab ungue leonem, plane totum cognoui. itaque, cum tibi de ista praestantis ingenii facultate, doctrinaeque copia plurimum gratulor: tum uero, ut tua bonorum, id est, ut aliquid litteris mandes, quod omnis posteritas in manibus habeat, pro instituta inter nos amicitia non hortor solum, uerum etiam rogo. Quod reliquum est, licet inter bonos haud ualde necessariam officii promissionem existimem, praesertim in ea necessitudine, quam studiorum similitudo peperit: omnia tamen, quae praestare possum, quae summa esse cuperem, sed ea tamen, quaecumque sunt, in omnibus tuis rebus, minimis, maximis, aequae tibi polliceor, ac si iam pridem amare coepissemus inter nos. hoc enim, & aliis frui priuilegiis decet eas amicitias, quae a studio uirtutis emanant.

Vale. Romae. Kal. Mart. M D L X I I.

NICA-

NICASIO. CASLETANO.

Patauium.

12

PATAVIUM te venisse, quae semper urbs officina quaedam est habita doctrinae, laetor equidem communium studiorum causa plurimum. cerno enim iam animo, ubi tu philosophia cum eloquentia coniunxeris, quantum ornamentum litteris nostris, quantum splendoris accedet: sed mecum actum est incommodius, qui, quo tempore nobis, unius diei tantum intervallo disunctis, praesentes amicitiae nostrae fructus nullo negotio capere licuisset, quo mihi optatius, aut iucundius esse nihil potuit, tunc abesse a te cogar, & omnem suauitatis, delectationisq. nostrae spem in mutuo litterarum officio reponere. crede mihi, hac ego cura vehementer angor: quippe, cuius imaginem humanitatis, ingenii, eloquentiae iam pridem vidi in epistolis tuis, ac saepe sum animo contemplatus, ea si proprius adspicerem, qua laetitia, qua voluptate perfunderer valeant, si qui aut opes, aut honorum insignia, vel illustrium virorum ambitiosas salutationes tanti aestimant, ut haec bonis, iucundis, sapientibus, idest tui quam simillimus amicis anteponant. Accedit ex occupationibus molestia, quibus impediatur, quo minus tecum per litteras quam saepissime colloquor. quod ob eam quoque causam ad te scribo, ne mihi vitio veritas, neue obliuione, aut negligentia mea potius, quam negotiorum multitudine, factum suspiceris, quod paullo serius fortasse, quam expectabas, epistolae tuae responderim. nulla enim re magis,

X 4

quam

328 PAVLLI. MANVTII
quam deserti officii memoria, crucior. nec tamen ab ami-
cis plus, quam commodum eorum, aut etiam voluntas
ferat, umquam postulo. itaque, amicum nostrum cur
excusares de infrequentia litterarum, causae nihil fuit.
quiduis enim potius persuaderi patiar, quam ei me absen-
ti effluxisse ex animo, quem ego praesentem quibus co-
luerim officiis, quaeque ad eius laudem studia contule-
rim, optimus ipse testis est. At scribit perquam raro.
Fortasse aulicae vitae consuetudo ita fert. fortasse etiam
cum velit, per negotia non licet, vel privata, vel pu-
blica: aut si licet, nostram amicitiam, quae satis per se
firma est, non modo litteris, sed nec ullo prorsus officio
putat esse fulciendam. qua ego quoque in sententia sum.
& tamen ita me comparavi iampridem; si quid ab ami-
cis praeter meam expectationem omittitur; id ne acci-
piam durius, & malim omnia mitiorem in partem in-
terpretari, quam committere, ut sanctissima necessitudi-
num iura suspicio, plerumq. falsa violare possit. Atque
haec ipsa, nisi graue est, ad eum perscribas velim: &
hoc addas, me, cum primum Romam veni, de meo sta-
tu litteras ad eum dedisse: quas a communibus amicis
fidei, & certo tabellario commissas, peruisse non ar-
bitror: ab eo tempore noui nihil in meis rebus conti-
gisse, nisi hoc nouum videtur, mihi cum hoc caelo,
cuius multi gravitatem non ferunt, adhuc quidem
optime conuenire. quod ei fore incundissimum, certo
scio. Tibi ad Carolum Sigonium, & Michaelem
Sophianum, praestantes viros, mihiq. & studiis, &
amore coniunctissimos, cur litteris opus esse commen-
daticius existimem? quasi non eorum vterque, ut do-
ctrina,

Etina, si
tibi ad eo
mo exclu
tus tua,
suetudin
fructu
fuis dea
hic, nisi
prorsus
aequatu
quantu
tanti su
lophi
pem, r
qui aieb
lis publi
Etum cap
quod ex
mani ser
tiam mil
Mart.

H C

De
in eos,
quod aut
diligere

Strina, sic etiam humanitate excellat. & profecto iam
 tibi ad eorum amicitiam, qua vir bonus & studiosus ne-
 mo excluditur, aditum aperuit, nullo intercessore, vir-
 tus tua, illique te cognitum diligunt, tuaque in primis con-
 suetudine delectantur. qua ego interdum cogitatione ita
 fruor, ut hac etiam specie falli me sinam, quasi ipse ve-
 stris deambulationibus, & sermonibus intersim. Ego
 hic, nisi me noctes aliquando adiuvissent, caruissem,
 prorsus litterulis nostris, quarum suavitate pascor. nunc
 aequato iam noctibus dierum spatio, vereor, ne non otii
 quantum vellem relinquatur. Tu quam libenter Pa-
 tauii sis, quamque diu te futurum putes, quo utaris in phi-
 losophia doctore, (nam Genuam, omnium facile princi-
 pem, rariore iam dentium ordine, minus explanate lo-
 qui aiebant) hac si ad me scripseris, & simul, de singu-
 lis publice interpretantibus quid sentias; duplicem fru-
 ctum capiam, & quod ea, quae scire aueo, cognoscam, &
 quod ex litteris tuis, in quibus vernaculum illum Ro-
 mani sermonis leporem, & plane Ciceronianam elegan-
 tiam mihi uideor agnoscere. Vale. Romae. IV. Id.
 Mart. M D LXXII.

 HORATIO. CARDANETO

Perusiam.

13

DE uirtute recte sentis. ea coniungit absentes, &
 in eos, quos numquam uidimus, amorem conciliat.
 quod autem, ut me, quasi aliqua uirtute praeditum,
 diligeres, adductum te significas: amplector uolun-
 tatem

tatem tuam: de amoris causa non disputo. sit ita, ut existimas; vel potius, existimes, quod lubet. nam ego me tibi, quin sim, numquam aperiam, ne de amore in me tuo, quem video esse non vulgarem, aliquid atque adeo multum detrabatur. Ego tibi, primum quod honorifice de me sentias, deinde quod id ipsum elegantissima mihi declarandum epistola putaueris, tantum debeo, quantum intelligo persolui a me uix posse. nam, & si nullum a me officium, aut studium, quod ad tuam laudem, aut rem pertineat, desiderari a me patiar: tamen, quod tu me prior tua sponte ad iungendam inter nos amicitiam prouocaueris, par paris referre, uel si omnia tua causa praestem, numquam uidebor. Quid, quod ista humanitas, qua me tibi deuinxisti plurimum, ingenii, eloquentiae, doctrinaeque laude cumulat? quae facile apparent in litteris tuis. itaque dedi statim eas legendas filio meo: ut exemplo tuo commoueretur, & quasi tua per uestigia ad eandem gloria contenderet. Tibi autem uehementer gratulor, quod tam praeclaram Latine scribendi facultatem sis adeptus, proprio tu quidem naturae munere uerum, nisi accessisset Grifoli mei, uiri doctissimi, atque integerrimi, egregia disciplina, & ad disciplinam studium, & industria tua, numquam is fuisses, cui possent inuidere multi, similes esse paucissimi. Roma discessisse Io. Baptistam Titium, probum iuuenem, & in primis eruditum, antea magnopere dolebam, nunc eo minus angor, quod uos una esse, & colloqui de studiis communibus, ex litteris tuis intellexi: ex quo, non dubito, quin fructus ad utrumque ut in litteris uterq. excelsit, maximi perueniant. Salutem ei meo nomine, si modo

do adhuc is
nolim, litt
Quint.

CH

Ho
de facie,
quentiam
la non uul
ius testime
gissim, ni
stitutis, a
mibi non n
esset, ornan
quae te ipsi
mibi crede,
tur, nemo m
cultate, &
maximis ui
non possum
ties, quod m
cis, ut me d
miliarissim
tione summa
Tuis oculis
usus, uel a
tem proclin

do adhuc istic est, dices; sin discessit, quod tua caussa
nolim, litteris adscribes. Vale. Romae. x i. Kal.
Quinct. M D L X I I.

CHRISTOPHORO. SAXO

Perusiam.

I

HORATIVM Cardanetum, licet ignotum mihi
de facie, tamen, ob eius excellentem doctrinam, & elo-
quentiam, uehementer diligo. is mihi disertissima episto-
la non uulgarem uirtutis tuae significationem dedit: cu-
ius testimonio commotus, uel si tua scripta numquam le-
gisssem, nihilque ex aliorum sermone de tuis optimis in-
stitutis, ac studiis cognouisssem, tamen ita statuerem, te
mihi non modo amandum, uerumetiam, quantum in me
esset, ornandum: si modo ornamenta desiderat uirtus tua
quae te ipsum iam pridem, istamq. ciuitatum illustrat. Sed
mihi crede, uberius nemo de te, aut honorificentius loqui-
tur, nemo mihi pluris est, quam Rhetor tuus: cuius fa-
cultate, & copia facile sum adductus, ut comparem te
maximis uiris, tuaq. caussa, quae possum, quaeq. etiam
non possum, cupiam. quod si credideris: iure a te fieri sen-
ties, quod nunc si facis, tua sponte, non meo merito, fa-
cis, ut me diligas: & expectabis a me eadem, quae a fa-
miliarissimis tuis: quorum, pro tua probitate, & erudi-
tione summa, numerum audio esse quam maximum.
Tuis oculis restitui cupio, uel quod assiduus librorum
usus, uel aetas iam ipsa, ad omnem corporis infirmita-
tem proclinior, ademit. tu tamen, quando animo, ac
mente

332 PAVLLI. MANVTII
mente vides ea, quae simul cum oculis amitti non pos-
sunt, fructu cogitationibus tuis, & forti animo feras hoc
quidquid est incommodi. malum enim, aut calamitatem,
quo tu vocabulo vsus es, numquam vocabo id, quod a cul-
pa seiunctum esse crediderim. Vale. Romae.

*

15

CVM tuas litteras legere coepissem, in quibus mi-
hi amantissime, quod ad urbem migraverim, gratulaba-
ris, primum accusavi tabellariorum incuriam, qui eas tā-
sero pertulissent: deinde, cum ad clausulam legendo per-
uenissem, liberaui culpa tabellarios, de te coepi quaere-
re, quod etiam nunc quaero, qui cōsiliū tui fuerit, ut, qui
primis diebus, aut etiam primis mensibus aduentus mei
nullam omnino laetitiae tuae significationem dedisses, idē
post annum denique, & eo amplius, omissum antea consi-
lium gratulandi repetendum putaueris. neque enim hanc
afferre causam potes, quod eo tempore minus commode
se haberent Romanae res, nunc autem in eo statu sint, ut
gratulatione dignae videantur. nam contra, quae iunc
tranquilla satis erant, nunc turbulenta multi putant: ego
tamen, ut opto, sic etiam auguror, & spero; fretus infini-
ta summi Dei clementia, & consiliis optimis Pii I V.
Pontificis, qui, publicae quieti ut consulat, nullam ipse
quietis partem capit, omnesque suas curas intento sem-
per animo tum in Ecclesiae dignitate, tum in communi
salute defigit. At metuebas, ne caeli nobis, praesertim
gravioris, obesset insolentia. Eslo: tamen hunc diffi-
mula-

mulari metum decuit; & ego, amicissimo homine
 gratulante, bonum omen libenter accepissem. Mo-
 res hominum fortasse, & consuetudo aulica, & haec
 prope quotidiana salutandi necessitas occurrebat: me
 contra, otii cupidum, huius ignarum ambitiosae ob-
 servantiae, quam hic veteres incolae humanitatem,
 nos inquilini fucum appellamus, vix putas haec pro-
 bare posse, nedum imitari velle. quod si ita est: paul-
 lisper, mi *, tuam in me benevolentiam possum
 requirere. partes enim videris eas abiecisse, quas
 tibi imposuerat amicitia nostra. tuum erat, idque ego
 sane expectabam, vel praeceptis erudire me, ad hanc
 disciplinam aptis; vel, si tibi quoque hoc artificii ge-
 nus incognitum est, hortari saltem, ut Romana stu-
 dia ne contemnerem, habendamque loci, ac tempo-
 ris, quod etiam sapientes probauerunt, rationem
 putarem. Haec ego, a te omisa, si essem in exi-
 gendis officiis paullo seuerior, & si id pateretur amor
 in te meus, iure forsitam exposcularem. Sed nihil
 est tanti: & cupio mihi persuaderi quid vis potius,
 quam, quo ipse animo erga te sum, eodem te erga me
 non esse. ac vide, quam non inique tecum agam,
 atque adeo quanto aequior in te sim, quam in me
 ipsum. ego, si quid in hac scribendi tarditate pec-
 catum est, saepe id utrique nostrum pariter adscribo,
 interdum etiam auerto a te culpam, & in me totam
 transferro. nam, si tu hoc dixeris, non abiecisse
 te officium scribendi, sed ignoracione rerum mearum
 distulisse, expectantem quotidie, ut aliquid de
 meo statu non ex humanissimi, optimique viri, Pauli

Sacra

Sacraei, sermone, sed ex meis litteris cognosceres: quid quid enim scripsissem, ad id tuas litteras accommodatum fuisse hoc, inquam, si dixeris, in tuto tua caussa est: neque solum excusationem tuam agnoscere cogar, et probare, verumetiam, quod contra asseram ad amouendam a me culpam, fortasse non reperiam. itaque absit omnis querella: & si quid offensum in hoc genere a nobis est, vicissim alter alteri largiamur. verus amor, ac summus, quo tu me, ut opinor, ego certe complexus te sum, numerari inter nos, aut perpendi officia non sinit. quod si fructum requireret amicitia nostra; quis esset uberior conscientia mutuae voluntatis? sed profecto non requirit, ipsaque sibi fructus est, seque ipsam alit, ac sustinet. atque equidem recordatione ipsa amicorum meorum ita pascor, ut in secundis rebus nihil iucundius, in aduersis hoc saepe maximum solatium inuenerim. Honores autem illi, quos tu sperari a me vis, in quo aduersantur multa, modice me capiunt. quid enim habent, quo melior fiam? quod curandum est vnum. aut, si hoc non habent, cur expetendi? cur igitur hac specie falli me patiar, aciemque mentis, homini a Deo datam, ut a malis bona distinguantur, inani splendore praestingui? illud optemus potius, ut honesti pulchritudinem, nulla interiecta rerum humanarum nube, contemplari liceat. quod si assequemur, contemnemus ea, quae ceteri mirantur, & in priuata vita, minimo contenti, regum fortunam adaequabimus. Vale. Romae. VI. Id. Octob. M D L X I I.

MARIO.

MARIO. NIZOLIO

Parmam.

16

D V M aliquid ad te scribere quotidie cogito, & tamen diem e die exspecto, spe vacui temporis, non modo ut commodius, sed etiam ut uberius possem scribere: fecit, ut anteuerteres, humanitas illa tua, quam ego coniunctam pari doctrina, in amore, & in ore semper habui. ac mihi quidem siue ratio ipsa, siue amor in te meus facile persuadet, ut, praereptum abs te officii priorem locum, non solum aequo animo feram, verum etiam gaudeam. quid enim mihi aut est, aut esse debet optabilius, atq. iucundius, quam, a quo maxime omnium diligi cupio, eum dare operam, ut id me esse consecutum intelligam? Quod autem eorum librorum, in quibus & figurarum, & argumentandi, amplificandiq. varia genera complecteris, quasi specimen quoddam ad me mittendum putasti: siue tu id feceris, ut obsequerere studio meo, cum id me valde cupere intelligeres; siue, ut eliceret iudicium meum, quod me velle tua causa multum, posse aliquid fortasse, hac quidem in re, animum induxisses; utroq. nonne est sane, cur te amem, ac tibi debeam plurimum, nec deesse patiar, quaecumq. est, voluntati tuae iudicium meum. Ego enim, ut vere dicam, istam excellentem ad bene de literis merendum animi tui propensionem ita probo, ut efferram laudibus: agere autem haec te simul omnia, & implicari tot rebus eodem tempore, quas curare singulas, & conficere permagnum est, aequae probare non possum.

Nec

Nec me fugit, argumentandi, amplificandiq. ratio, praesertim a te tradita, quem afferre fructum possit: sed figurarum via, natura obscurior, praeceptis ad hanc diem minus cognita, usu certe parum trita, poscere primo loco videtur lumen aliquod doctrinae tuae, ut ad exoptatam omnibus eloquentiae laudem certum iter aliquando unius industria patefaciat. duo reliqua mox: sunt enim praeclara, planeque studio tuo digna; interim, hoc unum si ages, primum tibi ipsi laborem valde minues, sine ulla tamen imminutione laudis tuae; deinde communis desiderii expectationem, ex mueterata iam tuae virtutis opinione ortam, explebis aliquanto maturius. quam multi enim sint, qui haec Latinae orationis lumina nondum viderint, ac ne esse quidem ulla suspicentur: quam pauci vero, qui, cum ea videant, imitandi tamen viam, & rationem ignorent; scis ipse omnium optime, & iudicasti iam ab illo tempore, cum te hac ipsa de re confecturum esse artem quandam, eamque illustraturum unius Ciceronis exemplis professus es. nimium diu debes, mihi Nizoli, quod olim petentibus a te tribus familiarissimis tuis, tuaeque gloriae cupidissimis, Petro Bunello, Paulo Magnulo, mihi tunc adolescentulo, saepe promissisti. nec tamen urgere te audeo, hominem aetate infirmum, oculis non bene utentem, publico etiam docendi munere districtum: sed meam sententiam de re dicendam putavi: in quo habui rationem in primis valetudinis tuae, veritus, ne, cum multa senex admodum suscepseris, omnia perferre vix possis: de tempore autem, & si iam indicaui non tam, quid ego, quam quid omnes cuperent, tamen ipse moderaberis ex prudentia tua, & eo quidem

quidem an
de tuo com
Equidem
guras or
quor sum
tas, &
possit. qu
im fiat:
studia, &
me ad al
nisse.
plicem, &
nam elo
borum,
deo, cur
quidem,
templor,
certe de
tuerit, ne
to. Dixi
dine, libe
mo. tu qu
coepisti p
bis. Com
Familiare
ri mihi an
tu non in
sed hoc ne
tate, eius
accidat un

quidem animo, ut, in magna expectatione nos quoque de tuo commodo vehementer laborare, tibi persuadeas. Equidem, si me audis, etiam illud suaserim, ne ad figuras oratorum similia aggregares poetarum loca. quorsum enim? cum ab uno Cicerone omnis veritas, & quasi silva tum rerum, tum verborum sumi possit. quod si poetis prodesse vis; hoc quoque separatim fiat: bene locabitur industria: nec ego aspernor ea studia, quae colui adolescens, & quorum ope fateor me ad aliquam oratorii numeri scientiam facile pervenisse. nunc labores velim & hanc unam, & simplicem, omnium, ut ego sentio, maximam, ac difficillimam eloquentiae partem. quo in genere, siue tu verborum, siue sententiarum ornamenta quaeras, non video, cur uno Cicerone contentus esse non possis. mihi quidem, cum immensas eius opes intentis oculis contempler, egere interdum ipsa paene Graecia videtur: certe de nostris, qui ad eandem laudem adspirare potuerit, neque fuisse antea, neque fore quemquam puto. Dixi, quid sentirem, ingenue pro mea consuetudine, libenter pro amore in te veterrimo, atque verissimo. tu quid statuas, utrum instituta commutes, an ut coepisti pergas, pro tua singulari sapientia iudicabis. Commentarios meos in epistolas Ciceronis, quae Familiares vocantur, cum a te expectari video, augeri mihi animos ad scribendum sentio: & quamquam tu non instes; admoneri tamen videor, ut absolvam. sed hoc nec sine otio fieri potest, & Romae otium optare, eius est, qui Romam ipsam ignoret, aut, qui, quod accadat universis, in eo sibi praecipuam condicionem

r sperare

sperare solus audeat. Sed, quia cessamus inuiti; & quia, quod fuit in opere difficilius, id transactum iam est: entemur, ut reliqua diu non desiderentur. angustiae temporis obstabunt: at detrabere aliquid somno, & conferre ad elucubrandum licebit. turpe enim nobis est, qui versamur in arrium nobilissimarum studiis, antelucana vincileuorum opificum industria; praesertim cum illi nihil, praeter ea, quae corpori seruiunt, & vetustate corrumpuntur, nos animi fructum cum nominis immortalitate quaeramus.

Vale. Romae. i v. Kal. Dec. M D L X I I.

ANDREAE . GOSTINIO

Cracouiam . 17

RECTE coniecisti, obrui me plane negotiorum fluctibus. nam, qui antea, cum essem Venetiis, vel infimi ordinis hominibus respondere ad me scribentibus consuefsem; scilicet Andrae Gostinio, doctissimo, & eloquentissimo viro, summa apud principes auctoritate, & gratia, & humanissime scribenti, nihil rescriberem. tum vero me hominem non esse, minimeq. dignum iis litteris putarem, quibus ab ineunte aetate ita meum studium dedi, nihil ut antiquius habuerim, nihil omino duxerim praestantius. Feci tamen in summis occupationibus, ut orationem tuam legerem: de qua sic statuo, scriptam esse graui ter, & ornate, sic, ut ex ista prouincia, quae nunc egregiis floret ingeniis, tibi cōparem paucos anteponam. neminē quo sane nomine vehementer tibi gratulor, et liberalibus disciplinis,

disciplinis, quibus ab ista eloquentia quantum ornamenti possit accedere, mente iam prospicio. Perge, mi Gostini, per eam viam, quae te ad immortalem gloriam ducit. nihil optabilius sapienti, quam ea quaerere, quae vulgus contemnit, eos vitae terminos, quos natura praescripsit, virtute proferre, quod tu potes; & velle debes, & ut velis, ego te, amicitiae causa, nuper inter nos institutae, non solum moneo, verum etiam rogo. De migratione nostra video te ex aliorum litteris cognovisse. nunc ex meis hoc scito amplius, cum hic honestissimorum hominum & benivolentia, & consuetudine fruam, nec mihi quidquam in mentem venerit optare, ac petere, quod a summo Pontifice Pio I V. non facile sim consecutus, angere me tamen, quod studiis nostris, quorum quae sit suavitas, ipse optime nosti, ita diuellar, ut ex iis, quae pro communi utilitate non pauca eram exorsus, pertexere nihil liceat. quam iacturam, fortasse re minimam, tamen, ut ad iuvandas bonas artes animi mei propensio est, fero molestissime. Quocirca tibi iam, tuique similibus, qui mihi voluntate pares, doctrina, & otio praestant, cogor tradere vigiliam meam: idque facio libentissime, qui publici commodi rationem ipsam per se, non cum mea laude coniunctam, plurimi semper fecerim. Ego tibi, si quid operae navare possum, id totum polliceor, deferro. serviam libentissime, quantum in me erit, voluntati, commodisque tuis. Vale, & Petrum Misconium, Andream Patricium, singulares viros, quibus fortasse excidimus, intermisso litterarum officio, rogo te, meis verbis diligenter saluta. Romae.

FRANCISCO . MORANDO

Veronam.

18

Ex omnibus officiis, quae in me plurima contulisti, quae cogitare saepe soleo, nullum mihi scito pluris esse, quam quod operam dederis, ut Iulii Iusti, Comitibus omni laude cumulati, amicitiam consequeretur. nam etsi antea, testimonio adductus tuo, praestare eum litteris, ingenio, humanitate existimabam: tamen vicit opinio nem meam illius epistola, sane ita luculenter scripta, ut ad antiquorum eloquentiam proxime accedat. non loquor ad gratiam neque id amicitia nostra, nec natura mea patitur. huic viro, si cum generis nobilitate spectatur virtus, quamquam nihil est ipsa virtute nobilius, qui praeferrari possit, neminem video. itaque illum in oculis fero, ornare etiam laudibus cogito, & meam obseruantiam, si fieri poterit, apud posteros testatam relinquere. tu, si sponderis ei de me, quaecumque ab homine coniunctissimo expectari solent, gratissimum feceris. Naugerius, controuersia quadam impeditus, tibi, ut arbitror, non ignota, suam professionem distulit inuitus. nunc nihil obstat, praeter anni tempus, quo minus in viam se det. quantum diuino, si Pontifex Bononiam se conferet, de quo rumor paene rancus factus est, itineris comitem se praebabit: sin minus, circiter Kalendas Martias, remissione frigoris, discedet. Orationem tuam licere tibi diutius, quam volueras, limare, ac perpolire, non moleste fero. at obtrectatio laudem minuet: quasi praestare idem, si temporis ad scribendum

tan-

tantumdem daretur, quiuis posset. tu hoc suspicaris: ego se-
cus. nam boni, & recte intelligentes, ipsam rem aequissi-
mis animis aestimabunt: improbi, & imperiti quid sentiāt
laborandum non est. alioqui negotium nobis numquam
deerit. De rebus meis, hoc vnum, quo laetari possis, acci-
pe; frui me multorum benevolentia: cetera satis frigent.
causam conferamus in tempora: nam ab hominibus libe-
ter culpam auerto. Pontificis quidem praestantem ani-
mum ita variae, itaq. graues distrabunt curae, ut ignora-
re multa cogatur, multa etiam delegare aliis, qui prae-
ter suum negotium nihil curant. Valet filius, & res Ro-
manas cupide tractat, quibus libellum suum de Ortho-
graphia non mediocriter locupletauit. Vale.

Romae XII. Kal. Febr. M D L X I I I.

I V L I O . I V S T O

Veronam.

19

FRANCISCVS Morandus, vir sane ita pro-
bus, verique cultor, ut neminem umquam fallat; ita
ingenio, doctrina, prudentiaque excellens, ut falli ip-
se non possit, multa mihi Venetiis, cum una iucundis-
sime viueremus, de tua singulari scientia, integritate,
suauitate morum, & eximia quadam ad omnes artes,
nobili viro dignas, propensiones saepe praedicare solitus
est. credebam facile tali viro affirmanti, teque amabam
vehementer, eius testimonio permotus: sed quanto ea-
dem vidi illustrius, atque apertius in litteris tuis,
quas ad me quo longiores, eo gratiores proxime misisti.
itaque ad priorem illam voluntatem, quam in te antea

T 3 tantam

tantam contuleram, ut ad eam accedere nihil posse videretur, accessio tamen eiusmodi facta est, ut eorum studiis, qui te & summa, & pervertere necessitudine attingunt, facile se aequauerit amor meus. nec vero me afficiunt illa, quae multis prima sunt, familiae dignitas, amplae clientelae, & earum rerum, quas fortuna suppeditat, copia. neque omnino hoc de genere nunc disputo. optent, si qui haec non habent; &, qui habent, honeste fruantur. sed, esse quaedam haud paullo praestantiora, quae neque extrinsecus affluant, & semel adscita nunquam remoueantur, quis, nisi sanae mentis expers, dubitauit umquam? quae tu, cum illa quoque possideres, a maioribus parata, a praestante viro parente tuo aueta, ita tibi acquirenda existimasti, quasi haec sola tui iuris, vereque tua propria futura essent, reliqua ad te parum, aut etiam nihil attinerent. maxime ista sapientia, istaque virtute. qui enim, subducta recte viuendi ratione, corpori se minimum, animo debere plurimum sentit: qui ita factus itaque institutus est, ut imperet iis rebus, quibus alii seruiunt: voluptatem nullam amet, ab honesto se iuncta; ipsamque honesti speciem ita contempletur, ut in ea totus haereat: is vitae fructum capit: is honorum vocabula contemnit; quique verus honor sit, & unde manet, quidque vera nobilitas a fucata distet, solus intelligit. Haec te olim videre, ac sentire adolescentem, cum tibi ipse dux esses in rebus egregiis ita strenuus, itaque certus, ut nec aetas illa, quam plurimos in optimo cursu remorari solita, languidiorem faceret, nec aequalium error a proposita gloria deflesteret, iure mirabantur multi: nunc, isto ductum sensu, ista incitatum voluntate, mirabiliter adiuuan-

adiuuant
etiam con
ti, ad vi
dem, qu
cendi po
plo debe
quanes
viderim
des, qu
antea di
exigua
sum no
naeque
illi Ap
benefici
penitus
si? neq
veritate
illud, qu
me, quat
laudibus
responder
guum iam
quid labo
rum meo
tior, null
virtutem
Congressu
nec tamen
nisi, qu

adiuvante natura, fortuna numquam aduersante, cuius etiam commoda, quibus ad nequitiam abutuntur multi, ad virtutis usum conuertisti, peruenisse ad eam laudem, quo adspirare paucissimis licet, cur miremur? incendi potius imitandi cupiditate, & commoueri exemplo debemus. equidem, a qua hora legi epistolam tuam, qua nescio an quidquam grauius, aut elegantius adhuc viderim, tantum abest, an assentatus mihi sim ob eas laudes, quas in me pleno modio contulisti, ut etiam, si quā antea de me ipso opinionem susceperam, quae sane perexigua fuit, plane omnem deposuerim. quod si, se ipsum nosse, tanti semper fuit, ut inter saluberrima, humanaeque vitae necessaria praecepta hoc praecipue veteres illi Apollinis oraculo tribuerent; quantum a te habeo beneficium, quas tibi debeo gratias, quod, ut ipse me penitus inspicerem, ac mihi posthac essem notior, effecisti? neque hoc simplex lucrum est, quod, reuocata ad veritatem ratione, coepi me minus diligere: sed accedit illud, quod acuisi industriam meam, ut conformarem me, quatenus liceret, ad iudicium tuum, & quibus me laudibus ornandum putasti, iis aliqua saltem ex parte respondere possem. quamquam, si tu me, quem ames, dignum iam existimas: cuius praemii spe enigilem, aut quid laborem amplius? uberrimum cepi fructum studio meorum: nulla mihi merces amicitia tua praestantior, nulla carior esse potest: in ea tantum pono, quanti virtutem aestimo, quam certe omnibus rebus antepono. Congressum nostrum ita exopto, ut tibi non concedam: nec tamen sperare audeo futurum, ut una esse possimus: nisi si, qualia saepe multa contingunt, eiusmodi aliquid

344 PAVLLI. MANVTII
praeter spem dies afferat, praeserim publicis rebus ita
fluctuantibus, ut mutari multa possint: utinam iactura
leni: quod equidem spero: verumtamen, si qua res orbem
conuerterit rationum mearum, lenietur incommodum spe
consuetudinis tuae: Morandi quidem nostri, hominis bu
manissimi, atq. doctissimi, conuietu domestico, quotidiana
nisq. sermonibus non dubito quin perfruar. Vale.
Romae, XII. Kal. Febr. M D L X I I I.

MARIO. CORRADO

Brundisium.

20

SI mihi omnia plane hic essent secundissima, quod
utinam aliquando contingat; adhuc quidē aduersi nihil
est, quod ad rem domesticam & meam, meorumq. va
letudinem pertinet: aliquis tamen in summo gaudio dolo
ri locus esset, quod nec ipse ad te, ut interdum Venetiis so
lebam, prae occupatione quidquam possum scribere; &
simul fructu careo litterarum tuarum suauissimo; quo ni
hil ferre molestius possum, captus elegantia sermonis tui
eaq. maximi erga me amoris significatione, quae licet
minime necessaria sit, si quando tamen in litteris elucet,
amanti nihil gratius, nihil iucundius est. quamquam hoc
ipso nomine, quod ad me tam raro scribis, cur ego te,
mi Mari, non amem magis etiam, quam soleo; si modo
id fieri possit? agnosco enim modestiam tuam: agnosco
humanitatem. numquam tu hoc officium, quo absentes
colloquimur, & cogitatione saltem coniungimur: quo
quidem utrique nostrum nihil optabilius existimo; inter
missum

missum esse patereris, nisi veritus esses, ne mihi diligentia tua, curis assiduis distento, rescribendi onus imponeret. quod si ita est: cessare tamen te, qui vacas, prorsus nolim. mihi vero hoc iuris non arrogo, ne numquam rescribam, sed hoc, te permittente, sumo, ut in commodo meo fiat. negligentia me peccare in hoc genere non putato. quod si memoriae meae parum confides, & diu responsum tibi a me deberi non patieris; admonebis, cum videbitur, atque adeo exiges. numquam mihi in appellando, modo, ut soles, Latine appelles, molestus eris: quin etiam gratiam inibis, quod efficies, cum aliquo soluam lucro, crebro regustandis epistolis tuis, quas lego libentissime. Vale.

E I D E M, Brundisium. 21

N O L I, obsecro, secus, quam debes, & quam te dignum est, aut de mea in te voluntate, aut de filii observantia suspicari. unice enim te diligimus, sic plane, ut in eis necessariis, quibus cum quotidie vivimus, quosque in oculis pro summis eorum meritis gestamus, *Marium Corradum*, quem numquam vidimus, numerare soleamus. si dubitas, testes dabo. testes dico? cum unus instar omnium esse possit. nam *Petrus Perpinianus*, de cuius probitate, & doctrina non tu sentis melius, quam ego, ex multis meis sermonibus, quo tu apud me loco sis, quantumque tibi tribuam, optime coniecit. de filio autem quid putas? an teneo eius animo persuaderi

346 PAVLLI. MANVTII
suaderi quidquam posse, quod a meo iudicio, mea-
que consuetudine abhorreat? mihi crede: cum illum,
egregiis imbui studiis exopto, ut imitari cum laude pos-
sit domesticam industriam: tum hoc volo in primis, &
hoc illi praecipio semper, ut amet eos tantum, qui virtu-
te excellent, & quos amari, ac laudari a me senserit.
in quo magnam capio voluptatem, quod eum video prae-
ceptis meis locum non relinquere, & in hanc sententiam
sua sponte ita propendere, quasi propriam in eo sitam es-
se laudem existimet. itaque sumus erga te pariter anima-
ti, nec amicitia tua quidquam carius, aut antiquius ha-
bemus: merito id quidem: quid enim te amabilius? quis
te vincit humanitate, literis, eloquentia? nostri vero, ni-
si me signa fallunt, quae tamen obscura non sunt, quis
cupidior, aut etiam studiosior? At nihil ad te littera-
rum per tot menses. Vis tu nos alieni peccati culpam
sustinere? non arbitror te esse tam iniustum; neque hoc
humanitas, & consuetudo tua fert. accusa eos, quibus id
negotii dederas, ut litteras ad nos tuas perferrent: qua-
rum in desiderio diu fuimus, & mirabamur, cum sis in
scribendo minime impiger, & cum ad Perpinianum
bene longas epistolas mitteres, nos a te, tuos veteres
amicos, ne schedulam quidem, aut litteram accipere
cum praesertim de Inscriptionibus antiquis a filio meo,
qui M. Brutum in eo imitatur, quia, quod vult, val-
de vult, rogatus esses. Quare nostram causam debes
aequam iudicare, & arbitrari id, quod res est, si tuas lit-
teras, aut etiam sine literis inscriptiones accepissemus,
numquam nos commissuros fuisse, ut officium nostrum
desiderare posses. nam Palia tuus Aldi mei sitim suis
pro-

promissis in
cello, frat
Romae,

✱

ET
prudenti
euentus,
eas perse
& ingen
virtute d
labi, hum
mouit am
rem ea, qu
expectam
& quo spe
susceptae
Reginaldi
cōuberni
quid, cum
tanti Gen
dabas? qu
piscuntur,
quidem te
plexum, &
pinquorum
ter non me
etiam pete

promissis incendit, re nondum sedauit. Vale. *Mar-*
cello, fratri tuo, salutem dices meis verbis.

Romae, x v. Kal. Febr. M D L X I V.

*, EPISCOPO. CREATO 22

ET SI, de futuris rebus affirmare, grauitatis, & prudentiae non videtur: coniecturam enim saepe fallit euentus, & obscuritatis plena sunt omnia: si quis tamen eas persequitur diuinandi vias, quae ab excellentibus & ingeniis, & studiis, a cognita industria, a spectata virtute ducuntur; hunc ego opinionis errore numquam labi, hunc optimum esse vatem existimo. quae meratio mouit ante aliquot annos, ut de tua dignitate praedicerem ea, quae partim consecuta iam sunt, partim sic a me exspectantur, quasi longe non absint. quid enim agebant & quo spectabant curae illae tuae, ab ipsa paene pueritia susceptae? quae res, quae spes tibi proposita fuit, cum Reginaldi Poli Cardinalis, innocentia & litteris eximii, cōtubernium, ac domesticam consuetudinum expetebas? quid, cum Lutetiae, post obitum Poli, Vicomercato, Patavii Genuae, praestantibus in philosophia viris, operam dabas? quidquam ne sequebare praeter ea, quae qui adipiscuntur, omni honore digni & habentur, & sunt? nos quidem te, amici tui, Patavii praeclara studia ita complexum, ut diuelli vix posses, cum & creberrimae propinquorum literae in patriam euocarent, & praesens frater non modo hortaretur ad rediū, verum precibus etiam peteret, atque obsecraret, ut promemodum extru-

simus,

finis, inuiti omnino, quibus carendum te esset, cuius con-
 suetudine nihil suauius; sed ita duximus expedire tuae
 laudi; cum intelligeremus, quanto futura esset illustrior
 ingenii tui facultas, ab otio litterarum ad res gerendas
 traducta, praesertim in ista prouincia, in qua tibi maio-
 rum tuorum virtus tritum iter ad gloriam reliquisset;
 isto Imperatore, quo nemo bonas artes excipit libera-
 lius; his etiam temporibus, cum Christiana Resp. dome-
 sticis hostibus uexata, ab iis, qui eam doctrina, probitate
 prudentia iuuare plurimum possunt, idest a tui similibus
 opem poscere videatur. Quo circa primum tibi gratulor
 ob actiones illas Tridentinas, in quibus ostendisti saepe,
 ut audio, pro communi salute lumen animi, ingeniiq.
 tui, numquam inops a consilio in ambigujs rebus, num-
 quam in maximis ac difficillimis a constantia relictus:
 deinde vero, quod tantorum meritorum egregie memor
 optimus & sapientissimus Imperator non solum Quin-
 que ecclesiensi te ornauerit Episcopatu, qui summis vi-
 ris deferri solitus honor est, verum etiam ad arcanas res
 admissum iis interesse consilijs voluerit, unde manat
 cum Christi gloria prouinciarum salus, unde profici-
 scuntur ea, quae multis re, exemplo omnibus expe-
 diunt. omnibus enim utile illud est, quo Principibus
 Christianis recte imperandi ratio, & emendatae disci-
 plinae formula praescribitur. Atque equidem videre
 iam videor, & plane coniectura prospicio, qualis, &
 quantus in isto munere, bonorum omnium, beneq. in-
 telligentium sententia, sis futurus, tum eloquentia qua
 excellis, tum ratione, prudentia, integritate; quae in
 omnibus natura ipsa inchoat, industria perficit in pau-
 cis.

cis. quod
 dem impe
 si meis inf
 gnitos bal
 ri in te m
 etiam age
 meo, si i
 nam gere
 possum
 cio maxi
 ficatione
 esse in re
 qui nisi l
 sione &
 gibus, m
 mum im
 hominum
 vult, cur
 vita peric
 adhuc app
 mutauit
 quid tu no
 genium, s
 eiusmodi
 sequantur
 sic fruer
 quasi omni
 in omni u
 confer. 25
 dem tribu

cis . quod nisi ita fore confiderem ; & nisi tuos ad laudem impetus iam inde ab eo tempore , cum te mihi quasi meis informandum sermonibus tradidisti , probe cognitos haberem : facerem id , quod tu , ut opinor , amori in te meo facile concederes : hortarer te , & precibus etiam agerem , iisdem scilicet , quibus agerem cum filio meo , si isto loco esset ; ut assidue cogitares , quam personam gereres , quam grauem , quam illustrem , a quo impositam Principe : qui cum suum de te iudicium beneficio maximo declarauerit , beneficium tamen ipsum significatione iudicii sui vehementer auxit . quid enim putas esse in rebus humanis optabilius , quam ei non displicere , qui nisi Deo ualde placeret , valdeq. carus esset , incursione & ui barbararum gentium uastarentur omnia legibus , moribus , hominibus , urbibus denique ipsis extremum impenderet exitium ? Multa sunt opinionibus hominum excelsa , atque ampla : quae si quis consequi vult , curas suscipiat , labores perferat , de ipsa interdum vita periclitetur necesse est . haec tibi , mi * , (meum enim adhuc appello , nec , ut spero , ista mihi te dignitas immutauit) haec , inquam , tibi cogitanda non sunt . nam quid tu non habes , cum hoc habes vnum , ut mores , ingenium , studia tua Ferdinandus Imperator probet ? hoc eiusmodi est , ut neq. diu solum esse possit , & si omnia consequantur , omnia tamen vnum vincat . Quare isto bono sic frui , quasi fonte & capite bonorum omnium , & quasi omnium maximo . Tuos vero sensus , tuas actiones in omni uita , non dubito , quin ad immortalis Dei gloriam conferas . sic educatus , sic eruditus es . hanc ego tibi laudem tribuebam adolescenti : nunc , si verear , ut robustior

stior aliter sentias, ac tui te dissimilem praebeas, faciam imprudenter. Retine igitur institutum, & persuade aliis exemplo tuo, verum decus in bene agendi perpetuitate positum esse; nihil opes ad laudem, nihil praefecturas: valere obsolescere prorsus bonorum insignia, nisi splendor virtutis accedat. quod quia te sentire certo scio; propterea tibi ex animo, vereq. gratulor accessione dignitatis tuae; & quaniq. uariis distinebat curis, feci tamen libenter, ut hanc ad te, iudicem laetitiae meae, testemq. voluptatis, epistolam mitterem. cui si responderis, iucundum tibi fuisse officium meum intelligam; sin minus, molestum tamen fuisse numquam putabo; occupationibus hoc tuis, illud amori tribuam.

Vale. Romae, Kal. Ian. M D L X I V.

DECIO . BRANCALEONI

Neapolim.

23

NISI tibi nota esset occupatio mea, vererem in primis, ne accusares officium meum, qui litteris tuis, amantissime scriptis, nihil adhuc responderim. Ego, mi Deci, hoc mihi iuris assumo cum amicis, ut, si quid ad eos magnopere non pertinet, a me vero non satis commodo meo fieri potest, omitam interdum, aut in aliud tempus reiciam. te vero cur in meis necessariis non numerem, uel Cambii mei testimonio, qui tuam in me beneuolentiam praedicare solitus est, vel affirmatione tuarum litterarum ex quibus duplicem voluptatem cepi, et quod amari me abs te cognouerim; & quod eum te esse, quem qui non amet,

amet, hominem non esse contenderim? Nec me putes blandiri nelle. sic equidem loquor, ut sentio. Praeclara virtutis fundamenta iecisti: signa video non obscura, nec dubia tum studii, tum ingenii: nec hortari magis, quam gratulari debeo; cum tu, qua aetate multi ad inanes voluptates defleunt, in ea solidam laudem quaeras, & propemodum ineunta gaudere possis. Nec dubito, quin istam mentem, & quidquid ex ea tibi manat gloriae, vel commodi totum, quantumcumque futurum est, acceptum Deo referre velis. quod si facis; nae tu mihi multo amabilior es; tibiq. ipse optime consulis, cum falsam speciem felicitatis humanae a veri boni possessione distinguis. Vale, & Cambium nostrum, iuvenem eximiae humanitatis, cupidumq. omnium liberalium doctrinarum, saluta meis verbis.

Romae. IIX. Id. Quint. M D LXIV.

EIDEM, Neapolim.

24

MIRAMUR uterque; tu, quod litteris tuis non responderim; ego, quod eo me nomine appelles, atque officium meum requiras. quid? tu solus ignoras, quibus distinear curis? quantis rerum oneribus premar? quam numquam vacem? nec tamen deferere officium soleo. numquam id mea vel consuetudo, vel natura pateretur. At non rescripsi. Excusat me litterarum tuarum argumentum. petebas a me scripta mea. quae corrigere cum vellem, otium numquam nactus, comprimenda potius, quam emittenda, iudicavi: idq. sum arbitratus licere mihi

hi per humanitatem tuam. Hoc ipsum, inquires, scripsisse te vellem. Hoc ipsum te quoque suspicari, decuit: & erat amoris; & ego, id te cogitare, aut ad aliam saltem causam referre silentium meum, libenter mihi persuasi. in quo si tu me putas indulgere mihi plus, quam oporteat: assentiar, cum ea fortasse condicione, ut te quoque plus a me, quam par sit, exigere fatearis. nam in iis, quae tua interesse cognouero, nulla, mihi crede, impedit occupatio, quo minus amicitiae nostrae debitum officium praestem. inanes autem litteras ut mittam, vix impetrarem a me ipso, si otio abundarem: quid, cum egeam uel maxime? Equidem, in te amando partes ut meae desiderentur, numquam committam. idemq. a te peterem, nisi uoluntatis in me tuae testes epistolas tuas, Cambium autem nostrum, quem aequae diligimus, quasi sponsorem haberem. Aduentum tuum, de quo spem rursus inieciisti, auide exspecto.

Vale. Romae. IIII. Non. Feb. M D L X V.

ANTONIO. FVRNARIO

Neapolim

25

ET aequa petis: & nihil est, quod ego tibi, pro tua praestanti uirtute, non libenter tribuam. itaque, licet iis distinerer curis, quibus respirandi locus non esset; potius tamen habui nihil, quam ut adirem ad eos, qui cum Indicem correxerint, eiusdem interpretandi scientiam maxime omnium tenent. ii sunt quattuor uiri, doctrina, & dignitate non uulgari, humanitate etiam tanta, quantam ego summam cognouerim. quorum unus, uetere mihi necessitudine

cessitudine coniunctus, eloquentia princeps, Mucius Ca-
linus, archiepiscopus Iadrensis, cum litteras tuas legis-
set; incendi aliqua tui cognoscendi cupiditate visus est, ex-
tulitq. laudibus ingenium tuum, assentiente me. deinde,
acturum se cum collegis de tua re diligenter, pollicitus, bi-
duo post ita mihi respondit: si qui sint Astrologiae indi-
ciariae libri, qui certo aliquid non affirmant, eos legi tuto
posse: totamq. hanc esse partem in Indice disertis verbis
ita explicatam, ut nihil addendum videatur: Episcopis
providendi ne peccetur, facultatem esse permissam: iis se
nihil praescribere neque velle, neque posse: nec dubitan-
dum, qui ii, pro salute animorum, & religionis nostrae
commodo, atque ornamento, egregie administrant omnia.
Haec de negotio tuo: in quo praestiti, quae sunt in me, di-
ligentiam, & fidem: reliqua, pro tua prudentia, & aequi-
tate, nisi fallor, a me non requiris. Amicitiam tuam, ut
debeo, facio plurimi: idq. ut intelligas elaborabo, &
fortasse perficiam. Vale.

Romae. i i x. Id. Quint. M D L X I V.

E I D E M, Neapolim. 26

OFFICIUM meum, quod ab optimo erga te
animo profectum est, iucundum tibi fuisse, vehementer
gaudeo. equidem vellem, quantum in me voluntatis,
& studii, tantum esset auctoritatis, & gratiae. nae
tu intelligeres, quo apud me loco sis, quantumq. iis,
quae vulgo bona appellantur, antepo-
nam ea, quae ve-
re bona sunt. in quo puto non discrepare iudicium
meum a sententia mea. exulto enim virtute animo.

Z

nihil

nihil inane placet; recta, & honesta, & cum ipsa virtute coniuncta, prima sunt. Quare velim ita plane existimes; patere me totum tui similibus, idest, probis, & eruditis hominibus; nihil mihi pluris esse, quam iis operam nauare, eorumq. commodis inservire: quod ubi contigit, ita laetor, quasi beneficium acceperim, non dederim. Tu autem, quasi magnum aliquid tua causa praestiterim, gratias mihi agis; & suavissimam epistolam condita rosa dulciorem facis: amanter tu quidem, et benigne: sed studiorum similitudine, praesertim artium liberalium, quibus uterque nostrum deditus est, contractus amor munera non desiderat, seipso contentus est: nec mihi quidquam est, aut esse potest te ipso praestantius, & benevolentia tua: quam si conservas, omni me afficis beneficiorum genere: & hoc nomine maiores tibi habeo gratias, quam si mihi Adonidis hortos donares. Ego te, ut debeo, in oculis iam fero, licet numquam viderim.

Vale. Romae. I V. Kal. Sex. M D L X I V.

E I D E M, Neapolim.

27

MAGNI amoris indicium, quod scribere ad me volueris, cum tamen, quod scriberes, nihil esset. argumento scilicet numquam indiget verus amor. vere autem quis amat, nisi qui, speciem virtutis intuens, haeret in ea, unam expetit, cetera floccifacit? hoc idem qui sentiunt, facile coniunguntur animis. licet longissime distent. quod opinor, utrique nostrum contigit nam studiorum similitudo contraxit amicitiam nostram, nec vulgarem, ut video, sed qualem saepe multorum annorum obsequia, officiaq. plurima,

plurima, & familiaris consuetudo non peperit. quod tu si cogitas, ut ego non mediocri cū voluptate sepe facio: contentum esse me, et laetari uehementer uoluntate, ac studio tuo, munera uero prorsus nō esse necessaria existimabis. quamquam amplector equidem officium tuum, & de pastillis aromaticis ago gratias, cum praesertim stomacho languenti uiles admodū experiar. quod uero de muliere dulciari addidisti; amo diligentiam tuam; uel quod eius excellenti opera usus es; cum vulgaris tibi confitura, qui tuus est in me amor, non satisfaceret; uel quod ipsum mihi significandum putaueris. Cymbae tuae secundos uentos exopto: & libenter spero fore, quod uehementer cupio. res tamen ipsa quae sit, quidq; sibi uelit Aquilonaris illa tempestas, plane non assequor. sum enim aliquanto hebetior, quam tu suspicaris. De minutis aurbus, risi & consilium tuum, licet causam ignorem, tamen improbare non audeo. nimirum, cauere, sapientis est: & satis cauet, qui non temere credit. quod Epicharmi, poetae Siculi, celebrato uersiculo monemur.

Vale. Romae. x i i. Kal. Feb. M D L X V.

NATTAE.

28

NOTVM tibi esse arbitror statum rerum mearum: de quo tamen, & de mea uoletudine, ex familiari tuo, qui has luter as perferet, cognosces. Voluntatem in te meam, atque obseruantiam, quae antea fuit, eandem esse, ac semper futuram, tibi persuadeas, utinam te ipsa aliquando experiaris. habet hoc uirtus, ut languescere animos in amore non sinat. te uero quis iam ignorat, cum

Z 2 paucissi-

350 PAVLLI MANVTII
paucissimis in omni genere laudis esse conferendum? Per-
ge in cursu laudabilis industriae tuae: quando nec otium
deest, quod mihi occupationibus eripitur, & praeclara ha-
bes adiumenta doctrinae, atque ingenii, quae tibi gloriam
nobis fructum afferent. Me vero ut ames amore illo
tuo singulari, ita cupio, ut nihil magis. Haec scripsi ra-
ptim, in summa vacui temporis inopia. Vale. III. Id.
Quinct. M D L X I V.

PETRO. MAFFAEIO

Genuam.

29

ET otium tuum significas; quod equidem vehemen-
ter optabam: & Latine scribis: et coralia quoque pollice-
ri, nil profecto tuis litteris iucundius. hoc enim verbo per
uxoris, & filiae valetudinem iam uti licet. unum requi-
ro, quod otii rationem prope nullam reddis. atqui me id a-
te, vel si taceam, expectare tamen, ne dicam exigere, po-
ter as opinari: si modo, te a me diligere, & diligere propter stu-
dia tua, putas. Iurisconsultus ille adhuc litigat, cum
damno lucrum quaerens. quem diligit, ignoro: utitur
quidem par paucis, & amare tenebras videtur. fortasse
illi persuasum est, desiderari se posse ab oculis multorum,
si rarus in publico sit. id populus curat scilicet. Haec de
illo, quod ad me attinet, non libenter, tua vero causa scri-
psi non inuitus, ne prorsus amicum desiderio tabesceres.
Venio ad Antonianum, quasi a ruta ad pulegium: nihil
enim hoc adolescente amabilius, siue mores, siue doctri-
nam spectes. Gratulatus ei sum tuo nomine de oratione,
qua Caesarem in funere laudauit. is tibi vicissim gratula-
tur

de statu rerum tuarum : speratq. fore, ut aliquando te
ad nos referas bene nummatum, & fruaris nobiscum si-
mul tranquillo animo litterulis nostris, certo vestigali,
tua virtute parto. quod hic, ut sunt tempora, pauci conse-
quuntur. nihil autem miserius homini praesertim libera-
liter educato, quam suspensas habere viuendi rationes, et
aliunde pendere, dubia spe, quam saepe fallit euentus.
Tu igitur frui isto otio. & colloca in tuto fortunas
tuas : quod vides facere discipulos tuos. πολλοὶ μαθηταὶ
ἀεὶ πλεονεξοῦσι τῷ ἀσκήσει. Camillum Seuerinum doctum iu-
uenem, & probum, rusticari cum nobili iuvene, optimeq.
erga ingenuas artes animato, Jo. Baptista Nigro, valde
laetor. non enim dubito, quin multas diei horas iucundissi-
me traducant, animū egregiis de virtute sermonibus obie-
ctantes, corpori tribuentes, quantum satis est. utrumq. ci-
pio, quod tuo commodo fiat, meo nomine salutari. Aldus
ae, ut debet, amat, salutemq. tibi multam impertit. Vale.
Romae. Idibus Sept. M D L X I V.

PAVLO. SACRATO

Ferrariam.

30

MALE sentis de utroque nostrum, cum de immu-
tata mea erga te voluntate suspicaris. nam & me leuem,
atque inconstantem, & te fingis dissimilem tui, id est
eum, cuius in amore, cognita iam virtute tua, lan-
guere quisquam possit. tu de te ipso vide quid statuas,
& quo modo feras iniuriam tuam : ego meam nec dis-
simulare, nec ferre leniter possum. nam, cum ab ineunte

Z 3 aetate

aetate ingenium, animumq. meum iis artibus, & studiis excoluerim, unde praeclara omnia nascuntur; scilicet egregium industriae meae fructum ferrem, si, quod in quibusdam soleo reprehendere, quodq. ipse sciens numquam feci, in amicitia peccarem, praesertim tua, quae non, ut multae, casu & fortuito contracta, sed expetita a me semper, & pluris aestimata, quam quae uulgo maxima putantur. Obsecro te, istam ne patere suspicionem in animo tuo residere: cogita, quod res est, te mihi esse in oculis: delectari me uehementer memoria officiorum tuorum, & angere nonnumquam, quod habere magis gratiam, quam referre, possim. In pensione exacta, et pecunia permutata agnoui diligentiam tuam, vel amorem potius, quo tu adductus, mea negotia vel minima ita curas, quasi maxima sint, maioremq. commodi mei, quam dignitatis & personae tuae rationem habes. De locatione vero renouanda, totum ad te refero mihi, quidquid egeris, non modo ratum, sed etiam gratum erit. venditionem quidem temporibus excludi, & priuatorum fortunas nouis vectigalibus exhauriri, non mea magis, quam vestra, causa doleo, quamquam dolorem nostrum leuare debet illa ratio, quod nihil malum sine culpa, item ut cum culpa nihil bonum. Ego me hoc in aduersis didici sustentare solatio. quod ignorari a Christianis, quibus haec sententia praestantissimum in caelo fructum promittit, cum iis etiam philosophis, qui verae felicitatis vix umbram viderunt, notissimum fuerit, turpe simul & exitiosum est. Vale. Filius te salutatur, & in primis obseruat.

Romae, xvi. Kal. Dec. M D L X I V.

EPISTO

359
EPISTOLARVM
PAVLLI. MANVTII
LIBER. SEPTIMVS

CAMILLO. PALAEOTTO

Bononiam.



ECCE, & amabiliter cogitas, cum usu-
ram mihi sermonis tui, tuaeq. suauitatis,
ademptam locorum interuallis, restituend-
am quoquo modo litteris existimas. hoc
sane non modo mea peruetus in te, & perpetua, & iam
ad summum perducta beneuolentia, uerum etiam huma-
nitas illa tua postulat, in qua tibi conferre possum paucissi-
mos, neminem ceste debeo antepondere. Atque hoc loco
recurrat animus ad initia nostrae necessitudinis, repetitq.
secum, & magna cum uoluptate contemplatur officia
tua: quae libenter aliis praedico, tibi non minus libenter
exponerem, ut hoc ipso me gratum, & memorem intelli-
geres, nisi me reuocaret pudor tuus, & putarem consi-
dere te memoriae meae, nec tamen expetere a me quid-
quam praeter uoluntatem. Sed omitto illa uetera, recen-
tem gratiam praeterire non possum, quod homo semper
districtus a publicis rebus, priuatis etiam, quae tua be-
nignitas est, amicorum negotiis tum opera, tum animo
distentus, epistolam tamen ad me miseris, & bene lon-
gam, quod ipsum amoris est, & omni prorsus officia, om-
niq. lepore, et elegantia refertam. Nam, quod me laudas:

Z 4 non

360 PAVLLI. MANVTII
non ita desipio, vt velim tecum de veritate contendere: si
te delectat hic error; frueri quamuis diu, me nec repu-
gnante, nec inuito. sin errare turpe ducis, in eo praefer-
tim genere, in quo te, vel si ego tecum sentire velim, res
tamen ipsa facile refellet: dic me deditum litteris, dic an-
tiquitatis cupidum imitandae: studium tribue: largire in-
dustriam: haec fatebor, & agnoscam: de doctrina vero,
& eloquentia, quam in me vtramque plena manu con-
gessisti, etiam atque etiam vide quid sentias. quam enim
tu laudem bene & emendatae scribendo consequeris, eam-
dem laudem non bene de scriptis alienis iudicando vt
amittas, committere non debes. Habuit istam gloriam
proxima superior aetas: cum florent illi illi viri, de qui-
bus nulla posteritas conticescet, Bembi, Sadoleti, Poli,
& horum vel aemuli, vel imitatores multi. tunc indu-
striam benignitas excitabat: fructus laborem sequebatur:
ad opes, ad honores aditus patebat. nunc obsolescit splen-
dor omnis Romanae linguae, & destituta praemiis mi-
grat ad exterarum nationes eloquentia. Hic tu me vocas
ad scribendum, & quasi iam languentem in cursu quan-
tum potes incitas. Obsecro, quid spectemus? vides
enim tempora: vides hominum ingenia, ad inuidiam pro-
niora, quam ad aequitatem. dignitatem vero illam, &
ea commoda, quae proposita olim erant, nihil est, quod
cogitemus. Quo circa sine me cedere temporibus, & mi-
nuere laborem aetate iam ingrauescente: si non conce-
dis, quod interdum cupimus, vt artem omnino desina-
mus. Ac faceres tu quidem, vt ego sentio, aliquan-
do iustius, si ad communes amicos, Sigonium & Ama-
saem, vtrumque doctrina, & ingenio praestantem,
cohortatio-

cohortationem istam conuerteres. quamquam Sigonium
 cessare non arbitror: scribit enim non minus alacriter,
 quam egregie. Amasaei autem musas, quaeso, cur pate-
 ris silere? certe illum dixeris accurate quaedam pange-
 re in historias Polybii. magnifica res, & gloriosa: cuius
 expectationem ego te auctore iam aliquam apud erudi-
 tos homines commoui. nunc tuae sunt partes, ut illum
 urgeas, efficiasque, ut omnino opus appareat. simul enim
 & studiosorum utilitati, in qua pater eius, dum vixit, exi-
 mia cum laude fixit omnes curas, & gloriae suae vehe-
 menter consulat. Amulius Cardinalis, optimarum artium
 patronus paene singularis, tua sui memoria ita delectatur
 ut, si cetera desint argumenta, vel ex hoc uno constet,
 quo apud illum loco sis. itaq. noli vereri, ne illi ex ani-
 mo effluas. non enim is est, qui vel temere amet, vel te-
 mere amare desinat. noui iudicium in deligendis homini-
 bus: noui constantiam in tuendis. praeterea fratrem tuum,
 Auditorem Rotae celeberrimum, clarum praestantibus
 in Christianam Remp. meritis, in oculis fert: de te vero
 perhonorifice & loquitur, & sentit. Cum Vnello tuis ver-
 bis de noua dignitate sum gratulatus. egit gratias, & lae-
 tari officio tuo, velleque plurimum tua causa visus est.
 Vale, & Sigonio meo, & Amasaeo tuo, vel potius vtri-
 que nostro, salutem a me plurimam.
 Romae. XIII. Kal. Jan. M D L V.

E I D E M, Bononiam.

CARDINALEM habes fratrem tuum. habes
 igitur, cur & vehementer, & perpetuo gaudeas. diui-
 num

num enim bonum honor est, non quilibet, sed is tantum,
 qui uitae innocenter actae, qui summis in Christianam
 Remp. meritis, qui rectis denique studiis, artibusq. tri-
 buntur. quod quia contigit fratri tuo, cuius animum, ab
 omni semper ambitione remotum, non haec uirtutis insi-
 gnia, quae ipsa per se nemo sapiens concupiuit umquam
 sed ipsa uirtus sua forma ad bene agendum illexit: ideo
 laetantur omnes boni, & fructum quisq. capit ex aliena
 dignitate: quasi ad omnes pertineat id, quod, si eosdē sen-
 sus, easdem actiones imitentur, sperare omnibus licet.
 quo tibi nomine haud sane paullo plus, quam uerbis asse-
 qui possum, gratulor: nec uero tibi solum, sed familiae
 tuae uniuersae; cui proponitur egregium colendae uirtu-
 tis exemplum, sic, ut uix iam esse quisquam possit, qui
 non ad uerum decus, atq. ad omnes bene audiendi partes
 excitetur. Ego ipse, qui quidem in tuis esse, & numera-
 ri uolo, nescio quo modo uehementius, quam antea, cupi-
 ditate solidae laudis incendor, atque ita statuo, non satis
 esse, in studiis, & in uita me similem esse mei; laboran-
 dum, atque enitendum, ut ipse me vincam, & qualem
 esse decet eum, quem vos diligitis, & in quem officia
 multa contulistis, talem aliquando me praebeam. Equi-
 dem, si uoluntati par facultas esset, nostram amicitiam,
 quae uobis, ut ego sensi, periucunda, mihi, ut omnes in-
 telligunt, perhonorifica semper fuit, libenter ornarem.
 sed euenit contra, ut ego orner quotidie magis iudicio de
 me uestro; & hac ipsa, qua uix optari maior ulla potest,
 recentis uestrae dignitatis accessione simul accedat ali-
 quid ad existimationem meam. caue enim existimes,
 aut laetari mediocriter amicos meos, aut mihi a paucis
 uilo

illo ipso di-
 pratus est
 mea, &
 quin huius
 ita gerat
 binate fr
 enim vi
 que reb
 quod a
 tam ve
 quatur
 tur in h
 gularis
 cum tal
 opimant
 lium Co
 nihus, e
 Nos au
 vult, ac
 nes debe
 Deo fra
 habet dig
 eam uni
 flagitat
 primicia
 rum aut
 dam, m
 Rom

illo ipso die, quo in amplissimum ordinem frater tuus cooptatus est, gratulationem esse factam. eoque maior & mea, & aliorum laetitia est, quod fore nemo dubitat, quin hunc honorem, qua virtute est adeptus, eadem ita gerat frater tuus, ut ex eius industria, doctrina, probitate fructus Christiana Resp. maximos capiat. sic enim vixit ad hanc diem, & in maximis, gravissimisque rebus ita se exercuit, nihil ut illi iam placere possit, quod a communi bono discrepet, nihil tam difficile, tam ve arduum occurrere, quod vel prudentia non assequatur, vel cura, studio, scientia non perficiat. Vidit igitur in hoc quoque multum, qui cetera omnia pro sua singulari sapientia prospicit egregie, Pius I V. Pont. Max. cum talem virum, non modo non ambientem, sed nec opinantem, non postulautem quidem certe, in Cardinalium Collegium, ipso Collegio comprobante, probis omnibus, & eruditis viris mirifice laetantibus, adsciuit. Nos autem, & quicumque bonis bene cupit, eaque vult, ac sentit de communi re, quae velle & sentire omnes debemus, diuturnam expetamus, & precemur a Deo fratri tuo vitam: ut cum praestantibus viris, quos habet dignitate pares, voluntate, & studio similes, eam universae Ecclesiae, quam tempus & necessitas flagitat, opem afferre possit. quod si acciderit, publica primum causa, deinde etiam nostra laetabimur futurum autem, ego quidem, permotus divinatione quadam, non magis opto, quam spero. Vale.

Romae, Idibus Mart. M D LXV.

IO. FRANCISCO. COMMENDVNO
CARDINALI. CREATO

3

O DIEM praeclarum, qui perpetuae voluptatis
& laetitiae nobis initium attulit, quarto id. Martias il-
lo enim te die Pontifex Max. a cunctis bonis expetitum,
cum excellentibus aliquot viri Cardinalem nominavit.
Queri iam desinamus, virtuti locum non esse. quod antea
multis in ore fuit, nec iniuria. quosdam enim ad summos
honorum gradus nobilitas, nonnullos opes, alios alia, so-
la virtus paucissimos extulit. deleuit hanc maculam, &
veterem illam Pontificum sanctissimorum consuetudinē
retentam a paucis, exoptatam diu, Pii I V. numquam sa-
tis laudata sapientia renouauit. Quo facto, te quidem pro
tua non vulgari prudentia intelligere arbitror, quae tibi
partes imposita sint, quasq. res & praesens a te dignitas
& ante acta tua vita postulet: ego autem hoc tibi videor
affirmare posse, vnum sensum esse, vnāq. vocem cum ti-
bi gratulantis vniuersae bonorum Reip. tum vero maxi-
mas Pontifici gratias agentis, quod temporibus difficilli-
mis labantem Ecclesiam tali praesidio fulserit, vtroq.
tibi istum honorem detulerit non petenti, quem studiose
petentibus nobilissimis viris denegandum iudicauit. Om-
nino, quod tu scis optime omnium, nullam mercedem re-
quirat virtus, nec ad se ornandam assumit aliquid extrin-
secus: verumtamen, si duabus rebus, praemio, & poena,
quod sapientissimi viri litteris mandarunt, salus publica
continetur: vtroq. pariter est laetandum, & ea bonis im-
pertiri,

periri, quae
improbata
nitatem li
quoq. plu
gai facer
simos pro
pericula
tem, ope
vbi te Ca
dio, eaq.
mere mi
prebend
nolentia
obserua
ut facia
Romae,

CHR

PE
ram, plu
lestiae. n
artibus e
quam tu
dignitate
gere inte
& virtut
tempori
quod si o
uel ut e

pertiri, quae inter homines ducuntur amplissima, & ita
 improbitatem notari, ne quis exsultet in culpa, & impu-
 nitatem licentia consequatur. quod cum ita sit: laetari te
 quoq. plurimum decet honore tuo, & fructum illum ma-
 gni facere, quem tamen non appetisti, cum labores grauif-
 simos pro Sedis Apostolicae commodo susciperes, cum
 pericula subires, cum omnes deniq. curas, omnem men-
 tem, operamq. in communi salute collocares. Equidem,
 ubi te Cardinalem esse declaratum cognoui, exultavi gau-
 dio, eaq. persusus voluptate sum, quam his litteris expri-
 mere mihi non licet, tu tamen, ut opinor, cogitatione com-
 prehendes, si, quae mea semper in te fuerit primum bene-
 uolentia, deinde etiam, ubi coepit esse tua virtus illustrior
 obseruantia, cum animo tuo considerare volueris. quod
 ut facias, etiam atque etiam a te peto. Vale.
 Romae, x i i. Kal. Apr. M D L X V.

CHRISTOPHORO. FVRO 4

PENDEBAM animi, nec satis constituere pote-
 ram, plus ne voluptatis ex discesu tuo caperem, an mo-
 lestiae. voluptatem afferebat illa ratio, quod erudire
 artibus egregius adolescentem illustri loco natum,
 quam tu curam suscepisti, primum, ut ego sentio,
 dignitatem habet: deinde, fructum ex eo te posse colli-
 gere intelligebam, non illum quidem tua cum industria
 & uirtute conferendum, attamen eum, qui pro malis
 temporum non omnino contemnendus esse uideatur.
 quod si otium quaeris, uel ut aggrediare ad scribendum,
 uel ut ea, quae iam habes instituta, perpolias: isto
 fortasse

fortasse loco nihil aptius, aut accommodatius ad tua,
 consilia reperiēs. nam in vrbe Roma, etsi nihil obstat,
 quo minus arbitratu suo quisque viuāt, interpellatores
 tamen quandoq. non desunt, honesti illi quidem, rectis-
 que dediti studiis, interpellatores tamen. Haec erant,
 quae mihi de te cogitanti laetitiae non parum asserent.
 Tursus, cur non dolerem, cum hic te multi, ipse mul-
 tos diligas, carere nos tua consuetudine, te nostra?
 tuam vero non vulgarem doctrinam, cui quidem ego
 semper, a quo primum die tua scripta vidi debitum vo-
 ce mea testimonium persolui, in hac luce, & celebra-
 tate versari, ubi cognita decoretur, quis, qui te vere
 atque ex animo amet, non vehementer cupiat? Hanc
 mihi molestiam prope omnem, & ancipitem sane cu-
 ram eripuit epistola tua. quod enim tu studiis tuis otium
 exoptare videbaris, eo te istuc iucundissime perfrui, nec
 urbis desiderio admodum laborare, facile coniecisti itaque
 vide, quam libenter animum meum ad tuam volunta-
 te accommodem. idem si ad me saepe scripseris; quod
 ita expeto, si modo fieri tuo commodo possit: abesse te lae-
 tabor, cum ea tamen spe, ut aliquando nos reuistas, tum
 scilicet, cum rationes tuae patientur. idem sentit, idem
 vult Octavius noster, idem etiam Sirlettus Cardinalis:
 qui viri? ornamenta, & lumina nostrorum temporum
 quibus te esse ac fore semper carissimum, non dubito,
 quin & tibi persuadeas, & id in magna tuae felicitat-
 is pate pōnis. Vale.

Romae, 1 V. Id. Apr. M D L X V.

IO. GENVAE.

CONVENIT inter nos de nota scriptis meis ap-
ponenda, quae moram ferre non possint; notae vero signū
omissimus. hoc igitur erit, †. Tu si mihi in hac descri-
benda epistola celeritate satisfeceris, quā emendate scri-
bendi studio, politaq. & eleganti litterarum forma satis-
facere solitus es: multum addes ad officia in me tua: quae
cum augeantur quotidie, augeri tamen vix potest amor
in te meus: eo iam peruenit non modo litteris, & ingenio,
sed moribus etiam, & probitate tua: quae ego haud paul-
lo pluris, quam omnium rerū scientiam, soleo aestimare.
Vale. Ex aedibus nostris. Nonis Ianuar. MDLXIV.

IOANNI. BAPTISTAE. TITIO

Florentiam.

6

ET SI doleo, negotiis te nimium diu a consuetudi-
ne abduci studiorum tuorum: tamen hanc in dolore uolu-
ptatem capio, quod tu is es, qui adempto librorum usu,
doctissimorum hominum assiduo congressu, & sermone
familiari iacturam hanc ita sarcias, ut minorem fructū
ex otio suo multi capiant, quam tu ex negotio tuo. gratū
lor tamen tibi, quod libris aliquando liberatus, redieris
ad communes Musas: cum quibus quam iucunde uiuas
de me ipso coniecturam facio. pascor enim, mihi crede,
litteris: cetera omnia uel molesta, uel certe parum grata.
Dactus, & Bonanani, si, ut scribis, ita de me sentiunt
uehemen-

uehementer gaudeo. equidem utriq. non tuo solum, uerū
 aliorum quoque testimonio permotus, plurimum tribuo.
 quod utinam officio declarare aliquo possim: in quo facul-
 tas exoptanda, quae nunc quidem abest; animus certe nū-
 quam deerit; sin id minus licebit: tu scilicet, quae tua est
 humanitas, & in me amor, cum de me iis omnia pollice-
 beris, tum eorum mihi beneuolentiam, cuius ipse potissi-
 mum auctor fuisti, conseruabis. debes enim, & uis opi-
 nor, ut optimus artifex, perpolire opus tuum, & ad exi-
 tum perducere. A te, mi Titi, promissa non exigo; ne,
 quod liberalitatis est, id uidear fidei uelle tribuere: cum
 tamen utriq. confidam pariter. hoc tantum dicam: quod
 te facturum scripsisti, id si quamprimum feceris, fore, ut
 non minus de tempore, quam de re tibi gratias agam.
 Cottatus semel & iterum ad me uenit. sane delector
 hominis probitate, moribus, doctrina. amo etiam ut ami-
 cum tuum. &, quamquam premor negotiis: quod tu opti-
 me scis: cum tamen ire ad me uoluerit, numquam eum
 excludet occupatio mea. Filius abest, Venetias profe-
 ctus ante aliquot dies, inde Asulam: quo in opido frater
 meus, ab omni remotus grauiore cura, tranquillo animo
 ita sibi uiuit, ut rem domesticam non contemnat. Vale.
 Romae, v. Kal. Nou. M D L X V.

MARIO. CORRADO

Neapolim.

7

ET SI nec magis, quam soleo, uacabam; & ad quo-
 tidianas occupationes accesserat cura sane grauis, ex in-
 teritu

teritu suscepta domestici hominis, ad mea negotia vehementer apii: feci tamen, amore impulsus, quo te propter ingenii, doctrinaeq. praestantiam mirificosum complexus, ut epistolae tuae responderem: quae mihi voluptatē eo maiorem attulerat, quod te Neapolim venisse, nec statim discessurum, cognoui. saepius enim, & commodius, ultro citroq. cursantibus publicis tabellariis, tu de meo, ego de tuo statu audiam. Videre mihi videor, te totum in litteris esse. cupio non inanem esse coniecturam. ut ut est, hoc equidem spectro delector, & mirabiles industriae tuae fructus exspecto. Ad Latinam vero linguam quod attinet, mihi crede, sine caussa laboramus. an illa tibi, tot veterum illustrata monumentis, tot etiam recentiorum probata testimoniis, vel nostro, vel cuiusquam egere patrocinio videtur? praesidii satis, atque opum in ipsa positum est ad repellendas istorum iniurias: quae tamen in ipsos recidunt. nam ei nemo maledicit, qui se ipsum inscitiae non condemnet. quod si Latinae linguae species, & pulchritudo, quae vulgi oculis non patet; cognosci ab omnibus posset: amores incredibiles, ut ille ait, excitaret sui. me quidem sic affecit, cum tamen integram eius formam nondum nouerim, extrema quaedam lineamenta vix adspexerim, ut reliquas voluptates contemnam, cum hac, & in hac libenter, & iucunde viuam. qui vero aliter sentiunt, & errare nos existimant: sexcentis eos argumentis refellas licet: parum proficies. quod ego cum iam pridem intellexerim: pauca quaedam scripsi, ad indicandam sententiam meam: nervos esse intendendos, ut in arcem huius caussae inuaderem, non putavi. Stomachari, mi Corrade, iam

Ad desina-

desinamus, in aliena culpa: & gratulemur potius ipsi nobis, quod amemus ea, quae praeclara sunt: quae si parantur laboribus maximis; id quod a studio multos deterret; molestum tamen esse non debet, quod gloria compensat immortalis. Fragmenta patris mei quod requiris: apud me nulla sunt; furto ablata, quo ille tempore vita excessit, creditum est. In Sex. Empirico, Palaemone, Aspro, & reliquis, mea tibi diligentia non deerit. odorabor, sicubi latent: nam in tabernis non exstant: inuentos, noli dubitare, quin eruam, quam vellem filius adesset, qui Veuetias profectus est. praestaret aliquid, opinor: haec enim studia tractat nauiter, & grammaticos, de Orthographia cum scriberet, euoluit omnes. Vale. VI. Id. Nou. M D L X V.

E I D E M, Neapolim. 8

SUPERIORE hebdomada pluribus verbis epistolae tuae respondi. heri alteram accepi; in qua petis a me, fecerim ne inscriptionem illam, cuius exemplum ad me misisti. in quo laborem sumpsisti non necessarium; id enim ex amico meo, ad quem illam misi, cognoscere omnes possunt. Quod mihi nescio quos inuidere significas; de inuidia non laboro; si quis maledixerit, fortasse tacitum non feret. Quod autem, ne stultis hominibus gratificer, me mones, in consilio tuo beneuolentiam agnosco: verum tamen, neq. quos tu stultos vocas, neq. quam rem nores, assequi satis possum. nam, si quis grammaticus obretrat, susq. deq. laborantibus enim inscientiae morbo medicinam facere si coner, valde sim stultus; si possim, valde

EPIST. LIB. VII 371
de sapiens. In exemplo inscriptionis ad me missae ver-
bum desideratur, omissum incuria describentis. nam ubi
est, VT DEBITVM. ET. DOMESTICAE.
VIRTVTI ego scripsi, VT. PIETATI. DE-
BITVM. ET DOMESTICAE. VIRTVTI.
Vale. Romae. xv. Kal. Dec. M D LXIV.

PETRO. PERPINIANO
Lugdunum. 9

AMABAM antea non vulgariter amorem in me
tuum, cum praesertim suauitates in te essent ingenii mul-
tae, rara probitas, doctrina prope singularis: nunc, quam
in exhauriendo mandato, quod humanitate tua fretus di-
scendenti tibi dederam, curam, & diligentiam adhibuisti,
ea me sic affecit, ut omni te animi mei sensu complectar,
omnia tibi, quasi iure optimo debita, studia, & officia pol-
licear. quamquam de amico meo duriora significant litte-
rae tuae. quae si vera sunt: amicum iam non appello. ex-
cellat licet ingenio: valeat industria. ex antiquis monu-
mentis praecleara quaeq. delibauerit: haec inania sunt, nisi
cum optima mente, & Christiana pietate iungatur. quod
si se respexerit, si cum Ecclesia Catholica, idest cum Deo
redierit in gratiam: tunc ego me illi restituam: tollam ho-
minem, & ornabo, quantum in me erit: nullum ei deesse
a me officium patiar, quod ad eius dignitatē, existimatio-
nemq. pertineat. Quod scribis, Lugduni meliore i. m. lo-
co religionem esse, & in eo te operam strenue nauare: non
miror, te tui similem esse, praesertim in communi salute:

Aa 2 publicum

372 PAVLLI. MANVTII
publicam vero rem quotidie melius ire, contra quam &
sperabant nefarii homines, & agebant, vehementer gau-
deo. Rex autem adolescens, ac paene puer, cum in Chri-
sti causam tanto animo coeperit incumbere, superare
videtur aetatem virtute, & plane is esse, qui maiorum
suorum laudibus aliquando respondeat. Posseuino meo
cum salutem a me scripseris, hoc addes, memoriam illius
nostrae veteris amicitiae mihi esse periucundam, sed lon-
ge carius, longeque iucundius, quod omnes ingenii sui vi-
res ad profligandos Apostolicae Sedis hostes felicissime
profundat. gratulor sane optimo iuueni de ista facultate:
nec dubito, quin eum semper, quocumque eat, quancumque
rem aggrediatur, ope sua Deus & prosequatur, & iuuet.
Rouillium, praestanti humanitate virum, egregie de reli-
gione sentientem, si meo nomine salutaueris, gratissimum
feceris. Vale. Romae. x i v. Kal. Dec. M D L x v.

Cum epistolam complicarem, venit ad me, ut so-
let, officii gratia communis amicus, diligens observator
doctrinae tuae, Zerbinus Ritiis. is rogauit, ut salutem
tibi suis verbis adscriberem. quod facio libenter; teque ro-
go, si tamen hoc patitur humanitas tua, ut ames iuue-
nem, amore tuo dignum.

HORATIO. CARDANETO
Perusium. 10

QVERERER tecum, si liceret, id est, si patere-
tur amor in te meus, quod fructu me prius & humani-
tatis, & iudicii humanitatis, quasi te amantem non reda-
mem,

mem, quod abest longissime a moribus, & consuetudine
 mea: iudicii, quod benevolentiam meam ita petis, quasi
 ego, qui tu vir, quantusq. sis, quae in te suauitas, quae do-
 ctrina, quae virtus, quod omnes iam norunt, solus igno-
 rem. Vbi igitur illa, quae in me plena manu confers? quā-
 quam id quidem amice magis, quam vere: verumtamen,
 si tu eum me putas esse, quem littere tuae significant; in
 quo, si vis, (vide, quanti te faciam) plus tibi credam,
 quam mihi; cur minuis auctoritatem testimonii tui, &
 paene tuam sententiam in dubium reuocas, cum admo-
 nendum me censes, ut eo erga te animo sim, quo si non
 essem, non modo indoctum, agrestem, inhumatum, sed pla-
 ne me hominem non putarem? Conor, inquis, extorquere,
 ut me ames. Non est, mi Cardanete, cur coneris id, quod
 iam perfecisti: aut extorqueas, quod ego tibi mea spon-
 te, & ita libenter quidem tribuo, ut etiam, quod amare
 videaris amorem meum, ipse mihi gratuler, tibi gratias
 agam. Quod ais, officio te esse impulsam, ut ad me scri-
 beres, & eodem officio admonitum, ut breuiter scriberes
 agnosco modestiam tuam, & probo, cum eo tamen, ut exi-
 stimare te velim, vel si creberrimas ad me, longissimasq.
 miseris epistolas, aequae mihi omnes gratas, & periuncun-
 das fore. cur enim scriptis tuis non delecter, quae cum le-
 go, antiqua non desidero? cum praesertim istam faculta-
 tem hodie multi expetant, pauci consequantur. Commen-
 tarios meos in familiares, ut vocant Ciceronis epistolas
 requiris. si esset otium, propediem absolutos darem. sed
 ita saepe, nescio quo fato, diuellor a libris, ut interdum
 mihi Roma displiceat, & agrestem solitudinem urbanae
 celebritati libenter anteponam. Illa de Imitatione

sinamus iacere . spissum opus est, & longi temporis, nec
 fortasse nostrarum virium: & ut vere dicam, sperare vix
 audeo, quam animo, & mente formam videre videor, eā,
 quaecumq. est, oratione, & stylo satis explicare posse.
 Haec scripsi, in lectulo, cum leuiter aegrotarem . Vale.
 Romae. IV. Non. Ian. M D L X V I.

IOANNI . CASELIO

Florentiam.

II

QVO maior est virorum praestantium, id est tui si-
 milimum, inopia, eo mihi carior est, & esse debet amici-
 tia tua: quam quidem omnibus officiis, & studiis, quae a
 summa proficisci beneuolentia possunt, perpetuo colam.
 quod utinam per valetudinem tuam fieri licuisset, ut Ro-
 mam peruenires. maiorem fructum, quam qui ex litte-
 ris percipitur, qui tamen vulgaris non est, ex familiari cō-
 suetudine, mutuoq. sermone, uterq. nostrum capere po-
 tuisset. quod quando non accidit: ego, quod ad me attinet,
 ut amoris mutui recordatione desiderium meum lenia-
 tur, operam dabo: litteris autem ita utar, quantum nego-
 tia sinent. quo te contentum esse, neq. in hoc genere plus
 exigere, quam praestare possim, tua mihi pollicetur huma-
 nitas. De philosophia illustranda, praeclare cogitas; ve-
 rum praeclara omnia quam difficilia sint, his praesertim
 temporibus, non te fugit. sunt enim adhuc, qui, frugibus
 inuentis, glande vesci malint. quibus ignosci fortasse ex
 aliqua parte potest, quod eos pudeat, Quae pueri didice-
 re, senes perdenda fateri: sed, eorum exemplo decipi ado-
 lescentes

lescentes, & inquinata doctrina infici, atq. corrumpi, hoc quidem graue malum est; malum, inquam, non ferendum idq. tu iure doles, & ego sic, ut tibi non concedam. Verè haec Principes viderint: qui nisi peccarēt in delectu, gymnasia florent, optimeq. cum litteris, & bene litteratis hominibus ageretur. De studiis meis, an de negotiis, aliquid scribam? negotia nihil ad te scilicet, studia vero pro pmodum iacent, & eo magis, quod valeo parum commodè. Te valere, liberatum iam, ut arbitror, diuturno morbo, non mediocriter gaudeo: reuertentem in patriam amore prosequor: frui optimis studiis, & capere studiorum uberrimos fructus, ita cupio, ut si communia bona essent, sic enim decet eos existimare, quorum animos & coniunxit virtutis amor, & retinet. Vale.

Romae. IIX. Id. Ian. M D LXVI.

FERDINANDO. GATVLAE

Neapolim. 22

SUPERIORIBVS diebus, cum tu me luculento sane carmine salutasses, etsi moleste ferebam, eripi mihi occupationibus facultatem respondendi, tamen non verebar, ne tibi de meo erga te animo secus interpretandi occasionem asferret silentium meum, odiosas enim, nec dignas bono viro suspensiones longe a se repellit excultus litteris animus, & liberaliter educatus. nunc vero, cū me praeceptor tuus, homo egregie doctus, & spectatae integritatis, Blasius Monicus, modeste ille quidem, tamē ut cupiditatem dissimulare non posset, admonuisset offi-

Ma 4 cū

cii mei: nihil habui potius quam ut haec ad te, licet iisdem,
 quibus antea, curis distentus, exararem. At, de tuis qui-
 dem versibus si quaeris quid sentiam: probarem omnia,
 si placeret argumentum, in verbis elegantiam, in senten-
 tiis gravitatem video, quod utrumque, nisi qui excellat
 ingenio, assequi nemo potest: in me autem extollendo
 quid sis secutus, aut quam rem spectaueris, non uideo. nā
 nec agnosco illa, quae scribis; & si agnoscerem, tamen
 haud libenter legerem: sed opinor tibi haesisse illud, quod
 a ueteribus proditum est; Bonum poetam esse non posse,
 qui non obscuris dare lucem, paruis magnitudinem sciat.
 quod si conaris, & si hoc te delectat exercitationis genus
 non improbo; & cum te amem, facile a me impetro, ut
 patiar uel abui te meo nomine ad laudem tuam, neque
 hoc solum, sed illud etiam tribuo amoris in te meo, quod
 tu fortasse non exspectas, aequo tamen animo, pro tua bo-
 nitate, accipies; ut hortor te, quando ad ius ciuile studium,
 curamq. tuam contulisti, ut istam artem, non, ut hodie
 multi, nudam, & inornatam, sed, ut olim ueteres illi,
 multiplici rerum scientia, praecipue uero Latinae elo-
 quentiae, quasi dote instructam, & locupletatam uelis,
 eloquentiam uero non ex uno, altero ue libro, sed ex ac-
 curata multorum lectione comparari, cum te Moni-
 cus erudierit, non dubito quin optime noueris. Etiam
 illud addo, quod fortasse recentioribus Iurisconsultis ab-
 surdum uidebitur, Graecae linguae, unde res petantur,
 sine quibus inane quiddam est, & plane languet eloque-
 tia, studii tui partem omnino aliquam esse dandam,
 quae si omnia pauci praestant: uaria excusatio est. aliis
 enim disciplina, aliis ingenium defuit, nonnullos etiam,
 cum

cum ad summam iuris ciuilis gloriam adspirarent, & forsitan peruenire possent, rei domesticae difficultas a praecleara industria ad quaestus necessarii curam detorsit. Haec si obstare intelligerem studio tuo: frustra cohortationem hanc susceperem, uel potius plane non suscipere. cogeret enim necessitas, quod uoluntas negaret. nunc te, optimis a puero non modo litteris, uerumetiam praeceptis informatum, praestantem ingenio, nec fortunae muneribus egentem, errare cum multis, & mediocri laude, angustis circumscripta finibus, contentum esse cur si-
nam? Perge igitur ad gloriam recta uia: obliquas uulgi semitas omitte: quaeque tibi praeter ceteros a Deo tributa bona possides, iis ita utere, ut ius ciuile non modo perdis-
scas, uerum etiam uehementer ornes. quod si efficies, lae-
tabor: sin minus, hoc tamen tibi, non obscurum, ut opinor
studii in te mei testimonium relinquam. Vale.

Romae, IV. Non. Feb. M D L X V I.

ANTONIO. FURNARIO

Neapolim.

13

Ego uero tibi non modo praesenti bono, sed futuri etiam spe ualde gratulor. non enim tam ex eo, quod abierit morbus, & quod, ut scribis, conualescere iam incipias, quam quod omnino futurum confido, ut breui pristinam ualitudinem plane recuperes, magnam laetitiam, uoluptatemque capio. tu modo tua temperantia fac, ut perpetuo gaudeam. quod ita me cupere uelim existimes, ut ex familiaribus tuis nemi-

ni con-

ni concedam. ista enim doctrina cum caremus; & cum affecto corpore, simul ingenium languet; angimur qui te diligimus; & quos ex industria tua fructus ferre potest aetas nostra, eos retardari, aut minui, patimur iniquissime ego ab interitu Pii Quarti valetudine utor incommoda. Stomachus, calore destitutus, officio concoquendi male fungitur. hoc vitium si tua citrea depulerint, plurimum sane tibi debebo; & eo magis, quod cetera pharmaca palato non amica, hoc medicinae genus ita suave est, ut, vel sine morbo, gustare nihil malim. itaq. speremus illud quoque, quod longe pluris est, ut stomachus fiat firmior: interea tibi ago gratias, quamquam id a te non expectari certo scio, quod me condimento gratissimo delectare volueris. quod profecto, nisi me non vulgariter amares, tibi in mentem non venisset. In extrema epistola quod mihi Gorgiae Leontini vitam exoptas: hoc quoq. amoris signum: sed malo prosperam, quam diuturnam. prospere autem, viuere, est otio & litteris, vacuo curis animo, frui. quod ego assidue meditor, & si quando assequar, purpuras omnes, quaeque purpuratis cara sunt, te fortasse non improbante, contemnam. Vale.

Romae, 11X. Id. Febr. M D LVI.

ANTONIO . MERVLAE

Calertam.

14

C A V E putes, aut me suspicari, quod adhorret ab amicitia nostra, oblitum te esse mei, aut commissurum umquam, ut obliuisci possis. Omnino discessu tuo nihil molestius: quis enim abesse eum, cuius neque consuetudine

tudine quidquam incundius, neque sermone eruditius,
 nec moribus, & vita sanctius, aequo animo ferre possit?
 Sed rursus, qui te diligunt, qui pro tua virtute sunt plu-
 rimi, quorum tamen ego nemini concedo, cur tuo commo-
 do maereant? vivis in parte Italiae nobilissima, honesta
 satis condicione, apud illustrem virum, humanitate, litte-
 ris, omni denique, ut audio, laude perpolitum. quae sunt
 eiusmodi, ut ea sequantur multi, assequantur admodum
 pauci. At urbe Roma cares. Scilicet, quia Capitolium,
 vel Amphitheatrum quotidie non adspicis, quae tu, hic
 dum eras, fortasse ne cogitabas quidem, id laborandum
 crediderim. Cetera, opinor, nihil ad te. neque enim suture
 te arbitror honores aut opes: quae qui adipiscuntur, vi-
 des, a tranquilla, & beata vita quam longe distent, qui-
 bus fluctuant curis, quibus assidue miseris urgeantur.
 Reliquum est, ut te pungat, quod nobiscum non sis. quod
 ita leuiter feres, si cogitabis primum illud, ortam ex vir-
 tute benevolentiam eiusdem virtutis memoria foueri, at-
 que ali, sic, ut nihil praeterea desideret: deinde, mutuis
 epistolis hoc leniri quadam ex parte desiderium posse:
 postremo, mortalem esse neminem, cui plane secunda
 sint omnia. addo illud, quod solatii tibi loco debet esse, no-
 stros sensus congruere cum tuis: nihil esse nobis opta-
 tius, quam ut simul viuamus: dolere, quia non liceat, eo
 minus tamen, quia futurum speramus, ut aliquando li-
 ceat. habes egregie animatum erga te Cardinalem Sirle-
 tum: cuius auctoritatem, pro singulari eius integritate, sa-
 pientia, doctrina, maximam esse, non ignoras. Panta-
 gathus de te & amicissime loquitur, & praeclare sentit.
 duobus illis, quos tuo nomine salutavi. Statio, Dauanza
 to,

to, qui te resalutant, scito te in oculis esse. nam de me ipso, non faciam, ut plura ad te scribam. vellem uia res ferret, ut, quanti te facio, tantum ex officiis meis fructum capere posses. mihi crede, studiis, & rationibus tuis ita consuleretur, ut ad vitam & commode, & satis etiam cum dignitate traducendam nihil deesset. sed vides tempora, fruamur, mi Merula, litterulis nostris, directo in Deum animo: ceteris rebus *πᾶλλὰ χῶραι*. Rotae nostro, non minus ingenio, quam nobilitate praestanti, poetae optimo, & cum veteribus conferendo, salutem, obsecro te, meis verbis, si quando ad illum scribes. Vale.

Romae, xiv. Kal. Quint. M D L X V I.

MARIO. CORRADO

Neapolim. 15

FACILE poterat e silentio nostro de tuo negotio coniecturam tacere: nisi si tacere nos existimas, vel quia non amemus, vel quia parvipendendum id credamus, de quo te vehementer laborare, epistolarum tuarum crebritas ostendit. in quo video te otium nostrum scilicet e tuo meriri. nam Statio nostro a scriptione publicarum litterarum respirare numquam licet. ego autem quibus rebus urgear, quam numquam vacem, nosse te apinabar e Ciuiino, aut etiam ex aliis: quoniam quidem status meae uitae is est, ut ignorari vix possit. Sed, ut ad prima redeam, veteres illi grammatici nondum Romae sunt: si afferentur, eos ad te mittam. tu velim significes, ubi sis futurus. nam istuc, si recte verba tua interpretor, non uideris,

deris admodum libenter esse. Huc te uocarem, nisi multi discederēt. optimum tamen, qualem aetas nostra non uidit, Pontificem habemus. qui si diu uixerit, quod a Deo precari non desinimus, spes est magna, haec, quae fluunt, posse contineri. *Vale.*

Romae, VI. Kal. Sext. M D LXVI.

OCTAVIO. SANMARCO

Patauium.

16

QVOD mihi iam antea filius meus, tui amantissimus, non obscure significauerat, id multo nunc ostendit illustrius epistola tua, ita te colere bonas artes, ut parentis tui, summi uiri, laudibus non modo respondere, uerum antecellere etiam aliquando possis. Concurrunt multa cum hanc omnino coniecturam faciam, primum instrumenta naturae, ingenium, memoria, ualetudo; quae si absint, ad magnas res, magnopereq. expetendas adspirare prorsus non licet; deinde studium, exercitatio, industria; quibus ita uteris, quasi illa non habeas naturae bona, quibus in primis abundas, & quasi a te ipso petas omnia. Adde, quod Patauium te contulisti, quam urbem? Athenas alteras: ubi cum praestantes uiri multi magnarum doctrinarum scientiam profiteantur, unum tamen in primis, quem ego semper plurimi feci, Pancirolum tibi audiendum, colendumq. delegisti. cuius consilii, mihi crede, maiorem in dies fructum, uoluptatemq. capies. Nam de Io. Vincentii Pinelli consuetudine nihil dico. non enim dubito, quin ipse iam per-

perspexeris, quae sint in illo iuvene virtutes, quae probitas, quae eruditio, quae humanitas: ut omni dignissimus honore sit, qui tamen ob omni honorum cupiditate, sola virtute contentus, longissime distat. Hanc facultatem, non ego te, ut urgeas, adhortor; sed gratulor potius & tibi, & patri tuo, quod ita viuas, ut omnes a te omnia summa expectent; mihi vero plurimum gaudeo, quod, cum te ipso sit nihil amabilius, tu tamen amicitiam meam, quasi magni pretii rem, tibi expetendam putasti. quod ut facile consequeris, ita velim euenire, ut officiis te ita colere possim, ut beneuolentiae in te meae parem, idest maximam, utilitatem percipias. Vale.

Romae. III. Id. Sext. M D L X V I.

FRANCISCO. MANCINO

Perusium.

17

MIHI vero numquam venit in mentem dissidere memoriae tuae. a quo enim diligere me, non solum cupio, verum etiam libenter mihi persuadeo, cur ei me effluere ex animo credam? quod sine summo dolore facere non possem. At scripsi ad Cardanetum. Non equidem ob eam causam ut promissi te admoneret, sed ut pecuniam a bibliopola exactam tibi numeraret. quod opinor factum. Officium litterarum, a te praetermissum, cum excusas, facis, ut officium tuum magis desiderem. amo enim mirabiliter ingenii tui excellentem imaginem, egregie in epistolis expressam. itaque, carere me hac voluptate, non facile patior. nec tamen plus oneris tibi impono, quam per studia

Studia tua licet; cum praesertim facere te in doctrina magnos processus intelligam. ad scribendum ita te hortor, ut a libris non auocem. quod si utrumque potes; ut certe potes: noui enim industriam, & facultatem tuam; oblecta nos tuis interdum litteris; & ad illa maiora simul incumbe; ut augeas domesticam rem: & dignitatem, omni re praestantio rem, consequaris. Vale. Aldus tibi salutem dicit, uehementerq. tua sui memoria delectatur.

Romae, IV. Kal. Sept. M D L X V I.

IOANNI. CASELIO

Florentiam. 18

CUM a discessu tuo nihil omaino de te, neque ex tuis, neque ex aliorum litteris, cognouissem; habere te iter in patriam, facile suspicabar. nunc uideo, te in Etrusca regione consedis se; amoena illa quidem, et ad uitandos calores, quos hic pertulimus grauissimos, admodum apta: uerum tamen, id si consilio fecisti. gaudeo; sin morbo coactus, ita doleo, ut amicitia nostra, & studiorum tuorum iactura, postulat. Quod ais, cogitare te domesticos labores, & in ea tamen cogitatione nonnihil pungi, recordatione ueterum molestiarum: o mi Caseli, ullum ne tu locum putas esse, in quo aduersi nihil occurrat? in quo ex uoluntate fluant omnia? inuidia tamen, quae tui similes, id est praestanti praeditos ingenio uiros, saepe uexat, ad extremum, ut scopulo fluctus, ita uirtute frangitur. qua spe te decet, ut hominem sapientem, uindicare animum ob omni cura, ut fructum capias excellentis do-

Etrinae

Etrinae tuae; qua nisi te ipsum iuuas, cum aliis prodesse consueueris, ^{di} ~~et~~ ^{ta} industria. Amicum tuum, iuuenem egregiis moribus ornatum, libenter cognoui: longiorem cum eo sermonem habere, per negotia non licuit. Vale. Haec scripsi raptim. Romae. III. Idus. Oct. M D L X V I.

Z E R B I N O . R I T I O 19

Q V A N T V M mihi, filioq. meo, tui amantissimo, doloris, ac molestiae, discedens reliqueras: cum tua nobis consuetudo admodum incunda, industria etiam perutilis interdum esset: tantum solatii, & uoluptatis utrique nostrum attulit epistola tua: quamquam, quod tu scribis, te tuis ciuibus esse carissimum, id ipsum fore putaramus. quis enim ita expers humanitatis, aut ita barbaris moribus esse potest, quem tua probitas, & uirtus ad amorem tui non alliciat? quis autem ab iis te diligere miretur, qui futurum intelligunt, ut maiores quotidie fructus ex ingenio, doctrina, diligentia tua, percipiant? quo tibi nomine, mi Zerbine, uehementer gratulor. nam, ut optabilius nihil est, quam amari a bonis uiris, praesertim in patria: sic nihil in rebus humanis praestantius, quam de patria bene mereri, & quasi parenti optimo gratiam aliquam referre. hanc tu nactus occasionem, contemne reliqua: & hoc unum age, in quo summa tibi & gratia, & gloria posita est. In hanc sententiam plura scriberem, nisi tuos iam sensus, & praeclaram animi tui ad honesta omnia propensionem, egregie cognitam haberem. Venio ad alteram partem, quam nec omittere possum, nec sine gemitu, & lacrymis attingere. Decessit, alie
nissimo

nissimo tempore, cum ad eum, salutaris doctrinae dogmata de loco superiore ostendentem, omnis omnium concursus fieret, cum haereticae factionis insidias patefaceret, impetum frangeret, tela retunderet, decessit inquam, florente adhuc aetate, nimis immatura morte, summo ingenio vir, incredibili scientiae copia, maxima iam apud omnes bene sentientes existimatione, & auctoritate, Perpinianus nostrae. quamquam nostra quidem haec iactura tota, nostra calamitas est: ille caelo fruitur, & caelestium animorum conspectu, circumfluens rebus iis, quas, inclusus adhuc mortali corpore, animo tamen saepe foras emergente, contemplabatur. verumtamen, sublato ex oculis amico, & ex hac luce erepto, recenti adhuc vulnere doleamus, necesse est; ratio fortasse medebitur, aut dies: memoriam quidem tanti viri mihi nulla dies adimet. Quod hortaris, ut edam Commentarios: currentem incitas: sed adhuc quaedam aduersantur: quae tamen, spero fore, ne diutius impedian. Etiam in Patris Grammatica, tibi ut satisfiat, operam dabo. Vale. Aldus tibi multam salutem. Vale iterum, mi optime Zerbine, & patriae, ac Musis, tranquillo otio, viue. Romae. III. non. Dec. M D L X V I.

I AM ad te scripseram, cum ecce bellaria tua: quae mihi pergrata sunt: sed, mihi crede, amorem istum in me tuum bellariis omnibus antepono. etenim illa palatum, hic animum non vulgariter oblectat. Catechismum ad te mitto. Commentarios meos tua causa aliquanto citius emittam.

Bb VIDO

VIDO. GVALTERIO

Narniam.

20

ANTEA, cum tu ad me, pro nostra amicitia, de
 Narniensi condicione retulisses: et si non satis constitue-
 re poteram, quid tibi agendum censerem, auctor tamen
 potius eram, ut urbem Romam ne relinqueres: non tam
 propter haec uestigia antiquitatis, quorum adpectu mi-
 re fruuntur homines eruditi: quam quod esse te in ocu-
 lis videbam nobilibus viris, quorum auctoritas, & gra-
 tia rationibus tuis prodesse vehementer posset. nunc au-
 tem, cum te istic admodum libenter esse, florere ci-
 uium optimorum beneuolentia, excellenibus ingenio
 discipulis abundare, significens; non tu quidem efficis
 adhuc, ut, abesse te, gaudeam; assequeris tamen illud
 ut aliquanto minus doleam. quod si alteris litteris, id
 quod equidem tua causa in primis opto, eadem confirma-
 ueris; prorsus à dolore ad laetitiam transferas; & cum
 ex tuis commodis uoluptatem maximam capiam, tum
 istam valde amabo ciuitatem, quae te tam honorifice ac-
 ceperit, quae tuam industriam, virtutem, probitatem libe-
 ralissime complectatur. cuius amoris, & officii, certo scio
 te non esse commissurum, ut eam unquam paeniteat.
 non enim aut in tua disciplina mendum, aut in vita la-
 bem, aut in moribus agreste quidquam, vel inhumanum,
 unquam videbit. quae quo sunt, hac aetate, in iis, qui in-
 uentutem egregiis litteris excolendam, ac moderandam
 suscipiunt, rariora: eo plus honoris, utilitatisq. tam prae-
 clara virtus postulat. quamquam tu quidem, si praestan-
 tiam

11
10
EPIST. LIB. VII 387
tiam animi tui bene cognitam habeo, mercedem merito-
rum tuorum maiorem nullam statues, quam eorum, qui-
bus cum uiuis, beneuolentiam: & illud tamen credes,
eum, qui diligatur, necesse esse, ut rebus omnibus abun-
det, quae non modo ad fructum domesticum, & ad sub-
sidia uitae necessaria, sed ad speciem quoque, ac dignita-
tem, pertineant. Intende igitur omnes nervos, ut iis, qui
te amant, amabiliorem te quotidie praebeas; & quam
Spartam nactus es, eam non modo tueare, verum etiam
cum primis ornes. Quod ut scriberem, amor impulit, non
quia te, iam pridem ad omnem laudem, patris exemplo,
atque doctrina, institutum, consuetudine postea confirma-
tum, vel mea cohortatione, vel cuiusquam egere praece-
ptis existimem. Vale.

Romae. VII. Id Dec. NDLXVI.

M V C I O . C A L I N O

EPISCOPO. INTERAMNAE

Interamnam.

21

ARCHIEPISCOPOVM praestare Episcopo di-
gnitate, nemo nescit: bonis tamen uiris, cum te, omisso
Iadrensi Archiepiscopatu, Episcopum Interamnae esse
factum, auditum esset, visa res est in primis gratulatione
digna. nam, quod ad dignitatem attinet, Italiam cum Illy-
rico conferentes, nihil imminutum putabamus: quod ad
commoda, additum aliquid potius, quam detractum.
Iam illud, licere tibi interdum ad Urbem, nobis ad te,
cum uelimus, excurrere, quanti aestimandum? nam ne-
que te amicis tuis prorsus carere, tua suauitas patitur;

Bb 2 neque

neque nobis quidquam molestius, quam adspetus & sermonis tui sitim diutius ferre. Quo circa ego quidem statim, audita re, laetatus animo sum: litteris gratulari cum maxime vellem, negotiis tamen impeditus, officium ueteri nostrae necessitudini debui praetermisi. in quo me tamen, cum meae conscius erga te perpetue obseruatione, tum tuae memor humanitatis, facile culpa libero. atque etiam (vide, quid mihi de tua benignitate pollicear) sperare audeo futurum, ut qui a me diliguntur, eos amicitia tua ne excludas. neque tamen hoc in multis ambitiose petam: tantum deligam, quos tibi non tam mea commendatio, quam ipsorum optima studia, conciliare possint. in his excellit in primis, iuuenis bene moratus, iis perpolitus litteris, quae nos a pueritia delectarunt, Iulius Iacobonius. uiuit coniunctissime cum filio meo, ut fere aetate, et studiorum similitudine, iunguntur: me vero, quod multis in rebus intellexerim, sicut alterum parentem, obseruat, & diligit. itaq. videor illi debere omnia, quae possum: nec sane ullum eius vel adiuuandi, vel ornandi, locum praetermitto: sed ex omnibus officiis nullum ei video gratius, aut iucundius praestari a me posse, quam si per me consequatur, ut aditum ad te habeat, a te cognoscatur, numeretur in tuis. quod etsi, non dubito, quin facile impetrem: non enim tuam φιλαδέμειαν: noui etiam, quo ipse loco apud te sim: tamen ita peto, quasi agatur existimatio mea. sic enim statuo, cum te tua virtus, nullo fortunae praesidio, in ista dignitate collocarit, valde ad existimationem meam pertinere, hoc si percrebescat, me abs te tantum amari, quantum & optavi semper, & mihi persuasi. Vale. Romae, Idib. Dec. M D L X V I.

ANTO.

ANTONIO. FURNARIO

Neapolim. 22

ITA mihi, quae opto, contingant: ut de tua valetu-
dine valde sum sollicitus: nec leuabitur dolor meus, nisi
cum te non solum periculo, sed prorsus omni molestia li-
beratum cognouero. quod utinam breui fiat. cur autem id
futurum non sperem, cum te, diffidentem humanis reme-
diis, ad pias preces videam esse conuersum? me quidem
ex aduersis rebus haec una saepe ratio, iam omni spe de-
stitutum, eripuit. De fortunis meis detraxit aliquid supe-
rior annus, hic fortasse damnum sarciet: sin aliter eueniet,
aequo tamen animo feremus, minuente sensum doloris
consuetudine, & cupiditatem aetate. De munusculo quæ
tibi venit in mentem aegrotanti? magni hoc amoris si-
gnum. itaque sic tibi ago gratias, tanquam de re am-
plissima: quandoquidem nihil mihi pluris est, quam ama-
ri a te, quem praeter ceteros amabilem uirtus facit. Sto-
macho certe meo, quod antea scripseram, nihil gratius
hodie genere medicamenti. Vale.

Romae. Kal. Feb. M D L X V I I.

CAMILLO. PALAEOTTO

Bononiam. 23

A quo primum die, Palaeotte optime, mihi cogni-
tus es, duxi te semper in eorum numero, qui nostra

Bb 3 hac

hac aetate antiquiae virtutis imaginem referunt, esse reponendum. nam & bonos & praestantes viros amas, omnique studio complecteris: & ipse, quae artes amorem conciliant, iis ita excellis, ut vicissim te omnes ament, nec minorem ex ingenio, doctrinaque tua, quam ex humanitate, & liberalitate fructum capiant. equidem in meis secundis rebus id maxime numero, quod olim tua mihi benignitas aditum aperuerit ad amicitiam tuam: illud dolere saepe cogor, quod ita fortuna tulerit, ut disiecti uiueremus, & eriperetur utrique nostrum suauitas illa, quae sine dubio, cum una simus, longe maior est, quam cum aut ego tuas, aut ipse meas epistolas legis. adde quod tibi perquam raro scribendi occasio, mihi ne facultas quidem datur. ita, qui est in litteris fructus, eo etiam prope caremus. quo tamen in genere tuam diligentiam, vel humanitatem potius incredibilem agnosco: qui nullum huius officii locum praetermittis: ut proxime, cum de Amulii Cardinalis incolumitate cognouisses, fecisti peramanter, quod & mihi, qui illum virum in oculis fero, unumque praecipue colo, per litteras gratulandum, & significandum existimasti laetitiam tuam. Sed ego vicissim tibi, & bonis omnibus, eo conseruato, cui praeter cetera virtus placet, vehementer gratulor. nam, si quid illi nunc humanitus accidisset; si quo fortasse tempore, cum nec aetati parum, & gloriae plurimum uixerit, nostro certe, & uniuersae bonorum Reip. alienissimo decessisset. Vides profecto, nec dubito, quin idem sentire videas excellenti virtute, ac sapientia Cardinalem, fratrem tuum, pares esse Amulio nostro dignitate non paucos, opibus etiam, & iis rebus, quas elargiri fortuna sc-

let,

let, superiores multos: at illa si perpendimus, quae sunt animi ingeniiq. bona, idest quae vere bona sunt, doctrinam studio, prudentiam usu rerum maximarum partem, praeterea benignitatem, probitatem, religionem; quam non multi sint, quos ei conferre possimus, opinor intelligis. iure igitur, illo graviter aegrotante, ita maerebamus, quasi cum illius salute nostra salus in discrimen adducta videretur: & nunc, eodem incolumi, tum sua quisque causa, tum bono publico omnes laetamur. In quo non dubitabam equidem, quin tuus sensus cum meo sensu congrueret: verum tamen egregiae testem voluntatis epistolam tuam legi perlibenter. vidi enim amorem in me tuum, & studium simul erga Christianam Rempublicam prope singulare. nam de Amulii morbo ita sollicitus eras, ut eodem tempore & dolor meus, & publica iactura tibi ante oculos esset. itaque non putavi committendum, ut ipsum celarem de literis tuis. ostendis legit incundissime: nec tacuit de tua laude; mihiq. ut salutem tibi eius verbis adscriberem, ac sua tibi studia prorsus omnia pollicerer, ita mandavit, ut vultu & verbis plane animum exprimeret. Ego de te, quae soleo, summam esse tuam in illum observantiam: optatius tibi nihil esse, quam ut, si quid eius causa praestare possis, utatur opera, curaq. tua. addidi quaedam de vetustate necessitudinis nostrae, de tuis etiam in me officiis: ut sciret, cum tu de meis commodis maxime semper laboraveris, cupere me non mediocriter, ut, a quibus ipse diligor, eundem te pari benevolentia complectantur. Vale, & Cardinali optimo, fratri tuo, salutem dic meo nomine plurimam. Romae, VII. Id. Mar. M D LXVII.

Bb 4 IOAN-

IOANNI . C A S E L I O

Florentiam.

24

OMNINO erat $\epsilon\omega\lambda\omicron\varsigma$ epistola mea: quam ut acciperet, numquam ad me rediit is, qui tuas litteras attulerat: verumtamen eam ad te mittendam putavi, ne tibi in aliquam fortasse neglecti officii suspicionem venirem. eius exemplum hoc est.

Epistola, de qua hic mentio fit, legitur sexta ante hanc.

QVOD me amicis crebro auges, praesertim hominibus uirtute praeditis: perbenigne facis. utinam praestare aliquid vel tua, uel eorum caussa possim. nos enim quae uestra bonitas & humanitas est, animo fortasse contenti estis: ego, qui meus erga liberalium doctrinariam studiosos amor est, nisi animum officia probent, contentius esse vix possum. Vale. Romae, xvi. Kal. Apr. MDLXVII.

PETRO . P E R P I N I A N O

Lugdunum.

25

CVR ego tibi excussem silentium meum? Odi ista uulgaria: nec tu is es, qui vel amicis diuorem te praebeas vel quibus ego negotiis, quantam & quam assiduam à me operam exigentibus, distinear, ignores. ac, si velis amabiliter, & vere cogitare ita credes: nulla me magis affici uoluptate, quam cum tuas epistolas lego: rursus, si
quis

quis est, qui ab officio discedat inuitus, eum esse me. quare
 ut ego tibi ingenio, eruditione, industria comparare me
 non ausim: ita, quibus maxime rebus amicitia colitur, hu-
 manitate, officio, obseruantia, neque te mihi, neque
 quemquam antepono. hoc te cupio credere. quod si impe-
 tro, simul illud impetro, ut omni me praeteriti, tum futuri
 temporis culpa, si fortasse rarius ad te scripsero, plane li-
 beres. quamquam nunc quidem, tuis ut rescriberem lit-
 teris. abieci omnia, victus beneficio tuo. beneficium enim
 certe, non mediocre nescio quod, sed quantum esse potest
 maximum, à te habeo, quod mihi amicum dederis Iaco-
 bum Rodericum Falconium, prudentissimi & optimi
 viri filium, ipsum iis litteris ac moribus ornatum, ut,
 cum me vel negotia, vel ipsa iam aetas ab amicorum
 consuetudine remoueat, hoc tamen iuvene quotidie fere
 utar iucundissime. ac saepe de te sermo, illo libenter
 praeclara tua facinora pro Christi gloria narrante, me
 libentius audiente. certamus enim, ut video, amore er-
 ga te, sic, ut alter ab altero vinci interdum gaudeat, inter-
 dum aegere ferat. ita non plane nobis totus abes. quod
 enim oculis eripitur, assequimur animo, memoria, men-
 tione tui, tuarumq. virtutum quam creberrima. tu con-
 tra, si parem gratiam referre uis, alterum Falconium
 reperi: si modo similem probitate, ingenio, obseruantia
 in utrumque nostrum reperies. Sed opto te felicem esse,
 & similem reperire: ut, de nobis cogitantes nonnum-
 quam, & colloquentes, officium amicitiae debitum per-
 soluatis. De tragoedia, nunc sum laetatus, praesertim
 agente Falconio. De animi tui constantia, tibi gratulor,
 Deo gratias ago, à quo ista manant. tibi. n. certe, & fortis-
 simo

simo cuique, nisi diuina uis affuisset; praesentis discrimine, in tanta gladiatorum licentia, animus concidisset. * bonam mentem opto. cuius enim ingenium, & doctrinam amo, de eo si quid afferetur durius, cum dolore audiam. Sed, quid est, quod etiam de Turnebo, tali viro, utinam falso rumore, dissipatur, auersum a salute peruisse? o magnum malum, nec re magis, quam exemplo. nam plebs imperita, licentiae cupida, si peccat; minus mirum: doctos viros, relictis antea sensibus euntes, offendere, & labi, matura iam aetate, quis non ingemiscat? Filius te salutat. tu meis verbis eruditum in primis, & probum adolescentem, Iosephum Scaligerum, si est Lutetiae, salutes velim. Val. Romae.

EPISTO-

395
EPISTOLARVM

PAVLLI. MANVTII

LIBER. OCTAVVS

P I O . I V

PONTIFICI. MAX.

I



VID antea de litteris, ac bonis artibus
existimaueris, Pie I V. Pontifex Max.
quam semper fueris, hodieq. sis ad eas ex-
citandas, ornandasq. praeclare animatus:
& omnes iam pridem norunt, & ego superiore anno sum
expertus: cum eo me consilio Romam euocasti, ut sacros
praecipue libros, ab haereticorum nefaria peste vindica-
tos, ederem quam liceret emendatissime, & in hac ele-
gantioris olim doctrinae parente, atque altrice, nunc diui-
norum institutorum custodi, ac praeside Vrbe perpetuum
meae vitae domicilium collocarem. cum ista mente,
istaq. ad bene agendum propensione summam potestatem
coniunxit Deus, non solum ut impendentes Reip. Chri-
stianae calamitates auerteres: quod a te curari egregie,
atque effici omnes fatentur: verum etiam ut a publica cu-
ra oculos interdum conuerteres ad priuatorum incommo-
da, eaq. cum videres, opem afferres non pro cuiusque la-
bidine, sed pro iudicio, ac sapientia tua. haec me cogita-
tio, diu verentem, ne appellare litteris Maximum Chri-
sti Vicarium, excubantem animo semper pro Christianae
Reip.

Reip. salute, impudentiae posset adscribi, ab ancipiti consilio ad certam sententiam reuocauit, effectiq. ut ea scribere audeam, quae ne coram agerem, maiestate tua primum, deinde etiam pudore quodam meo sum deterritus. Totum hoc imprimendi munus, quod mihi a te mandatum pro mea fide curo, duas habet partes, publicam unam, quae ad communem animorum utilitatem pertinet, ut e sacris libris maculae omnes eluantur; alteram priuatam, ut ea mihi interim suppetant, quae si absint, mecum, & cum meis agatur incommodius. Quod ad priorem attinet, facerem arroganter, si tibi tantam rem, qua nescio an ulla magis hoc quidem tempore omnibus expediat, studeam commendare: cum quattuor spectatae uirtutis & innocentiae Cardinalium, quos huic negotii praefecisti, singularis prudentia nihil deesse patitur. quare hanc partem, cui nondum tua liberalitas defuit, nec, ut spero, umquam deerit, omitto non inuitus: de me ipso, siquidem tua permittat humanitas, (quid autem ea non permittat?) attingam pauca. Ego, cum ad Urbem ueni; licet a Pio 14. recte & laudabiliter uiuendo, sperari posse omnia intelligerem; tamen efferrī me cupiditate non sum passus: nec situi honores: nec auri, argentiq. splendore sum captus: id scilicet unum spectavi maxime, ut beneuolentia tua, in qua pono omnia, perpetuo fruerer, eaq. me, quantum consequi studio, quantum industria liceret, non indignum praerberem domesticis rebus, quas negligere prorsus, qui pater est, non potest, amare nimium, qui se Christianum esse meminit, non debet, satis consultum putabam honorario illo annuo, quod a tua benignitate impetraueram: nec dubitare,

dubitare tamen poteram, si quid praeterca meae rationes exigent, quin id habere possem ex eodem fonte, ad quem aditus ambitiose petentibus vix pateret umquam, moderata cupientibus praeccludi numquam sole-
ret. sic annus abiit: nec mihi nouam interea cupiditatem dies attulit; quae etiam admonet, quo propius ad huius peregrinationis, quae vocatur vita: finem accedimus, eo minus de viatico laborandum. itaque mutatum nihil est in consiliis meis; animus, quos antea sibi fines praescripserat, iisdem se continet, ultra nihil appetit: sed corporis alia quaedam ratio est: aetas iam ingrauescens quasi extra ordinem multa desiderat: multa etiam, praesertim in laboribus, ac studiis, valetudo requirit imbecillior: quae si negligam, ingrata mihi videar agere cum Deo, a quo acceptum vitae munus magni facere, ac tueri diligenter debemus. quid caritas liberorum meorum, quibus in me uno sunt omnia? ea me appellat, nec patitur obliuisci, quid naturae debeam, & mihi me ipsum eo nomine commendat, quod in mea salute multorum salus, fortunaeque nituntur. Quae cum ita sint; & cum his caussis, quas commemoravi, magnopere confidam; tamen ita statuo, maiorem commodi mei spem in tua praestanti bonitate mihi esse reponendam. quare nihil desinio, neque mihi certum beneficii nomen peto: quod qui faciunt ignorant scilicet a quo petant, & in angustum reuocant, quae latissime patet, benignitatem tuam. ego rationes meas Principi maximo, & ad beneficentiam nato, commendare me intelligo. nihil me postulare praecipuum decet. unum illud indicare satis est, fulciri oportere subsidio aliquo fortunas meas: quod ipsum

sum tamen voluntati, arbitrioq. tuo totum permittatur, mihi quidem, si quid a tua liberalitate profiscatur, quidquid sit, aequè gratum futurum est, ac si me omni beneficiorum genere cumulasses.

CAROLO . BORROMAEO

CARDINALI.

2

NON patitur aut benignitas, aut consuetudo tua, ut appellandus a me sis de eo, quod semel & iterum hu-
manissime promisisti; & ego is sum, qui, quod semel pe-
titi, licet ad constituendas fortunas meas valde perimeat
impetrare cupiam, non exprimere. verumtamen non sum
veritus, ne tibi molestiam afferret iterata petitio, hominis
praesertim studiosissimi, & de tua laude, quantum imbe-
cillitas mea praestare possit, assidue cogitantis. Optabile
est, ut, qui optima cupiunt, iidem vel omnia possint, vel
apud eos, qui possunt, auctoritate, & gratia plurimum va-
leant. tibi virumque contigisse, non stulti homines arbi-
trantur. nam & natura propensus es ad ea, quae prae-
clara sunt: & haec ipsa propensio, singulari ingenio, &
virtute coniuncta, ita tibi amorem conciliauit sapientissi-
mi Pontificis, auunculi tui, ut cum omni te munere di-
gnum ducat, tum vero libenter, translata in te gravissimo-
rum negotiorum parte, releuetur. amplectere igitur pro
tua summa prudentia, vel retine potius, quam ample-
xus iam es, occasionem diuinitus datam, eripuit iam be-
nemerendi consuetudinem temporis iniquitas, eam si re-
stituis, quod facere coepisti, & facies: iisdem, quibus ma-
iores

iores tui, gradibus in caelum adscendes, relicta familiae
 tuae gloria, quam nulla dies exstinguat. Ego autem, si per
 te consequor, id quod in tua manu situm est, ut Romae li-
 benter viam: vix enim libenter, ubi parum commode,
 quisquam vivit: dabo operam, & fortasse efficiam, ne sit
 obscurum beneficium tuum: memoria quidem, & vo-
 luntate, si re ipsa minus potero, ingrati animi culpam
 vitabo. Vale.

Romae. iv. Kal. Nou.

SCRIPTIT. HANC

A. PRINCIPE. ROGATUS 3

HONESTA res, iucundaq. in primis, Nuptiae
 putantur: nec immerito. nihil enim ad generis humani
 perpetuitatem Natura magis postulat, quam ut feminis
 iungantur mares: nec ea coniunctione quidquam non mo-
 do commodius, verum etiam dulcius esse potest. habere se-
 cundis rebus mulierem laetitiae sociam, laetitiam auget;
 adversis pariter macrentem, solatii genus est. iam, quae
 ad cultum, ad victum, vitamq. pertinent, ea cum vxor
 ministrat, aut curat, quantam iucunditatem habent? Re-
 ges equidem ipsos non arbitror e suis regnis tantam volu-
 ptatem capere, quantum fidelis coniugii consuetudo, &
 conuictus affert. Quae tibi, optime *, ex iis veteri-
 bus nuptiis probe cognita cum essent; propterea factum
 opinor, ut secundas appetieris, & eandem omnino sua-
 vitatem regustare volueris. Hoc tuum consilium, pro
 suo quisque sensu, varie homines interpretantur. laetari
 multos

multos video, ut in re optima; quosdam admirari, ut
 parum expectata; dolere nonnullos, ut aduersa. mihi,
 in hac opinionum, & sententiarum uarietate, animus
 vehementer in dubio est. laetitiam à me poscere vide-
 tur amor in te meus, ortus ex memoria praeceptorum
 tuorum, quibus me puerum ad omnem uerae laudis
 cupiditatem excitasti: sed idem amor ante oculos ea
 proponit, quae cum cogito, tantum abest, ut laetari
 possim, ut dolore etiam afficiar; neque id tua magis
 causa, quam publica. nam, etsi, quod tibi placuit,
 idemut perpetuo placeat, atque expediat, vehemen-
 ter opto: tamen, cum de aetate tuam considero, quae
 iam ad senectutem vergit, interdum vereri cogor, ne
 aliter eueniat. sua cuique aetati studia Natura tribuit.
 quae iuuentas amat, respuit senectus. contra, senec-
 tutem oblectant, quae fastidit iuuentus. tu tamen,
 homo iam fere sexagenarius, adulto iam paene filio,
 nouum coniugium probasti; quoque magis miremur,
 non aequalem, aut aetate proximam, verum adole-
 scentulam duxisti: virum uoluptatis, an procreatio-
 nis causa, praeter te nemo nouit. uoluptatis quidem
 suspicione, pro mea in te beneuolentia, libenter te li-
 bero: sed, alii, quorum iudicium amor non impedit, de
 ista re quid sentiant, ipse videris. At procreatio libe-
 rorum optanda. Quis hoc improbat? aut quis aliter
 sentit? veruntamen temporibus multa distinguuntur:
 nec idem semper omnibus licet: nec eadem semper om-
 nes decent. Quo de genere si pluribus tecum agam, &
 illud usurpem, quod Apollini tribuit antiquitas, Co-
 gnosce te ipsum; ignorare videar utrumque nostrum,
 &

Et, quod aiunt, Sus Minervam erudire uelle. tu enim is es, qui haec ipsa mihi olim puero cantabas: quae mihi nunc insita penitus in animo haerent, nec euelli unquam sinam: tum quia praeclara, tum quod a te tradita, quem unice diligo. Recognosco igitur doctrinam tuam: Et cum illa, quae tractandis veterum monumentis obseruasti, in memoriam redegeris, tum cogita, quam iure mirentur nonnulli, aut etiam doleant, te, talem virum, ista aetate, ista existimatione, uiuo Et incolumi optimae spei filio, cum ipse te adspicere, cum valetudini tuae parcere, cum iuuentutem ab immoderata libidine tuis monitis reuocare ad continentiam deberes, tum puellae amore captum, eius complexum, Et consuetudinem sic optasse, non modo ut hominum de te opinionem, aut filii commoda parui faceres, verum ut ipsa vitae tuae nouo vitae genere periculum strueres. quis enim nescit, quod veteres quidam Philosophi memoriae prodiderunt, Veneris usum prodesse numquam, obesse autem saepissime? Quod si quis in dubium vocet, id negari certe non potest, Sene-
scentibus, deficiente natura, nulla re, magis, quam concubitu, vires minui. quod à te ignorari, qui tam multa nosti, turpe est. aut, si non tu quidem hoc ignoras, sed rationem libido uicit, quis te audiat, ita excusantem? hoc quidem est augere culpam, non minue-
re. Atque haec, tua causa, nos angunt: quid, publi-
ca? tanto magis, quanto aequius est, de multis, quam de paucis, laborare. nam, cum tuo iudicio, tuaque scientia, in omni causarum genere uteremur; cum tuae lucubrationes ciuile ius, eximia tua cum laude

Cc illit-

illustrarent; cum omnes lites, ac contentiones, aequitate, & sapientia tua dirimeres: optandum erat, ut huius boni, quo nullum in Ciuitate praestantius, diuturna admodum usura frueremur. nunc a te, nouae coniugis illecebris irretico, non modo lucubrationem ullam homines non expectant, sed uerentur etiam, ne maiorem diei partem, nedum nocturnas horas, domesticis oblectationibus tribuas. interim praeclarae illae frigebunt actiones tuae. minus libenter audies disceptantes: non tam attente, quae diiudicanda erunt, considerabis: non facile quemquam admittes: non saepe prodibis in publicum: non, ut antea, tui copiam facies: denique, cum antea ita uiueres, ut Reip. natus uiderere, nunc te, ad priuata studia conuersum, negligere communia, nemo est, qui aequo animo ferre possit. quae si alios cura tangit: quae me affici molestia, a quo angere dolore, par est? non enim is ego sum, qui meas partes aut ignorem, aut negligam. meum est, Ciuium otio, saluti, tranquillitque, consulere: meum, praestare, aut conari saltem, ut, quos potestati, fideique meae Deus commisit, aequo iure omnes regantur, nullius iniuriae pateant, nihil, contra leges, agant, nihil, praeter leges, timeant. Huius praeclari muneris cum ego te, pro tua praestanti, mihi iam pridem cognita, uirtute, ministrum, participemque, delegissem, gratulabar, & mihi, & ciuibus meis, non mediocriter; mihi, quod magna laboris parte me leuaret industria tua; Ciuibus, quod omnes, te iudice, libenter uerentur, optime de tua, non solum doctrina, uerum etiam probitate, sentientes. nunc, sic officia, studiaq. illa intermittis; si languidibus ea curas, quae
ad

ad Populi fortunas pertinent, quaeq. ego curavi a te diligentissime, & volui in primis, & putavi; vereor, ne quotidie vocularum exaudias hominum, te accusantium, quod a pristina causa desciveris, & a virilibus institutis ad molliem quandam, inanemq. voluptatem, deflexeris. Erunt etiam fortasse nonnulli, qui me, non adductum iudicio, sed amore lapsum, tantas res tuae fidei, constantiaeque, non satis prudenter commississe dicant. quibus ego quid respondeam, quoniam ipse non satis dispicio, tu, qui vides acutius, doce me. equidem nihil malo, quam, & te tui quamsimillimum esse, & me mei iudicii numquam paenitere. quod si secus euenerit; errasse me, cum aliquo existimationis meae damno, facile patiar; tuo cum dedecore, seram iniquissime, addito praesertim meorum Civium dolore, qui te in oculis iure ferunt, nec adspectu carere tuo possunt, nec sermone, & consilio privari. Quae propterea ad te scribo, ut intelligas, quantam animo curam sustineam, quanta tua res agatur; & ideo operam des, & ut & me sollicitudine, & te infamiae periculo, aut certe hominum sermone, liberes. Scribo autem serius, quia pendebam animi, nec satis, quo tecum uterer officii genere, constabat. gratularer? at contra sentiebam. dolorem? at male ominari visus essem, in ea praesertim re, in qua tibi, vel si damnum aliquod res publica faciat, secunda tamen omnia sic exopto, ut in hoc studio fere tecum certem, alios quidem omnes facile vincam. Vale, & ita frui domesticiis bonis, ut publica ne negligas. qua de re non mea quidem ulla suspicio, sed vereri me nonnumquam cogit dubitatio multorum: quam cupio falsam, & inanem esse.

PAVLO . STEMPOVIO

Neapolim .

4

ET SI iam litteras tuas, a Gorscio remissas, acceperam: tamen hunc ex earum tarditate cepi fructum, quod tu, dum te ita purgas, quasi ea res ad officium tuum pertineat, & longiorem scribis epistolam, & in eo me tibi haud mediocriter obstringis, significatione quadam amoris, & iudicii de me tui. Ego, Stempoui, cum omnes homines, ab ineunte adolescentia, in quibus aliqua virtutis elucere signa perspicerem, colui, quantum in me fuit: tum vero nationis vestrae probitatem, modestiam, & propensa in primis ad liberales doctrinas ingenia, mirifice semper dilexi. itaque, cum ad me tuos de Rep. libros Gorscius attulisset, petiissetque, tuo nomine, si quando vocarem, ut eos legerem; lectis, exponerem, quid sentirem: facile impetrauit; non modo, quia facultatem ineundae a Polonis gratiae non libenter amitto; sed etiam, quia multorum sermone cognita mihi virtus, & humanitas tua ita me incenderat, ut vehementer expeterem amicitiam tuam. peropportune igitur accidit, quod ego minime cogitabam, ut scripta tua ad me mitteres: sed valde contra meam voluntatem, quod ea tam cito repetieris. opes enim ingenii, doctrinaeq. tuae, quibus frui diu volebam, quasi praeteriens adspexi. intellexi tamen id, quod Gorscio significavi, peruolutasse te, nequaquam remisso animo, omnes omnium libros, egregia quaeq. tum veteris, tum re-

ce

centis historiae delibasse; nec eo contentum, addidisse rebus ordinem ornamentis Latinae linguae, quantum argumenti ratio ferret, usum esse. nunc, si auges, ut scribis, industriam tuam; & id cogitas, ut, cum opus absolueris, ac perpolieris, iterum ad me mittas: gaudeo, & spuo animo, spe futurae voluptatis, quam legendo antea degustavi, nunc haurire, si per te, liceat, uberiolem cupio. Nam, corrigendi partes, quas mihi videris imponere, si accipiam, faciam impudenter: quid enim in tuis scriptis eiusmodi est, quod aequus iudex damnare possit? sin autem recusem, culpam inhumanitatis extimesco: & vereor, ne tu me, cui minime omnium displicere velim, rusticum quendam esse hominem, agrestemque, suspiceris. hoc igitur arbitrato tuo: ego, quod in me est, desiderari abs te non patiar officium meum. Vale.

Romae, XIIX. Kal. Quint. M D L X V I I.

PERGRATVS mihi fuit aduentus Perseizum, quod ipsum diligo, amici mei filium, ingenio, & moribus ornatum; tum, quod benevolentiam in me tuam humanissimo sermone exposuit. agerem gratias, id si benignitas tua pateretur, & nisi referre mallet studio, officio, obseruantia: quod ut assequar, operam dabo.

E I D E M, Neapolim. 5

BELLARIA, de quibus antea scripseras, heri vesperi, per familiarem suum, ad me misit, egregiae vir humanitatis, amicus meus, Georgius Ticinius. sa-

C c 3

ne nihil

406 PAVLLI. MANVTII

ne nihil gratius, hoc praesertim aestu: sed, quaeſo, cur
tam multa? sunt enim vascula viginti quattuor: nae t
I V. aut V I, si noſſes imbecillitatem ſtomachi mei, per
totam aestatem, ſatis eſſe duxiſſes. agnoſco igitur coniun-
ctam amore liberalitatem. ille enim, vt mitteres, admo-
nuit; haec, ne pauca mitteres. in quo illud te cupio cre-
dere; quamquam haec ſint ſuauiſſima, me tamen frui li-
bentius memoria tui, laetariq. potius, quod me dignum
putaueris, quem tu muneribus afficeres, quam ſi me om-
nium munerum copia cumulaffes. quare peto a te, mihi
vt conſerues amorem tuum; a meq. exſpectes ea, quae,
qui vehementer amat, praestare conſuevit. Vale.

Romae, I I I. Kal. Quint. M D LXVII.

VINCENTIO. MACARIO

Scylacaeum.

6

LITTERIS tuis, humaniſſime, & ornatiffime
ſcriptis, nec reſpondere multum poſſum, cum diſtingar
negotiis; nec nihil debeo, cum, in officio non reſpondere,
turpe ſit. Scylacaei te ſuſtinere munus erudiendae iuuen-
tutis, valde laetor. amo enim Gerondae mei patriam, cu-
ius mihi memoriam nulla dies ex animo delebit: qui ſi
viueret, non dubito, quin mecum eſſet; iſdemq. ſtudiis,
eodem vitae genere, fruemur. Franciſcum, fratrem tuum,
noſtri memorem eſſe, gratum in primis eſt. equidem &
illum, & te ſimul, ita diligo, cum vtrumque excellere lit-
teris, ac moribus, intelligam, vt, ſi quid aut honoris, aut
commodi veſtri gratia praestare poſſim, in eo curam on-
nem, ope-

nem, operam, industriam, collocare cupiam. Quod ad mutatam scribendi rationem attinet, hunc tibi scrupulum Filii mei liber eximet, quem, de Orthographia scriptum, edidit anno superiore. Vale. Haec scripsi raptim, animo alia cogitante: quod velim ignoscas.

Rome. x. iix. Kal. Quint. M D Lxvii.

IO. FRANCISCO. CREMONAE

Ferrariam.

7

ANTEA sollicitus eram, facta rei familiaris iactura; quod acciderat, quorundam hominum, incuria, dicam, an socordia? nunc autem, quod amissa recuperaverim, laetor equidem, sed ita, ut dolere simul cogar, quod amicis meis aliena culpa molestiae tantum attulerit. te enim, vir optime, atque doctissime, quamquam ignotum mihi de facie, tamen amicum, appellare non dubitem. nam, cur aut exim non amem, aut ab eo me amari non putem, cui cum paullo Sacrato, omnibus mihi officiis coniunctissimo, summam intercedere necessitudinem intelligo? Quod si studiorum, ac morum similitudo amicitiam contrahit: cur non animis coniungamur, quamquam locorum intervallis disiuncti? Iam illud, quod tuus fraterq. tuus Alfonso, virtute tibi, & probitate simillimus, operam dedistis, idq. auctoritate, studio, diligentia consecuti estis, ut mea domestica supellex, ad alienas manus per errorem transducta, ab iniusto possessore vindicaretur, cum eiusmodi est, ut vestram erga me voluntatem & singularem quandam ad bene merendum pro-

Cc 4 pensio-

pensionem ostendat; tum ita me afficit, itaq. utrique obstringit, ut omnia, me debere vestra causa existimem. utinam ea fortuna essem, ut aequare animum officiis possem. profecto vel humanitate vestra, vel amore meo, nihil esset illustrius. sed, quia tam infirmum, aut tam humilem esse neminem constat, qui, si ad aliquam rem studia sua conferat, non aliquid, atque adeo multum praestet: fore non despero, ut merita meritis aliquando compensentur, & quantum vos in mea re ad exitum perducenda laborastis; tantum me, de gratia referenda, cogitasse omnes intelligant. sin voluntati facultas defuerit, peto a nobis, ut me tamen frui sinatis amore vestro: quo mihi cari-
us, aut antiquius, esse nihil potest. Vale, & Alfonso fratri salutem a me plurimam.

Romae, IV. Kal. Quint. M D L X V I I.

CLAVDIO. STRAMBONIO

Camerinum.

8

DELECTOR non parum memoria nostri tua: sed, eam iis declarari epistolis, quibus nihil elegantius, nihil suavius esse possit id vero est, quod maximopere gaudeam. quamquam, utri potius, tibi, an Falconio nostro, iuveni humanissimo, atque doctissimo, de hoc officio gratias agam, interdum subdubito. ille enim, ut eloquentia valet, paene mihi persuasit, sua cohortatione te esse adductum, ut scriberes. quod ei si crederem, susceptam a me opinionem humanitatis, & amoris in me tui, cogerer deponere. Quid igitur faciam? quod Academici solent: as-

sensum

sensum sustinebo: ne, si Falconio non credam, eius fidē,
cui multum tribuo, in dubium reuocem; si credam, detra-
xisse aliquid videar de beneuolentia erga me tua; quo
mihi molestius esse nihil possit. Quod si te impediunt ne-
gotia: hoc ipsum scriberes. ego enim ab amicis non plus
exigo, quam praestare possint. neque tamen amicitias
metiri soleo crebritate litterarum. fidem, & officium, se-
mel expertus, eadem, si res postulauerit, expecto; sin ali-
ter euenerit, leui culpa non condemno; & facio perinui-
tus, ut amari me non putem. Quare tuis occupationibus
ignosco, quod, a discessu tuo, rarius ad me scripseris:
tu quoque, velim, habeas rationem negotii mei; quo sic
urgeo, ut respirandi facultas non detur. Vale.

Romae, xiv. Kal. Sext. M D LXVII.

MARIO CORRADO

Salernum

ETSI mihi tui litteris nihil solet esse incundius: quā
tamē prid. Id. Sep. ad me misisti, legi perinuitus. sic enim
ad me scribis, quasi de mea erga te beneuolentia dubites.
Ego, mi Mari, a quo primum tempore certam uitae meae
rationem institui, semper id spectavi maxime, ut, quos se-
mel diligere coepissem, eos non solum sponte nulla re of-
fenderem, verum etiam, accepta interdum iniuria, ma-
ioribus complecterer officiis, hoc institutum cum mihi ad
hunc diem placuerit: fore non opinor, ut posthac umquam
displiceat, quod si tu secus existimas; & si me vulgari
quadam regula metiris, vel quia sensus meos, cum lon-
ge a me vixeris, ignoras; vel quia, nonnullorum ho-
minum

minum perfidiam expertus, de reliquis idem facile suspicaris: libenter equidem tibi istum, si possem, errorem eriperem: sin id mihi per te minus licet, me tamen in te amando fides, & constantia mea delectabit, vberemq. satis ex ipsa conscientia fructum capiam. Tuas paries in amicitia quae sint, ego tibi, excellentis ingenii, ac doctrinae viro, non praescribam: tantum illud dicam, quo tu nunc mecum genere litterarum usus es, id mihi parum ad conglutinandos animos aptum videri. aut enim haeret aliqua in me culpa, & eam tu notas, ac reprehendis, quod quale sit, non equidem intelligo; nec vero possum intelligere, cum nihil sit: aut culpam tu nullam in me vides? & coniectura tamen aliqua ducis ad suspicandum. certe enim suspicari te nescio quid, verba illa tua significant: Ego à te solum amari cupio: oro te, & obsecro, nihil aliud aut uulgare de me existimes: actum; a me tecum haecenus uere, & amanter. Quid? an ego aliquid commisi, ut de mea in te voluntate secus indicare posses? aut ego te umquam accusaui, quasi minus vere, aut minus amanter mecum egeris? Nisi si, quia litteris tuis, homo, sexcentis curis implicatus, non illico responderim, propterea vel me tibi credis immutatum, vel id agis, ut ego te mihi subiratum putem. Ego autem si essem ad mutationem, vel natura, vel consuetudine, proclivior; tamen ita de studiis tuis, ita de ingenio, & eruditione, ita de moribus, & integritate sentio ut, nisi mihi sincere indicandi facultatem casus aliquis adimat, immutari tibi nullo modo possim. At creberrimae tuae litterae, meae rariores. Diuersa ratio est: nec, si tu id facis, quod si omitteres, fortasse peccares; & , quia non omittis,

omittis, agnosco, & amo vehementer amorem in me
 tuum; ideo sequitur, ut, quia non ego idem facio, &
 istam officii partem, districtus negotiis, praetermitto, lan-
 guere me iure putes in studio tui, & in amore illo, quem
 cum pepererit tua virtus, noli dubitare, quin eadem alat,
 atque conseruet. Familiares tuos, cum ad me venerunt,
 & quoties venerunt, accepi, quantum in me fuit, huma-
 nissime; neminem exclusit, aut excludet umquam occu-
 patio mea. vix enim credas, quam de te libenter aut lo-
 quar, aut audiam. Quare, quod ais, ne cui posthac, qui si
 ne tuis litteris ad me adeat, velim credere: id equidem
 scripsisse te nollem. cur enim, si quis expetit amicitiam
 meam, & eam se consequi facilius putat, si te ornet lau-
 dibus, teque sibi, in optima studiorum via, ducem fuisse
 dicat; quod video multos, cum quadam ambitione, prae-
 dicare: cur, inquam, hac me voluptate privas, ut ei non
 credam, qui narrat ea, quae libenter audio? Patere igi-
 tur, amicos tuos, cum iidem amici mei esse volunt, adire
 ad me arbitrati suo, & , quamquam testimonio careant
 litterarum tuarum, mihi tamen, ipsa tantum tui nominis
 appellatione, commendari. Vale.

Romae. x. Kal. Oct. M D L X V I I.

FRANCISCO. PLANTEDIO

Neapolim.

IO

VERE dicam, Plantedi: magnopere sum delectatus
 iis laudibus. quibus me, cum de Ludovici Ariosti poe-
 mate meam sententiam exquirere cogitasses, ornandum
 existimasti.

existimaſti; neque vero, quod ipſa laude admodum capi-
 capiar: me enim quotidie magis, ab ambitione, cum
 ratio, tum iam aetas remouet; ſed quod amoris in me
 tui, vt ego interpretor, index laudatio eſt. amari autem
 ab eo uiro, qui excellat iis artibus, quas in omni aeta-
 te diligenter colui, quaeq. rebus omnibus antecellunt,
 cur non gaudeam? Amplector igitur iſtam voluntatem,
 & habeo gratiam, non modo, quod ita de me ſentias,
 verum etiam, quod eos, qui contra ſentiant, Obre-
 ttores, & Inuiduos, voces. cum quibus tamen, opti-
 me Plantedi, pugnare te, mea cauſſa, nolim. nam, ſi
 laudem quaeram: tu mihi multorū vnus inſtar ſis, cuius
 doctrinam, & eloquentiam in ſcriptis video; probita-
 tem, & mores de multis audio. Sin, quod vera eſt,
 ipſa me ſola virtus afficit, cetera parui pendo: ſinamus,
 placere ſibi vnumquemque, & in ſua ſententia trium-
 phare: nos inſtitutum retineamus, & in hoc ſiue, vt iſti
 volunt errore, ſiue, vt ego iam pridem ſtatui, veritatis
 amore ac ſtudio pergamus, Epistoſa tua, & verſus,
 redolere mihi pariter antiquitatem videntur. quo tibi no-
 mine, vehementer gratulor. quibus enim contingat, vt,
 in vtraque facultate, excellent, pauciſſimos in omni ae-
 tate fuiſſe non ignoras. De Arioſti poemate, hic quo-
 que ſunt, qui diſputent, in vtramque partem; cum alii
 ſuum iudicium ad Ariſtotelis praecepta referant; à
 quibus quem diſcedere intelligunt, eum ſtatim e poeta-
 rum numero extrahendum cenſent: alii uero, ſiue res,
 ſiue verba ſpectentur, Ariſto tantum tribuant, non
 modo vt eum ad ceteros poetas aggregent; verum etiam
 cum illis poetarum principibus conſerendum ſtatuant.

Mihi

Mihi npr tantum otii suppetit, vel ut hoc totum, quid-
quid est, considerem, vel ut meam sententiam litteris
exponam. Vale.

Romae, nonis Sept. M D LXVII.

ANTONIO. MERVLAE

Casertam.

II

Nihil mihi gratius, aut iucundius iis versibus
accidere potuit, quos a Berardino Rota, praestante vi-
ro, de me conscriptos, ad me antea misisti. quo sane mu-
nere ne uiderer indignus, cupiui statim paria paribus,
& ut assequerer, elaboravi: sed, cum non procederet,
indignantibus Musis, quasi eas per tot annos, conuer-
sus ad alia studia, neglexissem, distuli rem, consilium
non abieci. non enim fore desperabam, ut aliquid ali-
quando, tamquam e quercu, exculperem, quod sum-
mus poeta cum videret, si minus ingenium probaret,
id quod equidem sperare numquam ausim, animum sal-
tem, referendae gratiae cupidum, diligeret. Sed ecce
tibi ista, difficultatibus ita multis implicata. Breuiarii
mutatio, nihil ut laboriosius, aut molestius, umquam
senserim. necdum tamen eo loci res est, ut ea, quae flu-
ctuabant, recedisse uideam. quo maiore versor in solici-
tudine, non solum, quia careo litterulis nostris, in qui-
bus antea uuebam, sed etiam, quia, seiunctus ab a-
micis, vereor interdum, ne quis, mearum ignarus oc-
cupationem, exsuisse me putet ueterem humanitatem,
& officii curam, quae mihi olim prima fuit, penitus
abiecisse. Quare, te rogo, pro eo, quantum me amas,
& quan-

Et quantum te amari amescis, des operam, ne quid Ro-
ta de me suspicetur durius. nosti meos mores: nosti ani-
mum: quem si alia fortasse labes inficui, certe, ad amico-
rum obseruantiam, Et ad tuendam officii religionem,
quod attinet, prius est. De tuo statu, cum nihil scripseris
arbitror esse, ut volumus. Vale, Et Rotae salutem,
Romae, Kal. Nou. M D LXVII.

IACOBO. FALCONIO

Bononiam.

15

O ME credulum, qui te iitum in Hispaniam pu-
tauerim: quod cum ta affirmare non desineres, Maxi-
mus tamen noster perpetuo negabat. nimirum ille adole-
scens quiddam occultius, quod ego hebetior non viderem
assequebatur ingenio. nec me tamen hoc tecum queri pu-
tes: quin potius errore meo delector, Et, me delusum
esse, gaudeo. nam, si tam longe discessisses: primum veri-
tus essem, ne serius ad nos, deinde etiam, ne cum illo
Hispaniensi fastu, obliuis humanitatis tuae, redires.
nunc, mutato consilio, cum Bononiae confederis: non du-
bito, quin te ciuitas omnium humanissima, qualem dimi-
simus, talem nobis, ac melioribus etiam, si fieri possit, Et
litteris, Et moribus excultum, remittat. De Sigonii con-
suetudine, valde tibi gratulor. cole istum virum, Falconi
quem habemus in Italia, non solum doctrina, verum
etiam probitate paene singularem. Vale, Et Iacobo Bon-
compagno salutem à me plurimam.

Romae, VI. Nou. M D LXVII.

10.

IOANNI. BAPTISTAE. ARCVTIO

Neapolim.

13

ET bene te sentire de studiis meis, deq. laboribus illis, quos, iam a prima adolescentia, patris adductus exemplo, ad restituendam antiquitatem contuli, & me etiam diligi a te, video. quod cum utrumque mihi gratissimum esse, tum a me tibi parem in utroque gratiam referri, velim existimes, nam, cum epistolam tuam legissem; valere te ingenio, praeferre litteris, facile iudicavi; & ad iudicium accessit benevolentia, nec ea vulgaris, sed quam tam virtus, & studiorum similitudo gignit. quare, persuasum hoc tibi, planeq. exploratum esse cupio, quaecumq. a vetere necessitudine expectari officia solent, ea tibi a me, si qua tui dabitur facultas ornandi, praesto semper futura. De Ariostolis, & contentio non placet: antiqua me delectant, eaque tracto, utinam tam feliciter, quam laboriose. si quis in eo suam industriam locat, ut ipse excellat, consilium probo; aliena qui tantum indicat, eum ego, vel si recte indicet, non libenter tamen imitabor. Vale.

Romae, v. Id. Nou. M D L X V I I.

ANTONIO. FVRNARIO

Neapolim.

14

UTRUMQUE laetor, & fortunis tuis aliquid esse additum, & amori erga me plurimum. at multi contra,

416. PAVLLI MANVTII
tra vel dignitate, vel commodis aucti, contemnunt vete-
res amicos, & officio multam salutem dicunt. quod hic
nos experimur quotidie. Quod me annuo munere afficis:
agnosco humanitatem tuam. quod vero, id te tribuere vir-
tuti meae, dicis: maiore etiam me ornas munere. noli au-
tem arbitrari, tam desipere me, ut disputare tecum ve-
lim, & quaerere, vere ne sentias, an secus. facio non inui-
tus, ut iudicium tuum cum mea laude coniunctum tuear,
ac probem. De anno, quem Scalarem vocant, ne tanti
Firmicus, & qui cum eo sentiunt, apud te sit, ut animi
tranquillitatem amittas. quae enim impendent, si sunt
eiusmodi, ut euitare prudentia possint: spero fore, nihil ut
te laedant. sin ea fixa sunt: praeripere molestiam, & ang-
frustra, certe non oportet. Ego valetudine vtor satis com-
moda, re familiari, si spectentur labores mei, parum copio-
sa; si ratio temporum, satis ampla. Vale.

Romae. xvi. Kal. Febr. M D LXX.

NICASIO CASLETANO

Patavium.

15

OPTABAM, ut emergeres ex eo vitae genere:
quod neque studiis, neque fortunis tuis aptum uidebam,
angebatur tamen, eripi nobis fructum suauitatis, & doctri-
nae tuae, hac praesertim proborum, atque erudi totum ho-
minum, id est tui similitum, caritate. nunc, ex tuis litteris
cum intelligam, ordiri te nouum quoddam uitae genus;
medicorum antiquorum libras euoluere coepisse, ne post-
hac, inani spe ductus, aliunde pendeas; frui non modo fa-
miliaritate, sed conuictu etiam, ac domo praestantissimi
iuuentis,

iuuenis, Io. Vincetii Pinelli: abstergo prorsus illam ex
 animo molestiam, quā discessus mihi tuus reliquerat, teq.
 istic esse, ubi otio, libris, doctoribus abundes, & eam, quae
 maxime ingenium adiuuat, quam paene hic amiseras, ani
 mi tranquillitatem non desideres, uehementer gaudeo.
 De epigrammate, Sammarcus agit gratias: ut referat,
 non exspecto. cupedias tamen si habebo, ita non contem
 nam, ut nos omnes amem. quid enim quisque praestite
 rit, non ignoro. Vale, & Pinello. Sammarco, Andreae
 Siluio, qui me olim diligere uidebatur, multam salutem.
 Romae. pridie Kal. Febr. M D L X I X.

C H R I S T O P H O R O
 BARONI. LOBCOVICZIO. 16

N I M I V M agis mecum liberaliter, cum tu mihi
 principis uiri filius, homini priuatae fortunae, nullo meo
 prouocatus officio, tuam beneuolentiā sponte defers. quod
 ego beneficium tanti facio, nihil ut antepo nam. cum enim
 ita uitam instituerim; ut uirorum nobilium amicitias ex
 peterem: tum eam nobilitatem praecipue colui; quae licet
 aliquid extrinsecus assumat, maxime tamen a se ipsa pen
 det, ac praesenti uirtute decoratur. quam tibi placere sen
 tentiam uideo, & dare operam, ut, quod maxime probas,
 id maxime consequaris. itaque sic uelim tibi persuadeas,
 nihil omnino mihi uel carius esse posse, uel incundius ami
 citia tua: non eo solum nomine, quod illustri sis admo
 dum loco natus, quod patrem habeas, qui Bohemiae cum
 summa potestate praesit, qui omni honore, omniq. laude
 floreat: sed multo magis, quod & audio, & ex tuis lit

D d teris

418 PAVLLI. MANVTII
teris coniicio, defixum te esse in praestantibus curis, et ea
quaerere, unde uerum decus, uera nobilitas emanat. ita
fiet, ut, quantum ad splendorem domesticum sua uirtute
addidit pater tuus, tantum ipse ad paternum decus, uolun
tate nunc simillimus, uirtute aliquando praestantior, ad
iungas. Incumbe igitur, clarissime adolescens (iam enim,
ne abs te in amore uincar, laborare me aequum est de glo
ria tua) incumbere, obsecro, & huc omnes neruos, omnem
industriam confer, ut ornamenta referas in patriam, quae
tua propria sint, quaeque tibi nulla umquam fortunae uis,
nulla mutatio temporum auferre possit. Quare cohortatio
nec longior esse debet, cum te tua sponte propensum satis
esse ad omnem laudem intelligam; nec omittenda tamen
fuit, cum hoc apud te uellem relinquere, quando aliud
praestare tua causa uix possum, testimonium amoris, &
obseruantiae erga te meae. Vale.

Romae. IV. non. Feb. M D L X I X.

PETRO. MISCOVIO 17

Ex iis rebus, quarum memoria delector, nulla ma
gis recreor, quam conscientia obseruantiae erga te meae,
& opinione amoris in me tui. inde fit, ut & optem tibi se
cundissima omnia, &, cum optata contingunt, uehemen
ter gaudeam. quamquam quis non gaudeat, cum debita
uirtuti praemia tribuuntur? cum excellit honore, auctori
tate, opibus, qui excellit ingenio, industria, probitate? ita
que, cum tibi Episcopatum Plocensem esse demandatum
cognouissem; gratulatus sum tibi primum pro amicitia
nostra, meoque in te studio singulari: deinde bonis artibus,
quibus

quibus ex tua dignitate tantum ornamenti, tantum splendoris accessit. Hoc exemplo, quis fore iam dubitet, quin omnes non modo in Polonia tua, verum in longinquis etiam nationibus, quo tuorum meritorum fama peruenierit, ad excellentem verae gloriae cupiditatem excitentur? aequidem, cum audio, quae partim ab aliis, partim a probo & prudente viro, tuarum laudum praecone, Metello Venturello assidue narrantur. ita commoveor, non equidem ut adspirem, quo peruenire non licet: (non enim me tibi ulla re confero) verum ut in praestantibus doctrinarum studiis, unde fluxit amplitudo tua, languere nullo modo possint. atque etiam adducor in illam spem, fore prorsus, ut excellentibus ingeniis, quibus abundat in primis patria tua, auctoritas, gratia, opesque tuae pateant, sic ut ad magnas res, magnopereque expetendas, tuo potissimum patrocinio nitantur. ita nascetur ex virtute virtus, & propagabuntur illa, quibus a turpi otio ad laudabilem industriam, ab iniuria ad aequitatem, a feritate & discidio, ad societatem, & conuictum humana vita conuertitur. cuius tanti boni ut auctor esse velis; iam enim posse te, satis constat: ne rogandus quidem es. cum hoc a te tua dignitas, et anteactae vitae ratio quasi suo iure postulet. Vale.

Romae. Id. Feb. M D L X I X.

FEDERICO VIVALDO

Neapolim.

18

MAGNUM humanitatis, magnum amoris argumentum, non solum ad me scribere, quem numquam, ut opinor, de facie noueris, verum etiam, quae tua sunt, omnia

D d 2 nia

420 PAVLLI. MANVTII
nia mihi perliberaliter offerre, ac polliceri. Ego, mi Vinal
de, voluntate sum contentus: cetera non desidero. amari
enim cupio: prodesse vero amicis malo, quā debere. itaq.
licet amicitia nunc primum inter nos exoritur, tamen sic
velim existimes, quae res ad existimationem, aut ad com
modum tuum pertinebunt, in iis rebus me esse operam da
turum, ut familiaribus tuis vetustate quidem, & opibus,
officio tamen concedam nemini. nam, si, amantem non re
damare, turpe est: multo magis eum, qui ingenio, doctrina
multis denique, ut audio, suauitatibus ingenii ita floret,
ut eius amicitiam, qui recte sapiat, in rebus valde expe
tendis numerandam putet. Quod ob eam causam scribo,
ut intelligas, cum tibi me gratias agere, tum gratulari mi
hi plurimum de beneuolentia tua: de qua, si umquam cō
mijero, ut aliquid mea culpa detrabatur, hominem me
non putabo. Vale. Ro. x v. Kal. Mar. M D L X I X.

PAVLLO. LVPO. 19

ETSI cum tuum erga me non mediocre studium fa
cile mihi antea cognitum, atq. perspectum, tum mea in te
singularis beneuolentia postulare videbatur, ut viscerem
te quam creberrime, tertium iam mensem difficili morbo
laborantem: tamen id non feci, non equidem obliuione tui
quem fero in oculis ob egregios mores, optimamq. indo
lem; sed partim valetudine, qua, propter nimis longam
verni temporis intemperiem, incommodiore adhuc vtor:
partim etiam occupatione molestissima, qua ita distineor,
ut pedem ex aedibus efferre perquam raro liceat. Quod
reliquum fuit; quotiescumque vidi (vidi autem fere quo
tidie)

tidie) familiarem tuum, mei studiosissimum, probum iu-
 uenem, & eruditum, Iulium Iacobonium, cuius tu con-
 suetudini, atq. consiliis, quidquid aut in litteris, aut in mo-
 ribus ad hanc diem profecisti, acceptum referre solitus es;
 quam saepe de tuo statu quaesierim, quam sollicitus de tua
 salute fuerim, optimus ipse testis est. quod uinam, quan-
 tum doloris ex tuo periculo suscepi, tantum opis ad te sub-
 leuandum afferre potuissem. nae tu nunc, plane integer,
 & saluus, nullam pristinae valetudinis partem deside-
 rans, nobiscum esses, ut interdum solebas, nosq. tuo lepo-
 re, tua venustate, tu nostra consuetudine, nostra etiam, si
 qua est, hilaritate fruereris. quod tamen breui futurum ita
 spero, ut valde tibi primum, deinde etiam nobis gratuler.
 non enim dubito, quin statim repetas ea studia, quae non
 vulgari cum laudes tractabas; quaeq. te (libet enim au-
 gurari, quod opto) ad summās opes, summamq. dignita-
 tem, fauente praesertim, atque adiuuante patrono omnium
 bonarum artium, omni virtute praedito, Cardinali. Alcia-
 to, aliquando extollent. nihil est enim, ut exemplis & an-
 tiquis, & recentibus erudimur, quod hominum studia ad
 utilitates nostras magis alliciat, quam virtus: nihil magis
 & humana nobis omnia subiicit, & aditum ad caelestia
 patefacit. Quare, cum tibi nec instrumenta naturae desint,
 quorum expertes multi, optima voluntate, studio flagran-
 ti, nihil tamen vel mediocri laude dignum praestare po-
 tuerunt; neque vero ex iis rebus ullam requiras, quae si
 absint, praeclarae saepe cursus impeditur industriae: de-
 bes animum in spem optimam erigere, omniq. cura ad re-
 cuperandā valetudinem incumbere. medicos habes, qui
 locum in ciuitate principem obtinent: mater assidet aegra

to, curat, exsequitur omnia: amicorū nec salutationes, nec officia desunt: haec speramus fore salutaria: sed, mihi crede, medicina praestantior in te ipso, idest in cōstantia, prudentia, temperantia tua, reposita est. Consule igitur, quantum potes, & saluti, & gloriae, & parentis etiam vitae: quam filii iacentis adspēctus exanimat: amicis vero tuis, maerore adempto, veterem iucunditatem aliquando restitue. Quod si, expertus omnia remedia, placere Deo senseris, ut haec humana relinquas; quae quam caduca sint quam numquam firma, quam saepe exitiosa, profecto vides; agnosce tuam felicitatem, ad eamque propera laetissimo animo, relictis erroribus, quibus ii, qui hac diutius compage corporis includuntur, falsa rerum inanum specie decepti, ita saepe implicantur, ut numquam ad veri boni cognitionem perueniant. nos quidem, qui, te isto uexari morbo, patimur iniquissime, iidem, si contigerit, ut in ista aetate, istis moribus, ista mente, nondum terrena contagione deprauatus, aut mortiferi criminis labe pollutus, hanc miserrimam vitam cum illa bonis omnibus circumfluente permutes; laetabimur & exitu optato molestiarū tuarum, & initio beatæ vitae, ad quam adspirare paucissimis licet. Vale.

XIIII. Kal. Maii. M D L X I X.

AVGVSTINO . ANGELELLO

Fabrianum.

20

NISI tibi, quae nunc meae vitae ratio sit, quibusque curis & negotiis distinear, satis cognitum credere;

rem: sane afficerer magna molestia, quod tibi, viro optimo, atque in primis erudito, praeterea, quod res ipsa declarat, mei amantissimo, deesse videretur officium meum. sed profecto, si me putas ab ineunte aetate iis artibus, ac studiis non mediocriter esse delectatum, quibus ad humanitatem animus excolitur: aequiorem te mihi esse oportet, nec suspicari, quia rarius ad te scribam, non video me tibi, quas debeo, gratias, habere, nec diligere & amplecti diligentiam, industriamque tuam, quam, quotidie locas in antiquitate colligenda: cuius ego maiorem officii partem libenter acceptam refero benevolentiae erga me tuae. Ne tamen superuacaneam operam suscipias, cum praesertim otio non abundes: hoc velim scias, omnes me cum veteres, tum etiam proxime Auximi effossas inscriptiones, in quibus hae quoque duae sunt, quas ad me misisti, ante duos menses accepisse a Io. Francisco Gallo, ciue Auximate: & quod tu scripsisti, F. POLLVCI. ille, LI. POLLVCI. quod tu, TVRCIVS. C. F. ille TVRCIVS. C. F. s- quod Sergiae tribus nomen fortasse fuit. nam & infra video, C. F. SER. nisi si, SER. N. idest Seruii nepos, legendum. quod ut diligenter inspicias, mihiq. significes, valde rogo. Filius abest, Venetias anno superiore cum matre negotii causa profectus. Vale.

Romae. nonis Apr. M D LXXIX.

Dd 4 1A-

IACOBO . FALCONIO

Pifas .

21

ETSI tuis litteris magnopere delector, in quibus
 & amorem erga me singularem, & ingenii tui praestan-
 tiam facile perspicio: & tamen, ut hoc nostrae neces-
 situdinis officium persoluas, auocari a studiis tuis, aut
 etiam ab amicorum sermonibus, minime velim. scis
 meam consuetudinem. neminem diligo, quem non pro-
 bem: quem porro coepi diligere, tantum abest, ut exi-
 gam ab eo plus, quam praestare possit, ut etiam, si quid
 peccauerit, remittam. quis enim est, qui leges amici-
 tiae perpetuo seruet? quamquam te quidem ab hoc nu-
 mero non minus vere, quam libenter, segrego. noui tuam
 constantiam, noui curam, atque industriam, in quacum-
 que re amor eluceat. quae quo rariora sunt, eo magis hic
 te desidero: nec desiderium ferrem, nisi cogitarem, eo
 te consilio discessisse, ut auctus virtute ad nos redeas.
 quod ut assequaris, ita cupio, ut parenti tuo concedam,
 praeterea nemini. Ioannem Riccium Politianum, illu-
 striam virtute adolescentem, qui aliquando mecum in
 tuis aedibus, inuitatu parentis tui, viri optimi, cena-
 tus est, audio Pifas breui, studiorum causa, venturum.
 eum velim roges, ut me diligat, quando ego singulari
 sum in illum beneuolentia, sic, ut te aemulum vix
 patiar. Salutabis meo nomine exquisitae doctrinae
 uirum, poetam summum, Petrum Angelium Bar-
 gaeum, qui Latinam, & Graecam linguam istic pu-
 blico

blico munere maxima sua cum laude proficitur. Vale.

Romae, x. Kal. Iun. M D L X I I X.

IO. ANTONIO. VVLPIO. 22

VIX credas, quam me delectauerint inscriptiones a te missae: non solum, quia disertae, ac perelegantes; verum etiam, quia gratiae ineundae ab amplissimo viro, singulari virtute ornato, Thoma Altimaro, oblatam occasionem avidissime sum complexus. nam, quod inde natum est argumentum epistolae tuae, ita scriptae, ut summum ingenium, summum etiam erga me amorem ostendat: hoc ipsum apud me quanti esse putas? equidem, si qua est huius vitae felicitas, maiorem eius partem in hominum eruditione, et probitate excellentium, idest tui similium, amicitia constituo. Quare cum tibi maximas ago gratias, quod ad me scripseris, quodq. mihi haud paullo plus, quam agnoscere debeam, tribuere videaris, quippe cum ea reseras ad iudicium meum, quorum ego te, si arbitrii mei res esset, Aristanchum libenter statuerem: tum vero sic velim existimes, si quis est, qui tuae laudi faueat, qui tua praestantem doctrinam in ore habeat, qui deniq. tua causa summa omnia et cupiat, et curet, eum esse me, daturumq. operam, ut animum aliquando res ipsa declaret. De inscriptionibus indicavi Sanctae Seuerinae Archiepiscopo, quas probarem maxime: nullam tamen, ut vere dicam, improbare audeo; cum aliquid in unaquaque videam excellere. Vale, & Altimaro salutem a me plurimam. Romae. Kal. Iun. M D L X I I X.

VICEN.

VINCENTIO. RICCIO

A. SPE

23

MITTO, quae petis, omnia, praeter unam Petrarche paginam: quam ego, primum a pueris nostris, deinde a me ipso diligentissime quaesitam, ne inter fragmenta quidem reperire potui. Atticanis epistolis etsi adhuc mihi opus erat, tamen quando ita vis, & ego tibi tua petenti neque negare possum, neque volo, remitto tibi eas per eundem tabellarium, qui has litteras ad te perferet. Mihi quidem animus iste tuus gratissimus semper erit. verum tamen, mi Vincenti, si curabis, ut mihi de eodem volumine in aliquot dies commodare possis, impones operi praeclaro velut artifex egregius ultimam manum. nā ego non nisi libros quinque cum meo libro contuleram, reliquam partem ut absolvere aliquando possim, non petam a te pluribus verbis, ne videar benevolentiae tuae diffidere. Vides cupiditatem nostram. Tu statues in hac re, quod sit ex fide tua primum, deinde etiam ex voluntate mea. Ego te, & Peregrinum nostrum, & Hieronymum etiam in oculis fero. Venetiis. VII. Kal. Iun.

EIDEM.

24

HENDECASYLLABVM carmen, quo nos tam amice salutaſti, multis cauſſis legi perlibenter. primum, quod tuum erat, deinde, quod elegans, & ornatum, postremo

postremo, quod in illo mihi significabas memoriam tuam
nostrae necessitudinis, & benenolentiae. itaque non pos-
sum non tibi vehementer gratulari, mihiq. plurimum gau-
dere; tibi, qui tam egregie bonis in litteris profeceris; mi-
hi, qui talem, ac tã amabilem nactus sim amicum. Deus
igitur faxit, ut in hac animorum coniunctione ad extre-
mum vsque vitae cursum perseueremus, & quae summi
amoris uterque fundamenta iecimus, ea non solum confir-
memus, verum etiam augeamus. sic enim habeto, qui pro-
pter egregias animi, ingeniiq. tui suauitates vehementer
te diligant, esse quamplurimos; qui mihi sint in te aman-
do pares, esse uel paucos, uel fortasse neminem. Sed haec
satis. Illud curabis, ut erudito iuueni, Cornelio Diuo, sa-
lutem meis verbis annuncies plurimam. Bene Vale.
M D XXXI. pridie non. Sext.

E I D E M.

25

V I D E, quanti mihi sis, quantumq. te diligam: ubi
primum ex balneis reuerti, e vestigio ad scribendum con-
uolauit. quod ideo ad te scribo, quia non eius generis meae
litterae sunt, ut ex illis aliquid possis cognoscere, quod
aut nostra intersit, aut te scire necesse sit. vnum est illud,
quod velim, te intelligere, nobis Dei beneficio pristinam
salutem si non penitus, certe magna ex parte restitutam.
De meis studiis, propter diuturnam valetudinis infirmi-
tatem, prope iam actum videtur. ego tamen, ut spero, quid
quid omissum est temporis, breui refarciam. Tu quid pe-
pereris, quid parias, vehementer scire cupio, non enim
is es,

429 PAVLLI. MANVTII
is es, qui patiaris tuum ingenium longo otio torpescere.
idq. cum praestas, non modo tibi utilitatem cum laude
quaeris, sed etiam tuis omnibus & amicis & propin-
quis, laetitiam atque gaudium affers. Bene Vale.
M D XXXI. XV. Kal. Sept.

E I D E M. 26

LEGI tuas litteras, perbreues quidem illas, sed
tamen valde mihi gratas. Laetaris, quod conualuerim;
ego contra, quod te repererim tam belle valentem. De
Cornelio quod scribis, non legi semel, sed bis & saepius.
habeo enim illum conuenire. tu, si libebit, eris mihi co-
mes in homine visendo,
M D XXXI. XII. Kal. Sept.

E I D E M. 27

MVLTIS, & iis quidem maximis argumentis
declaras mihi in dies tuum erga me amorem non confir-
mari solum, sed etiam augeri vehementer. Quod enim
tam ex animo delectaris nostra consuetudine, quod tam
frequenter nos uisis, quod tam crebro litteras mittis, cui
dubium esse possit, hoc ex nimia quadam in me beneuo-
lentia proficisci? Quare ferreus omnino sum, & humani-
tatis penitus expers, nisi te valde amem, & obseruem,
qui nos, nullo nostro erga te merito, & ames, & benefi-
ciis ita tibi obstringas, ut unde pares referamus gratias,
nullus

nullus iam relinquatur locus. Gratae igitur tuae litterae, eoq. magis, quod intellexi te Patauium cogitare; unde sperem te pro singulari tua prudentia, & in bonas artes propensione, amplissimam & famam, & celebritatem nominis ad tuos relaturum. Quod autem ad Graecas litteras animum appuleris, hoc tuum consilium & probo vehementer, & feliciter Deum Opt. Max. fortunae volo. crede enim mihi, nihil poteris praeclarius cogitare, quam cum Latinis Graeca coniungere. Sed, quoniam nostram epistolam, si longior exstitisset, futuram tibi gratiorem significas: sic habeto, mi Vincenti, nos prolixius ad te non scribere, quod neque prolixiores epistolas, quibus confirmetur, amicitia nostra videtur desiderare, neque mehercule valde est, quod scribam, quod aut nostra intersit, aut te scire oporteat. Nisi fortasse velis me scribere, in Italiam Gallos aduentare, & Venetiis visum esse cometam Sextili mense, & similia, quae minime te fugiunt. Quod si viderim te longitudine capi, dummodo tibi satisfaciam, inanes potius, quam nullas, ad te litteras dabo. Vale. pridie Idus Sept. M D XXXI.

EIDEM.

28

ET litteras, & libellum accepi, de quibus tibi gratias ago. neque vero mihi erat ignota diligentia tua, quam antea nobis, cum Venetiis viueres, idest cum in humaniora studia mecum incumberes, multis quidem argumentis declaraueras. Peregrinus, & ceteri communes amici salutabuntur a me diligenter, ubi primum

430 PAVLLI. MANVTII
mum eos offendam. Tu fac existimes, nihil esse, quod ab homine amicissimo proficisci possit, quod ego non velim te a nobis exspectare. fecit humanitas tua, quam mihi Patavii tam egregie significasti, ut ad antiquum amorem erga te meum addiderim etiam cumulum quendam benevolentiae prope singularem. amavi enim semper, & amor voluntatem hominum, quae mihi rerum omnium antiquissima est. itaque, contubernalibus tuis, & lectissimis viris, Augustino, Bartholomaeo, & Ioanni cum salutem dixeris, addes etiam, omne meum studium, & officium iis paratum esse, ac semper fore. quod ut aliquando tu cum illis experiare, dabo operam, quantum erit in me situm. Paulus Papiensis per me vobis omnibus salutem adscribi voluit, seq. constanter asserit perpetuo comitati vestrae deuinctum in primis fore. Si Bonamicus redierit, si mihi significabis, gratissimum feceris. Vale.

Venetis. Id. Sept. M D XXXI.

E I D E M.

29

POSTQVAM mihi renunciatum est, te Patavium, adipiscendae philosophiae gratia, concessisse, plurimum sane voluptatis animo cepi, & hoc tuum consilium etiam atque etiam tacitus mecum ipse laudavi. facit enim amor erga te meus, ut existimem, quidquid tibi conducatur, id mihi etiam expedire. atque tu, cum in tanta hominum luce, in tanta doctissimorum virorum frequentia vivas, non dubito; quin bonarum omnium disciplinarum, & laudatarum artium cognitionem brevi sis consecuturus

secuturus: novi ego ingenium tuum: novi impetus ad lau-
dem. itaque non adhortabor te ad eas artes, quibus ab ip-
sa pueritia deditus semper maxime fuisti. quid sit ante
acta aetate tua dignum, qui te mores, quod institutum vi-
tae deceat, tu videbis. Ego illud tantum tibi ante oculo-
los ponam, ut cogites, in ea te urbe nunc agere, quae
liberalium omnium doctrinarum hodie ueluti domici-
lium habeatur, & a qua inanem quemquam redire,
turpissimum sit. atque hoc satis esse arbitror ad excitan-
dum te ad honestas disciplinas. quamquam ne hoc qui-
dem ideo tibi propono, quod uoluntati, aut prudentiae
tuae diffidam, sed ut potius amor erga te meo, qui me ad
scribendum impulit, satisfaciam. quod tu cum legeris,
eo uelim accipias animo, quo nos & cogitauimus, &
scripsimus. Cornelium Diuum, Peregrinum Benzo-
num, Nicolaum Sonicam, & Hieronymum Riccium
Muranensem, communes amicos, meo nomine si sa-
lutabis, erit mihi uehementer gratum. Tu fac ualeas,
& me, ut instituisti, diligas. M D XXX I.

EPISTO.

EPISTOLARVM
PAVLLI. MANVTII
LIBER. NONVS

NICOLAO. CAETANO
CARDINALI



Gō vero fratris tui, Principis optimi, filios, praestanti ingenio adolescentes, & libenter sum complexus; & , perspecta singulari probitate, atque ad bonas artes propensione, quotidie magis utrumque diligo. Sed, ut, illorum praeclara ad virtutem indole, pro mea erga familiam vestram peruetere, perpetuaq. obseruantia, vehementer laetor: sic, ad excolenda eorum ingenia quod attinet, nec mihi vacui temporis esse quantum res exigit, nec facultatem, quae voluntatem aequare possit, non mediocriter angor. quamquam illis, ut video, quae aliunde petuntur, intra domesticos parietes abunde omnia suppetunt. ut enim reliqua omittam, cum in tuam vitam intuentur, cum tuos mores, tua instituta, tua studia, contemplantur, nullam praeterea disciplinam, nullius vocem, aut praecepta desiderant. verumtamen, si quando acciderit, ut ab iis occupationibus, quarum concursu paene obruor, respirare liceat, deesse vestrae cupiditati non patiar industriam meam. quod ut enitar, hortantur quidem multa, nihil tamen magis, quā epistola tua, quae me cum sermonis elegantia, tum significatione amoris, & iudicii de me tui sic

sic affecit, ut nihil umquam senserim iucundius.
Vale. x. Kal. Apr. MDLXIX.

PAVLO. MANVTIO

S. P. D.

2

SVPERIORIBVS proximis diebus sumpsit
mibi quiddam non alienum, ut arbitror, ab officio meo,
neque tibi aduersum, cum optimo animo tuiq. amantiissi-
mo, quae te ratio impulisset, ut de optimo Imperatore
Maximiliano, Domino meo, vere recteq. cogitata, &
ad Sambucum nostrum perscripta, ex libro epistolarum
tuarum tolleres, & bene culta euerteres, exquirere non
dubitaui. Magnum enim atque graue aliquid fuisse,
quod te ipsum quasi ad cuius laudes amplificandas illa,
quae diuulgaueras, pertinebant, inuerterit, statuebam,
& quin hoc cum iniuria, quae capiti Reip. Christianae
fieret coniunctum esset, dubitare non poteram. Itaque
cum te, propter excellentem omnium liberalium doctri-
narum cognitionem, animo meo egregie carum habeam,
& tibi aliquid a maleuolis instillatum, quominus in re-
cta sententia maneres, putem, erigere te, atque confir-
mare rursum meis litteris volui. Spero autem, ac po-
tius confido, te pro singulari tua humanitate & probita-
te in optimam hoc accepturum partem, ac maiorem mi-
hi, cui Caesar intime est notus, fidem habiturum, quam
hominibus Imperatoris opt. & inuictiss. tuisque laudi-
bus inimicis, meq. dubitatione, & cura, quam ista muta-
tione, cuius nulla vera ratio excogitari potest, nobis
inieciisti, leuaturum. Id ut facias, & banc meam curio-

Ee sitatem

434 PAVLLI. MANVTII
sitatem (licet hoc nomen in vitio ponatur) ab omni ma-
leuolentia disiunctissimam, ac potius cum summa erga te
beneuolentia, fideque, quam integerrimam Caesaræ Ma-
iestati quoad vixero præstabo, coniunctam esse tibi per-
suadeas, in maiorem modum peto. Bene Vale. Vien-
nae. ex aula Caesaræ. IX. Kal. Iun. M D L X I X.

Ioannes Crato a Crastheim,

S. Caes. Maiest. Cons. & Medicus
intimus.

IOANNI. CRATONI

Viennam.

3

SI quis est, vir præstantissime, qui constantia dele-
tetur; &, quam semel consilii viam ac rationem est in-
gressus, in ea libenter pergat, is ego sum, & eum esse me
non mediocriter gaudeo. sed, ut te non fugit, singulari do-
ctrina ac sapientia virum, in hominum voluntatibus ni-
hil esse perpetuum necesse est: nec videtur in aliquam
culpam incidere, aut male de se ipso consulere, si quis ita
vitam instituit, ut eius consilia ratio temporum modere-
tur, ac regat. Ego olim in illa mea ad Sambucum episto-
la, quid cogitarem, declarandum putavi. nam, etsi de stu-
diis meis humiliter admodum sentirem, nec satis fore spe-
rarem, ut ex ingenio meo quidquam depromerem, quod
si ad Maximilianum, Regem tunc Romanorum in-
clytum, nunc Imperatorem, mitteretur, aditum mihi ad
eius beneuolentiam patefaceret: suasu tamen amicorum,
assiduisque sermonibus, in eam mentem impellebar, ut
maximo

maximo Principi, erga liberales omnes disciplinas egregie animato, notam esse cuperem industriam meam. nunc mutata mea ratio est. Romam euocatus a Pontifice, sic impedior negotiis, sic a studiis auellor, ut, quae de litteris nostris opinio fuit, si modo ulla umquam fuit, ea nihil dignum, in summa temporis inopia, praestari a me posse confidam. porro, quod pollicebar, cum posse perficere sperabam, id, spe sublata, cur pollicear, non video. nisi si, quod a mea non solum natura, verum etiam consuetudine, semper absuit, eos imitari velim, qui maiorem ex inani quadam ostentatione, quam ex ipsa veritate, voluptatem capiunt. Nam quod vereri te ostendis, ne maleuolorum opera & artificio factum sit, ut a pristina sententia discederem: patere, obsecro, persuaderi tibi primum, id quod res est, mutationem fecisse me voluntatis, non iudicii: deinde, illa ipsa mutatione voluntatis, quam nulla te meritas attulit, sed ab inuito necessitas expressit, nihil animo meo molestius, nihil acerbius accidere potuisse. quid enim? an ego uel ita hebeti sum ingenio, ut, quibus uirtutibus tanta Maiestas ornata sit, non intelligam; uel ita improbo, ut, quae laudes tantis uirtutibus debeantur, non confitear? istam calumniam, opinor, neque qui studia mea, neque qui mores nouerit, in me conferet. In quo tamen, ut ingenue fatear, est quod me mordeat. qui enim alios, homo minime fallax, ex ingenio meo antea metiebar, nunc demum, quasi admonitus officio litterarum tuarum, incipio suspicari, posse aliquem, quod a me ratione, ut arbitror, optima factum est, id, aut ignorance consilii mei, aut suae fortasse naturae uitio, deteriore in patrem interpretari. neque, huic

E e 2 malo

malo quae mederi ratio queat, dispicio, nec possum, in optima animi conscientia, non aliquam tamen ex aliena suspitione molestiam trahere. Tibi quidem, Crato optime, cum & me verbis exquisitis in epistola tua elegantissima, ac plane omnium, quas adhuc legerim, prudentissima, laudaueris, & ea simul scripseris, quae profecto, nisi me valde diligeres, & nisi de mea existimatione ac laude laborares, tibi nunquam in mentem venire potuissent, quas gratias debeam, facile video: quas agere possum, non reperio. quod tamen in me est, ut meritum tuum perpetua memoria colam & singulari te ipsum amore complectar, quod virtuti quoque tuae, omnibus notissimae, libenter tribuo, id si omitam, nefario me scelere deuinctum putabo. Vale Romae, Idibus Sept. MDLXIX.

E I D E M, Viennam

4

ET serius, quam tu fortasse expectabas, & breuius omnino, quam uterque nostrum vellet, ad te scribo. id accidit valetudinis incommodo, non obliuione tui ad quem quotidie mentem refero, & ea sane voluptate, qua maior esse nulla possit. quod si corporibus animi mederentur: facile sanaret hunc morbum, quo quintum iam mensem laboro, iucundissima recordatio humanitatis, & beneuolentiae erga me tuae. alleuari tamen videor, dum de te cogito, tecumque quasi loquor. calores exspecto, valetudini meae semper viiles, nam hiems, & veris inconstantia, cum hiemali prope frigore, male me
vehemen-

vehementer habuit. Si valebo, expecta epistolam bene longam. interim ama me, ut facis. Vale.

Romae. Kal. Maii. M D L X X.

LABORABAM eodem, quo antea, morbo, et quidem aliquanto etiam grauius. ita Dei voluntas fert. nec satis constat inter medicos, qui sit exitus futurus: meus animus, ut ingenue tibi fatear, aberrat a bona spe, quippe aetate ingrauescente, valetudine perimbecilla, morbo plurimorum mensium. Te rogo pro nostra necessitudine, si quid mihi acciderit humanitus, filium meum Aldum, qui viuit Venetiis, tuis officiis, tuaque humanitate complecteris. Ego, si diutius vita fruor, nullum, mihi crede, erga te amicissimi atque obseruantissimi hominis officium praetermittam. Haec quoque aliena manu: nam meae vix penitus omnem ademit morbus. vide, qui sim, mi Crato. Vale, & posthac Venetias, quo me breui conferre cogito ad oratorem vestrum litteras mittes. is mihi eas reddendas curabit, & quamquam fieri potest, ut inde me Patavium, valetudinis curandae gratia, conferam, tamen discedens mandabo meis, ut litteras mihi tuas eo mittant.

E I D E M, Viennam. §

NUNC demum exoriri mihi videor, & quasi post multam noctem lucem adipisci, reuersus post annos decem in patriam ab urbe Roma, unde me, laborem nullum pro publica re, communique commodo recusantem, grauis morbus ac diuturnus extrusit. Gratu-

E e 3 lantius

lantur amici, amplexantur, laetitiam oculis, vultu, sermone declarant. Hoc mihi incundissimum est: sed, in hac incunditate, angor saepe intimis sensibus, dum recordor, quid iacturae, quamdiu Romae uixi, studia mea fecerint: de quibus, quamquam intelligo non eum, esse me, qui magna praestare possim, verumtamen minima fortasse non erat expectatio. Ire, inquires, non oportuit. Certe, si diuina re licuisset. verum, si res adhuc integra ponatur, eundi consilium qui reprehendat, fortasse nemo sit. Laborabam domesticis incommodis, fratrum meorum culpa: nec spes erat emergendi, nisi noua consilia caperentur. Vocabar a Pontifice Max. quo nihil videri poterat honorificentius: fructum autem quis non expectaret? Cohortabantur amplissimi viri, quorum erga me singularem beneuolentiam multis rebus antea perspexeram. laeta denique, copiosa, ampla ab omnibus omnia promittebantur. quid agerem? credidi, & speraui: ut fere sumus omnes homines hoc ingenio, ut ea, quae cupimus, libenter quoque speremus. quamquam hoc leuius, quod spem fefellerit euentus: non tam enim abundare, quam non egere, gratum est: illud per quam graue, quod perpeti saepe multum coactus, indecora prorsus, indignaque studiis nostris, aetate nostra, existimatione ante parta. In quo tamen occurrat ea consolatio, quod, in illo vitae durissimo genere, multa ferendo, multa simul didici, quae profecto me numquam neque libri, neque ulla doctrina, neque dies ipsa docere potuisset. Nunc, singulari diuino munere patriam adepti, redibimus ad illa praeclara studia, unde discere non oportuit: omniq. prorsus cura vacui, nullo cuiusquam imperio, exclusis etiam, si licebit, interpellatoribus;

ribus; si non licebit, rure abditi, salubri aliquo, & amoe-
no loco, fruemur, liberrimo otio, litterulis nostris; ope-
ramq. dabimus, quantum in nobis erit, ut, quod amissum
est antea temporis, non id quidem totum, (qui enim fie-
ri potest?) nonnulla tamen ex parte sarciat, & ali-
quem adhuc ex industria nostra fructum posteritas ca-
piat. Valetudine modo utamur commoda, qua nunc om-
nino caremus, erepta laboribus illis, animiq. curis, quae
nimium omnino graues, nimium diuturnae fuerunt. Fe-
bris discessit post nouem tandem menses: sed inedia, mor-
bo, maerore, ad horribilem prope maciem redacti sumus:
quodq. miseri, etiam est, aluum purgare, nisi accedant
extrinsecus adiumenta, numquam licet. Huic ariditati
asininum lac prodesse in primis posse, neq. huic remedio
ullum praestare, inter omnes medicos conuenit. In cibo
sicca omnia damnant, humida probant, praesertim quae
facilia sint ad concoquendum. Pono magnam spem in eo-
rum consiliis, maiorem tamen in animi tranquillitate, in
adpectu meorum, in caeli patris salubritate. denique ad
omnipotentem Deum omnia refero. quidquid acciderit,
eius voluntati libenter acquiescam. Haec de statu no-
stro: utinam quotidie laetiora. quod futurum spero, & sa-
ne tua quoque causa cupio. necesse est enim, quem val-
de ames, (sic enim mihi iam persuasi) de eo valde te
solicitem esse. Ad illam superiorem epistolam, Romae
scriptam pluribus verbis, exspecto, quid respondeas. Vale.

Venetius x. Kal. Nou. M D LXX.

BOTVITO. NERICIO

Senas.

6

VELLEM, ut, quam libenter eos homines comple-
 ctor, quorum in sermone & in moribus aliqua signa vir-
 tutis, & integritatis elucent, tam saepe accideret, ut eos
 colere officiis, ornare verbis, aliqua demum vel tueri, vel
 augere facultate possem. profecto animus meus, cui mul-
 tis rebus fortuna defuit, & tibi, & aliis tui similibus lon-
 ge pateret illustrius. hanc tu fortasse voluntatem meam,
 nullo quidem adhuc insigni merito declaratam, spectas,
 cum mihi gratias agis, quod te, cum Romae esses, huma-
 niter acceperim, & in summa mea occupatione, num-
 quam tamen aditu, numquam sermone exclusim. quae
 tu pro tua bonitate magni beneficii loco ducis, ego, si quis
 ea praestet, non tam laudandum, quam, si omitat, vitupe-
 randum puto. Quod vero de scriptis meis ita sentis, ut ea
 cum vehementer ipse probes, tum a tua sententia non di-
 screpare cōe iudicium dicas: istam quidem opinionem tā-
 ti aestimo, quanti aestimari debet ea laus, quam, erudito-
 rum ac sapientium virorum consensu & approbatione ni-
 xam, inuidia aut malevolentia labefactare non queat. ve-
 rum tamen, qui me probe norim, vereri saepe cogor, ne te
 quidem amor, multos fortasse fallat auctoritas tua. ac, si
 me audies, cui debes in ea re, quae ad me ipsum pertinet,
 obsequi non inuitus, parum per moderabere posthac iudi-
 cium de me tuum: ne, dum existimationi meae nimium
 studes, tuam in discrimen adducas. Sūt enim quaedā pe-
 stes

stes hominum, quibus aliena laus ita molesta est, ut, quid
quid aliis addatur, sibi detractum putent, & omnem de
trahendi obtrectandi ve locum sic arripiant, ut ex aliena
ignominia sibi laudem quaerere videantur. De mutatio-
ne illa, quam feci in epistola ad Sambucum, & pruden-
ter, & amanter iudicas. scripsi, cum impedimento nihil
fere videbatur, quo minus id, quod cogitabam, ad exitum
perducerem, induxi, cum propter assidua negotia studiis
meis ita diffiderem, quasi nihil ne mediocriter quidem
eruditis auribus, non modo Imperatore Maximiliano di-
gnum, asferre iam possent. virisque consilii causam ad
Cratonem perscripsi. spero fore, ut meum factum, quo pa-
rum aequis animis nonnullos indicare, litterae tuae signi-
ficant, vir optimus ac prudentissimus non improbet. quod
si euenerit, tanti hominis auctoritate sustentatus, non e-
quidem dicam, quid alii sentiant, non laborabo, sed certe
multo minus, cum praesertim te quoque, florentem inge-
nii, probitatis, doctrinae fama, tui iudicii testimonio mi-
hi non defuturum intelligam. Vale.

Romae. XIIIX. Kal. Oct. M D LIX.

AVGVSTINO. ANGELELLO

Fabrianum.

7

NEC filius adest, profectus Venetias cum matre
ante aliquot dies: nec mihi a grauioribus curis tantum
spatii relinquitur, ut binis tuis litteris pluribus verbis
respondere possim. hoc tantum habeto, delectari me
vehementer diligentia tua, qua te vii video tum in de-
scribenda, tum in mittenda ad nos antiquitate. gratias
agerem,

442 PAVLLI . MANVTII
agerem, si hoc uno contentus officio essem, aut hoc a te
crederem expectari. In Orthographiae libro, cum rursus
edetur, aut in eo, qui apparatur, veterum Inscriptionum,
carere te tua laude non patiar. ita nostra consuetudo fert:
ita postulat & amor in nos tuus. Reliqua, cum vacabi-
mus, si modo id assequemur unquam: quod sane non tam
nostra, quam aliorum causa cupimus. Vale.

Romae. VII. Id. Maii. M D L X V I I.

E I D E M, Fabrianum. 8

DE inscriptionibus ad me missis, noli expectare dum
tibi gratias agam. nam neq. id patitur amicitia nostra; &
officium tuum, saepius iteratum, gratiarum actionem re-
quirere iam non videtur. Quod ad meos Commentarios
attinet, velim hanc moram aequo animo feras. quotidie
enim aliquid additur, aut mutatur. ita, si quam facit in
tempora iacturam eam tibi re sarciam. equidem istam
amo cupiditatem scriptorum meorum: in qua te socios ha-
bere multos intelligo. utinam otium contingat, ut eam ex-
plere aliquando possim. Vale.

Romae. I V. non. Sept. M D L X V I I.

E I D E M, Fabrianum. 9

PVTO te ab Onuphrio Gilio, tui amantiſſimo, cer-
tiores non semel esse factum in valetudinis meae; qua no-
num iam mensem ita laboro, ut neque ratione victus, ne-
que ullo remedii genere adhuc quidem allevari potuerim.
itaque

itaque misere iaceo, spe iam destitutus omni, praeter eam, quam in caeli mutatione multi ponendam arbitrantur. quorum ego libenter accedo sententiae. exire propter nimios calores nondum licuit. Sed ego exeundi consilium ita cepi, ut Urbem plane relinquam, & ad patrios lares, & dulcia incunabula remigrem. in quo Pontifex, ut est insigni praeditus humanitate, facilem, perbenignumq. se praebuit. Si quaeris, laetior, an tristior discedam: non facile dixerim. ita multa occurrunt, quae animum ac uoluntatem huc illuc distrahant. propensior tamen in hanc partem sum, ut post annos decem, aetate ingrauescente, urgente praesertim difficili morbo, ad patriae complexum recurram: cuius adspectus, non dubito, quin mihi amissam molestissimis curis hilaritatem restituat. quam si quis afflictæ uoletudini haud paullo magis, quam orientalia quæuis pharmaca, prodesse dixerit, opinor non errabit. Eamus igitur diis bene inuantibus, & redeamus aliquando ad illa studia, unde discedere piaculum fuit. quod utinam per uoletudinem liceat: nam per negotia certe licebit. ita res meas constitui: ita, quae dissipata erant in domesticis rationibus, collegi, atque contraxi: ita denique, quod accipi quasi dictum arroganter nolim, humana omnia propemodum coepi contemnere. De discessu igitur fixum consilium est: de die nondum statui: sed, ut hiemales imbres, tempestatesq. uitentur, ante Kal. Oct. cogitamus. Onuphrius hic remanet, meo sane cum dolore: non solum enim eius opera utebar in studiis, uerum etiam conuictu, sermone, probitate, ingenio ita fruebar, ut hanc iacturam sarcire me posse uix umquam putem. non deerunt omnino, quibus utar: sed, praeter operam, alia desidero.

dero. hoc adolescente nihil aptius ad naturam meam. Te, mi Augustine, quamquam longe disunctus, tamen prorsus non carebo. quae enim tua est humanitas, qui tuus in me amor, scribes interdum ad me. ego autem, licet otium & litteras, si ualebo, ita amplecti cogitem, ut diuelli me non facile patiar, tamen a te, uiro optimo, nostri, quod facile perspexerim, cupidissimo, atq. amantissimo, non committam, ut in hoc genere prorsus requiri possit officium meum. Vale. Kal. Sept. M D LXX.

HERCVLI. CIOFANO

Sulmonem.

IO

NON possum non amare uehementer industriam tuam, qua te uti uideo in emendando gentili tuo, poeta summo. perge, ut coepisti: nam & gloriae tuae consules, & alios ad eandem laudem excitabis. Victor ad Aeménios aridet, quam, Victor folcricos: accedente praesertim antiqui libri testimonio. Regius autem, inania captans, veritatem quaerebat in tenebris. Tu longe certiora sequeris, itaque tibi libenter assentior. Vale. Romae, XIII. Kal. Apr. M D LXXIX.

EIDEM, Sulmonem.

II

INSCRIPTIONES illae nihil habent, quod oblectatione aut doctrinam legentibus afferre possit. quod si similes occurrerint, in anem laborem suscipere te nolo. De Ouidii loco, ad tuam sententiam opinionem meam adscribas, licet. Regius ille saepe alucinatus. in si perges
ut

ut coepisti, poetam ingeniosum, ciuem tuum, a mēdarum
 labe, non mediocri tua cum laude, vindicabis. Vale.
 Romae. Pridie Kal. Sext. M D L X I X.

M. ANTONIO. CIOFANO

Sulmonem.

12

EXCVSAREM tibi tarditatem litterarum mea-
 rum, nisi Hercules frater tuus, quae meae vitae ratio sit,
 quam assiduus, quam variis impedita negotiis, optimus te
 sis esset, atq. ego illi, cū me rogaret, ut aliquid tibi rescri-
 berem, deesse mihi dixeram nō modo otium, sed etiam ar-
 gumentum, nam de paraceto, sane mirabar non probari
 tibi sententiam parentis mei, praesertim quae rationibus
 optimis nūteretur. cetera vero in tuis litteris erant eius-
 modi, ut a te non negotii, sed animi causa scripta videren-
 tur. quod si mihi haec imposita condicio sit, ut eorum om-
 nium, qui quotidie non modo ex Italia uniuersa, verum
 ex transalpinis quoq. gentibus ad me scribunt, rescribere
 litteris necesse sit, inique mecum agatur & prorsus inhu-
 mane. cuius enim otii est, cuius etiam ingenii, tot episto-
 lis posse respondere Latino praesertim sermone, in quo mi-
 hi, propter eam, quam nonnulli de scriptis meis opinionē
 habent, non licet esse negligē? At officii praetermissi gra-
 uem esse culpam dices. Si simplex officium agitur, iure di-
 ces, sin eueniat, ut concurrant officia duos certe, posse alte-
 rum omitti sine culpa, et minori maius anteponi, aut fate-
 beris, aut in grauem ipse culpam incides. magnam enim,
 nisi distinguantur officia, rerum omnium humanarū pertur-
 bationem sequi necesse est. Simili, ut opinor, in loco mea
 causa

caussa versatur. Cum enim sacris libris, qui ad Christianae Reip. salutem pertinent, & corrigendis, & edendis, cum salutationi virorum honestissimorum, qui frequentant aedes meas, cum etiam studiis nostris, vel ut instituta absolvam, vel ut absoluta perpoliam, danda opera est; scilicet eius temporis, atque eius operae partem, rebus gravissimis detractam, ad inanes epistolas transferam. inanes appello, quia uideo multos, cum scribendi causam aut perquam leuem, aut etiam nullam habeant, ideo tamen scribere, ut meas litteras eliciant. quod nisi statim assequuntur, indignantur, & maiorem suae voluntatis, quam occupationis meae, rationem habent. Ab horum numero libenter te, mi Ciosane, seiungam. non enim dubito, quin me diligas, vel tua sponte, propter communia studia vel imitatione iuuenis optimi, atque eruditi, Herculis fratris tui, a quibus autem diligi me puto, de iis ut bene sentiam, non aegre a me soleo impetrare. atque utinam, quam propenso erga utrumq. vestrum animo sum, tam facile uobis animum insigni aliquo merito probare possim. quod equidem enitar: & si contigerit, vehementer laetabor: sin minus, vos tamen amplecti voluntatem meam, eaq. contentos esse, & humanum in primis, & aequum est. Vale. Romae, x i i. Kal. Dec, M D L X I X.

IOANNI . CASELIO

Florentiam.

13

A EQVE, ut video, laetamur, tu mea ergate, ego tua in me beneuolentia, quae si orta est ab opinione vir-
tutis,

tutis, ut certe est; non dubito, quin perpetua sit. tu enim
 quas artes a puero colere coepisti, in iis quotidie magis
 ut excellas, operam dabis: ego te, inani fortasse conatu,
 (nam aduersantur multa) studio tamen, & uoluntate,
 quantum licebit, imitabor. Nericium tuum quis non
 amet? mihi crede, tuarum litterarum testimonio, aut
 commendatione non eget. me equidem ita sibi deuinxit of-
 ficio suo, non modo ut omnia quae possum, sed etiam quae
 non possum, eius causa cupiam. iam de eius ingenio, do-
 ctrina, eloquentia quid ego tibi, cui notior est, quam mi-
 hi? praedicabo igitur aliis: uel quod amor impellit; uel
 quod, ornare uirtutem, nostrae consuetudinis est. Vale,
 mi Caseli. nosq. ut facis, ama.

Romae. XII. Kal. Oct. M D L X I X.

FRANCISCO. PLANTEDIO
 Manfredoniam. 14

ET serius, quam tu expectabas, et breuius fortasse,
 quam uterque nostrum uellet, respondeo litteris tuis.
 quamquam, cum tibi nota esset occupatio mea, erat huma-
 nitatis & prudentiae tuae, silentium meum in bonam par-
 tem accipere, & amici hominis commodo consultum uel
 le: cum praesertim, iudicium meum de tuis uersibus cur
 expetas, causa nulla sit. tu enim hoc in genere ita es uer-
 satus, ut excellas: ego saluere Musas iussi ante aliquot
 annos, nec poetas iam conor attingere: aut, si interdum, ut
 oblectem me potius, quam ut imiter. quod si tu meum iu-
 dicium anteponis tuo, quod ego ne comparo quidem: er-
 rare

rare te facile patiā, neque committam, ut meam frustra
sententiam exquiras. *Mihi quidem ea, quae scripsisti*
ad Rotam, uatem aetatis nostrae celeberrimum, ualde
probantur. habent leporem, nec tamen grauitate carent.
totum poema (sic enim uideor appellare posse) lumini-
bis ingenii, doctrinaeq. distinguitur. Sic perge: sic ibis ad
astra, praesertim oratoria quoque facultate, ut uideo, non
mediocriter instructus. Commentarium meum in epist.
fam. dederam amico describendum: sed eius operam ca-
sus nescio quis interpellauit: edetur aliquando uel hic, si li-
cebit, uel certe Venetiis: quod minime uellem absente
me. post discessum tuum addidi non pauca, quaedam per-
polui. Cupio saluari a te ueterem patronum meum, om-
ni laude praestantem, Cardinalem Comensem, cuius er-
ga me officia, dum uiuam, animo ac memoria tuebor,
praedicare numquam desinam. Vale.

Romae. VII. Kal. Oct. M D L X I X.

IACOBO. GORSCIO

Cracouiam,

15

PARTICVLAM litterarum tuarum, in qua scri-
bis ad amicum tuum, audisse te, exclusum esse Roma
Paullum Manutium, (haec enim ipsa uerba ponis)
legi sine molestia. qui enim rumor nec si uerus esset ualde
afficeret animum meum, subsidia sibi ad omnes casus ex
optima conscientia quaerentem; is cum sit falsus, & ina-
nis, quid est cur me tangat? Equidem, si scire uis, qui sit
meus hac tota de re sensus, inclusus potius mihi uideor
esse,

esse, quam exclusus a quo enim die Romam ueni, exē-
 di facultas, quam saepe valetudinis, interdum animi
 etiam causa optaueram, data numquam est: non quin
 iis hominibus, qui tanti apud me sunt, ut eorum volun-
 tatem nutumq. quasi legem obseruem, utar facillimis:
 sed commissum fidei, diligentiae, industriae meae nego-
 tium cuiusmodi est, ut absente me iacturam patiat. quod si
 priuata mea res ageretur, negligerem fortasse:
 nunc, ut scire te arbitror, totum hoc munus ad Sedis
 Apostolicae dignitatem pertinet, pro qua si accideret
 ut vitam profunderet opus esset, praeclare mecum actum
 putarem. Hoc meum studium placere bonis viris, & ip-
 si in primis Pio v. Pont. Max. nihil omnino probanti, ni-
 si quod ad summi Dei gloriam, communemq. salutem re-
 feratur, ita laetor, ut ceterorum opiniones, & iudicia con-
 temnam. quid enim laborem, quid de me sentiant, aut lo-
 quantur ii, qui ne sincere iudicare possint, liuore impe-
 diuntur, aut maleuolentia, fortasse etiam hominem in salu-
 berrima tollendae prauitatis haereticae cura diu noctuq.
 versantem, non labori, non valetudini parcentem, parum
 aeqis oculis adspiciunt? sexcentas enim artes, quibus
 causa publica laedatur, quotidie veterator ille manus,
 generis humani sempiternus hostis, excogitat. Sed nomi-
 ni meo, quantum volunt, isti detrahant: me tamen, ut ab
 optimorum consiliorum cursu, rectissimaq. mente dedu-
 cunt, numquam assequantur. Te quidem ista mi Gorsci,
 quae aut a leuissimis hominibus temere, aut ab improbi-
 ssimis callide diffeminantur, si putem credere ignorare
 videar & prudentiam, & bonitatem tuam: ut ingenue
 tamen tecum agam; post illa verba. Excluseram esse Ro-

F f ma

ma Paullum Manutium, optavi signum aliquod vel iudicii, vel saltem amoris in me tui: iudicii, ut hoc adderes: Quod verisimile non videtur: aut etiam, Quod de tali viro vix crediderim: amoris, hoc, aut simile: Quod cupio esse falsum: Quod si verum est, doleo. Haec tu si sic scripsisses, cum amicitiae nostrae, tum constantiae quoque tuae satisfacisses: illa quidem ipsa verba, quae subacerba nonnullis videri fortasse possint, condimento quasi aliquo mitigasses. Utraque est a te ommissa significatio: & quamquam utraque mihi aequae grata futura esset, quippe qui a bonis eruditisque viris, idest a tui similibus, non minus probari, quam diligi velim: tamen nescio quo modo fit, ut amoris te nihil dedisse, aliquanto molestius feram. Qua de re scripsi ad te libere, pro mea consuetudine: neque tamen dubito, quin tu hoc ipsum, quod scripsi, pro tua humanitate aequi bonique facias. Nam de statu rerum mearum mihi ipsi, auctori satis bono, velim credas, non modo Romae esse me, verum etiam libenter esse, ex estimatione integra, re familiari aucta potius, quam immi-
nuta. Vale. Romae. VI. Kal. Oct. MDLXIX.

I O. BAPTISTAE. OLIVO

Asulam.

16

ET SI, cum haec scripsi, non satis commode valebam, dedi tamen operam, humanitate coactus litterarum tuarum, ut aliquid rescriberem. Laetor periurandam tibi esse recordationem veteris amicitiae, consuetudinisque nostrae: sed maioris laetitiae causam afferunt officia tua, quibus uxorem meam primum, graui morbo

bo affectam, deinde filium, non minus graviter laboran-
tem, assidue coluisti. Vinam, quam debere me fateor,
aliquando referre gratiam possim: habeo quidem meri-
to tuo parem, quamdiu vita contigerit. De statu rerum
tuarum, ex Laelio Gauardo, probo iuvene, mihiq. suis
morbus, & sua virtute carissimo, cognoui ea, quae ve-
hementer optabam; diligite, & coli à bonis, honestisq.
ciuibus; opera, opeq. tua multos adiuuari; augeri quo-
tidie opinionem probitatis. & doctrinae tuae, quo tibi no-
mine plurimum gratulor: quaeq. tam praeclarae indu-
striae, tam propensae ad communem salutem volunta-
ti, praemia debentur, ea non dubito, quin tibi nunc qui-
dem homines, olim vero Deus opt. Max. uberrima per
soluat. Vale, & uxori, filioque, quorum in salute sita
mea salus est, humanitatem, & diligentiam. si nondum
conualuerunt, eandem praesta: à me vero, quaecunque
ad commodum, laudemq. tuam pertinere intelligam,
omitti posse nolim existimes: si quid ignorabo, admoni-
tus à te vincam officiis meis opinionem tuam.

Romae. pridie Kal. Oct. M D L X I X.

PRO. COLLEGIO. CANONICORVM

S. P E T R I.

S. R. Magdalenae, & Leonorae Austriae, sorori-
bus Spiram. 17

BENE agendi ratio maxime dicitur eorum exem-
plo, quorum actiones generis nobilitas, aut splendor
dignitatis illustrat. propterea neque optabilius quid-

F f 2 quam

quam est, quam ut Reges, principesq. reliqui ad ornam-
dam, tuendamq. Christi ecclesiam, unde vera salus,
aeternaq. vitae felicitas emanat, suas omnes curas, om-
nia studia conferant: neque nos ex nulla re maiorem ca-
pere laetitiam potuimus, quam ex M. V. propensa ad
cultum, ac uenerationem Apostolorum uoluntate, an-
tea quidem nobis minime dubio multorum sermone,
nunc autem insigni vestis aureae munere declarata. Et,
quamquam suae pietatis, perpetuaeque innocentiae a Deo
opt. Max fructum illum capient, quo nihil potest esse
praestantius: tamen nos quoque, ne partes nostrae deside-
rentur, primum gratias eis de ista liberalitate, istaq. men-
te quam licet maximas & agimus, & habemus: deinde
fore pollicemur, ut exstet sui muneris memoria in annos
plurimos inter ornamenta templi, in animis vero nostris
numquam extinguantur. Interim precibus omnibus, ut
M. V. perpetuo bene sit, quaeque optant feliciter, prope-
req. eueniant, a caelesti nomine petemus.

Romae. xvii. Kal. Ian. M D L X I X.

HIERONYMO. RVBEO

Rauennam. 18

EPISTOLAE tuae, in qua significas Rauenna-
tem historiam à te esse institutam, quaerisq. à me, quae
ad eam pertineant, nonnulla, serius omnino, quam
tu exspectabis, respondeo: sed obliuionis, aut negli-
gentiae culpa liberat me diuturnitas morbi, quo pri-
mum leniore commotus, postea grauius perculsus,
ad hanc fere diem iacui. alioqui meum in hoc genere
studium

studium nec tibi defuisset; nec defuturum unquam
 velim existimes. non est enim meum, minimeq. decere
 arbitror, cum humaniora semper studia praecipue co-
 luerim, nunc committere, ut humanitatis officia de-
 ederare a me quisquam iure possit. Adde meam erga
 doctos homines, in quibus excellere te video, beneco-
 lentiam, adde non mediocrem observantiam erga ciui-
 tatem vestram; quae me olim adolescentem omni libe-
 ralitatis genere complexa, immemorem, aut ingratum,
 in iis praesertim rebus, quas ad eius amplitudinem,
 & gloriam spectare intellexero, profecto numquam
 seniet. nec vero dici potest, quam valde gaudeam,
 quod eniteris, atque elaboras, ut eius antiqua nobi-
 litas, aeternis ingenii tui prodita monumentis, ab om-
 ni posteritate cognoscatur. nae tu iam nunc ista volun-
 tate magnam laudem consequeris: quid futurum pu-
 tas, cum voluntati res ipsa responderit? honestis consi-
 liis Deus, hominesq. fauent: honestius autem nihil;
 aut praestantius, quam de patria bene mereri. Urge-
 igitur, & illustra, quantum in te est, gentiles tuos.
 quod eo tibi magis curae debet esse, quia memoriam pu-
 blicam, vetustate iam deficientem, ab interitu vindi-
 care non potes, quin priuatam simul tui nominis me-
 moriam immortalitati commendes. In hoc argumen-
 to quid efficere, & praestare ipse possim, non equidem
 intelligo: veruntamen, si quid possum, & si assequar
 aut legendo, aut cogitando, totum illud, quidquid e-
 rit, & quantumcumque erit, prolixè tibi, perlibera-
 liq. animo & polliceor, & defero. Nam illa, quae re-
 quiris, eiusmodi sunt, ut vel historiae veteris testimo-

Ff 3 nio,

nio, vel ipsa etiam coniectura explicari facile possint.
 Si enim Caesarem, cum utrique Galliae praeesset, in
 citeriore, conuentuum agendorum causa, saepe hiber-
 nassee concedimus; id quod ambigere non licet: quis du-
 bitet, quin Rauennae, quo nullum in ea prouinciae par-
 te nobilius opidum inuenio, conuentum egerit? De
 foedere, ne hoc quidem video cur in dubium vocetur.
 urbs enim Cisalpinae Galliae Rauenna fuit: at Galli
 foederati. Locum Ciceronis in oratione pro Balbo, sus-
 fragante, ut verba tua declarant, vetere libro, ita lege-
 rem: P. Caesium, virum bonum, qui viuit, Rauen-
 natem, foederato ex populo. Ut primum patria, dein-
 de patriae condicio ostendatur. nam si legamus, Qui
 viuit Rauennae foederato ex populo; foderati populi
 nomen, idest P. Caesii patria, ignorabitur. in quo re-
 pugnat Ciceronis consuetudo. neminem enim ciuitate
 Romana donatum appellat, quin patriam simul nomi-
 net. Q. Iubium, seu, Q. Iunium, cur non placeat,
 eadem ratione adducor. nam si hunc Rauennatem es-
 se dicemus: P. Caesio quid fiet? an solus patria care-
 bit? Dixi, quid sentirem; rogatus a te; nec mihi ta-
 men arrogare tantum ausim, ut meum iudicium ante-
 ponam tuo. In amore, atque etiam in iis officiis, quae
 amori debentur, me abs te vinci numquam patiar. Vale.
 Romae. Kal. Febr. M D LXX.

CLAV-

CLAVDIO . STRAMBONIO

Romam.

19

FATEBOR ingenue, ut & consuetudo mea, & amicitia nostra postulat, putavi te, pro tua prudentia, & aequitate, amore erga te meo contentum esse, amoris fructum, & officia requirere numquam putavi; cum praesertim, si quis est, quem distringant curae non quotidianae tantum, sed etiam permolestae, is ego sim. quod tu cum scias, & mecum tamen sic agas, quasi nescias: quid suspicer? me abs te non amari? siquidem, quos amamus, eorum commodo libenter consulimus. odi istam rationem: errare malo cum tanta voluptate, quantam opinio mihi affert benevolentiae tuae, quam id cogitare, quod si credam, iniucunde vivam. quid enim profecerunt studia mea, illa, illa, quae tu dilaudare interdum solitus es, aut quid egi tantis vigiliis pro communi utilitate susceptis, siquidem hoc non sum affecutus, ut, quibus laborem minuit labor meus, ab iis mihi merces benevolentiae nulla persolatur. ac velim credas, non me tamen, si quid mihi hoc nomine debetur, id ab omnibus exigere. instar omnium pauci futuri sunt; & in hoc ipso paucorum numero in primis esse te, vehementer cupio. amo enim tuos mores: ingenium plurimi facio, studia laudare numquam desino. possum autem, ex ista mente quae virtutum ubertas aliquando futura sit, facile diuinare. & hac equidem spe, si verum scire vis, iacturam illam, quam interitui Iulii Poggiani Romanae litterae fecerunt, aliquanto le-

Ff 4 nms

uius fero. nam, si contexes extrema cum primis, teq. ipse, ut soles, ad summam eloquentiae laudem incitabis: non dubito, quin paucis annis Latinae linguae amissam prope dignitatem restituas. quod eo facilius fore video, quia tu, non contentus inani verborum sonitu, quo delectantur multi, prudentiam simul ex iure civili, rerumq. maximarum scientiam ex philosophiae fontibus hauriendam iudicas. Quibus causis adductus egregius ille vir, omni praeditus ingenii suauitate, Castilioneus Cardinalis quem tu nobis, in tanta similium uirorum paenuria, creptum iure doles, ita te ferebat in oculis, ut nemini concederet, qui tui amantior esse posset. Sed illum iam lugere desinamus. quid enim lacrumae proficiunt? aut etiam, (si veritatem cōsulimus: quod facere debemus) qui ab iis malis, quibus referta est hominum vita, hac praesertim aetate, ad aeternas beatissimorum sedes migrauerit, cur eum lugendum putemus? Haec igitur, quae praeter nostram voluntatem accidunt, ad summi Dei voluntatem referamus. ita fiet, ut ea vel modice doleamus, uel ne dolenda quidem existimemus. Vale

Romae. IIX. id. Maii. M D L X I X.

PAVLO. TACHONO

Vibonem.

20

DELECTATVS sum litteris tuis, non quia ornant laudibus, sed quia beneuolentiam erga me tuam declarant. amari enim ab eo viro, de quo bona omnia boni omnes praedicant, & optabile in primis est, & multorum diuitiis, atque opibus anteponendum. Quare hoc ego nomine tibi gratulor. iudicio autem

tem

tem de me tuo, etsi vix fieri posse arbitror, ut respondere possit industria mea, tamen, siue recte sentis, gaudeo: siue erras, error quoq. tuus, ut vere dicam, mihi periucundus est. Locus Ciceronis, de quo meam sententiam exquiris, totus, ut arbitror, a coniectura pendet. itaq. destitutus historiae testimonio, affirmare nihil ausim. quod si tu, ubi obscura veritas est, verisimilia non contemnis: fortasse non improbabis quod scripsi in meis commentariis, dixisse Ciceronem, Abutor coronis, quia, cum olitorem calficari vellet, qui sibi interdum coronarum munuscula miserat, abuti coronis, id est, malam ei gratiam referre videbatur. Haec, ut dixi, e coniectura. tu, si quid habes certius, impertis: & vale. Romae. xv. Kal. Apr. M D L X I X.

IO. BAPTISTAE. IANVARIO

Vibonem.

21

Nec mea valetudo, graui iam quattuor fere mensium afflicta morbo, permittit, ut multa, nec humanitas, ut nihil omnino litteris tuis amantissime scriptis respondeam. quamquam, si quis est, cui liceat hoc officium sine culpa praetermittere, aut is ego sum, aut prorsus nemo. obtruor enim epistolarum numero, quae quotidie mihi ab ignotis hominibus, ex longinquis regionibus, non necessario plerumque mittuntur argumento. Ego autem neque hoc inanium, & ambitiosarum litterarum genere natura delector: & si velim id suscipere, ut unus omnibus respondeam, quid me laboriosius, aut etiam quid stultius esse possit? cum praesertim valetudine utar infirma, negotiis autem curisque
urgear

urgear eiusmodi, quae vel firmissimam defatigare ac frangere omnino possint. Ergo habenda mihi ratio est, quae non habetur ab aliis, cum occupationis meae, tum etiam salutis. quod si hominibus mei amantissimis in mentem veniret, aequis animis meam causam perpenderent non otium meum ex otio suo metirentur, ita ad me scriberent, ut rescribendi necessitatem non imponent. Duo genera excipio, vel qui scribunt iis de rebus, quae ipsorum vehementer intersint, quibus deesse, contra officium est, vel si qui sunt, qui, quacumq. de re scribant, ita diserte loquuntur, ita ornatè, ut eorum virtus, & eloquentia, non modo quae possum, sed ea quoq. quae non possum, postulare a me suo quodam iure, atq. exigere videatur. Hoc te in genere, Ianuari doctissime, constituo. tu enim quamquam ad ea indaganda, & perscrutanda, quibus inuentis, rerum obscurissimarum vis & natura patet, assidue totus incumbas; & in hoc studio ita verferis, ut omnino cum paucis excellas: tamen, quasi hac una laude non contentus, ita oculis, itaq. tenes Latinam linguam, ut oratione tua nihil purius, elegantius, illustrius esse videatur. quod si cuperem laudari, de quo laborant multi, ego quotidie minus minusq. curo, a nullo, mihi crede, mallem, quam a te. sed, cum hanc in me cupiditatem siue aetas, siue valetudo, siue ratio exstinxerit: ita non moveor iis laudibus, quas tu amplissimas in me contulisti, quasi nihil ad me pertineant, aut quasi sensu prorsus omni caream: amore quidem tuo, unde laudes istae manant, (sic enim interpretor) mirabiliter delector, eumq. ut eadem, quae peperit, perpetuo alat, atq. augeat humanitas tua, vehementer opto. ego enim, non modo ut parentis benevolentiam

tiam praestem, verum etiam ne genus ullum obseruantiae, studii, officii, quod ad te ornandum attineat, praetermittam, pro virili mea parte operam dabo. De versibus, iocari te facile patior, & in ludicro argumento ingenii praestantiam ostendere. Sed noli a me expectare, ut patriaribus. te enim, ut alumnum suum, perpetuumque cultorem, amplexantur Musae: me, qui, salute iam pridem illis dicta, ad oratores me contuli, nunc, si quando ad eas conor accedere, ut alienum, ac transfugam, a se repellunt. Vale.

Romae. Idibus Aug. M D LXX.

ANTONIO. FURNARIO

Neapolim.

22

ET valemus, & satis iucunde viuimus, re domestica ita iam constituta, ut adolescenti filio, quem unicum habemus, cogitandum de virtute potius, quam de fortuna videatur. nam, quod ad me attinet, hanc habeo senectutis gratiam, ut pauca iam requiram; vel quod ad illa longe meliora properamus, non enim longe abesse videtur ille portus, quo peruehi cupimus ex diuturna tempestate, uel quod stulti putamus, ea quaerere cum labore, quae nec si adipiscare, molestiae finis est. quod te quoque, excultum litteris hominem, sentire arbitror: & hoc equidem nomine cum te diligo vehementius, tunc diligi a te cupio. Memoria nostri tua, muneribus declarata suauissimis, periucunda nobis est. Vale.

Romae. XXI. Kal. Febr. M D LXX.

E I-

QVAE solet ex carissimis, incundissimisque rebus percipi voluptas, eam ipsam ex epistola tua cepisse me, prorsus velim tibi persuadeas. hoc adeo inde perspicies, quod, in magna valetudinis aduersae molestia, defatigato etiam curis animo, committendum tamen non putavi, ut amicitiae nostrae, & humanitati erga me tuae debitum rescribendi officium non persoluerem. Probari a te mea scripta, atq. etiam laudibus ornari, siue tu id iudicio tribuas, siue amori largiaris, aequè gaudeo. nam, si e studiis meis fructum aliquem exspecto; quis uberior, aut praestantior laudatione doctissimi viri? sin litteris ita utor ut praeter eas ipsas nihil cogitem, quod his temporibus facere prope necesse: amari tamen a te, quem qui non amat, hominem vix puto, in primis optabile est. Ac de isto quidem tam illustri aut opinionis, aut voluntatis testimonio mihi vehementer, ut debeo, gratulor: tibi vero gratias agerem, si te putarem hoc officii genere delectari: quod certe tua bonitas respuit: aut si ego is essem, qui, officio deuinctus aliquo, libentius in agendis, quam in referendis gratis operam collocarem. De tuo statu, si est, ut volumus, & si nihil anno superiore accidit incommode, bene est, de meo, quem vicissim tibi pro mutuo inter nos animo curae esse non ignoro, satis multa me scripsisse existimabo, si hoc vnum scripsero, languere me quotidie magis in earum rerum cupiditate, quas mirabar antea. aetas hoc fortasse fastidium parit: verum tamen ratione potius assequi mihi videor, ut ita sentiam. quid enim appetam,

appetam, cum nec sciam, quid utile futurum sit, nec iam
 usura possit esse diuturna? appropinquat enim dies, qui
 nos ex immensa errorum caligine ereptos, in aeterna ve-
 ritatis luce constituet. quae me quidem cogitatio nec se-
 cundis rebus laetari, nec nimis angi patitur aduersis.
 Munusculum, quod ad me singulis annis cum pulcher-
 rima epistola mittere non desinis, pensio quaedam amo-
 ris est: quae ego te, amore ipso contentus, ea condicione li-
 bero, ne scribere tamē desinas. aequiore enim animo om-
 nibus muneribus, quam suauitate tuarum epistolarum,
 carere possum. Vale.

Romae. x i i x. Kal. Feb. M D LXX.

E I D E M, Neapolim. 24

NON patiar ignorare te, quod gratum, & periunc-
 dum tibi fore arbitror, viuere me nunc in patria, & pla-
 ne viuere. frui enim rebus iis, sine quibus vita prorsus
 nulla est, propinquis, amicis, libris, ipsa demum liberta-
 te, qua nihil est carius. nā Romae, tantum aberat, ut otio
 sō liceret umquam esse, ut negotiorum assiduus quasi flu-
 tibus obruerer. Longius a te absūm: quid refert? ne Ro-
 mae quidem cū essem, fore speraui, ut umquam te vide-
 rē: cum aetas viriusq. valetudo, vitae genus peregrinari
 nos non sineret. habet autem hoc amor a virtute ortus, ut
 absentes coniungantur animis, & sit inter eos, recordatio
 ne mutuae voluntatis, & beneuolentiae, tanta suauitas,
 quantam vix, aut ne vix quidem vlla potest asferre con-
 suetudo. at plerique homines quotidiana fere salutatio-
 ne, collo. uione, familiaritate, beneficiis etiam, atque

muneribus, ali, & conseruari amicitiam putant: nisi haec
 adsint, deficere, & exstingui. stulte. nam, si ab honesto
 manat amicitia: nulla re indiget, ipsa se sua sponte, suisq.
 viribus, tuetur, ac sustinet, sin aliunde oritur; infirma sem-
 per, inops, inconstansq. sit, necesse est: a fortunae varie-
 tate pendeat; multis vitiis, & mutationibus, laboret. Er-
 go nos à vulgo recte dissentimus, & a vulgi consuetudi-
 ne nostra ratio in primis abhorret: cum amemus inter nos
 amore singulari, nec tamen inter nos officia multa inter-
 cesserint, aut alter alterum de facie norit: quod multo mi-
 nus, ob longinquitatem locorum, in posterum continget:
 & voluntatis tamen aut ego tuae mutationem, aut tu
 meae, non est, cur extimescas. Cupio te valere, & inter-
 dum, si uacabis, ad me scribere. Ego commodius, quam
 Romae, ualeo: quid mirum? qui tranquillissimo animo
 uiuam, & ualetudinem, ab omni occupatione longe remo-
 tus, praecipue curem. desiderari autem litteras a te meas
 non patiar, si placere tibi sensero officium meum. Vale.
 Ex opido, Plebe Sacci: quo me saepe conferam, ualetudi-
 nis, animiq. gratia: addo illud, ne studia colem, quibus
 carui diutius, quam uellem, interpellatores molesti sint.

III. non. Non. M D LXX.

EPI-

463

EPISTOLARVM
PAVLLI. MANVTII
LIBER. DECIMVS

AMPLISSIMO. CARDINALI
IOANNI. MORONO



VRPE est praescribere sapienti, quid agat
& quomodo agat: neque ego id umquam
commiserim: neque ideo aut consuetudi-
nis, aut naturae meae: uerumtamen excu-
sandus fortasse uidear, si uel a mea maxima re, quae
nunc agitur, uel ab humanitate tua, quam omnes norunt
& praedicant, persuaderi me patiar, ut agam paullo libe-
rius, quod sentio, &, quae cum animo meo sum medita-
tus, eadem nunc, ex promam, nihil dissimulans, nullo ue-
ritatem artificio tegens. Ego, uir praestantissime, quoad
putavi, te, uti pollicitus eras, acturum esse cum Pont. de
caussa mea, laetabar uehementer, & in hac aduersa ua-
letudine, quae mihi omnem abstulisse iucunditatem uide-
batur, aliqua tamen uoluptate perfruebar. sperabam enim
fore, ut auctoritas tua, prudentia, eloquentia, praesertim
in optima causa, facile impetraret ab aequissimo ac be-
nignissimo principe non immoderatum aliquid, aut eius-
modi, quod inuidiam excitare posset. non enim ego ita ef-
ferri cupiditate soleo; quid igitur? annuam tantum ordi-
narii stipendii solutionem: ut, quemadmodum Pius
Quartus Pontifex, immortalis memoria dignus, uenien-

tem

tem ad Urbem insigni viatico donauerat; sic Pius Quin-
 tus, omni virtute ac laude praestans, ab Urbe disce-
 dentem non modo simili, sed maiore etiam munere pro-
 sequeretur. in quo ratio videbatur habēda aetatis meae,
 habenda valetudinis, habenda etiam meritorum meo-
 rum. quamquam de meritis, ita me Deus amet, loquor
 non libenter: aduersatur enim modestia mea: sed hoc
 verbum expressit ab inuito dolor, & eorum temporum
 memoria, cum in meum nomen inuehebantur multi, alie-
 na conferentes in me, mea mihi detrahentes. Hoc igitur
 alloquendi Pontificis, & cum eo statuendi, consilio tuo,
 quasi rebus meis nulla iam tempestas immineret, &
 quasi iam in portu nauigarem, ita laetabar. Postea ve-
 ro quam de Mariano Victorio, summae probitatis,
 rarae doctrinae, excellentis industriae viro, cognoui,
 acturum te esse de negotio meo in eo conuentu, qui pri-
 mus habebitur eorum Cardinalium, quibus alendorum
 in Urbe studiorum, moderandique Gymnasii publice
 demandata cura est, plane sum admiratus mutationem
 consilii: & ut ingenue fatear, quemadmodum natu-
 ra mea fert, nec bonitas tua recusat, ex alta quadam spe
 turbatus concidit, afflictusque iacet animus meus. equi-
 dem iis Cardinalibus tantum tribuo, quantum eorū sum-
 ma virtus, ac dignitas postulat, aequae omnes diligo, ae-
 que colo: sed ad eos certe nullam arbitror negotii mei
 partem attinere. A Pontifice sum Romam accer-
 situs: a Pontifice discedendi facultatem peto. si pote-
 stas quaeritur: unius est summa. si liberalitas: unus
 unico verbo pollicetur, & praestat. si dignitas: quae
 maior est, quam, a Pontifice vocatum esse, a Pontifice
 cum

cum benignitate dimittit? Haec mea consilia sunt: quibus tamen, ut debeo, anteponam tua. satis enim exploratum habeo, nihil te cogitasse sine summa ratione, nihil acturum sine summa prudentia. & mihi, parum in usu rerum versato, obscura multa sunt: tu tamquam Lynceus vides omnia, probatus per totam aetatem iis actionibus, & curis, unde salus publica minime dubio bonorum omnium testimonio manavit. Ego me semel, non temere, aut repentina quadam voluntate impulsus, sed explorata ratione, certoque iudicio adductus, in clientelam tuam tradidi me, liberosque meos tuae potissimum fidei, benevolentiaeque commisi eadem, mihi perpetuo mens, eadem, quoad viam, in te uno sita spes erit. tu me ornandum, augendum, tuendum suscepisti: saepe vidi pro varietate rerum mearum, & laetitiam, & sollicitudinem tuam: nunc tamquam bonus artifex tuum ut perpolias opus ac perficias oportet. expedi, obsecro, me hac molestia: vel potius, hoc me periculo libera. vides enim, cum Romano caelo minime iam conuenire mihi posse: adductam esse in extremum fere discrimen salutem meam: autumnum aduentare, cuius varietatem, & inconstantiam, hic si permansero, mea certe nequaquam feret imbecillitas. Venetias multis nominibus cogito. idque mihi primum est & praeter cetera optandum: sed, si uel per Pontificem, quod non opinior, vel per quotidianam febrem, quod magis me tuo, patriam, longo terrarum ac maris intervallo disiunctam, petere non licebit: deponam voluntatem meam, suscipiam eam quam necessitas offeret. accedam ad Sabinos colles: quos florere audio regionis amoenitate, caeli temperie,

Gg

omnium,

466 PAVLLI . MANVTII
omnium rerum, quas hominum victus, cultusque deside-
rat, ubertate. Interea me tibi totum, salutemque meam
quam suppliciter possum commendans, ac tradens, nego-
tium administrandi rationem singulari tuae sapientiae per-
mitto. Vale. V. Kal. Sept. M D LXX.

AMPLISSIMO . CARDINALI
GVLIELMO . SIRLETTO 2

AVGERI tua vetera erga me merita recentibus
officiis, nec miror, & vehementer gaudeo. quamquam ve-
teribus contentus esse poteram: erant enim eiusmodi, ut
addi nihil posse videretur; sed tamen, ut video, tua nunc
quidem ad ea per multum addidit humanitas. & quam-
quam neque tua, neque collegarum tuorum, Moroni,
& Cornelii, de viatico mihi impetrando summa conten-
tio quidquam profecerit: aequae tamen vobis omnibus de-
beo, ac si profecisset plurimum. est enim animi liberaliter
instituti, spectare voluntatem in primis; minime quidem
rem contemnere, potiore tamen ipsa re voluntatem du-
cere. sane optimi Pontificis angustias temporum diffi-
cultas excusat: verumtamen ingrauescenti hominem
aetate, non solum infirma, sed etiam aegra valetudine,
imparatum a re domestica, cum filia nubili, ab Urbe
Roma, cuius nomen omnia pollicetur, post decem anno-
rum labores, suis sumptibus in patriam redire, iis fortas-
se, qui haec solent animadvertere, admirationem aliquam
pariet. Et, quamquam ea, quae bonis artibus debentur,
ratio temporum impediat, ut etiam liberalissimorum
Principum

Principum voluntas in optimo benemerendi cursu retar-
detur; me tamen a litteris nulla res abducet, si modo as-
sequi otium licebit. satis cum vulgo insaniuimus: ambi-
gua certis, turbulenta tranquillis, inania solidis praefer-
rentes. aetas, & praeteritii iactura temporis admonet, ut
resipiscamus, quodque reliquum est vitae, viuamus no-
bis ipsis, bonis artibus, Deo potissimum, a quo uno, si
quid aut ingenii, aut doctrinae in nobis est, cum accepe-
rimus: ad eiusdem unius gloriam omnes ingenii, doctri-
naeque fructus referre in primis aequum est. Vale, &
tibi persuade, neminem esse, vel umquam fore, qui tuam
praestantem virtutem aut magis amet, aut libentius prae-
dicet. Cardinalem Carasam, iuuenem natum ad immor-
talem gloriam, exemplum antiquae probitatis, cuius hu-
manitati, qua me semper est complexus, debere me plu-
rimum fateor, nisi graue est, meo nomine salutabis. VII.
Kal. Oct. M D LXX.

E I D E M, Romam. 3

QVID QVID tuli, dum in patriam reuertor, sua-
ue est: tuli autem aspera, graua, difficilia, sanequam
multa; & eo magis, quod asperitates omnes aegra va-
letudo, & corporis imbecillitas, vehementer augebat.
Quae dum ferrem, haec mecum loquebatur animus: Su-
stine, praeteritorum memoria, futurorum spe; & co-
gita, quas turbas reliqueris, quibus laboribus emerse-
ris, quam tranquillitatem, quam quietem, petas. In
patriam tendis, refertam bonis omnibus. ibi te comple-

Gg 2 xii

xu excipiet dulcissima coniux, languentem fouebit, in-
 firmum reficiet, afflictum subleuabit: nullum obsequii,
 studiiq, munus abesse patietur. Erat haec duris in rebus
 optima consolatio. Itaque laetus nonnunquam eram, in
 dolore, ac molestia comitum meorum. nunc, affectus
 ea, quae speravi, in unam curam incumbo, ut perdi-
 tam valetudinem restituam. diuturnitate morbi, & ine-
 dia, corpus iam, & vires amiseram. accedere itineris
 incommoda, quibus ita consumptus humor omnis est,
 ut nimia siccitate vitae periculum impendeat. in re-
 nuocanda potissimum τῆς κοιλίας δυνάμει medici labo-
 rant; quam si assequor, conualuisse mihi prorsus vide-
 bor. dici non potest, quo desiderio teneor studiorum nostro-
 rum. quasi ceruus ad fontem, si per valetudinem licebit
 sitibundus accuram. tua mihi consuetudo, tua virtus an-
 te oculos erit: quam imitari non desinam; & eo quidem
 animo, ut in ipsa imitatione magnā felicitatis meae par-
 tem statuam. assequi enim, quod optimum, atque perse-
 ctissimum est, non cuius contingit: velle tamen, & cona-
 ri, non mediocri dignum laude ducitur. Cupio conseruari
 veterem amorem in me tuum, meritis quidem à me nul-
 lis, perpetua tamen cultum obseruantia. quam eandem
 semper, aut etiam, si modo ad eam accedere potest, quod
 ego non arbitror, maiorem fore tibi confirmo. Vale.

MATTHAEO. SENAREGAE

Genuam.

4

IAM prorsus de uelluto spem abieceram, (utar
 enim noto verbor: nam veteres aliter loquebantur) ni-
 si tu,

si tu, rursus ut eam susciperem, tuis proximis litteris
 effecisses. expectabo igitur, & quidem brevi, (sic enim
 tuis) aduentum propinqui tui, quem, arbitror, in itinere
 philosophos ambulantes imitari. nam tribus mensibus
 non modo Genua, sed ab ultima Lusitania facile ad ur-
 bem peruenire potuit. Verum ego fortasse calumnior: &
 illi moram, homini industrio, & agenti strenue suam rem
 negotia diuturnionem, quam opinabatur, Florentiae,
 vel Senis iniecerunt. sic enim existimo: reliqua fere per
 iocum. Simiolus, ut video, tibi quoque molestus est. duci
 enim te vides fictis verbis: nihil cohortatione, nihil ad-
 monitione profici: quidquid dicat, inane esse. itaque
 molestia te affici, necesse est, vel mea causa, vel quia
 rei te mouet indignitas. ac uereor, ne semper eodem lo-
 co simus, nisi tu des operam, ut ei per aliquem tuorum
 iudicium intententur, & a lictore publico vocatus ad iudi-
 cem, serio rem agi sentiant. Artes hominis praedixit. quo
 turpius est falli, & sinere eum diutius tibi verba dare.
 quare, si me amas, quacunque via potes, urge, & con-
 tende omnibus neruis: quamquam haec quidem res tuis
 neruis digna non uidetur: sed contende tamen mea caus-
 sa, ut enomat aliquando quidquid debet. quod si accide-
 rit, atque adeo cum acciderit: cur enim dubitem, quin di-
 ligentia tua fructum pariat? non dicam, tibi agam gra-
 tias: non enim pateris: sed, tibi acceptum referam, ut alia
 multa. quae si obliuiscar, hominem me esse non pu-
 tem. Vale, vale iterum, mi suauissime Matthae; ;
 tibiq. persuade, me nulla magis in re, quam in tuis lit-
 teris, in amore, in studiis, officiisq. erga me conquiescere.

Romae. x i i x. Kal. Oct. M D LXX.

Gg 3 AN.

ANDREAE. ANTONINO
Ostianum.

5

Nisi me valde amares, quod multis argumentis intellexi, subirasce te mihi crederem, quod litteris tuis amantissime scriptis nihil umquam responderim. sed si, cur officio defuerim, audias; non dubito, quin omni me prorsus & inhumanitatis, & negligentiae suspitione liberandum putes. A quo enim tempore Roma discessisti, nullo difficultatis incommodique genere, nulla fere dixerim miseria negotia nostra caruerunt. ex ea sollicitudine, ac laboris assiduitate incidi in morbum cuius primū vi deterritus, deinde etiam diuturnitate desessus, tentatis prope rebus omnibus, cum neque periculi, neque molestiae finem viderem, cepi consilium in patriam reuertēdi: extremoq. Septembri mense, dissuadentibus me dicis, & amicis, aeger, in viam me dedi. Pisaurum vsq. morbus ingrauescere visus est. adpectu maris, quasi iā in oculis diu expetita patria esset, propinqui boni spe, animus corpori medicinam fecit. febris abiit, antequam Pisauro solueremus. ita Venetas, refecti cibo, paullo firmiores appolimus. malum illud remanet, ut inueteratis morbis fere contingit, quod alio sumus ita sicca, itaque restricta, nullo prorsus ut cibi genere molliri, soluique possit. quod si perpetuum esset, quid miserius? sed, ne perpetuum sit, curabimus, & cauebimus, quibuscumque rebus poterit, his primum, quae sunt in nobis ipsis, quiete corporis, hilaritate animi, ratione victus: tum iis etiam,

etiam, quae a medicorum scientia, consilioque profici-
scentur. Habes, id quod optasse te arbitror, de statu meo
tu, si placet, vicissim aliquid de tuo. cum enim de te,
tuisque rationibus certior fieri pro nostra necessitudine
maiores in modum cupio: tum sermone litterarum tua-
rum purissimo, atque elegantissimo, mirifice delector.
Vale. Venetiis.

FRANCISCO. MORANDO

Veronam.

6

QVAE me caussae, minime natura procliuem ad
nova consilia, nunc impulerint, ut negotium illud Roma-
num, quod Pius Pontifex Max. decem abhinc annis
honorifico quingentorum scutatorum stipendio mihi de-
mandauerat, reiiciendum putarim, non facile est scri-
bere: velim quidem existimes, eiusmodi esse, ut aliter sta-
tuere meis rationibus alienissimum fuerit. Illud certe fie-
ri non poterat, ut cū illo mihi amplius caelo conveniret.
Quod experiri, constantiae causa, dū cupio, parū absuit,
quin ipsius caeli adspēctum, usumque perdiderim. Nouum
igitur consilium capiendum necessario fuit, si modo mihi
carus esse uellem, si salutis, quam omnes antiquissimae
habent, rationem ducere, si denique uitae munus, à Deo
datum eousque tueri, & custodire, quoad ille ipse, qui
dedit, arbitratu suo repeteret. Veni domum. hic vero
me summa quies, & domestica commoda, maximeque
fidelissimae, atque amantissime coniugis cura tanta,
quanta potest esse maxima, plane recreauit, Febris

G g 4 abiit,

472 PAVLEI. MANVTII
abiit, nec tamen valemus. morbi enim reliquiae super-
sunt, magis prope timendae, quam morbus ipse. qui enim
valere possum, aut etiam quid non timeam, cum attenua-
tum, exsiccatumq. corpus naturali munere fungi sua spō
te numquam possit? quae res neque molestiae parum ha-
bet, & si inueterauerit, periculo non vacat. Hoc igitur
malum nisi depulero, valere me non dicam. Studia no-
stra, remissa occupationibus, retenta tamen animo, attingere
nondum audeo, ne stomacho, unde fluxit omne ma-
lum, praepropera cupiditas obsit. Sed heus, mi Moran-
de, quando te complectar? quando adspecta, sermoneque
fruar tuos? tu ne ad nos, an ego ad te prior? Ego scilicet ad
te. Ire enim, cum per anni tempus licebit, ad Gauderina
balnea decretum est: quae quater antea sumpsi, nec um-
quam sine fructu; nunc eo sumam diligentius, quod maio-
rem aetas, morbiq. grauitas, ac diuturnitas cautionem
postulat. inde excurram ad te, ut te videam, te comple-
ctar, tecum sim. De cydonite illa, exquisito artificio con-
fecta, qua carui tot annos, in interrupto locorum interuallis
officii tui cursu, nisi tua sponte ad consuetudinem redieris
appellabo te quasi meo quodam iure, sic tamen, ut ipsum
ius e tua fluxisse benignitate confitear. Vale, mi suauissi-
me Morande, nosq. ut solebas, ama. Venetiis.

CAMILLO. PALAEOTTO
Bononiam. 7

PVTASTI ne umquam fore, ut ego me Roma-
narum occupationum e vinculis eximerem? certe fa-
ctum

Etum vides. nec mihi venit in mentem eius consilii paeni-
 tere: quin quotidie megi gratulor, quod illa reliquerim,
 haec sim adeptus; quod ab omni cura liber otio fruor ho-
 nestissimo, quod ea nunc denique studia recalcere mihi li-
 ceat, a quibus disunctus tot annos vixi, vel potius plane
 non vixi. quae enim mihi potest esse vita sine litteris? va-
 leat ambitio, & fucatus opum splendor. nihil est, quod
 cum suauissima librorum consuetudine conferri iure pos-
 sit. qua mente cum essem, commisi tamen, ut aliter sen-
 sisse videar, cum sententiam numquam mutauerim. nam
 ad urbem Romam eo quidem consilio sum profectus, do-
 mesticis ut rationibus consulere; simul tamen id spe-
 ctans, ne delicias meas, optimarum studia doctrina-
 rum, prorsus desererem. aliter cecidit. quis me accu-
 set inconstantiae? vicit meam voluntatem potestas eo-
 rum, quibus, ut aequum est, non minus libenter, quam
 necessario, parui. sed mitto praeterita. quasi enim, ea
 dum attingo, vulneribus obductam prope cicatricem
 renouo. Hinc me propinqui, familiares, noti pariter
 atque ignoti redeuntem exceperunt voluptate summa. Ur-
 bem priuatis aedificiis elegantiore, & publicis operi-
 bus magnificentiore, quam reliqueram, inueni, prae-
 terea, quamquam ardente bello, florentem ut in sum-
 ma pace rebus omnibus, quae vel ad usum corporis, uel
 ad animi delectationem pertinent. quo dolore interdum,
 ac paene mihi succensere cogor, qui tot bonis, tanta
 tranquillitate, tanto etiam nobilium uirorum erga me
 amore tamdiu me carere sim passus. lucri tamen id
 factum est, quod, nisi hinc discessissem, diuque absuis-
 sem, haec ipsa profecto, quibus nunc ex interuallo re-
 cuperatis

cuperatis iucundissime fruor, numquam omnino, quanti essent, intelligere potuissem. itaque est, cur immortalis Deo gratias agam, habeamq. maximas, quod mihi, occasione grauissimi morbi, missionis à Pontifice petendae, ipsique Pontifici concedendae mentem attulerit. alioqui nec satis decorum putassem, nec umquam omnino commissem, ut ante pactam diem negotium publicum, Urbemq. relinquerem. In discessu commoda quaedam sperabantur; nec defuit intercedentium dignitas, auctoritas, gratia: ratio temporum est aduersata, Pontifice, natura liberalissimo, Turcicum bellum, & praesentis futuriq. sumptus necessitatem excusante. mirum id videri nonnullis. ego, qui propemodum id, quod accidit, opinione iam praeceperam, non sum commotus, ipsoq. missionis impetratae munere contentus, cetera non dixerim equidem contemnens, sed certe non maximi pendens, otii cupidus nihilo laetior discessi. Nunc habeo cum uoletudine negotium. eius enim morbi, quo me scis, Romae dum essem, nec parum diu, nec leuiter laborasse, molestae admodum reliquiae sunt. sed ut spero, sublatis iam causis, quae morbum & peperant, &alebant, sedulitate, ac fideli meorum cura, adiuuante etiam huius caeli, quod in lucem editus primum hausi, benignitate, breui omnino conualescam. Tu interea fac ne officium desiderem litterarum tuarum. Vale. Venetiis.

EIDEM,

N A E ego istam uillulam vehementer amo, quae
 te festum urbanis curis leuat, reficitq. secessu, & otio
 incundissimo: ubi te colligis, animumq. transfers ad con-
 templationem pulcherrimarum rerum: quid agas, quid
 curas, lex nulla praescribit: scribis, aut legis, arbitrati
 tuo: modo aprica decambulatione, modo prospectu col-
 lium, quandoque aperto puroq. caelo gaudes. nimirum
 hoc est viuere; & ista solitudine, isto vitae genere, nihil
 beatius. cur ego tam longe absum, cur negotiis impedi-
 or iis, a quibus quo magis ut disiungar, diuellarque, ope-
 ram do, eo me distringunt, retinentq. magis. mihi cre-
 de, si rerum domesticarum soluta ratio esset, aduolare
 ad te statim, in ipsam in quam uillulam recta me confer-
 rem, ut tua consuetudine, tuis sermonibus, tuo conuictu
 fruerer: te denique discedente, custos remanerem, pomarii
 praefectus, villicus plane tuus. quod si accideret, ut istuc
 exulare perpetuo cogerer, modo te interdum socio, modo
 cum libellis, praeclare mecum actum putarem, multam
 salutem urbibus, multam honoribus, in quibus ceteri
 insaniunt, libenter dicerem. quid enim expectem am-
 plius? didici iam, & magna mercede sum expertus,
 quam inania sint illa, quae, communi deceptus errore,
 praeclara duxeram. magnae urbes magnas occupatio-
 nes, ne dicam miseriae, habent. si quem delectat ambi-
 tio: si quis augendae rei familiaris cura tangitur: si senten-
 tiam in curia dicere, aut à multis in foro salutari, inter
 summa ponit: urbem amet: me quidem posthac aemu-
 lum.

476 PAVLLI. MANVTII
lum, riualemque non habebit umquam. aetas nostra, mi
Camille, ad otium uergit. uides, quam fluxa sint omnia:
quam facile hunc & illum, florentes opibus, florentes
aetate, repentina mors auferat, ut hoc ipsum, quod spa-
tium nobis relinquitur, totum in lucro deputandum esse ui-
deatur. ac fieri quidem potest, ut diu uiuamus: sed, ob
secro, quid erit, cur nos diu uixisse laetemur, inter dome-
sticas curas, inter hominum fraudes, infidelitates, infi-
dias, addo etiam publicas calamitates, quibus anguntur
boni uiri, quales nos & esse, & haberi uolumus? Am-
plectamur igitur studia nostra: remota ab arbitris loca,
amoena, salubria, quaeramus: vulgi stultitias, ineptias
que uitemus: animos excolamus, ut eas fruges serant,
quas nec caeli calamitas corrumpat, nec malus vici-
nus furto subtrahat, nec belli saeuientis impetus deu-
stet. In hac sententia te esse, & idem probari utrique
nostrum, litterae tuae, non minus eleganter, quam pru-
denter, scriptae significant. Sed impedita, propter do-
mesticas difficultates, mea ratio est, tua longe facilior,
& expeditior. nihil enim obstat, quo minus id, quod uis
exsequi, & praestare possis: ego uoluntate, & cogita-
tione pascor: ab ipsa re quam longe absim, intelligo.
Nec tamen parum profeci, quod ab urbe Roma disces-
si. ibi enim ne spes quidem erat otii: hic saepe uaco, nec
tempus perire sino: sed, quod otii perpetuitate careo, idem
tidem interpellantibus aut hominibus, aut negotiis, &
quod angusta nimis utor domestica re, ideo fit, ut conari,
& instituere multa possim, absolvere & perficere, prae-
sertim quod expectationi respondeat, nihil fere possim.
Habenda est etiam ratio ualitudinis: quam uereor, ne in
longum

longum tempus affligerit Romanum caelum, dicam, an negotium? an utrumque potius: quod ita esse reor. Sed, si valebo, si rem familiarem ita constituam, ut absentis animum nihil pungat: imitabor, quantum in me erit, consuetudinem tuam, expertemque culpae voluptatem quaeram. & quod te quoque facturum esse, vel potius iam facere coepisse video, in litteris, in colenda pietate, in summi Dei, summique boni amore, & cupiditate conquiescam. Vale.

Venetiis. 7. die. Dec. M D LXX.

E I D E M, Bononiam. 9

NIHIL gratius oleis, uel earum magnitudine, uel condimenti suauitate, uel ipso amore tuo, qui te, ut mitteres, admonuit. Hispanis honorem tribuunt nobilium mensae, quia magnitudine ceteris antecellunt, mihi nescio quo modo subinsulsae videntur. tuae nec magnitudinem desiderant, & carnis habent multum, & praestanti sapore commendantur. quare non dixeris, sed praeclare collocatur industria tua in oleario colendo. in quo multa consequeris. tibi, post urbanae curas, voluptatem quaeris: domesticam rem iuuas; quamquam te quidem hoc arbitror in minimis ponere: amicos muneribus afficis: in quibus me non potestremum locum obtinere, ita laetor, ut hac una saepe cogitatione in magnis molestiis non mediocriter solatium inuenerim. Fruere, mi Camille, ista voluptate, qua nihil honestius; isto industriae genere, quo nec liberalius,

beralius, nec nobilius quidquam esse potest. Scis enim, quid de sapientissimis uiris proditum memoriae sit: agrestem eos uitam, expertem deliciarum, ab omni luxu, atque ab illa bonorum morum corruptrice copia remotam victu cultuq. simplici contentam, urbanae praetulisse; agro bene culto, & ipsa largo sinu suas opes effundente natura, nihil vidisse libentius. Quid magni Reges? nonne sua manu satas pulcherrimas arbores, apto ad speciem ordine, incundiq. descriptione dispositas, exterarum nationum legatis gloriae causa ostentabant? Hoc qui student imitari, quis eos iure reprehendat? Utinam fundus meus aut abesset propius, aut ea saltem regione esset, ubi caeli grauitas minime timenda videretur. mihi crede, olearia ego quoque instituerem, rusticis me oblectarem operibus, valetudini simul animoq. consulerem. quod aliqua tamen ut ratione consequar, quocumque loco, quacumque regione operam dabo. Nam hic diu commorandi spem auferunt multa, sed maxime frigoris iniuria, & vinorum austeritas: quae, tenui corpore, imbecillo stomacho, ferre vix possum, vel plane nullo modo possum. itaque de migratione cogitandum. Vale. Ventiis. Kal. Ian. M D LXX.

FRANCISCO. CICEREIO

Mediolanum.

IO

QVAM vereor, optime ac doctissime Cicerei, quia serius epistolae tuae respondeo, ne quid suspicere de me durius; quod certe non debes. quo enim tempore mihi
Romae

Romae reddita est, graui morbo laborabam: neque conualui, nisi post multos menses, nec in Urbe, sed in patriam reuersus. nam ualeitudini meae caelum illud, quo usus eram antea perbegnino, aduersari, & obesse ita coeperat, diutius ut ferre non possem. itaque fuit omnino, ut vitae consulerem, ab urbe discedendum. in quo summi Pontificis clementiam, & facilitatem laudabo numquam satis: qui, de languore meo certior factus, cum adhuc muneris mei susceptaeque prouinciae menses non pauci superessent, abeundi tamen potestatem petenti aequissimo animo concessit, quam quidem eius benignitatem tanti aestimo, quanti suam quisque vitam & incolumitatem aestimare debet. uiuere enim diu me posse, aut recte saltem et firmiter umquam ualere, si permanerem ubi coeperam aegrotare, febris praesertim adhuc urgente quotidiana, plane desperabam. Haec si tu nosti; non dubito, quin purgatus tibi satis superque sim. id enim aequitas, & earum artium, quas magna cum laude profiteris, humanitas postulat. Sin autem de statu meo nihil accepisti: mirari te fortasse non nihil decuit male tamen de me, quasi officium negligere, aut inhumanitatis uitio laborare, quem scires ab homine omnium officiosissimo, atque humanissimo, Octauiano Ferrario, diligi, existimare non oportuit. inter diuersa enim studia, dissimiles ne mores, amicitia non oritur; aut si oritur, non diu certe conseruatur. similem sibi quisque ad amandum deligit in quo errare se non putat: sed, si errat, iudicium iudicio meliore corrigit, dissuta, non dississa ut à sapientibus praecipitur, amicitia. At mihi cum Ferrario triginta iam annos, eoque amplius, artissima intercedit

tercedit necessitudo . quo primum die mihi cognitus est, ingenium , & futurae doctrinae principia perspexi; postea mores in consuetudine prouaui : inde ortus est utrimque amor : qui ne umquam deficeret , alereturq. potius , & ad summum perduceretur , ille suae virtutis , ego meae meritis in illum obseruantiae , praestitimus . Hoc argumento , tu vide quid tibi sentiendum de me putes : ego , cum Ferrario , tali uiro , cuius non minus ita , quam scientia , bonis omnibus , recteque intelligentibus probatur , placere me video , ipse mihi displicere non possum . Nam quod una cum eo Bartholomeum Capram , Hannibalemque Cruceium in caelum fers : plane tecum sentio , vel tu mecum potius . multi enim sunt anni , cum , & hominum proborum , atque eruditorum celebri sermone comotus , & Ferrarii testimonio quo quid grauius ? impulsus , utrumque coepi diligere . Capram , iam tum audiebam , praeter ius ciuile , dignamque nobili uiro multarum litterarum scientiam , insigni quadam erga bonos omnes , praesertim liberalium disciplinarum amore flagrantem , liberalitate excellere . quae laus eo pluris in privato ciue debet aestimari , quo minus hodie in iis , qui beati propter opes putantur , idest in principibus ipsis agnoscitur . Cruceii humanitatem expertus saepe sum in rebus meis : doctrinam e scriptis eius non uulgarem , praestantem eloquentiam duxi . Quis igitur dubitet , (nam te quidem vix arbitror) quin agnoscat illud apud me ualeat quod tu lepide , uereq. induxisti : si tibi cum iis uiris , quos ego uehementer amo , uehementerq. colo , optime conuenit , sequi omnino , ut mihi quoque tecum optime conueniat . sed , mihi crede , his argumen-

tis

is iam non eget uirtus tua: quam probauit, largita tibi
sua iura, ciuitas omnium nobilissima: probauit, manda-
to tibi publice docendi munere, senatus ille, cuius ad sa-
pientiam & iustitiam, quasi ad sacram anchoram, rebus
aduersis, aut dubiis, omnes confugiunt: probarunt de-
nique suo testimonio, suaque commendatione, tres illi
uiri omni prorsus laude cumulati. Quae cum speculo
mecumque cogito, munus hoc amoris tui delatum ad
me per litteras, & eas litteras, quibus ut nihil huma-
nius, ita nihil possit esse ornatius, quantum sit, intelli-
go. in quo tuendo, augendoque rebus iis, quae signifi-
cationem habere poterunt uoluntatis meae cum tua lau-
de coniunctam, partes meae non desiderabuntur. tu
uelim existimes, quod tibi nunc libenter promitto, mul-
to facturum esse me opportuno tempore libentius. id si
credis: & si utendum tibi statues in omni tua re studiis,
officiis, facultatibusque meis, & eo quidem animo,
tamquam ea tibi non recentiis, aut dubiae, sed ueterri-
mae, & multorum annorum usu confirmatae beneuo-
lentiae iure debeantur: erit hoc alterum humanitatis
 tuae non uulgare munus: quo me tibi deuinctum, perpe-
 tuo fore polliceor. Vale.

Ex opido Plebe Sacci. VII. Id. Nou. M D LXX.

OCTAVIANO. FERRARIO
Mediolanum. II

M I Ferrari, si me tantum amas, quantum profe-
cto amas: gratulari te mihi aequum est, quod exopta-
Hb tae

481 PAVLLI. MANVTII
tae diu patriae compos denique factus post annos decem
tenui fortuna contentus ita viuo, vt regum opes hono-
resq. contemniam. carebam otio, studiis, rebus multis ad
meam naturam aptis: quae mihi nunc omnia Dei beni-
gnitas restituit: iisque fruor eo suauius, quo fit vsus de-
siderii diuturnitate iucundior: Si quid praeterea non
tam de meo, quam de meorum statu scire uis: ut sere,
qui amant, curiosi sunt omnes: haec accipe. vxor, & fi-
lius in urbe, commoda vterque valetudine, illa rem do-
mesticam, hic officinam, emendandorumque librorum
curam administrat egregie. mihi, taedio diutinae com-
morationis urbanae, rusticari vehementer placet. quo
primum afflictæ diuturno morbo valetudini consulimus
& imbecillo corpori vires addimus: deinde, quasi qui-
busdam ex solutus uinculis, libere uagatur, & volupta-
te pascitur animus honestissima. nullis hic angimur cu-
ris, nullis implicamur negotiis: licet id, quod antea
numquam licuit, prorsus nihil agere, si volumus: &
quod licet, saepe volumus. nam uehi curru, opida inuise-
re propinqua, amicorum uillulas obire conuiuari etiam
interdum, suauissimisque epulas condire sermonibus, hoc
ipsum uoco nihil agere. quamquam, qui, valetudinae
parum firma, operam dat, vt suauiter, iucunde, & hone-
ste simul uiuat, is profecto nihil agere mihi non uidetur.
Sed in hoc tamen uitæ genere libros, communes deli-
cias nostras, abiicisse me penitus, nolim existimes. no-
biscum ubique sunt, comites nunquam molesti, loquen-
tes, silentes, cum uolumus, quo ad volumus. & quam-
quam ueteris morbi reliquæ quaedam supersunt, & ui-
res adhuc languent: quiddam tamen aggredi sumus ausus:
quod

quod si, ut spero, absoluam; & si, ut principia dare se uidentur, ita procedet industria, uel a te probabitur; (à te cum dico, qui subtiliter, & sincere iudicant, simul omnes intelligo. tu enim is es, quem nec opinio fallat, nec uoluntas a ueritate detorqueat) uel, quin me putes omnis expertem ingenis, nec de mea, nec de cuiusquam omnino facultate statuere, & existimare quidquam posse, non recuso. Locus ipse me, uacuis interpellatoribus, & haec uiuendi arbitratu meo, rerum omnium dulcissima, optata antea potius, quam sperata libertas inuitauit, ut or direr id, quod, nisi sedem hic statuo, aut certe, nisi in hoc secessu, & in hac paene solitudine (nam si cum urbe conferatur, quamquam celebre satis opidum, solitudo tamen quaedam uideri possit) maiorem anni partem consumpsero, vereor, ne sero admodum, fortasse etiam per texere numquam liceat, opus est nec temporis, nec laboris exigui. tempus hic, ut uideo, decesse non potest: laborem communis utilitatis gratia numquam adducar ut fugiam: interim tamen, superiore periculo admonitus, operae curaeque plus in ualeitudinem, quam in studia, conferam. Vale. Ex opido Plebe Sacci. v. Id. Nou. M D L X.

HENRICO ET CAMILLO

CAETANIS, FRATRIBVS

Bonifacij Principis filiis,

Romam.

12

LAETARI vos arbitror, nobilissimi adolescentes, pro vestra erga me benevolentia, meo in patriam reditu, minime dubitantes, quin tranquille vinam, vacem iis molestiis, quibus in urbe Roma carere vix poteram, fruam iis studiis, cum quibus voluptatem nullam confereo. nam de fructu, quem posteritas capere possit ex industria mea, nihil dico. conatus equidem a puero sum, idq. mihi propositum in omni vita fuit, ut omnibus meo labore prodessem: utrum autem, quod sequebar, assequi licuerit, ad meum iudicium non reuoco: viderint ii, qui nostra legent. ego mihi temere nihil arrogo, nec assentor libenter, aut ita gloriola ducor, ut falsae opinionis errore, quod video multis contingere, oblectari me sinam. quod si nihil aliis prodesse possum: bene tamen mereor de me ipso, dum ea lego, quibus curae sedantur, dissipatusque perturbationibus animus colligitur, & ab admiratione rerum inanium ad vere solidaeque felicitatis cupiditatem traducitur. hoc bono Romae carebam, quia carebam litteris, & otio, molestissimis implicatus occupationibus, quarum ipsa nunc recordatione commoneor. itaq. cum opinari & credere nonnullos audio, eo me consilio ab urbe discessisse, ut, recuperata valetudine, redire, ita statuo, vel eos ignorare, quam infeliciter mecum actum

actum sit, quam diu Romae vixi, vel in illo quingentorum scutorum stipendio tantum ponere, ut easdem subire molestias cum eodem expediat euolumento. qui se naturam moresque meos tenerent, profecto longe aliter sentirent. non enim aut stipendium illud, aut vlla me lucri cupiditas Romam perduxit: quamquam haec privatae sortis homo non contempsit: sed spe sum allectus prope certa, vitae cum dignitate traducendae, fruendi nonnumquam studiis meis, amicorum consuetudine, voluptatibus etiam homine ingenuo, & liberaliter educato non indignis. quam contra ceciderit, vos optime nostis. nunc, vel si stipendio vocarer multo maiore, sic insanirem, ut meam quietem, diuino mihi munere post annos decem restitutam, mea studia, ipsam denique valetudinem villo pretio venderem? tum vero, si eadem illa contingerent, iure plesterer; nemo excusatione aut venia dignum duceret: nemo querentem audiret, nemo opem ferret imploranti: ad auaritiae culpam, & immodicam habendi libidinem conuerterentur omnia. Praestat igitur sapere, id est, quam alii fortunam admirantur, eam contemnere, paucis acquiescere, & iisdem contentum esse, quibus ipsa contenta natura est: quae, dum vitae arceantur incommoda, & alimenta suppetant necessaria, praeterea nihil desiderat. Iam aetas, & valetudo, haec admodum infirma, illa quotidie magis ingrauescens, admonent me cupiditate ne prouehar longius, vela cito contraham, & impendentes futurae vitae procellas extimescam. itaque facio non inuitus, ut, cum huius peregrinationis exitus haud longe distet, non tam de uia, quae minima restat, quam de exitu ipso, qui principium afferet aeternae

486 PAVLLI. MANVTII
nae vitae, cogitem, atque elaborem. Haec ideo colle-
gi, ne quando vos, aut aliquis potius vestri dissimilis,
(nam id quidem a prudentia vestra expectandum non
videtur) displicere mihi consilium meum suspicari pos-
set, quod in patriam venerim. quod utinam biennio
maturius fecissem. non incidissem in eum morbum, quo
valetudinem in perpetuum fere peridi; rationes hic do-
mesticae minus iacturae fecissent: studia fortasse mea
fructum studiosis aliquem tulissent. Una tamen ex hoc
naufragio tabula me delectat, quod opinione fruor amo-
ris in me vestri; quod ex disciplina, praeceptisque meis
maximum vos in ea via, quae ad eloquentiam ducit, fe-
cisse progressum intelligo; quod, perspecta denique in-
dole, voluntate, industria vestra, augurari facile pos-
sum de futura gloria: nec locum iam habet adhortatio:
curritis enim vestra sponte, quo patriui Cardinalis digni-
tas, & virtus, quo parentis integritas, & sapientia,
quo auita decora, & maiorum nomen immortale vocat.
Valete. Venetiis. IX. Kal. Dec. M D LXX.

I O. C A S E L I O. A D
arcem Sucriniam. 13

VRBEM Romam ante duos menses, difficili diu-
tinoque coactus morbo, reliqui. melius omnino mihi
nunc est: necdum tamen ita valeo, ut intermissa officia
repetere audeam. libros parce attingo, amicorum lit-
teris, nisi graue sit argumentum, aut breuiter admo-
dum, aut prorsus nihil respondeo: negotio reliqua, ut
valere

valere ipse possum, valere iussi. eare nec scripsi ad te
 antea; & in posterum, ne quid oneris mihi imponas,
 quod infirma ferre valetudo nequeat, a te peto. Fami-
 liares tuos, nobiles adolescentes, Ioachimum Basseni-
 tium, & Nicolaum Rascium, verbis perhumaniter
 accepi: re non inuio: quia nec ipsi rogant; & mihi, quid
 eorum causa praestare possim, ipsis non rogantibus, in-
 mentem non venit. modesti sunt omnes, & morum ele-
 gantia praediti. ingenio, & litteris, cum a te diligan-
 tur, tuaque consuetudine sint usi, non dubito, quin pro
 aetate excellent. ac sapienter quidem eos facere iudico,
 quod apud nos aliquandiu sibi viuendum statuunt. prae-
 claram enim indolem, materiemque virtutis haud me-
 diocriter caelum italicum adiuuabit. quod eo magis lae-
 tor, quia redundabit ad te aliquid ex eorum summa lau-
 de; cum vel alumni fuerint disciplinae tuae, vel tuis
 hortatibus, consiliisque in Italiam, quasi ad mercatum
 bonarum artium, se contulerint. mihi autem, caue-
 putes, gratius quidquam esse posse, aut curavi a me
 libentius, quam quod ad existimationem pertinere
 tuam intelligam. id adeo cum praestanti doctrinae
 tuae, studiisque ad communem utilitatem spectantibus,
 tum summae erga me, perspectae iam satis atque co-
 gnitae, beneuolentiae debere mihi videor. Vale.
 Venetiis. x i i x. Kal. Jan. M D L X.

HORATIO. CARDANETO

Perusium.

14

GRATVLOR tibi, mi Cardanete, nec sane magis ex animo gratulari possum, quod nobilissimorum adolescentum, Henrici, & Camilli Caetanorum, fratrum, autus amicitia sis. melior omnino reperiri ratio nulla poterat, qua ferrem aequius eorum me consuetudine carere, quam quod utantur tua. te enim vel studiorum similitudine, vel animorum coniunctione, vel mutuis etiam officiis quasi me alterum esse puto. qua modestia sint, qua gravitate, qua prudentia, quam a communibus ingeniis differant, quam a deprauatis huius saeculi moribus abhorreant; quia breui admodum ipse intelliges, nihil dicam. auguratus quidem antea sum, si diuturna viriq. vita contigerit: quod in tanta bonitate, tam propensis ad veram laudem studiis, ab immortali Deo sperandum videtur: nullam esse gloriam tantam, quam non facile consequantur: nullos honores, qui non eorum virtutibus ultro deferantur. Te rogo, pro eo quanti me facis, conferas in eos quidquid poteris, officii, studii, observantiae, quodque facere cum omnibus qui te norunt, solitus es, id tibi cum ipsis praecipue faciendum putes, ut iis pateant opes ingenii, eloquentiae, doctrinae tuae. De meo statu, quidquid possum scribere, ut video, cognitum iam habes. in eo tamen erras, vel potius errare te coegit aliorum sermo, quod me bene nummatum in patriam rediisse putas. decem enim annorum laboribus vix tria scutorum millia,

lia, id est quantum ad filiam collocandam requiratur, colligere potuimus. ita mihi nullae pecuniae, nullum vectigal, prater veterem frugalitatem, quo vectigal nullum est uberius, animum paucis contentum, relinquitur. quare gratulari te mihi velim, non quod abundem, quod falsum est, sed quod tranquilla mente viuam, quod in studiis quatum valetudinis ratio permittit, quod cum meis, quod denique nullis implicatus negotiis, sed in summo otio, summa quiete, summa libertate, quae sunt omnibus diuitiis, recte intelligentium iudicio, anteponenda. Vale, & Illustrissimis Caetanis salutem dices a me plurimam. Venetiis. XVI I. Kal. Ian. M D LXX.

ANTONIO. ROLANDO

Patauium.

15

ADHVC languebam ex vetere morbo: & filio non leuiter aegrotante, eram sane perturbator: committere tamen nolui, ut epistolae tuae insigni praesertim Homericæ magniloquentia, & beneuolentiae notis erga me tuae, nihil omnino responderem. Quod petis, ut orationem tuam corrigam: primum id quidem necesse non est; cum scriptor sis luculentus, iudicioque excellas: deinde vero tatum ab re mea mihi otii non est, aliena ut possim legere. aut enim non vaco: aut, si quid temporis conceditur, ad ea, quae inchoata, rudiaq. iam pridem habeo, absoluenda, & perpolienda totum confero. quare a te peto, ut habeas rationem & valetudinis, & occupationis meae. Ego, postea quam in patriam reueri, negotiorum

480 PAVLLI. MANVTII
tiorum magnitudine defatigatus, aetate etiam admoni-
tus, & Venusii Poetae versu, Solue senescentem ma-
ture sanus equum, mihi & Musis dumtaxat vivere
constitui. nullas suscipio curas, nisi quas rerum dome-
sticarum necessitas imponit. nouas amicitias non expe-
to; veteribus colendis operam non do: cum vxore, li-
berisque suauissimam vitam duco. hic enim dies, vt il-
le ait, alios mores, aliam vitam postulat. amicorum co-
pia quid praeter molestiam habeat, non video. si quis
aliter sentit, arbitrato ipse suo viuat; ego malo mihi sa-
pere, quam aliis. De vxore a te ducta, de susceptis li-
beris, valde tibi gratulor. nam, eisi onus alendae fami-
liae, durissimis temporibus, magna rerum omnium
caritate, perquam graue esse non ignoro: te tamen, vi-
rum bonum, peritum optimarum artium, tua virtus ex
omnibus incommodis, ac difficultatibus eripiet: ade-
ritque Deus, cuius eximia benignitas praeclaris cona-
tibus & optimis studiis deesse numquam solet. Vale.
Venetiis. x. Kal. Ian. M D LXX.

EPI-

491
EPISTOLARVM
PAVLLI. MANVTII
LIBER. VNDECIMVS

ILLVSTRIS. ET. EXCELLENTIS.
I V V E N I,

IACOBO. BONCOMPAGNO 1

NOTA sententia est, a sapientissimo viro
litterarum prodita monumentis, muta-
tione temporum, euentu vario, per omnes
aetates comprobata, cum Principum mo-
ribus, atque institutis, priuatorum hominum sensus, &
studia congruere. est enim ita more comparatum, ut
in eorum, qui imperant, vitam ii, qui parent, veluti
in speculum intuentes, dicta simul & facta diligenter
animaduertant. inde oritur cupiditas imitandi; inde
fit, ut aut virtutes emanent, aut vitia deriuentur. ita-
que, GREGORIO XIII. cui tu sanguine con-
iunctissimus, virtute carissimus es, in illa proxima cae-
lo sede, incredibili Cardinalium omnium consensu, in
quo perspicua diuini numinis voluntas apparuit, collo-
cato, speciem quandam & imaginem rerum omnium
laudandarum quasi post tenebras exorta luce vidimus.
& cum ad urbem quotidie tot mortales, praesertim qui
nobili aliqua arte excellent, suae quisque spei fauens,
tam cupide confluant, nemo dubitat, quin, cum ille
antea

antea semper ita vixerit, ut ingenuarum disciplinarum studia rebus omnibus praeferret, rectum & honestum sic amaret, ut nihil ambitioni, nihil gratiae tribueret, ad aequitatem & religionem omnia referret, eadem ei nunc prima sint, eadem studia colentes amplectatur, ornet honoribus, opibus augeat, maxima potestate cum optimamente coniuncta. Ille pacem, & concordiam Christianorum Principum tuebitur: ille praeclearam in perdendo communi hoste conspirationem fouebit: illi publica salus, Sedis Apostolicae dignitas, summi Dei gloria, a qua numquam oculos deflexit, erit antiquissima. In iustitia vero, cuius omnes partes nouit, plerasque cum laude exercuit, prorsus eum nihil fallit: non ex aliena pendebit opinione: non alienis consiliis auferetur: quae saepe labes, graui ciuitatum damno, bonos etiam Principes infecit: ipse disceptator, & iudex res & priuatas pro sua sapientia, suoque sensu moderabitur, ac reget. Quid artes illae nostrae, quibus ad humanitatem informamur, quae fessos curis animos leuant, nec tamen uilitatem a uoluptate seiungunt, non eae nunc, nimium dtu cum oblanguerint, spe quadam recreatae, oculos tollere uidentur? cumque nouo Principe, ad liberales omnes artes maxime propenso, uehementer laentur, tum uero in te, IACOBE Illustrissime, spem suam in praeiis locatam habet, a te opem expectant, tibi se suamque dignitatem, fatali quadam temporum calamitate ea demptam, supplices commendant. non negabis, opinor, bene de te merentibus patrocinium tuum, & ad cetera, quae in te elucent, ornamenta, cum ingenii, atque doctrinae, tum uero eius modestiae, qua te tam secundis rebus

admi-

admirabilem praebuisti, addes hoc, quo nullum illustrius
 esse potest, ut litterarum causam suscipias, reliqua tam-
 quam inania contemnas: quamq. tibi antea laudem apud
 multos, versatus in celeberrimis Italiae gymnasiis, non
 obscura voluntatis egregiae significatione peperisti, eius
 augendae cum facultas hoc tempore diuinitus tributa
 maxima sit, non committes, ut ipse tibi aliquando, & glo-
 riae tuae defuisse uidearis. Quae si cogitas, summa sapien-
 tia est; si perficis, summa felicitas. nam ipsum, velle,
 quis in laude ponat, nisi, quod velis, res ipsa declaret? fe-
 licem porro non ego quemquam duxerim, qui sibi licere
 putat, quidquid libet; sed qui, cum in magna potestate sit,
 licere tamen sibi nihil uult, nisi quod ueritas, & ratio ipsa
 praescribat. sensus autem hic multitudinis est, ut abunda-
 re quamplurimis rebus, optabile in primis existimet. re-
 ste uero uti, neque optant multi, & soli sapientes norunt.
 Ac mihi quidem, cum ad tuam superiorem uitam ani-
 mum refero, haec ipsa, quae laudo, quae tuum nomen im-
 mortalitati commendare possunt, eadem te sentire, eadem
 cogitare, & uelle, tuaq. sponte satis ad uerum decus in-
 flammatum esse, minime dubitandum uidetur: eoq. breuius
 ad te scribo, ne superuacanea legas, distentus magnarum
 rerum curis: scribendum tamen aliquid hoc tempore sum
 arbitratus, ut, cum omnes tecum gratulationis officio fun-
 gantur, omnes tibi nauare operam & studium uelint, ego
 quoque meam in te singularem obseruantiam, priuatim
 nihil spectans, tuae studio laudis incensus, & nobilium
 disciplinarum amore flagrans, officio testatam aliquo re-
 linquerem. Vale. x. Kal. Quinct. M D LXXII.

C A.

CAMILLO. PALAEOTTO

Bononiam.

2

PRAECLARA sane amicitiae lex de similitudine animorum in utraque fortuna : quae si seruaretur, nihil esset humana uita incundius . sed, quod tu sentis, & quod ego tecum, siue munus hoc naturae fuerit, siue earum artium, quibus ab ineunte aetate operam dedimus, in eo, quam pauci sint, qui nos imitentur, tu profecto pro tua prudentia animaduertis, ege pro mea tenuitate saepe sum expertus. equidem nulla re magis laetor, quam opinione amoris in me tui : cui nisi ex omni parte responderem, hominem me non putarem. amo autem te non ob illa, quae tibi possunt esse communia cum multis, quod unus ex amplissimo XL. uirum collegio sis ; quod propinquitatibus, clientelis, opibusque ualeas ; denique, quod fratrem habeas Cardinalem, & eum Cardinalem, quem non dignitas magis, quam uirtus illustrat : sed ob ea, quae tua propria sunt ; quod ab adolescentia ita uixisti, ut senilem in te prudentiam nemo requireret quid, ortus clarissima gente, maiorem tamen ex te ipso nobilitatem quaeris ; quod ad omnem uirtutem, libero uiro dignam, praecipue uero ad liberalitatem propensus, excipis, & complecteris omni officiorum genere, quicumque se studiorum gratia Bononiam conferunt, & , quo quisque magis uirtute, industria, probitate uidetur excellere, eo maior ac praestantior in eum tua benignitas elucet . ita fit, ut ad libera-

lium

lium disciplinarum studia plurimos quidem inueterata
 iam Bononiensis gymnasii gloria ex uniuerso terrarum
 orbe, multos tamen tui quoque nominis fama pelliciat.
 Haec ego cum aliis potius, quam tecum: nunc erupit
 amoris uis, quae me, nihil minus ab initio cogitantem,
 prope inuitum ea scribere coegit, quae tu cum libenter
 agas, non libenter tamen audis. occasionem autem non
 ostendendae solum beneuolentiae meae, sed iudicii quo
 que declarandi non leuem sane tu dedisti, cum in ma-
 ximis occupationibus, in summa nouae affinitatis laeti-
 tia non modo de me absente cogitasti, quo contentus
 esse debui, sed effudisti in me suauissimis litteris par-
 tem laetitiae tuae, affecisti que me voluptate tanta, quan-
 tam animus meus capere potest maximam. Ac de isto
 quidem officio tibi nunc, ut debeo, gratias ago, habe-
 re numquam desinam: de ipsa uero re, quam significas
 ita gratulor, ut, quae mentis exprimere meae sensum
 queant, verba prorsus nulla suppetant: ista enim affi-
 nitate, ad utram familiam oculos conuerto, omnia ui-
 deo plena dignitatis, plena sapientiae, plena virtutis.
 cum uero utriusque decora copulantur; tale quiddam
 exsisti, quod cum intueor, haud facile, quid conferre
 possim, reperio. Quare debes expectare omnia iucun-
 dissima. soboles exorietur, approbante immortali Deo,
 digna parentibus, auis, maioribus, unde mirabiles
 Christiana Resp. & in primis ipsa patria fructus ca-
 piat. Quod ut ita sit, pro meo ergo te singulari studio
 non minus opto, quam si ad me ipsum, liberosque meos
 eadem illa pertinerent. Tu me uelim ames mutuo, Si-
 goniumque meum, & Amasacum salutes. Vale, Ego,
 quam-

quamquam caelum mutauerim, nondum tamen satis recte valeo.

Ex Plebe Sacci. XVI. Kal. Maii. M D LXXI.

E I D E M, Bononiam.

3

UALDE accidit non sane contra voluntatem, sed certe praeter opinionem meam, ut Mediolani consistere. sic sunt humana consilia nostra plerumq. ratio, casus interdum, & fortuna moderatur. Ego Genuam ea potissimum causa petebam, ut villulis pulcherrimis, iucundo placidi maris adspectu, & quod in primis valetudo mea requirit, verno caelo hieme summa fruerer. nam Venetiis hieme superiore, cum & cubiculo clauderer angusto, & camino assidue utrerer luculento, parum tamen abfuit, quin me vis frigoris absumpserit. Scis, quae mea tenuitas, quae sit imbecillitas. nec aetatem, ut arbitror, ignoras. quotidie labuntur vires, & eo magis, quod ea, quae mihi ab adolescentia rerum omnium antiquissima fuerunt, & a quibus ne nunc quidem, aetate ingrauescenti, diuelli possum, studia calorem illum, quo alimur, exhauriunt. Haec de frigore: audi nunc, quae supersunt incommoda. Exercitationibus dum utor, confirmari me sentio: at iis uti Venetiis, praesertim sub dio, vel ob angustias viarum, vel ob infinitam prope ciuium, peregrinorumque frequentiam non licet. huc illuc impellimur: saepius alieno motu, quam nostro, mouemur: uix ut interdum, ac ne uix quidem, si lubrica uia est, consistendi facultas detur. De uinis quid loquar? diu.

turna

turba me consuetudo Romanis, omnium facile primis,
 assuefecerat. similia non quaerebam, sed quae prorsus dis-
 similia non essent: periit omnis industria. Carnis mira
 paenuria: vitulinam quidem, quae differat à bubula, re-
 perire, felicitatis est. Excellunt uiri nobiles benignita-
 te, virtute, sapientia: neque ego eorum amicitia, & con-
 suetudine exclusus umquam sum, appetitus etiam a
 multis: quod in iis rebus numero, quarum memoria
 non mediocriter oblector: sed nescio quomodo fit aeta-
 tis fortasse vitio, ut quaedam res, quibus olim pascabar,
 quotidie magis ex animo dilabantur, mihi uni, mi Ca-
 mille, iam cupio uiuere, dum uiuo, sic tamen, ut, me
 ceteris etiam uixisset, aliquando intelligatur. Habes, cur
 Venetiis non sim: quo spectem, & ubi esse uelim, ac re-
 liquae vitae domicilium collocare, sane nondum constat.
 amoenitatem, & salubritatem sequor. utraque Genuae
 est, utraque ut audio, Regii, quo peramanter inui-
 tor: & suburbannum mihi suum, magnifice extructum,
 eleganter ornatum, uir primarius, integritate, doctri-
 naque excellens, Horatius Malagutius, summi Pontifi-
 cis cubicularius, semel & iterum detulit. mihi tamen
 ocellus Italiae, Benaensis ora, Asulano meo, unde
 multa suppetent, satis propinqua, vehementer arridet.
 eo me conuertit animus: eo referunt pedes: ibi denique
 cum rusticis malim, rustico paene more, quam alibi
 cum perurbanis, in magna non modi lautitia, verum
 etiam copia, vitam agere. Interea sum in hac urbe, &
 ut uideo, diutius ero, quam putabam: non tam quia pro-
 pter anni tempus discedere uix iam licet; cum & imbres
 assidui uias corruperint; & ego is sim, qui uel leuissi-
 mi

mis frangar incommotis; quam quia duorum virorum,
 omni laude ac virtute circumfluentium, Bartholomaei
 Caprae, hospitis mei, & Octauiani Ferrarii, veterrima
 mihi necessitudine coniunctissimi, singulari doctrina, hu-
 manitate beneuolentia perfruo. otii quidem habeo, quod
 tu fortasse vix credas, in vrbe amplissima, omniumq. ce-
 leberrima, non minus, quam optabam, plus profecto,
 quam sperare ausus essem. itaq. studia calent. quod cum
 dico, simul illud dico, Mediolani me perlibenter esse.
 nam cum studiis, & litteris nullum vitae genus, ne si
 Croesi quidem addantur diuitiae, permutauerim. De va-
 letudine si quaeris: ea sum, qua soleo, idest non admodum
 firma: me tamen cum domestica quiete, tum definita qua-
 dam victus ratione, aliqua etiam animi tranquillitate
 tueor atque sustento. Vale.

Mediolani. Kalen. Nou. M D LXXI.

E I D E M, Bononiam.

4

OLEAS Mediolanum usque? mirus amor, &
 singularis humanitas. Sed vide, quid acciderit. venit
 in mentem Simonettae tuo, ut est homo perelegantis in-
 genii, munus tuum cum suo munere coniungere, & sub
 amari saporis oleas, quo ipso gratae sunt, alio tamen sa-
 pore gratiores efficere. itaque misit ad me scite admo-
 dum condita cotocea; & qui attulit, cum mihi tuo nomi-
 ne salutem dixisset, addidit illud, quod Simonetta lepide
 coniecerat, de olearum sapore temperando. Est igitur cur
 utriq. vestrum pares agam gratias: nisi si paullo fortasse
 maiores

maiores tibi debentur, cuius occasione liberalitatis alia videtur exorta liberalitas. quamquam Simonettae iam antea sane vel plurimū debebam, quod humanitati suae tantum tribuisset, ut ad me, vir nobilitate praestans, & senatorii muneris honore insignis, domum veniret, horasque mecum aliquot suauissimo sermone consumeret. quo quidem in genere, si mihi non dicam per studia, quae licet periucunda, voluntatis tamen, arbitriūq. mei sunt, sed per valetudinem, cui seruire necesse est, liceret; ita me officio vinci non paterer: quemadmodum animi certe voluntate non vincor. Ego propter frigoris magnitudinem domo pedem efferre adhuc non audeo. itaq. paucis vtor. Capra hospes meus, & Ferrarius, ille quotidie, praesertim vespertinis horis, hic, quantum ei vel a philosophiae studio, vel ab amicorum negotiis vacat, tantum fere mecum est. horum virtus, humanitasq. facit, ut & paucos, & pauca desiderem. & omnino, si studiorum similitudo si officia, si mores benevolentiam gignunt: multos amore complecti, non illo vulgari, sed eo, qui excellit, id est qui inter nos est; quam non facile sit, opinor vides. nam, quod in epistola tua, grauissime, atq. ornatissime scripta, speras posse fieri, ut a Simonetta tantum diligar, quantū vel ille a te, vel tu ab illo diligeris, addo etiam, quantum ego me a te diligi pro tuis maximis officiis iam pridem mihi persuadeo: id qua ratione possit euenire, cum aut in eum intueor, aut ipse me perpendo, non equidem intelligo. diuersa studia sunt: consuetudo non intercessit: vitae ratio dissimillima. illum publica negotia, summarumq. rerum cura distinet: ego humili litterarum otio delector. ille, ad amplitudinem natus, curat ea, quae speciem, &

Ii 2 splendo.

splendorem habeant; ego, si quies animi datur, si colere licet eas artes, quibus a primis temporibus aetatis meum omne studium, operamq. dedi, cetera prope contemno, quaerenda certe magno cum labore non arbitror. denique illi celebritas, mihi, ut fatear id quod est, solitudo vehementer placet. Faciam igitur, quod officii mei esse duco, & quod a me dignitas hominis, ac virtus non modo postulat, verum etiam exigit, ut eum omni tempore, quamquam absens longeque disiunctus, animo diligenter observem, memoria colam, iis etiam ornem laudibus, quibus ille suis maioribus ut respondeat, sic enititur, ut assequatur. quod eum scire tuis litteris, & persuasum habere, si cognouero: summo me, ac singulari affectum abs te esse munere indicabo. Vale.

Mediolani, Kal. Febr. M D LXXII.

E I D E M, Bononiam.

QV I D est, cur sperem assequi me posse tua merita officiis meis? par in utroque voluntas: id enim iuvat credere: sed condicio longe dispar. tibi enim ad me ornandum una cum voluntate suppetunt reliqua, auctoritas, dignitas, virtus: mihi ad gratiam rescendam, praeter voluntatem nihil prope relinquitur. itaque, tu me magis ut diligas, quam ego te, numquam concedam: idem, officii residere plus apud te, semper fatebor. dissimulem? nihil me ingratius. negem? facile refellar. testes erant antea meritorum tuorum, egregiaeque cuiusdam voluntatis erga me. sane quam plurimi: nunc accessit, qui pro sexcentis unus est, vir amplissimus

Scipio

Scipio Simonetta: qui, quod me amet, quod aliquid esse putet, quod etiam in sermonibus laudet, magnam in eo sane benignitatem hominis agnosco; sed tibi quoque tribuo: cuius ille iudicium quanti faciat, quo primum die sum eum allocutus, haud obscure perspexi. Quod scire vis de mea valetudine, quā tibi summae curae esse vehementer gaudeo: tātum abest, ut optima fruatur, ut ab optima absim aliquanto etiam longius, quam a deterrima. ac si mihi medium quiddam contingat, praeclare mecum agi putem. sed, id ut optare potius liceat, quam sperare, aetas facit, & valetudo. studia mitto: à quibus diuelli non queo. nihil me magis, quam scire, delectat. ita scribo, ut ad alios industriae meae fructum peruenire cupiam: sed, mihi crede, plerumque fit, ut, quo diligentius in hac cura uersor, eo plura ipse discam, quam alios doceam. De amicitia si tibi scrupulus molestus est, euellet eum aut Aristoteles, aut Cicero noster: quos tu cum magistros habeas; miror sane, cur ad me quidquam reseraras. nam ego me vel scire nihil puto, quod tu nescias: vel si quid scio, ab illis didicisse confiteor. hoc tantum dicam idque tua causa mihi Camille, quando te hoc de genere libenter uideo disputare: si quis perfectam illam amicitiam, cum ex duobus animis tamquam unus fit, ut afficiantur pariter in utraque fortuna, ut nihil incundum, nihil triste separatim, communia sint omnia; hoc, inquam, genus amicitiae si quis cogitet, & ea, quae leguntur in libris, inter homines quaerat, eum frustra laborare. est enim amicitiae, ut reliquarum rerum omnium idaea quaedam & species obsoluta: cuius praestantiam mente comprehendere, & ingenio consequi fors

502 PAVLLI. MANVTII
tasse licet, exempla certe sub oculos non cadunt. haec
ego ita sentio: tu, si quid contra, doce me. Vale.
Mediolani Idibus Mart. M D LXXII.

E I D E M, Bononiam.

6

AGRI vestri, siquidem, ut scribis, imbribus irriga-
ri coepti sunt, meliore, quam nostri, qui adhuc valde si-
tiunt, caeli munere fruuntur. de vindemia tamen quod ad
bonitatem firmitatemque vinorum attinet, bene speratur:
de copia, fore certum est, ut non abundemus. Ego, non
exspectatis imbribus, iam sarcinulas collegeram, ut in
viam me darem: nihil enim erat potius, quam ut domum
redirem, eoque itinere te viderem, & villulam tuam, utro-
que autem fruerer, quamdiu per anni tempus liceret; sed
uicit consilium meum Cardinalium voluntas: quorum
opera est effectum, ut GREGORIUS XIII. Pont.
Max. qui tamen sua sponte liberales disciplinas miro
quodam studio amplectitur, fouet, alit, honorifico me sti-
pendio retinendum putauerit. Hic igitur cogimur consi-
stere, libenter, ut Romae, in summa celebritate, & amico-
rum copia; inuiti, ut a te disiecti, cuius consuetudine
non semel, aut iterum, sed perpetuo aestiuis mensibus,
amoena regione, iucundo otio, cum communibus musis
frui cogitabamus. hoc tamen quidquid est incommodi,
non illud quidem penitus, sed aliqua saltem ex parte,
quantum scilicet per utriusque occupationes licebit, litte-
rarum commodo sarcietur. Vale.

Romae. VII. id. Sept. M D LXXII.

H I E

HIERONYMO. CAPRAE
Mediolanum.

7

QVOD ad me Camilli Palaeotti, uiri nobilissimi,
meiq. amantiſſimi, litteras miſiſti, ualde gratum: quod ue
ro cum iis etiam tuas, easq. Latine ſcriptas, & ita qui
dem, ut Romanam illam ueterem elegantiam redoleant,
multo etiam gratius. nam ut, Mediolani cum eſſem, in
terdum ſermone tuo ſumma cum uoluptate fruebar: ſic,
adempta mihi nunc tui ſermonis uſura, totam ſpem hu
ius mitigandae moleſtiae tuis in litteris repono. quam
quam hoc in genere ita moderabor meae cupiditatē, ne
tibi plus oneris imponam, quam uel occupationes tuae,
uel ſtudia patiantur; cum praefertim eadem ſcribendi le
ge pariter utrumque noſtrum teneri aequum ſit: ut, cum
tibi caueam, mihi quoque, multis curis implicato, caue
re ſimul uidear. quid igitur faciam? nimirum id, quod
unum relinquitur, ut ex amoris in me tui memoria ſola
tium capiam, ea fruor, in ea te abſentem intuear, allo
quar, amplectar, & inexoptata re falli me ſinam erro
re periucundo. atque haec quidem in perferendo tui deſi
derio ſatis commoda ratio eſt, illa perdifficilis, remune
randi officia tua, quae cum libenter, & ſaepe cogitem,
egregieque partes in eo meas animo expleam, niſi tamen
id tibi re ipſa aliquando perſuadeam, non bene mecum
actum exiſtimabo. Extremum illud eſt, quod a te uehe
menter peto, ut, quantum mea cauſſa uiſ, quem uelle ar
bitror quantum cupio, tantum ſtudii ponas in tuenda

Ii 4 mihi

mibi beneuolentia, cum qua thesauros non permutaue-
rim, virorum illustrium, sapientissimorum senatorum,
Scipionis Simonettae, Ludouici Macentii, Hiero-
nymy Montii: quorum erga me singularem humani-
tatem, semel atque iterum salutationis officio perspe-
ctam, nulla umquam apud me delebit obliuio. Al-
dus filius te salutat, amicitiamque tuam, ut debet,
plurimi facit. tu salutem viro optimo, multisque
virtutibus ornato, Hannibali Cruceio, dices meo no-
mine. Vale.

Venetis. IIX. Kal. Maii. MDLXXII.

HANNIBALI. CRUCEIO

Mediolanum.

8

INFIRMO adhuc corpore ob recentem morbum
nec mente, ut vere dicam, satis tranquilla, feci ta-
men, ut haec ad te exararem, amore impulsus, quo
te sum complexus ante multos annos, cui tu, ne quid
addi iam possit, humanitate tua, probitate, virtute
perfecisti. Ille igitur amor, qui me ad scribendum im-
pulsit, idem purgationem tuam, quod me non saluta-
ses in discessu, ut indignam utroque nostrum plane re-
spuit. Ego de te, tuorumque valetudine quam saepe
quaesierim, Ferrarius noster optimus testis est. atque
ille de te ea, quae volebam scilicet, de filia paullo du-
riora; quae comprobata euentu, teque aetate iam ingra-
uescente tam graui percussum esse vulnere, ut debeo
vehementer doleo. ac mihi quidem, partes esse meas
veniendi

ueniendi ad te, ut hominis amantissimi officio fungerer, saepe tunc in mentem venit: sed cum opem tibi a me afferri nullam posse, molestiam uero fortasse aliquam posse, intelligerem, essem praeterea, ut soleo, imbecillior, tenui me, inuitus equidem, sed tamen tenui. tu certe, cum iaceres, aut confirmato corpore nondum esses, ad me ut uenires, expectare non debui. non enim is ego sum, qui plus amicis oneris imponam, quam quantum ipse suscipiam. Ego mihi largior, & hoc in prima amicitiae parte pono, ne quem colam ambitiosius, ne saepe domum eam, ne tempus inani sermone conteram, ne deducendi, aut reducendi laborem, & molestiam capiam. Quae si mihi concedi uolo; cur ea tibi, uel aliis eripiam? At etiam purgas te de superiori tempore, quod sex amplius mensibus, id est quamdiu Mediolani mihi esse contigit, ter, aut quater ad me ueneris. Id quidem satis ab Hannibale Cruceio fuit, homine publicis muneribus assidue distento, domesticis etiam tricis impedito, quae nobis, qui, liberos habere, & patres familias appellari, pulchrum putauimus, negligendae non sunt. Sed, ut haec omittam, atque huius generis alia, quae tibi cum multis communia esse possunt, & ut attingam ea, quae uel tua propria sunt, uel certe communia cum paucis: nullum ne munus, nullum ne priuilegium habet virtus? ea uero habet, & quidem maximum, ne vulgi legibus teneatur, ut sui iuris arbitriique sit, ut se ipsa fruatur, ut otio interdum, & solitudine gaudeat. sint igitur visitationes voluntariae, sint gratae semper, & incundae, ideo tamen rare, quia perquam raro necessariae. faceessant haec à nobis vulgaria, mi Crucei, in quibus

quibus non modo officium, verum etiam laudem quidam locant: ego inepta, vilia, putida censeo, minime digna iis artibus, studiisq. quae colimus. *viget, & vigebit ipsa per se, externam opem contemnens, suis fulta viribus, necessitudo nostra. absentes, praesentes iidem erimus: & multa etiam, quibus praesentes saepe carent, animorum coniunctione, studiorumq. similitudine consequemur. cur enim. quod ipse tibi de me polliceor, & quod libenter praestabo, id a te, viro optimo, omniumq. humanissimo, non expectem? Vale, & Ferrario meo salutem. Venetiis, idibus Maii. M D LXXII.*

IOANNI . CRATONI

Viennam.

*Q*U A primum hora in patriam redii, unde menses aliquot absueram & valetudinis, & otii causa, quaesiui statim de filio, Ecquid Crato noster? Valet, inquit, & nos amat: deinde, quid tu ad illum de me, quam saepe, quam amanter, quid ille ad te scripsisset, pluribus verbis exposuit. vix credas, & cum salua hic omnia compererim, & eam nurum, quam volebam, aetate, moribus, forma, quantus tamen ex litterarum tuarum humanitate laetitiae cumulus accesserit. quamquam, cum mihi iam antea & natura, & consuetudo tua nota sit, peccare mihi uidear, & graui admodum scelere obstringi, si, quod ab utraque abhorreat, & quod utraque indignum sit, suspicari me umquam patiar. Nec vero, me quidem id, quod mihi boni contigit, agnoscere, languere autem

autem in gratia referenda, uelim existimes. refero enim, mi Crato, referamque dum uiuam: at quibus rebus? iis, quibus te contentum fore scio, memoria, amore, obseruantia. nam reliqua neque tua dignitas, neque fortuna exspectat: neque is ego sum, qui possim paria paribus, aut qui officium potius in compensanda re, quam in emetienda voluntate positum putem. in quo illam capio voluptatem, quod filius meus, quem studiis mihi et institutis per similem esse, fortuna uelim paullo meliore, te in oculis fert, laudare non desinit, sicut alterum parentem obseruat, et colit. is excusat silentium suum: habet enim, non modo quod assidue agat, uerum etiam quod libenter agat in nouis nuptiis: quae si quid parient, uel dicam etiam ominis causa quod parient, id tibi, aut qui tuo nomine agat, sacro lauacro suscipiendum deferitur: ut amicitia nostra, tuis instituta non vulgaribus officiis, nostris ad hanc diem studiis egregie culta, religionem quandam assequatur, quae labem ab ea culpamque prorsus omnem perpetuo remoueat. Mediolani abditus in litteras vixi. si quaeris, quo studiorum genere: explanandis Ciceronis orationibus: quod mihi propositum fuit ante multos annos. nunc dandi sunt dies tum amicis, tum etiam negotiis. Commentarios in epistolas, quae familiares vocantur, conuitio iam prope efflagitatos, debere studiosis diutius uix possum. id nunc cogito, ad quem mittantur. an ad eum, qui me ornauit ea dignitate, cum qua nullas opes confero? tu statue: ad te enim refero, cui uel prudentia, uel amore erga nos quem anteponam, habeo neminem. Vale.

Venetis. x i. Kal. Maii. M D L X I I.

HEN.

HENRICO. ET. CAMILLO

C A E T A N I S

Perusiam.

IO

ACCIDIT incommode, ut, quo ego tempore ad urbem veni, negotii quidem caussa, sed maxime studio nostrae consuetudinis ex interuallo regustandae, vos eodem fere Perusiam ex urbe discesseritis. quamquam cur ita loquor? recte vos, & sapienter fecistis, istam salubritatem secuti, urbe relicta anni tempore difficillimo. quod pro mea in vos singulari beneuolentia sane vehementer laetor. mecum autem actum est incommodius, qui vestro adpectu, vestro sermone caream, ex quo summam voluptatem spe, & cogitatione praeceperam. at potest hoc sarciri litteris. qui potest? habent enim litterae suauitatem, sed, ut ego sentio, minime cum ea, qua praesentes fruimur, conferendam: vel quod in familiari sermone arripere licet argumentum ex quacumque re, quae gratissima libertas est: vel quod in voce, oculis, vultu est quidam, quod amemus magis, non modo quam in litterarum notis, sed saepe etiam, quam in rebus ipsis, quae litteris explicantur. quo molestius careo sermonibus vestris, qui praesertim fore suspicer, ut circiter id. Sept. fractis iam, his caloribus, quibus maiores non meminimus, cum filia, quam ante biennium aegra ualitudine discedens in coenobio sacrarum uirginum reliqueram, in patriam reuertar. hoc si euenerit, spe mea frustratus, fortunam accusabo uos quidem animo complectens, dum de uestro erga me amore, dum de moribus, dum de uirtute cogitabo: quod
mibi

mihī nec ipsa fortuna, nec ulla dies umquam eripiet: facile, ut spero, consequar, ut, quasi officium meum ex aliqua parte persoluerim, ita dolor, & desiderium ex aliqua saltem parte leniatur. *Valete.*

Romae. VI. Kal. Sext. M D LXXII.

CAMILLO. CAETANO

Perusiam.

II

DILIGENTIAM litterarum uerus amor non desiderat. itaq. quod per biennium nec ego ad te, nec tu ad me quidquam scripseris, utrumque nostrum libenter omni culpa libero. te quidem etiam uehementer laudo, quod a iure civili, in quo perdiscendo totus es, ab iis artibus, unde manat decus, officii minime necessarij causa deflectionum non putasti. nam, quod ad me attinet, uixi cum ueteribus musis, fortasse parum utiliter, sed tamen uixi. quamquam quid utilius, quam recte ualere? id ego peregrinatione, et libero quodam uitae genere, si minus quam optabam, at certe plusquam sperabam, sum assecutus. uideras hic me diu languentem, uidi ego saepe dolorem tuum: quo quidem amoris argumento ita sum lactatus, ut medicinam praestantio rem nullam senserim. nunc beneficium illud tuum, fratrisq. tui Herici, omni laude, quae cadere in adolescentem possit, ornati, tueor, ut aequum est, & tuebor memoria sempiterna: officiis etiam gratum fore me dicerem, si modo uestra uel fortuna, uel uirtus officium a mea tenuitate ullum expectaret. De Antonio Persio scripsi ad filiū diligenter. nō dubito, quin, ubi opus esse intelliget, eo curam, operam, industriam suam omnem

SIO PAVLLI . M A N V T I I

nem conferat, neque id magis, ut mihi obsequatur, quam ut a vobis gratiam ineat, atque adeo, ut hominem excellenti uirtute praeditum eo sibi conciliet officio, unde in homines quamplurimos, & in multas aetates haud minima diffundetur et propagabitur utilitas. Vale, et salutem fratri plurimam.

Romae. v. Id. Quint. M D LXXII.

HORATIO. CARDANETO

Perusiam.

12

CUM ante aliquot annos excellere te cognouerim iis artibus, quas qui non diligit, hominem uix puto; & cum ad hanc laudem ornamenta morum, probitatis, humanitatis, id quod paucis admodum contigit, addideris: quid est, quod malim, quam sic amari abs te, ut me tibi parem animum reddere, teq. mihi carissimum esse tibi persuadeas? amoris autem signa cum à te multa sint, hoc eiusmodi est, ut eo maxime delecter, quod me Perusiam inuitas, & quasi de uetere nomine appellas. ais enim promississe me, nec promissum soluisse. nae tu bona memoria es, quam tamen amor in me tuus aluit, & confirmauit. at mihi id exciderat, vel quia tunc ratione temporis consilium mutare sum coactus: uel quia leues culpas uerus amor facile dissimulat. nunc in summa tibi obsequendi voluntate uide quid obstat. ego, si cum uno altero uero iter haberem, expeditus nullo negotio excurrerem ad te. quid autem iucundius, quam Caetanis meis, tibi. non modo id optanti, sed etiam exigenti dies aliquot dare? sed

re? sed exiguu comitatu , cum filiam uirginem ducam , tot
dierum uiam conficere quam honestum sit , tute cogita .
Accedit illa molestia , quod duas lecticas , diurna mer
cede conductas , quaternis scilicet scutatis in die , ultra
praescriptum a lecticariis tempus remorari non licebit .
breuis enim mora ferri posset : sed in uestra cōsuetudine ,
uestrisq . sermonibus , addo etiam in lauta , nobiliq . ciuita
te , biduum hora esset . Habes meam caussam : quam , non
video , cur non probes . nam , quod ad animi voluntatem
attinet , tu ut cupidior mei uidendi sis , quam ego tui num
quam concesserim . Vale .

Romae . Id . Sext . M D LXXII .

M . ANTONIO . CIOFANO

Sulmonam .

13

VASCVLO aereo , quod ad me Hercules frater
tuus heri attulit , nihil amabilius , neque id usu magis ipso
quam operis elegantia . equidem , Sulmonenses homines
ualere ingenio , satis antea cognoueram , hoc artificii gene
re ceteris hominibus antecellere , vix unquā putassem .
nunc perspecta industria , illos laudo , te de isto munere
uehemēter amo . Nos hic , fracti caloribus maximis , lan
guemus , ego in primis , tenui admodum & infirma uale
tudine . itaq . ingenium , artemq . si tamen ingenii , aut artis
aliquid in me est , non , ut solebam , in litteras , & studia ,
sed anni tempore coactus in unam valetudinis curam
confero : & si quid proficio , quae doctrina praestantior ?
vos istuc , nisi me fallit poeta uester , gelidas undas , easq .
uberrimas , habetis . nimirum istuc est uiuere , si cui cae
lum

lum eiusmodi contingat, ut hieme tepeat, aestate refrigeretur. quod si virumque non licet, vel alterutrius optio datur: ordinem naturae non equidem contemno, verumtamen aestiuam temperiem, nec ut arbitror, iniuria, longe praetulerim. nam frigoris acerbitas camino luculento, pellita veste, cibi etiam ratione mitigatur: caloris leuandae molestia, pauci sunt, qui sine periculo remedium inueniant. est igitur, cur tibi gratuler, cui contigerit id, non modo quod ego pluris facio, sed fortasse etiam quod reuera pluris est. ego si dignus amore tuo, dignus etiam dolore sum, cuius ad naturalem imbecillitatem uix ferenda robustioribus aestus incommoditas accesserit. Vale.

Romae. V. Kal. Sext. M D LXXII.

HORATIO. MORONO

14

EPISTOLA tua, sermonum tuorum simillima, quam me affecerit, qua uoluptate perfuderit, quem ad meam superiorem erga te voluntatem cumulum addiderit, nec mihi uerbis explicare, nec tibi mente consequi facile sit. o miram prudentiam, suauitatem, elegantiam: equidem antea te non uulgariter amabam, uel quod Ioanni Morono Cardinali, praestantissimo uiro, cuius in me exstant merita quamplurima, propinquus esses: uel quod ore sermone, moribus modestiam singularem praeteferes. nunc vero, cum ex epistola tua, quam longe per eloquentiae rectissimam uiam ingenio, studio, industria processeris, intellexerim, neque solum, qui nunc es, uerum etiam, qui futurus aliquando sis, conicere potuerim: ita sum amore incensus, nihil ut inquam senserim ardentius,

tius. & quamquam haec adolescentiae tuae tam praeclara principia gratulationem potius, quam cohortationem, requirant: in eā tamen partem nescio quo modo libentius delabor, ut te hortor, ad rogem, ne cōtentus communi laude sis, ne mediocribus acquiescas, ne praestantiam naturae tuae languere umquam sinas, sed eam ita exerceas, ut, quod adhuc fecisti, & quod facturum te esse non dubito, aetatem semper virtute vincas. in eo si putabis omnia summa esse collocata: mihi crede, omnia summa ad te confluent. quaeritur enim cum labore virtus: ea vero sine labore omnia consequitur: quod qui ignorant, aut qui aliter sentiunt, nihil habent in vita firmum, nihil stabile, dubia semper fortuna vacillant, nulla re perpetuo fruuntur. Vides autem, opinor, nō eum te esse, cui liceat utrumvis. nam obscuro loco nati si dignum laude nihil praestant, vitio non datur; domesticis enim latebris desidia tegitur: a nobilibus autem quasi debita res exigitur virtus: eam si habent, vere nobiles dicuntur: si secus, illa ipsa a maioribus accepta nobilitas dedecus & culpam auget. te, familiae tuae claritas ad gloriam vocat: tibi rectum atque expeditum iter ostendit: deflectere te, aut offendere nusquam patitur. quae tamen proponenda tibi ne sint, effecisse iam videris, totus addictus liberalibus disciplinis, totus incumbens ad ea, unde verum decus, & vera nobilitas exoritur: ut, qui tua studia plane noverrit, is tecum gratulatione potius, quam ego omiseram, quam cohortatione, utendum esse iure putet. At me tamen quae dicta sunt, sic in bonam partem accipies, si prius, eum esse me, tibi persuaseris, qui tuae laudi, tuisque studiis libentissime serviat. hoc enim si cre-

K k des,

514 PAVLLI. MANVTII
des, res ipsa te profecto numquam fallit. Vale. XIIX.
Kal. Sept. M D LXXII.

ANTONIO. FVRNARIO

Napolim. 15

QVOD felix, faustumq. sit, iterum Romae sum, id mihi, non dicam inuito, (quis enim inuitus, honesta praesertim condicione, Romae sit?) sed certe nec opinanti contigisse, velim credas. nam, cum, post obitum PII V. Pont. Max. quo sedente nescio quo meo fato secundis vii uentis haud satis mihi umquam licuit, eo consilio ad urbem uenissem, ut nubilem iam filiam, quam hic, bienio ante aeger discedens in coenobio celeberrimo, sacris commendatam virginibus, reliqueram in patriam ad nuptias reducerem, exceptus incredibili omnium laetitia, praecibus amicorum, suasu Cardinalium, iussu GREGORII XIII. Pont. Max. cuius ex mente, propter sanctitatem, ac sapientiam, honesta omnia, utilia, salutaria proficiuntur, sedem hic statuere, & redeundi consilium abiicere sum coactus. quod tibi, mei amantissimo, qui me olim discedente doluisti, significandum putaui. uidere enim mihi videor tuum uultum, cum haec leges. utinam tu quoque uideres animum meum, dum haec scribo. tua laetitia mihi leatitiam affert; in amore pari, qui tuus est sensus, idem & est, & esse debet meus. mutuae voluntatis fructus non apparet; quid tum? non ii sumus, qui amicitiam utilitate metiamur: iam pridem erudiui animum, & docui, uulgaria quaedam contemnere, in bonis, doctisq. uiris fortunam non quaerere, sola uirtute, quae nulla re indiget, nullam extra se appetit

tit, contentum esse. in quo tuos sensus meis cum sensibus
congruere, neque dubito, & vehementer gaudeo. Vale.
Romae. XII. Kal. Oct. M D LXXII.

MARTINO. BERZEVICAE O

Patauium.

16

Ego vero & postremis Cratonis litteris respondi,
contra quam tu existimas; et illius epistolam, tum quia te
stis esset amicitiae nostrae, tum quod ita scripta, ut ad ele
gantiam parum ad prudentiam certe nihil posset accedere,
una meis imprimendam curavi. quod tamen antea fami
liaribus meis, vehementer petentibus, excluderam. nunc
id ei submolestum fuisse, indicat litterae tuae. in quo sum
mam eius modestiam agnosco. meae quidem cogitatio
nes, praeter illius laudem, nihil spectant. quod si aliter ei
persuasum crederem, uitam mihi acerbam putarem. ne
mo est, cui me magis debere & confitear, & gaudeam.
Volumen epistolarum mearum, cum valetudinis causa
ab urbe discederem, dedi negotium filio, ut ad eum mitte
ret. nec mandatum neglexit. amat enim, observatq. Cra
tonem, pro suis erga nos officiis, aequae propemodum, ac
me ipsum. Quod ais, Patauii cum essem, adire te ad me,
nisi Pinello duce, ausum non esse; cum tamen Romae
perhumaniter à me esses acceptus: id equidem valde sum
miratus. tibi tua virtus aditum facile patefecit ad ami
citiam meam. utinam is sim, qui praestare aliquid tua
caussa possim. ambigere te non paterer de animo erga te
meo. Filius te salutat. Vale.

Venetis, XII. Kal. Sext. M D LXXII.

Kk 2

EPI

EPISTOLARVM PAVLLI. MANVTII

LIBER. DVODECIMVS

CAMILLO. PALAEOTTO

Bononiam.

I



IN tu? litteras ego sine nomine, praeser-
tim ad te, quem tanti facio, quanti fortas-
se neminem? equidem erratum meum vix
agnosco. itaq. peto a te, ut mihi litteras il-
las remittas: quo simul intelligam, de emblemate quid
scripserim: si modo is ego sum: qui aliquid scripserim.
valde enim in hoc quoque perturbor. Quod ais me rur-
sus in bellum: ominare, quaeso, melius. ego enim quiete,
ego otium, ego studia mea & urbi, & urbanis rebus an-
tepono. sed si & urbe, & simul studiis meis frui licet:
quis erit tam iniquus rerum aestimator, qui mihi nō con-
cedat? otii quidem adhuc, quantum optavi semper, tan-
tum conceditur. negotium sponte nullum suscipiam. im-
ponetur: feram, quoad licebit, id est quoad instituti mei ra-
tio permittet. nihil enim malo, quam posteris prodesse. in
eo mihi diuinitiae, in eo sunt omnia. quod si non assequor id
quod propositum est: me tamen ipsam, conari, & velle,
delestat. utinam consuetudine tua ne carerem: nam, ea
si accederet, in caelo essem. voluntas utrique nostrum
eadem fuit, facultas defuit. Vale.

Romae. XIII. Kal. Oct. M D LXXII.

E I-

E I D E M, Bononiam. 2

AGNOVI erratum amanuensis: in quo tamen
 sub accuso negligentiam meam. nam si, scribere, est offi-
 cium: omnes officii partes complecti, eius est, qui cum ve-
 hementer amet, tum etiam amare vehementer debeat. eū
 autem esse me si profitear, & praedicem: quod utrumq.
 facio, faciamq. dum viuam: non est, cur me quidquam
 dare auribus, aut gratiae caussa fingere, quisquam putet.
 tu enim is es, cuius in me ornando studium eiusmodi sem-
 per fuit, ut, non modo quantum possim, sed plus etiam,
 quam possim, tua debere caussa mihi videar. ideo fit, ut, si
 quid in minimis etiam rebus aut omittam, aut committā,
 sceleris prope loco ponam. tu autem cum dissimulas, mi-
 hiq. ignoscis, ingenium simul & humanitatem declaras:
 nec me tamen culpa, cura ve liberas. ego enim, cum tibi
 de ista facilitate agam gratias, ipse tamen mihi non igno-
 sco, aut eatenus ignosco, ut aliquo dolore non caream. Vil-
 lula tua, non est, cur a me quidquam expectet, cum in te
 ipso sit, quod aliunde quaeris. atq. illa quidem, ut arbitror,
 tecum, si posset, ita loqueretur. Ego te fessum urbanis cu-
 ris recreo; ego otium, ego tibi valetudinem restituo. a me
 fruges, a me poma, a me etiam auiculas & palato gra-
 tas, & stomacho utiles, habes. deniq. aut, hic dum es, vi-
 uis, aut numquam viuis. nunc tu me orna, quod potes.
 noli pati me ad quemquam confugere, aut cuiquam de-
 bere, nisi tibi, cui libenter debeo. Has voces, mi Camil-
 le, quas tacita videtur emittere, noli contemnere: re-

Kk 3 fer

518 P A V E L I . M A N V T I I
fer aliquam gratiam bene merenti: ut, quid tu illi, quid il
la tibi debeat, omnes intelligant. quam enim tu vnus o-
ptime nosti, quis, nisi tu vnus, de ea optime loquetur? Va
le. Rome, XIII. Kal. Dec. M D LXXII.

E I D E M, Bononiam.

3

DE oleis quid exspectas? eadem, quae antea, adspe-
ctu pulchrae, sapore per quam gratae. pleniores etiam,
quam anno superiore, caeli ne munere, an tuo delectu? vi-
sae sunt. agere gratias, si tua ferret humanitas, & nisi
iam inter nos, pro vetere amicitia, ac familiaritate, pui-
dum id esse videretur. tuam quidem industriam, quod
eas tua manu seueris, atque alueris, nec admirari satis,
nec laudare possum. quod vero eius industriae fructum
ad amicos etiam absentes peruenire vis, & quod in eo
me numero locas: utrique nostrum aequae gratulor. nam
de nomine, oleae ne poma sint, in quo tu mihi, suscepta
grammatici persona, quasi licem intendis, ipso a te mune-
re delentus non contendam. quamquam, si nuces &
amygdalae, quae ipsae quoque oleum efficiunt, poma
sint; quod, opinor, non negabis: cur oleas inter poma re-
ferri non liceat, haud equidem intelligo. sin tu, de earum
nobilitate laborans, ut fere suum opus amat omnis arti-
fex, fruges appellari mauis: indulgebo non inuitus: ne te
mihi, tamquam tuis muneribus detrahenti, subratum li-
beralitatis tuae cum aliquo fortasse meo damno paeni-
teat. Vale. v. non. Ian. M D LXXIII.

E I

QVAE mihi res maximae curae fuit, et in qua meas omnes cogitationes, omniaque studia fixeram, & locaram ea cum ex animi sententia, diuino fauente numine, successerint litteris tibi, mei amantissimo, significandum putavi. Funicam filiam, inter sacras virgines educatam, non hebetem ingenio, nec paucis, nisi me fallit amor, virtutibus instructam, iuueni optimo satis honesti loci, haud postremi ordinis in cure civili, addo etiam, quod hodie potissimum requiritur, a fortunae bonis non imparato, meis reclamantibus, de sententia tamen fidelium amicorum despondi. hoc tu meum consilium, pro vetere nostra necessitudine, tuaque aequitate, non dubito quin & probes, & omnibus optimis proseguare. equidem onus Aetna grauius deposuisse mihi videor: speroque fore, ut, quod reliquum est vitae, uacuo curis animo tranquille degam. Quaeris, ubi Romae, si per valetudinem licebit. nam hie me fere tota mecum actum est non optime, communi tamen pituitae morbo, quo robustiores etiam laborarunt, alii sine periculo, alii sic, ut decesserint, in quibus fuit is, cuius obitu dolendum est maxime, poetica laude insignis. Amaltheus. mihi eadem, quae antea, victus ratio medicina fuit, necdum audeo institutum mutare propter anni tempus inaequale. in publicum, nisi necessaria re coactus numquam prodeo, domesticis me finibus teneo: & cum libellis, id est cum amoribus, & deliciis meis, iucundissime uiuo. Orationem pro Archia cum meo commentariolo scire cupio an acceperis. absolui iam in reliquis om-

Kk 4 nes,

STO PAVLLI MANVTII

nes, duabus exceptis, pro Ligario, & Deiotaro: quam bene, alii iudicabunt, magno certe cum labore, opera, numquam, nisi per morbum, intermissa. Quidam etiam explanare sum aggressus: & ut se principia dederunt, videor aliquid praestare posse. assentor mihi fortasse: nam sua quisque amat: verumtamen hic omnes, praesertim, qui litteris excellere, putantur, initium, quod ad te mitto, valde probant. Cardinalem, fratrem tuum, veteris exemplum innocentiae, columnen sanctae sedis Apostolicae, salutari a te meis verbis, magis opere cupio. Vale. Romae, xii. Kal. Martii. MDLXXIII.

E I D E M, Bononiam.

5

S I C tu par pari, ego de filia mea paullo ante collocata, nunc tu de tua significas. cuius rei quae tua laetitia sit, meus me sensus admonet. equidem cum ea voluptate, quam cepi superioribus diebus, quam spero diuturnam fore, prorsus nihil consero. & quia te pariter affectum existimo, mirabiliter gaudeo. postulat enim, noster amor, ego secundis ut rebus tuis aequae laetor, ac meis, tu meis vicissim aequae laeteris, ac tuis. Gozadina familia vel doctrina, & sapientia, vel honoribus, & rebus gestis praeclari nominis est. generi tui pater is & fuit in omni vita, & nunc quidem is maxime est, cui praeferrī nemo integritate, ingenio, dignitate, conferri possint admodum pauci. filius adolescens, ex omni a te, tali viro, iuuentute probatus, atque electus, non dubito, quin & parentis, & maiorum suorum laudibus egre-

egregie respondeat. Quo circa tibi, ut debeo, de ista conjunctione uehemente gratulor: eamq. Deum opt. max. ita fortunare uolo, ut maiorem quotidie tui consilii fructum, uoluptatemque capias. Quod autem, abiecta rerum urbanarum cura, otium, & solitudinem cogitas: ignosce, non assentior. tu ne, cum auctoritate ualeas, uirtute excellas; cum ita factus a natura sis, ita liberalius disciplinis institutus, ut prodesse patriae, laborantibus amicis opem fere, familiam tuam, illam quidem satis claram, adhuc tamen illustrare possis; tu haec deferres omnia, ut uni tibi uiuas? obsecro, quis probabit? uel dicam etiam, te permittente, quis non improbat? ego sane, qui te natum rebus maximis iam pridem intellexerim, si feceris id, quod significas ut salutem curiae, foro, negotiis dicas, probabo fortasse ominis causa, qui tibi cupiam, quidquid agas, ex animi sententia succedere; sensibus tamen quin agar intimis, impetrare a me non poterō. quid ceteri, quid sentient? quid eloquentur? nam, etsi genus illud uitae, quod ordinis, totum cum uirtute coniunctum, reprehendi posse non uidetur: tibi tamen, ut opinor, multo minus, quam aliis, pro tua superiore uita, beneq. de omnibus merendi praeclara consuetudine, conceditur. At ego me litteris totum tradidi. id enim obiicies. Diuersa, mi Camille, ratio est. ego enim, quod praestare posse videor, homo a rebus gerendis alienus, ualitudinis incommodae, non magni animi, id libenter unum ago & quidem in urbe Roma, quod tu miraris, ut in deserta solitudine, interpellante nemine. quod beneficium optatum antea potius, quam speratum, nunc a Pontifice optimo, ac libe-

liberalissimo, ad excitanda doctrinarum ingeniarum studia mire propenso, GREGORIUS XIII. acceptum, meminero, & praedicabo, dum viu, fortasse etiam scripta mea, me mortuo, loquentur, & obscurum posteris esse non sinent. Ego igitur si cum libellis assidue sum, et hoc non modo ad naturam, verum ad ualitudinem meam apto uitae genere delector: peccare me non arbitror. Te tua nobilitas, animi non minor, quam ingenii, praestantia, perspecta saepe uirtus, ipsa patria vocat ad eas res, unde laudes oriuntur maximae: ut, quod tibi uitae reliquum erit, non priuatis humilibusque curis in remota uillula, montanaque crepidine, sed actionibus nobilissimis, in oculis, & in auribus clarissimae atque eruditissimae ciuitatis perpetuo traducas. quod si feceris, aut si non omnino neglexeris: medium enim quiddam est: magnopere cum tua, tum communi etiam multorum causa laetabor. Vale, & fratri tuo, integerrimo, ac sapientissimo Cardinali, & Sigonio, nostrae aetatis ornameto, ad illustrandam antiquitatem nato, salutem à me plurimam.

Romae. M D LXXIII.

E I D E M, Bononiam.

6

POST grauem trium fere mensium morbum, nunc denique incipit esse mihi paullo commodius. nec tamen ad huc uel eo, quo solebam, stomacho, uel ita firmo uitor capite, ut cogitandi, aut etiam legendi laborem sustineam, gradum uero facere sine sensu doloris, aperto nuper educendis humoribus laeue crure, neque dum possum, & conari, supra quam uires patiantur, non audeo. quae quoniam

niam

niam fieri quotidie mitiora sentio; aliquam in dolore voluptatem capio: cum praesertim prope anniuersarius hostis valetudinis meae iam abierit autumnus. Oleis tuis, quibus me, quocunque loco sim, carere non pateris, in quo tuam benevolentiam agnosco, fruar cum filia, & genero. simul enim uiuimus, & plane uiuimus. ego autem parce, quia nondum firmus offensiones etiam minimas extimesco, illi comedet liberius, qui a recte ualent, nec in cibis plus minus ue diiudicant. De me ipso dixi: de rebus meis quod te scriberem, noui nihil erat. Omnia fere sunt eadem, quae antea, hilara satis, & prospera. ampla non dixerim, ne mentiar. quamquam hoc uulgi more loquor. nam si ampla sunt ea, quibus maiora non expectimus: amplissimis opibus fruor. nihil enim deest, quod natura desideret: quod autem natura non desiderat, abesse facile patior. Vale.

Romae, 7 diebus Dec. M D LXXIII.

ANTONIO. FERNARIO
Napolim. 7

VALDE sum laetatus laetitia tua, humanissimis, & ornatissimis litteris expressa. amoris. n. index est. amari autem a te, quo nihil amabilius, siue probitas, siue doctrina cogitetur, quis tanti non aestimet, quanti ea, quae summa sunt? nec uero, quamquam voluntatis erga te meae nullus adhuc quidem fructus exstat, a me tibi gratiam non referri, debes existimare. nam etsi disiuncti satis longe sumus, & congregiendi, colloquendiq. facultatem interualla

terualla locorum impediunt, meus tamen in te animus est, de te saepe cogitat, de te etiam, nec mediocri uoluptate, secum ipse nonnumquam ipse loquitur. & si tu, amare, & colere, officium esse putas; officia tibi mea numquam deesse, testis ipse mihi sum. Citrea, quae mittis, eo mihi gratiora sunt, quod, ut mitteres, non te magis institui tui memoria, quam amor admonuit. quod autem ad dis, eis stomachum imbecillum confirmari: cupio verum esse, idq. mihi persuaderi facile patior: quandoquidem & hoc medicinae genere nihil suavius: & , stomacho si valerem, hac fere valetudine, praesertim iam senior, contentus esse possem. nam, ut robustioribus me conferam, optare non debeo: cum id mihi natura semper, nunc etiam aetas deneget. Vale.

Romae, IV. non. Oct. M D LXXII.

E I D E M, Neapolim.

8

VIX credas, & memoria nostri tua quam delecter & eas, quas mittis, epistolae, quibus ipsa memoria declaratur, quam libenter legam. Ego enim hoc mihi primum ab ipsa natura videor accepisse, ut amari uellem a tui similibus: qui quidem hodie (ne assentari me putes: a quo uitio longe absum) quam pauci sint, qui recte iudicant, mecum omnes intelligunt. accessit ratio, quae uoluntatem auxit, atque in hanc partem quasi propendentem impulit, hoc mihi bonum, idest amicitiam tuam, cum tua mihi ultro derulerit humanitas: quam à me putas felicitatem praesferri? atque adeo cur non in hoc ipso felicitatem esse maximam existinem? Est igitur, cur & ipse

ipse mihi gratuler, & tibi gratias agam. quorum alterum
perpetuo a me fit: alterum ut fiat, à tua singulari benigni-
tate non conceditur. Munuscolo tuo, cum haec inter nos
minime necessaria sint: quippe omnibus muneribus mu-
tua praestat benevolentia: nihil tamen gratius. Vale.
Romae. xviij. Kal. Febr. M D LXXIII.

E I D E M , Neapolim. 9

AMABO te mi, Furnari, quid tibi in mentem ue-
te? an tu me uis muneribus obruere? ego enim illa scri-
pseram, non ut peterem, sed ut admonerem, spectans ui-
delicet illud tempus, quod adhuc quidem longe distat.
amoris haec nimirum interpretato fuit. amor autem er-
rare non potest: aut, si errat, gratificandi voluntatem se-
cutus, & bene merendi studio ductus, quis tam insipiens
aut rerum tam iniquus aestimator est, qui non cum lau-
de potius, quam reprehensione dignum ducat? Coronea
sane ipsa, tam celeriter abs te missa, mihi accidisse per
quam grata, nec possum negare, nec debeo. utar iis, ut con-
sueui, post cibum, libenter, ut egregie conditis, utiliter, ut
remedio puuina laborantibus aptissimo. O te amicum op-
timum: tantum ne? immo etiam medicum suauem, qui cu-
rat simul & delectat. qualem qui reperit, si eum in ocu-
lis non fert, cum humanitatem ignorat prorsus, tum sua
ipse diligere commoda non videtur. Vale.

Romae, iij. Kal. Febr. M D LXXIII.

MEDICOS omnes de conditis Coroneis audio
sentire melius, quam de citreis. itaque posthac, quan-
do tu, ut video, tuum institutum retinere vis, nec ego

COR

contra disputo, illa malim propter valetudinem, sic tamen, ut pura sint, non cum aromatibus, & sicciora densa, quam tremulo coacta gelu.

I O . C R A T O N I

Viennam.

IO

EPISTOLAM tuam, a te datam XVII. Kal. Non. accepi VI. Kal. Dec. eo sane gratiorem, quo minus hoc tempore expectatam. noui enim, quam vacuus numquam sis, non tam a tuo munere, quam ab amicorum negotiis, quae ita suscipis, ut sustineas, donec ad exitum, perferantur. scripsisti igitur amore impulsus, & omnia vicit humanitas tua. quo tibi nomine debere me multum dicerem, nisi tantum iam deberem, quantum persolvere vix possim. Romam qua caussa adductus uenerim, scripsit, opinor, ad te filius: quae retinuerit, a me cognosce. atq. hoc primum, quod tibi pro tua in me singulari beneuolentia maxime voluptati fore non dubito: incredibili sum exceptus hominum laetitia. Pontifex ipse, praeclare in optimas artes animatus, cognito aduentu meo, laeti animi signa ostendit, negotiumq. Cardinalibus dedit, ut ita mecum demansione agerent, ne discedere paterentur. noli quaerere, quam sim laetatus, non quo libenter abessem a meis, quibus mihi dulcius in uita nihil est, aut quo penderem ab aulicis honoribus, qui ne iuuenem quidem mouerant unquam, ne nunc senem, sed ut homines, obliti superiorum temporum, eundem in urbe Roma, qui semper fuit, uirtuti locum esse perspicerent. parui rogantibus, cognita praesertim

Sertim Pontificis uoluntate. stipendium satis per se tenue in quo meam facilitatem nonnulli reprehendunt, cum libertate & otio maximum uidetur. nihil oneris imponitur litteris, ut in solitudine, frui licet, & ut spero licebit. unum, aut alterum Cardinalem bis in mense, terue summum, uel quia me diligunt, uel quia uirtute excellunt, salutare consueui. Caelum idem exsuperior, quod antea, humidum, graue, inaequale: nec tamen ualeo deterius, quam in patria; uel quia, quod te uirum doctissimam non fugit, hilaritas animi corpori medicinam facit; uel quia me domesticae tricae sollicitum non habent; uel fortasse etiam propter uina, quae sunt hic ex omni genere optima. pituita carere iam non possum, sexagenarius laborem scribendi, aut legendi fere numquam intermittens. Vereor, si longior epistola sit, ne tibi molestiam afferam: nisi si haec ipsa tibi molestia maior est, quod excusatione tecum utar. A te igitur peto, ut, quemcumque Caesar oratorem in demortui locum Romam mittet, ei me de meliore nota commendes. dicerem significationem amoris in me tui commendationem fore omnium grauissimam; cum nemo sit, quin facile diligat quem diligere te sentiat: sed ego ne tibi praescribam, homini omnium, quos in uita nouerim, humanissimo, & prudentissimo? Vale. Romae, Kal. Dec. M D LXXII.

 IO. SARIO ZAMOSCIO 11

MULTORVM mensium aduersa uoletudine vexatus, omni prorsus carebam legendi, scribendique facultate. quod eo mihi in primis, nomine permolestum est,

est, quia, multis ad me scribentibus, respondere sine ualitudinis incommodo uix possum. nam, et si depulsa uis est morbi; pristinas tamen uires desidero, & capitis infirmitas non modo litterarum, sed prope sermonis usum adimit quotidiani. Dabis igitur mi Zamosci ueniam homini tui amantissimo, qui te pro ingenii doctrinaeq. praestantia summis ornare laudibus numquam desinit, si ad tuam elegantissimam epistolam hoc unum rescribo, rescribere me tibi pluribus uerbis hoc quidem tempore non licere. nam, cum licebit persuadere tibi, non esse me commissurum ut debitum humanitati, amicitiaeque nostrae officium non persoluam. interim haec pauca, ut recenti morbo, uacillantibus litterulis. Vale.

Rom. non. Dec. M D LXXIII.

VBERTO. FOLIETAE

12

ET SI tu is es, cuius ingenium & uirtus neq. meū neq. cuiusquam omnino testimonium desideret: me tamen uel amore in te meus, uel ipsa ueritas adduxit, ut ex stare uellem de tuis Elogiis iudicium meum, non tam apud te, qui te ipsum egregie nosti, quam apud omnes gentes, atque adeo apud ipsam posteritatem, quae de studiis ingeniisq. nostris, expers amoris & odii, pro cuiusq. merito sententiam feret. Ego enim tua scripta & legeram ante multos annos, & ita probaram, ut ex iis, qui tunc excellere putabantur, tibi neminem anteferebam: nunc, ut uere dicam, non ut gratiae causa tuis auribus largiri quidquam uelim, haec de tuis Liguribus illustis, & diligens, & ornata commemoratio ita mihi placuit, ut

ut, qui conferri tecum hoc in genere possit, prorsus ne-
minem esse iudicauerim. nam ex vniuersa Italia, aut ex
multis prouinciis multarum virtutum exempla colli-
gere, id quod ex veteribus multi, ex recentioribus non
nulli fecerunt, haud sane magni negotii videtur esse: ex
vna vero ciuitate, & ex vna satis angusta regione tam-
quam ex vberissimo fonte multos haurire, qui vitae san-
ctitate, qui militari gloria, qui reipublicae admini-
strandae scientia, qui solertia & inuestigandi nouarum
rerum, nouarumque gentium studio, qui etiam litteris
& eloquentia floruerint, hodieque floreat, admiran-
dum quiddam est, & immortalis laude dignissimum. in
qua cogitatione dum versor, non tam equidem patriae
tuae gratulor, quod eos ciues tulerit, qui tantas res
gererent, aut qui insigni aliqua laude inter ceteros emi-
nerent, quam quod tu incredibili quodam erga tuos
amore incensus, ad eorum memoriam ab interitu vin-
dicandam ingenium artemque contuleris. viuunt enim
nomina, consumptis corporibus, excellenti scriptorum
industria: & si praeconem virtus inuenit, elucet; eo
si caret, obscuratur, & exstinguitur. Quo circa uel
iis ipsis, qui ornati a te sunt, quorum hodie nonnulli sua
gloria uiui perfruntur, vel eorum posteris tanti de-
bet esse munus, officiumque tuum, quanti semper a
fortibus ac sapientibus uiris aestinatam nominis ae-
ternitatem videmus, qui eam non modo laboribus,
ac periculis, uerum etiam uita; ac sanguine quaeren-
dam putarunt. Et, ut aliquid de meo sensu, cum alum-
num disciplinae meae, praestanti uirum ingenio, na-
tum maximis rebus, ornatæ dicendi, scribendique fa-

Ll *cultate*

cultate, siue latina Lingua, siue commuuis Italica spectetur, nemini prorsus aetate nostra concedentem, proprii Elogii laude decorasti, etsi debitum in eo virtuti praemium persoluisti, me tamen, pro mea in illum singulari beneuolentia qua voluptate laetitiaque affeceris, quo tibi beneficio deuinxeris, nec mihi verbis exprimere nec tibi cogitatione consequi facillimum sit. Ac tu quidem materiam cepisti nobilem, & praeclaram: sed, ut ea speciosior, & iucundior, & ut ita dicam, se ipsa maior sit, eloquentiae tuae praestantia consequeris. omitto reliqua, ne sim nimis: nam sua quidque laude dignum est: sed in principiis tam multis tantam varietatem, tam splendidam, tam elegantem quis non admiretur, aut quis vidit umquam? in ceteris enim Elogiorum paribus tui numquam non similis, id est grauis, & sublimis, & ornatus, in hac vero tantus es, ut in illis certare cum aliis, in hac te ipsum vincere voluisse videaris. Maeste vir ingenio, atq. virtute, optime de patria merite, cui tot ciues, tot heroes, tot Principes, communifactorum lege ereptos, vel temporis iniuriam timentes, restituis, atque conseruas. nunc illa te suae studiosum dignitatis, publici cupidum commodi, verique suum alumnum agnoscit: nunc amplectitur absentem: nunc inuolumentum, florentem, beatum exoptat. quae tibi merces una pietatis in illam perpetuae praestantissima videtur. Vale.

Romae, ex aedi. pride Kal. Dec. M D LXXII.

CAE-

CAESARI. ORLANDO 13

Nihil abest a natura mea longius, quam vel assentari, quod sui commodi spe plerique faciunt; vel inanibus verbis tempus conterere; quod eius est, qui minime sua boni nouit, quique secum sibi, & suis, tum etiam ciuibus vniuersis, & patriae natum obliuiscitur. Ego, mi Caesar, cum virumque nostrum aequae lance perpendo, cur ipse tibi assenter, causam video esse nullam. tu enim tua virtute, ego mea fortuna contentus viuo. si quis didicit esse blandus, ut alterum capiat: eius artificio locus apud te non est. ego autem, si assentatio mercedem spectat, aut emolumentum aliquod aucupatur, nihil habeo, quod à te expectem, aut quod petam praestantius beneuolentia tua. at eam adeptus iam sum: adeptamque tanti facio, ut nihil anteponam. amari enim ab homine excellentis ingenii, summae probitatis, cogitationes curasque suas omnes ad unam virtutem referente, iurisperito denique eruditissimo, non ex recenti barbariae, sed ad illam doctrinae veteris elegantiam exculto; amari, inquam, abs te, tali viro, & frui beneuolentia tua, ipsum per se optabile est. cum vero ab eadem beneuolentia multa mihi quotidie commoda nascantur: quid est, quod me tibi debere non confitear? mitto reliqua illud omnium maximum nec meminisse, nec praedicare umquam desinam, quod mihi non solum bibliotheca tua, omni prope referta librorum genere, sed ea, qua excellis, doctrina ita patet, ut, si quem

Ll 2 ex

CAE-

ex his commentariis, quos in Ciceronis orationes di-
noctuque texo, posteritas fructum colliget, eum tibi ex
aliqua parte acceptum referre debeat. Sunt enim quae-
dam, amissis duodecim tabulis, omni paene formula-
rum, responsorum, edictorum exstincta memoria, ita
complicata, & inuoluta, ut, nisi singularis iurisconsul-
ti scientia, & usu confirmata, aucta ingenio, adhibeatur, ex-
plicari, & euolui vix, aut ne uix quidem interdum pos-
sint. Agerem tibi gratias de isto munere, si uel tua pa-
teretur humanitas; uel ege is essem, qui bene de me me-
renti uerbis potius, quam re, satisfactum esse uellem. me-
moria tuebor officia tua, donec illucescat ille dies, ut refer-
re gratiam liceat: quod si assequar: non dubito, quin tu,
quem tibi hominem adiunxeris, cum intelligas, tua prae-
stanti liberalitate, bene que agendi consuetudine uehemen-
ter laetere. Haec interim, cum de officio meo cogitarem
facere non potui, quin ad te scriberem: quamquam & a
studiis meis inuitus auellerer; & ut uere dicam, non
me tuus tantum, sed meus etiam pudor ab hoc argumen-
ti genere, quod totum ad tuam laudem pertinet, haud
mediocriter auocaret. Vale. ex aedibus. Pr. non.
Dec. M D LXXII.

MAXIMO. ZABRERAE. 14

SI quis est, qui tuam humanitatem. tuosque mo-
res & probe norit, & laudare loco numquam desinat:
eum esse me, uelim existimes. uerumtamen, cum ego diu-
tius, quam studia fortasse tua patiebantur, eo, quem
superiore mihi aestate commodaueras, libro sim usus,
nonnum-

nonnumquam mihi, ne tu durius id acceperis, venit in mentem suspicari. adire ad me solebas: nec in officio tuo mediocre beneficium: erat quippe tua suauitate exhilarabar: delectabar ingenio: doctrina etiam, in qua mentiar si tibi quemquam ex aequalibus tuis antepōnam, nonnihil interdum & leuabatur labor meus, & adiunabatur industria. haec nisi restituas: nimium a te grauis errato meo, si modo erratum esse vis, poena constituitur. Longe, inquis, habitas. Fateor: nec tamen ultra mille passus. at cū memini, ad templū diui Petri, ut es religioni deditus, maximeque pius, itare quotidie soles. praeclara consuetudo: quae si manet, incommodi nihil mea causa suscipies. non enim deuiae sunt aedes meae: ab arce sancti Angeli recta euntibus ad basilicam beati Petri propemodum occurrunt: sin autem intermissa est, & te sanctae Mariae templum, quam Minervae vocant, magis tenet: impetrare tamen debet amor in te meus, non dicam, ut quotidie una simus, sed certe, ut adspectu me, & sermone tuo, semel in mensē frui sinas. Haec mi Maxime ita velim accipias, ut si te delectant, serio; si quid offendunt, ioco dicta credas. ego enim cum eo sum ingenio, ut incommodare uelim nemini: tum eo erga te animo, ut tibi multo minus, quam ceteris. amo scilicet, uti debeo, studia tua: occupationes noui: breuitatem dierum video, addita praesertim tempestate, ventis, frigoribus, imbribus infesta. Gabriel frater tuus, omni laude ornatus adolescens, de quo, ita uiuam, ut saepe cogito, ut valeat, quid agat, quam spem redit afferat, scire vehementer uelim: ad quem cum literas mittes, ita cupio salutem adscribas meis

Ll 3 verbis,

534 PAVLLI. MANVTII
verbis, ut amari se a me non mediocriter intelligat. Va-
le. Ex aedibus. pridie 7d. Jan. M D LXXIII.

M. ANTONIO. CIOFANO
Sulmonem. 15

LAETARI te, quod Romam venerim, valeam
que post itineris laborem satis commode, cum etiam at-
que etiam gaudeam, minime tamen miror. Facit hoc
amor in me tuus, illo primum tempore, quo inita inter
nos amicitia est, mihi non obscure perspectus, quotidie
postea iis illustrior officiis, quae si patiar ex animo meo
deleri, peccasse mihi valde videar. At gratiam non
rebero. Non arbitror te id spectare; quae tua humani-
tas est. nec ego quidem ex eo molestiam capio, qui mihi
sim conscius voluntatis in te meae, & si qua tui dabi-
tur ornandi facultas, eam praetermittere non cogitem.
Herculem quidem, fratrem tuum, tibi & probitate &
virtute simillimum, dum hic ero, omni officiorum gene-
re complectar. Laudibus iis, quas in me confers, non
quod is sim, qui gloriola capiar, sed quod eae quoque
ab amore proficiscuntur, magnopere delector. Vale.
Romae. v. Kal. Quint. M D LXXII.

AVGVSTINO. ANGELELLO
Fabrianum. 16

PERSVADE tibi, nihil mihi gratius, aut iucun-
dus esse posse litteris tuis, & quia pure in primis, ornate
que

que loquuntur, & quod amorem in me tuum, perspectum illum quidem a me antea, clarioribus tamen argumentis quotidie magis ostendunt. Inscriptiones misi ad filiū. is te tuo merito amat, & gaudet muneribus tuis. mihi senae, quas proxime misisti, valde probantur. Onuphrius ad te scripserat meo nomine, ut mitteres ad nos ea, quae nos olim ad te misimus. tu nihil dum respondes. quid putemus? humanitatem, & diligentiam tuam non requiram est enim utraque mihi probe cognita. quid ergo est? occupationibus distineris; quae tamen adimere tibi nostri memoriam non debent, quemadmodum nec ipse in magnis curis & negotiis tui possum obliuisci, quamquam litteris tuis interdum non respondeam. quod si tu deteriore in partem non accipis, facis quod amicitia nostra dignum est. Vale.

VII. Kalend. Iunii, M D LXXIII.

BRANCONDIO . OPHIDANO 17

EST omnibus a communi parente natura tributum ut amari velint a sui similibus, & in animorum societate & coniunctione multum ponant. Ego autem, quorum eminet virtus, & quibus in ipsis ea sunt, quae praecipuis quendam amorem concilient, eorum amicitia nihil optabilius, nihil esse praestantius, existimo. atque ego te, vel hominum sermone, vel tuis litteris, ornatissime scriptis, adductus, in horum numerum libenter aggrego, mihi autem vel maxime gratulor, quod ita te sentire video de studiis meis, ut mihi tantum largiare, quantum si agno

LI 4 scam,

scam, aut ipse me parum nosse, aut, quos mea mihi fi-
 nes modestia praescribit, eos praeterire longe videar.
 nec tamen contra tuam benignitatem disputo: potius eam
 amplector, atque amo. quod si res tulerit, ut referre
 gratias possim, in his praesertim rebus, quae ad tuam
 laudem pertineant: dabo operam, ut eo te esse apud me
 loco, quem tua virtus postulat, intelligas, & in ma-
 gna tui amantissimorum hominum copia me tamen eo-
 rum nemini concedere. Vale.

Romae, pridie non. Nou. M D LXXII.

BRANCONIO. OPHIDANO.

PAVLLI. MANVTII
PRAEFATIONES

QVIBVS. LIBRI

AD. ILLVSTRES. VIROS
AVT. AD. AMICOS

M I S S I

COMMENDANTE.

PAVLLI MANVTII
PRAEFATIONES
QVIVS. LIBRI
AD. ILLVSTRES. VIROS
AVT. AD. AMICOS
M I S I
COMMENDATA

AD. MATTHAEVM.

SENAREGAM. AMBROSII

F I L I V M

IN . EPISTOLAS . CICERONIS

QVAE . FAMILIARES

VOCANTVR



VO ne, *Matthae Senarega*, an meo di-
cam felici contigisse fato, ut, relicto Loua-
niensi celeberrimo gymnasio, quo, tam-
quam ad mercatum bonarum artium, vir-
tutis & eloquentiae comparandae causa, concesseras,
Venetias te hoc potissimum nomine contuleris, quod no-
stri, ut ipse dicere solitus es, videndi & cognoscendi mi-
ra quaedam te cupiditas incenderat? tu quidem, si tuum
sensum attendo, vis me hoc tribuere fortunae tuae. nam,
quod ita euenerit, non modo ut ad amicitiam, & consue-
tudinem, verum etiam ad conuiuium, & contubernium
meum tibi aditus patuerit: in eo quasi tibi quiddam expe-
tendum contigerit, ipse tibi gratulari plurimum solitus es.
de quo, non est meum statuere, vere ne sentias, an secus.
at illud meum est, paucis ostendere, cur tu contra mihi
carissimus, iucundissimusque sis, & quod nunc in meis
aedibus mecum habites, mecumque viuas, in eo ego quoque
meae felicitatis aliquid agnoscam. nam, si tu ita de me
sentis honorifice, quod iudicio mouearis: aequum est mi-
hi a te concedi, ut ego de te non minus vere, quam tu de
me, iudicare possim. sin istam tibi de me opinionem pepe-
rit

rit humanitas : me quoque non solum natura , sed ipsa
iam ratio docuit , praeclarum esse humanitate excellere.
itaque do me libenter iam eam partem , ut homines offi-
ciis colam , laudibus exornem , re , si opus est , pro mea te-
nuitate sustentem . Sed mehercule ego de te , mi Mat-
thaeae , a vero animi mei sensu iudico : nihil me gratia , ni-
hil afficit ambitio . Primum , cum aliquoties mei salu-
tandi causa domum meam venisses , pellexisti me in amo-
rem tui , comitate morum , & lenitate sermonis : deinde ,
quod iam non tibi modo , verum & aliis petentibus nega-
ueram , atque excluseram , ut ego te domo reciperem , elo-
quentiaeque studiis erudirem , multis precibus usus per-
uicisti . Nec mihi tamen , quod tibi , meorum sermonum
cupiditate flagranti , meamque domesticam consuetudi-
nem potenti , satisfecerim , adhuc venit in mentem pae-
nitere : quin , quo plus ad nostrum conuiuium accedit tem-
poris , eo maiorem e tuis moribus , tuisque studiis haupio
suauitatem . non enim tam hoc in te laudo quod certe in
adolescente summa laude dignum est , quod a studio do-
ctrinae non te suis illecebris voluptas , non commodum ,
ne ipsa quidem valetudinis ratio deducit ; quam illud
& admiror , & praedicare satis pro dignitate non pos-
sum , quod in tuis cogitationibus haec tibi prima est , &
antiquissima , ut Deum Optimum Maximum , a quo
vno , quae vere bona sunt , emanant omnia , humanis
rebus , quae fluxae nimis , infirmaeque sunt , longe om-
nibus anteponas . Perge adolescens optime in hoc prae-
claro diuinoque sensu . haec est omnium rerum vna no-
bilissima , vna , mihi crede , quae omnium Philosopho-
rum scientias , vna , quae omnium Regum opes facile
vincat.

vincat. quare tu quidem oblecta te, quod facis, eloquen-
 tia studio: in qua, quo modo principia se dant, futurum
 auguror, ut breui superiorem neminem, aliquando ne pa-
 rem quidem habeas. sed illud stet in primis, neq. umquā
 excidat, omnium virtutum Pietatem in Deum esse funda-
 mentum. ac vide, quot inde tibi bona fluant. Primum,
 tuae saluti consulueris egregie. animi salutem appello,
 non corporis. decet enim nos aeternam potius illam vi-
 tam, omni felicitate circumfluentem, quam hanc, quae
 temporum spatiis definitur, miseriis numquam vacan-
 tem, cogitare. deinde, patrem tuum, qui, ut audio de
 multis, atque etiam de te ipso, humanam prudentiam,
 prae diuinare religione nihil esse putat, incredibili volu-
 ptate laetitiaque perfundes. cui quantum debeas, non
 ex eo solum intellige, quod pater est; sed quod is pater,
 qui te filium vult esse inter tuos ciues omni re florentem,
 atque honoratum; qui te consiliis a puero sapientissimis
 erudiuit; qui te suo exemplo, suis optimis institutis, ac
 factis ad laudem quotidie vocat. Tali patri, tam pro-
 bo, tam tui amanti, tam libenter suas omnes curas in
 te consumentem, curare debes, ut id, quod reliquum est
 vitae, per te sit incundissimum. quod ita consequeris,
 si statueris, quibus artibus ideo nunc operam das, ut
 aliquando ceteris hominibus elegantia sermonis, et scien-
 tia rerum antecellas, earum artium infirmam esse glo-
 riam, nisi perpetuo erga summum Deum amore studio-
 que fulciatur. mihi quidem, cui tu carissimus esse aut vis
 aut certe ita videris velle, ut mihi persuadeas, magis vl-
 la re placere non poteris, quam si te in eo, quod institui-
 sti, vitae innocenter & cum virtute degendae studio con-
 stan-

stantem, tuiq. simillimum videro. Et, ut iam nunc intelligas, quos in animis hominum amoris igniculos vera virtus accendat; scis quintum abhinc mensem mihi tecum nihil fuisse, te mihi numquam visum, ignotam mihi tuam faciem, obscurum nomen. nunc, apud me quo loco sis, intelligere te puto. paucissimis diebus ex conuictu consuetudo, ex consuetudine amor, ex amore familiaritas exorta. itaque tecum & saepissime sum quod sub iisdem tectis necesse est, & admodum iucunde, quod ea, quae in tuis moribus elucet, probitate consequeris. Et, quoniam is ego sum, qui, quo me voluntas ducat a ratione profecta, eo libenter sequar; gessi morem animo meo, tacite hortanti, ut hanc meam ad te amandum propensionem non modo tibi, sed, quatenus quidem per me liceat, reliquis etiam hominibus illustri aliquo officio ac munere declararem. cumq. tulisset casus, ut hoc tempore Ciceronis epistolae familiares, eae, quas tu iam legendo & peruolutando triuisti, denuo typis, ut nunc loquimur, essent imprimendae: peropportuna ad id, quod volebam, visa res est nam, hunc librum si cum tui nominis inscriptione publicarem, putari me facere, quiddam, quod utrique nostrum aequae conueniret: tibi, quia ex his primum Ciceronis epistolis ad Latinae orationis elegantiam informamur, ex his primus eloquentiae quasi succus, qui qualis initio fuerit, permagni interest, ebibitur: mihi, quia, cum hic liber omnium fere versetur inter manus circumferet, id quod ego cupio, tuum nomen, & meum de te iudicium, meamq. spem quam plurimis ostendet. quorum alterum est eiusmodi, ut ego tibi nunc ex aequalibus tuis neminem in ullo genere laudis anteponam: altera,

IN. C I C. E P. A D. A T T. 5
tera, cum aetate processeris, ea mihi de te pollicetur,
quae si euenerit, (omnium autem rerum euentus in Deo
positus est) vir eris inter viros maximus, habebit a te fa-
milia tua memoriam nominis sempiternam, patria vero
exemplum in ciuitate virtutis excolendae praeclarissi-
mum. Venetiis, M D L I V. mense Maio.

AD. CAROLVM. PISA VRIVM
LEONARDI. FILIVM
IN. EPISTOLAS. CICERONIS
AD. ATTICVM 2

BENEFICIORVM, Carole Pisauri, non ea
dem omnium est ratio. multi, quid detur, spectare solent,
sua quidque magnitudine metiuntur, nihil attendunt
praeterea: ego potius, quibus de causis, & a quo homine
detur, animaduerto; ac, si quid in aliquem, aut in me ip-
sum collatum est gratiae, tanti soleo aestimare, quanti vi-
detur is, qui contulit, aestimandus. hinc fit, ut quae a pa-
tre tuo, viro sapientissimo, & cum aliis laudibus ornato,
tuo vero omnium, quos ego in vita nouerim, humanissi-
mo, quae item a patruo, qui nuper magno bonorum om-
nium maerore mortuus est, Ioanne Maria, Paphi Epi-
scopo, excellenti non minus doctrina, quam bonitate, prae-
dito, diuersis temporibus in me profecta sunt officia, ea
quamquam summa non fuerit, (neque enim tulit occasio
neque rationes meae postularunt) pro summis tamen ac-
ceperim, & earum rerum loco duxerim, quas qui possi-
dent,

dent, beati existimantur. fons enim ille, unde manarunt, amor fuit, & cum amore iudicium, quod uterque de me habuit: quod equidem, si potero, tuebor officiis: studio certe, omniq. prorsus cura, atque industria bonum virum, meritorumq. memorem praestabo. quod si liceret ingenium cum voluntate coniungere: ut alterum alteri responderet, & cupiditati vires aequarentur illustrarem beneficia vestra; ac fortasse efficerem, ut gratia mihi a vobis aliqua deberetur, gratiam persoluenti. verum, ut, hoc quidem ab infirmitate mea sperari minime posse, non solum intelligo, verum etiam ingenue confiteor: sic illud facile polliceor, vereq. affirmo, si quid aut iam est in me facultatis, aut erit aliquando, iis, in quibus assidue versor, studiis partum, & vigiliis, velle me id in omni mea vita, quantumcumque erit, servire totum uestrae laudi, tuae praesertim; quae cum a meis praeceptis, & consiliis originem duxerit, exornabo eam, tamquam opus meum, quibus potero artibus, qua licebit industria; florentemque pulcherrimis virtutibus alumnum disciplinae meae cum inspiciam, gratulabor virique nostrum pariter, fructumque amoris & studii veteris in te mei ex tua gloria uberrimum capiam. Ac tu quidem, mi Carole, cum tibi nasci contigerit ex ea familia, in qua semper verus honor, & splendor virtutis entuit, nihil debes humile cogitare, nihil angustum, nihil obscurum, aut inane. excelsa petat animus tuus, ampla, illustria, plena dignitatis, & gloriae. quo te semper a tua prima pueritia mea vox incitavit; quo pater tuus, cuius ad te cogitationes curaeque referuntur omnes, assidue cohortatur, quo denique te vocant maiorum tuorum exem-

exempla; quorum nomina nulla dies existinguet, nulla
 obscurabit obliuio. non enim, si praestiteris ea, quae a
 te expectantur, quae maxima sunt, nouum in tua fami-
 liam decus inferes: antiqua renouabis, praeclaramque
 consuetudinem retinebis in tua domo laudis eapetendae,
 exercendarumque artium optimarum: quibus instru-
 ctos, uiles fuisse patriae ciues, sibi & familiae glorio-
 sos, de tua gente multos, si annales euolueris, inuenies.
 Verum, quando te sacris addixisti, & illud vitae ge-
 nus complexus es, quod est totum in laudabili ratio-
 ne, totum in praeclaris cogitationibus et factis constitu-
 tum; non te libera voluntas, ut alios, ad honestum re-
 ctumque ducit; sed, quo te primum die ad religionem
 contulisti, eodem die legem ipse tibi imposuisti perpe-
 tuae continentiae; exclusisti rerum inanium cupiditu-
 tem; uelle ad solidam laudem omnia referre uelle sum-
 mi Dei gloriam in omni uita, idest tuam salutem, specta-
 re professus es. Quare non tibi monitores, quorum te
 moueat oratio, expectandi: ipse te excita, ipse acue &
 impelle. multae sunt propositae adolescentibus uiae, falla-
 ces, obliquae, insidiose, oculis incundae, specie qua-
 dam obiecta voluptatis: in quibus errare quotidie uides
 & labi, ducem sequentes libidinem, non rationem, de
 tuis aequalibus quamplurimos. tu uirtutis ingrederi,
 simplicem, rectam, apertam, principio fortasse diffici-
 lem, atque asperam, exitu certe salutarem, & glorio-
 sam. hanc, inquam, uiam, signatam, & impressam
 uestigiiis proborum sanctorumque virorum, si uis ipse ti-
 bi carus esse, si uis ipse tibi recte consulere, unam ingre-
 dere: aut, si ingressus iam es, curre per eam celeri

Mm gradu

gradu ad ea, quae te manent, praemia immortalitatis. Haec ego, pro meo in te amore singulari, vetereque erga parentem tuum studio, scriptis tecum ago, quae sermonibus & libentius agerem, & saepius, si liceret. sed, quando te Patauii tua studia, a quibus abduci non debes me Venetiis mearum rerum ratio, & valetudinis deinet infirmitas: proficiscetur ad te mea vox, his consignata litteris: quae tecum erit perpetuo, ubicumq. fueris, te prosequetur, quocumq. iueris. nec vero dubitavi, quin ea tibi paullo gratior esset futura, coniuncta cum Ciceronis voce, idest cum iis epistolis, in quibus cum Attico, familiari suo, non minus graviter, & sapienter, quam eleganter, & splendide loquitur. fructum, ut spero, capies ex utraque non uulgarem. ego enim, ut uelis optima, te hortor; Cicero uolentem adiuuat; ornat enim eloquentia, consiliis instruit sapientissimis. nam disputat saepe in his epistolarum libris, sermone per quam eleganti, de statu reip. de uitiis Principum, unde fluunt exitia ciuitatum, de uicissitudine fortunae. qui tibi erit, accurate legenti, sapientiae fons uberrimus.

A me uero munusculum hoc habebis, meae in te uoluntatis & studii argumentum. exiguum, inquires. fateor: sed uelim spectes animum, non rem: quam tamen ne ipsam quidem debes contemnere; siquidem eiusmodi est, ut tuas, tuorumq. laudes, a me non expressas, sed tamquam tenui penicillo designatas, simul cum beneuolentia mea cunctis gentibus patefaciat.

Venetiis, M D LIX.

A D.

9
AD. BENEDICTVM. ACCOLTVM
RAVENNAE. CARDINALEM
IN. ORATIONVM. CICERONIS
PARTEM. PRIMAM 3

MAXIME esset optandum, Accolte clarissime, ut, quae olim a doctissimis uiris magno labore, magnisque uigiliis sunt elucubrata, ea nostram ad aetatem peruenire omnia potuissent. artium plurimarum scientia, quarum adiumento ad uitam recte instituendam indigemus, non desideraretur. uerum ita casu nescio quo accidit, ut ex iis scriptis, quae ueteres illi, homines sapientissimi, reliquerunt, non solum multa prorsus interierint, sed etiam, quae in hanc diem seruata sunt, ita deprauata, ita mutila legantur, ut saepissime uix, aut ne uix quidem intelligi possint. hoc incommodum pater olim meus magna ex parte sustulit. cuius industria multos excitauit, ut, eandem rem aggressi, iacentem literarum laude pro suis quisque uiribus subleuaret. quod si alii fecerunt, tantum aemulatione gloriae permoti: certe, cur ego id faciam, hoc plus habeo caussae, quod, cum pater studiosis id, quod in hoc genere promiserat, morte praeventus praestare non potuerit, hoc me nomine ita appellat, quasi ad filios soleat non paternae solum rei, sed uoluntatis etiam hereditas peruenire. haec me, ut debet, opinio multum mouet, sed auctoritas tua plurimum quam ego tanti soleo facere, ut, quamcumque tu probas rationem, ea demum & utilis mihi, & honesta uideatur esse. tu igitur cum ad hoc posteritatis adiun-

Mm 2 dae

AD.

dae Studium nos & vehementer, & saepe sis cohortatus; effecisti, ut in eam rem tanto alacrius incumbamus quanto pluri apud me tua, quam reliquorum omnium consilia sunt. quod si labore, studio, diligentia profici in hoc genere quidquam potest, ut certe potest: magno pere spero fore, ut neque te officii tui in me admonendo, neque liberalitatis in adiuuando paeniteat. cuius rei quasi specimen erit haec prima Ciceronis orationum pars, quam, ex veterum exemplarium collatione diligenter emendatam, in manus hominum sub tuo nomine emitimus. nam, cum usu, & consuetudine ita comparatum sit, ut, quibus rebus Principes viri delectentur, in iis rebus multi suum studium probare velint; ex quo fit, ut ab aliis canes, ab aliis equos, aut aues nobiles dono dari videamus; commode me facturum existimaui, si quid ego eius generis ad te mitterem, quod omnibus te praesferre voluptatibus intellexissem. soles enim quotidie fere a gravissimarum artium tractatione, in haec studia, quae sibi ab humanitate nomē adsciuerunt, quae si in hortum amoenissimum, diuertere: ubi te modo oratorum & poetarum flores, modo dulcium amicorum colloquia mirifice delectant: ut, praeter id temporis, quod valetudini dare soles, quod sane pusillum est, hora nulla sit, quam non in litteris, & cum virtute traducas. quam tuae vitae rationem qui ignorant, mirantur scilicet, unde illa tibi in aduersis rebus fortuna tanta, unde animi robur illud inuicti, quod ne illa quidem ipsa, quae in rebus humanis fortuna dominatur, ullo pacto poterit infringere; contra cuius vim duplici te praesidio munieris, artium maximarum cognitione, & mentis optima

mae

mae conscientia. haec est aliarum virtutum, quae in te sunt multae, quasi Princeps, & Regina quaedam, ut in aliis neminem tibi antepone, in hac ne conferre quidem possim. Nam de prudentia, de pietate, de iustitia, ne videar assentari, nihil dicam: ne de liberalitate quidem, quae tamen ita nota est, ut non, qui eam laudet, assentator, sed, qui non laudet, malevolus existimetur. cum enim haec dandi beneficii ratione eiusmodi sit, ut nulla certior ad laudem, nulla uero magis lubrica videatur via; propterea quod in beneficiis collocandis plerique fortunam hominum spectare solent, ut eandem gratiam, aut etiam cum fenore recipiant: non est, quod in hoc te labi quisquam arbitretur; cum & rarissime contingat, cuiusquam opera ut egere videaris, & tu tamen quam plurimis, ob eximiam naturae tuae liberalitatem, atque amplitudinem, benigne facere & soleas, & possis. & cum de omnibus ad bene merendum natura es maxime propensus: tum vero ipsa tentatio atque doctrina ita conformavit, ut ad eos honestandos, qui se iis artibus, in quibus ipse excellis, dedidere, tuum soleas studium libentissime conferre. quae quidem humanitas & beneficentia tua non sane video qui possit in ullo maior esse, quam in me tuendo fuit. quae est enim a te res, quae ad meum commodum attineret, praetermissa? quis diligentius est adhortatus, ut hanc restituendae antiquitatis laudem, qua pater meus olim excelluit, paene afflictam excitarem? quis eam ipsam ad rem perficiendam plura contulit? cum etiam magnis Principibus, tui simillimis, ita me commendavis, ut, iudicii tui testimonio permoti, non minimis ad se praemiis evocarint. Quae cum recordor,

et si me ipsum probe noui, tamen interdum mihi assen-
tor, & mihi aliquid uideor esse, quod a te sim ornatus.
haec me inanis ambitio ita delectat, ut illum dolorem,
quem ex difficultate capio remunerandi, si non tollat,
minuat quidem certe. quamquam tu is es, qui te satis
superque remuneratum existimas, si modo id, quod de-
disti, ab eo, qui accepit, intelligis memoria teneri. quo
in officio praestando, noli credere quemquam esse, qui
me uincat. & huius quidem rei confido fore ut aliquan-
do eiusmodi a me signa dentur, quae nullum cuiquam de
mea in te uoluntate dubitandi locum relinquant: nunc
earum rerum, quas ipsi quidem hoc tempore possumus,
maxima, primum, ut dixi, Ciceronis orationum uolu-
men in tuo nomine apparebit. omnino neque amplitu-
dine tua, neque uis officiis, quae in me contulisti, digna
res uidetur: sed, ut spero, muneris nostri tenuitatem
humanitatis tuae magnitudo subleuabit.

A D . G V L I E L M V M . B E L L A I V M
L A N G E V M

A P V D . S V B A L P I N A S . G E N T E S . P R O R E G E M
I N . O R A T I O N V M . C I C E R O N I S
P A R T E M . S E C V N D A M 4

M A G N I refert, Bellai ornatissime, quo quid-
que tempore agatur; & ad omnes res non paruum
habere mumentum solet occasio quaedam, & commo-
ditas, qua uti dicuntur ii, qui nihil, nisi loco, facere
consue-

consueuerunt . nam , quemadmodum pictorum tabulae
certo loco positaе delectant ; eademq. minus bono lumine
constitutae non item eorum , qui spectant , oculos tene-
re solent : sic actiones nostrae , mirum est , quantum op-
portunitate commendentur : ut interdum plus in tempore
quam in ipsa re , positum esse videatur . quod ego cum
semper iudicassē , tamen non sum ueritus , quin tibi , in
iis rebus uel maxime occupato , quas Rex Christianissi-
mus . & post hominum memoriam maximus , tuae fi-
dei diligentiaeq. mandauit , hoc ipsum , quod nunc a me
profiscitur , officium futurum esset uel iucundissimum .
nam , et si magna tibi est grauissimorum negotiorum im-
posita moles ; quam tu summa tua cum laude , & om-
nium paene gentium admiratione sustines : tamen in ipsa
illa occupatione ita te litterarum tractatio delectat , ut
& legas cum uoluptate , quae alii scripta reliquerunt , &
scribas ipse , quae a posteris cum admiratione perpetuo
legentur . ex quo illud consequeris , ut non modo Regis
uoluntati seruias , quod est summa laude dignum ; sed
etiam posteritati consulas , quo laudabilius esse nihil po-
test . itaque tantum abest , ut a maioribus tuis , omni de-
core affluentibus , ad te ornandum quidquam haurias ,
ut etiam in te sit , quod ad illos redundet . nam , si tibi
aliunde petenda sit laus ; unde plura suppetant ornamen-
ta , quam a fratribus tuis , maximeq. ab eo , qui a Paulo
III. ita est in Cardinalium Collegium cooptatus , ut ei
summus Pontifex amplissimam dignitatem non quasi op-
tata concedisse , sed quasi debitam persoluisse videatur ?
cui quidem uiro cum ad summam gloriam nihil desit ;
cumq. item tibi eae res abunde adsint , quibus homi-

Mm 4 nes

nes hominibus antecellere uidentur: tamen fit uestra bonitate, & sapientia, ut uicissim & tu in illius dignitate, atque amplitudine, & ille in ingenio. atque uirtute conquescat tua. uterque uero magna apud Regem prudentissimum, & summo iudicio praeditum auctoritate, magno estis apud omnes nomine, & gloria. nam tu quidem, quis est tam longinquus, cui notissimus non sis? non ex praesenti corporis forma, (quamquam multas provincias Regis legatus obiisti) sed ex imagine ingenii tui; quam uerissimis eloquentiae coloribus expressam in tuis scriptis licet intueri. in hac cum & naturae tuae bonitas, & uirtutis eximia praestantia cernatur: sequitur, ut, ex ea qui te norunt, iidem ament. quorum ego in numero cum ita essem, ut nemini concederem: tamen non est credibile, quantum ad illam ipsam animi erga te mei uoluntatem addiderit Gulielmi Pellicerii, oratoris in hac urbe Regii, hominis praestantissimi, praedicatio. cuius multi, & egregii de tua laude sermones me iam antea commotum impulerunt, ut ex orationibus Ciceronis, cuius tu libros e manibus dimittere non soles, alteram partem cum tui nominis inscriptione diuulgarem. qua in parte ab erroribus, & mendis uindicanda quantum operae, studiique posuerim mihi ipse sum testis: quantum autem profecerim, & tu, & alii iudicabunt. tibi quidem, si consequar, ut nostra diligentia probetur, sane meos labores non exiguo compensatos esse fructu existimabo.

A D.

AD . ALEXANDRVM . CAESARINVM
 C A R D I N A L E M
 IN . ORATIONVM . CICERONIS
 PARTEM . TERTIAM 6

BENE mereri de litteris, etiamsi utilitas praeterea consequatur nulla, tamen praeclarum in primis, atque egregium esse semper duxi: quamquam, utilitatem spectare si volumus, ea demum summa est, quae ex hoc genere percipitur. fructus enim in posteritatis memoria, & praedicatione positus est, quem nemo umquam sapiens non praestantissimum iudicauit. sed haec bene merenditatio duplex uidetur esse. nam & qui aliquid ipsi scripserunt, & qui alios uel cohortatione, uel praemio, ut scriberent, impulerunt, litteris opem tulisse existimantur. quae duae res eiusmodi sunt, ut, qui alterutram commode faciat, ei scilicet a studiosis omnibus gratiae sint agenda, qui utramque, ne haberi quidem satis possint. Atque hanc laudem, ne apud ueteres quidem saepe accidit, ut unus consequeretur: propterea quod, qui ea uirtute, atque fortuna fuerunt, ut & ingenio posteris prodesse possent, & opibus, ut idem facerent, multos adducere, alterum facile fecerunt, ut eos, qui doctrina, & eloquentia ualerent, ad iuuanda litterarum studia excitarent; alterum facere, ut ipsi monumentum aliquod industriae suae relinquerent, propter rerum gerendarum curam non ita potuerunt. quod item nostris temporibus usu uidemus euenire. nam neque multi sunt, qui praestare utrumque possint; & , qui possunt,

his.

AD.

iis fere, cum velint, non conceditur. cuius generis exemplum, ne id, quod adest, aliunde quaeramus: concede quaeso, Caesarine praestantissime, ut a te summam: & sine me hoc impetrare a modestia tua, ut ea, quae sentio, de te dicam. certe enim, qui maiorem aut iuris civilis, aut sacrarum litterarum cognitionem sit consecutus, neminem esse constat. neque tamen haec studia, quae humaniora appellantur, quae nos adhuc secuti sumus, contempsisti, in quibus etiam diligenter versatus es, ut illa superiora, quae quibusdam ipsa per se nimis horrida videntur, eloquentiae pigmentis, cum velles, atque etiam quantum velles, illustrare posses. est igitur in te ipso, unde posteritas adiuvetur. nec, ut arbitror, voluntas deest: sed otium eripiunt maximarum rerum occupationes. nam, quia tua virtus non humili, neque obscuro loco latet, sed quasi in specula quadam excelsa, atque illustri posita est, unde opem ostentare bonis omnibus videtur; ideo homines accurrunt ad te, vel ut consilium, vel etiam ut auxilium petant. itaque negotiis a litterarum tractatione distractus, ex duabus rationibus, quibus initio bonas artes adiuvare posse dixi, alteram inuitus omittis, cum ipse nihil scribas: alteram studiose amplecteris, cum iis, quos industria vides excellere, nullare desis. quamobrem Hieronymus Ferrarius, qui se iampridem tibi addixit, homo & ingenii, & iudicii laude praestantissimus, cum alia, quae a te habet, praedicare solitus est, tum illud vel maxime, quod, domi tuae vivens, te permittente, atque adeo libente, totum diem in litteris ponit, & otio

frui-

fruitur tanto, quantum diserta in regione vix esset. cuius ex ingenio qui fructus percipiuntur, qui certe maximi sunt, ii sane tuae liberalitati referuntur accepti. a te habemus, quae Ferrarius in veterum scriptis vel correctione restituit, vel explicatione illustrat. a te emendationes in Philippicas Ciceronis orationes, quas ille plurimas, atque optimas ad me misit, quae iamiamque edentur, a te inquam omnes sunt. itaque etiam eas ipsas orationes, ut a Ferrario, idest a te, restituas, & quae praeterea in hoc tertio volumine continentur, in quibus ipsi, quae male affecta erant, multa sanauimus, tibi inscriptas, atque dicatas emittimus; ut, quod beneficium habemus maximum, eius beneficii auctorem agnoscamus, & huic libro summum ornamentum, Caesarini nomen, apponatur. quare etiam id, quod iampridem optavi, fortasse consequar, ut, quam praeclare ego de te sentiam, cum intelligas, tu me eum existimes, quo in amicitiam, vel potius in clientelam tuam accepto, non pessime sensisse videaris.

AD. IOANNEM. MONLUCIVM
CRISTIANISSIMI. REGIS
CONSILIARIUM

EIVSDEMQUE. APVD. VENETAM. REMP. ORAT.
IN. CICERONIS. ORATORIOS. LIBROS 6

QVOD te non fugit, Monluci sapientissime,
praestare omnes ceteris hominibus, sed alius alia re
vult.

uult . non enim uniusmodi sunt nostrae voluntates ; sed , quoniam ex animo qui uarie afficitur , tamquam ex typo affinguntur , ipsae quoque uariae sint , & multiformes , necesse est . ergo non eadem omnibus prima sunt . Quoniam uero ex iis , quae appetuntur , necesse est aliquid excellat , ut de multis optabilibus unum optabile maxime sit : quid sit id , quod ego ceteris praestare putem , si de me quaeratur ; dicam , id , quod qui assequuntur , eorum in potestate sensus omnium , animique sunt : id autem sine dubio Eloquentia est : quae tantum possidet dignitatis , ut infra uel eorum fortunae , quorum imperium provinciae nutumque sequuntur , me quidem iudice constituantur : cum ita accadat , ut ab hac quamcumque in partem volentes ducamur , illis inuiti saepe pareamus . Sed , quoniam , quo loco posita laus est , eum locum maximis difficultatibus Natura circumsaepsit , ut perueniendi facultatem paucissimis relinqueret ; non est , quare nobis in mentem ueniat mirari , cur neque diuturna , neque in multis perfectae fuerit species eloquentiae . illud uideo , cum in hanc cogitationem mentis aciem intendi , bene dicendi gloriam duabus rebus ali maxime , otio , & libertate . itaque in urbe Roma , quae bonorum oratorum quasi secunda genitrix partus edidit uberrimos , neque ante secundum Punicum bellum , neque post Caesaris dominationem magnopere fuit , quod in hoc genere probares . Hannibale uiecto , hostis Italiae terribilis nemo fuit . tum in urbe securitas , tum summa tranquillitas orta : tum seditiosorum hominum ingenia popularibus concionibus acuit

am-

ambitio . conciones , inquam , eloquentiam pepere-
runt : nisi quid me fallit ratiocinantem : ratiocinor
autem sic , & per hos quasi gradus interrogationis
adscendo . Eloquentiae quod summum fuit propositum
praemium ? consulatus : qui summus honor fuit . con-
sulatum quis mandavit ? populus . populum quis te-
nuit ? concionator optimus . ergo a concionibus existi-
tit orator . idemque sublatis concionibus , nullus fuit .
cum enim civilibus armis oppressa Resp. iaceret ; uetus
consuetudo periisset ; à populo , cuius potestas uniuersi
translata ad unum esset , non iam magistratus , non
praefecturae peterentur : eloquentiae , quae populi
gratiam honorum spe quaesierat , inanis omnis & su-
peruacanea fuit exercitatio . sic oratoria facultas ,
summorum hominum studiis , exercitationibusq. cul-
ta , cum a duobus Gracchis ad C. Caesaris aetatem ,
hoc est per annos centum fere ita uigisset , ut nihil
umquam fuerit illustrius ; non effugit rerum huma-
narum commune fatum : quas ubi ad summum siue in-
dustria , siue natura perduxit , retro fere praecipiti la-
psu reuoluuntur . Imperatores deinde multi rem Ro-
manam exceperunt : quorum aetatibus uestigium ue-
teris eloquentiae nullum agnosceres . quid post ? multo
minus . nam , imperii sede in Graeciam translata , cre-
brae uastationes Italiae consecutae ; cum influentes
barbararum nationum copias reprimeret nemo . tum
non eloquentia modo , sed ipsa paene literarum me-
moriam funditus deleta , nec sanus est bonis disciplinis
honor , nisi multis post saeculis , restitutus . partum
denique , aut auorum nostrarum memoria , cum exte-

vos

ros mores Italici caeli temperies aliquando ad humanitatem deduxisset, paullulum oculos litterae sustulerunt. doctrina primum, serius enituit eloquentia: nec mirum: doctrinam enim sine eloquentia laudamus; eloquentem sine doctrina recte intelligens nemo duxit. nunc in oratorum nomine, quod eximium semper fuit, nihilo minor, atque haud scio an etiam maior, quam priscis illis temporibus, dignitas, & amplitudo est. mittuntur a Regibus ad Reges, aut ad liberarum ciuitates, qui non de stillicidiis agant, non de iure fundi; quarum rerum controuersias qui perire, & copiose disceptarunt, scimus olim habitos esse eloquentes: sed ea tractent, quae prudenter disputata, otium gentibus constituere. dignitatem imperii conseruare, terminos proferre possunt. hoc qui praestat, eum ego ueteribus oratoribus non comparo solum, sed etiam antepono. illi causas agebant primum apud iudices sorte ductos, deinde apud eos iudices, quibus de a iena re, non de sua indicantibus persuadere orator siue hoc, siue illud haud magno negotio posset. nunc agitur in consilio letissimorum virorum: agitur iis de rebus, unde ad eos ipsos, qui iudicant, maximum potest siue emolumentum, siue damnum redundare; cum & de publica re iudicent, & in publica, extra quam nihil est, priuata cuiusque contineatur. his probare quae uelis, eo maioris ingenii uidetur esse, quo difficilius ab artificio capitur prudentia. itaque, cum hoc multi uoluerint, magnum decus atque ornamentum est eorum, quibus contigit, ut possent; qui sane pauci sunt: maximum uero, si cui tantum aut natura dedit, aut exercitatio doctrinae,

Etrinae, ut inter hos ipsos emineret. qualem si quis te iudicet, Monluci clarissime, hunc ego recte iudicare mihi persuadeam. nam, si consideremus, primum à quo missus orator sis, deinde ad quos, tum quibus de rebus missus: ita reperiemus, missum ab eo Rege, qui omnes Reges sapientia uicerit, quoniam quidem omnium unus, quid contra Fortunam virtus posset, maxime declarauit: ad eam Rempublicam, quae nisi sapientissimorum ciuium copia floureret, semperq. flourisset, profecto neque tanta nunc esset, cum olim minima fuerit; neque tam diu staret, cum ceterae Respublicae suorum ciuium temeritate conciderint: iis autem de rebus esse missum; quarum quae magnitudo sit, ex eorum, ad quos pertinent, opibus apparet; quae tantae sunt, ut paucorum imperiis distributus terrarum orbis teneatur. Et, cum haec legatio tibi perhonorifica fuit; tum illud ad tui nominis celebritatem longe maximum accessit; quod cum a Principe Turcarum Solymano pacem defessa bellic Europa peroptaret, eaq. sine Christianissimi Regis intercessione desperaretur; unus electus, qui tantum muneris obires, acceptis à Rege mandatis, aestate media, summis caloribus in Graeciam nauigasti. pacem ut componeres, optabatur: composuisti: hieme summa, difficillimis itineribus, per dispositos equos in Galliam recurristi. Exceptus alia cura, cum de sedandis inter Regem tuum, Regemq. Britannum magni momenti controuersiis ageretur, praefuisti. te consulente, agente ultro citroq. cursante, abiectis armis pax inter eos firmissimo foedere constituta. Habes hoc omnino, Monluci, non dico a Fortuna, quam casus, & temeritas regit, sed

a te

ate ipso, qui ad consilium & rationem omnia refers, ut in tuis actionibus felix usquequaque sis. nimirum Sors, quam in rebus humanis dominari quidam sunt opinati, non omnium est acque communis; sed ipsa sibi virtus propriam fortunam architectatur. non eras, quia non est errare sapientis; & quia sapienter agis, omnia procedunt. bonus etiam orator es, quia bonus uir: ingenium enim probitas commendat; nec minus mouet is, qui dicit, quam ea, quae dicuntur. Quod nisi Latinum sermonem in Italia peregrinitas immutasset; nae tu nobis longo intervallo & Crassos, & Antonios retulisses. sed quoniam ea lingua utimur, quam multis coeuntibus linguis generatam corrupta consuetudo peperit: veteribus Romanis oratione dissimilis, ingenio simillimus, non tu quidem loqueris ut illi, sed ut illic tamen & sapis, & persuades. Quare non fuit ab re, cum ego eos libros, in quibus perfecti formam oratoris a Cicerone videmus expressam, mendis anlea deformatos, nunc mea correctione expolios emitterem; non fuit inquam ab re, tuo nomini dicatos emittere; ut, quae de perfecto oratore traduntur, ea perfecti item oratoris titulo cohonestarentur. hoc cum ita existimasset, quia videbatur esse aptissimum, feci, & feci eo libentius, quod cum tu mihi & multa iam summae humanitatis officia tribuisses, & is esses, qui tribuere etiam maiora posses; ego, nisi aliquid, praesertim ubi daretur occasio, retribuere, uerebar, ne, ex duobus maxime insignibus uitiis, alterutrius infamiam non effugerem, ut vel ea viderer, quae a te accepissem, minus meminisse, quod a consuetudine naturaq. mea alienissimum est; vel ea, quae

quae sperari possent, negligere: quod quia superbi esset, abest non modo a fortuna mea, sed etiam a voluntate plurimum.

Venetius. M D XLVI.

A D . BENEDICTVM . RHAMBERTVM
IN. CICERONIS. LIBROS
DE. OFFICIIS

NON ignoras, Benedicte Rhamberte, sensum esse quandam in hominibus similitudinem, quae cum in consuetudine cognita est, efficitur, ut, inter quos id accidit, amor exoritur. ab hoc quasi fonte multorum amicitiae manarunt. multos etiam beneficium cum obligasset: cumque id, quod acceperant, memoria conseruatum grate animo redderent; idque uterque fieri ob ingenii bonitatem, & voluntatis erga se propensionem existimaret, statim est illam opinionem benivolentia consecuta. itaque duae causae sunt, quamobrem homines ament inter se: sed haec posterior, quae a rebus externis originem ducit, cum illa superiore, quae a natura proficiscitur, nullo pacto videtur esse comparanda. illa enim primum habet eam suauitatem, qua, ut opinor, & certe, nulla maior est, cum eos, quibus utimur, & iisdem rebus, quibus nos, & aequae atque nos affici sentimus: deinde, etiam qui in dando & accipiendo beneficio fructus est, eo non eget. nam, si haec actio bene merendi interdum est, & esse potest in iis, qui voluntate non admodum coniuncti sunt,

Nn quanto

quanto facilius existet apud eos, quorum animi ita consentiunt, ut, quasi natura hortante, easdem res appetere, ab iisdem fugere videantur? at vero, qui officiorum commoditatibus adducti in amicitiam conierunt: etiam si alter alterum initio summe diligit: tamen, si quando accidet, id quod accidere saepe solet, ut ea, qua diligere coeperunt, causa tollatur: certe eorum animi pedetentum in amore laescent. quo in genere animaduertis, Rhamberte, quam multi quotidie labantur, de quibus, facile est intelligere quid sentias, cum ab eorum instituto tua ratio tam vehementer abhorreat. probe enim te, quae nostra debeat esse in iungendis amicitiiis cautio, quae in iisdem colendis religio, quod item in omni vita praestandum officium sit, horum librorum, quos nunc tibi inscriptos ad te mittimus, lectio erudiuit. sensi in me ipso; quem, ab opibus non magnopere firmum, aut ne firmum quidem, tamen octauum abhinc annum tanto studio es complexus, quantum, qui ab omni re paratissimus sit, remunerando compensare vix possit. cumque rerum mearum status, ut sunt humana, interdum mutaretur; memoria teneo, te, numquam immutatum, eandem semper cum mihi, tum fratribus meis voluntatem, ac beneuolentiam praestitisse. cum vero maior aliquanto inter nos consuetudo esse coepisset: quod quidem est factum, postea quam te in nostram vicinitatem contulisti: facile sentio, ad meam vitam recte conformandam quanto mihi observatio tuorum morum fuerit adiumento. colloquutiones vero de litteris nostrae quid non dicam delectationis, sed utilitatis habuerunt? equidem, si liceret, totos dies vellem tecum ponere. quarum
enim

enim ego rerum cognitione delector, earum in omni genere quae tui sit iudicii subtilitas, intelligo. sed hanc Latinae scribendi rationem, in qua multi nunc volunt excellere, paucissimi possunt, eam vero sic tenes, ut tuis scriptis mihi quidem purius nihil esse videatur. quod eo mirandum est magis, quia tu non, ut alii, diuturno, atque assiduo librorum usu, sed temporum studio subsequiorum, hoc ut posses, consecutus es. nam, ut omittam, quod tibi, cuius fidei atque prudentiae Veneti Senatus arcana creduntur, otium non saepe contingit: ecqui dies est, quo non ex amicis tuis aut consilio tibi aliquis, aut opera, aut etiam re sit adiuvandus? qua in consuetudine retinenda nimium diligens esse dum vis, accidit saepe, ut tuum potius ipse commodum, quam officii colendi facultatem praetermittas. quo ego me potius facere sum arbitratus, si haec opuscula, in quibus maxime de officio praecepta traduntur, ad te, quem cognovi esse omnium officiosissimum, mitterem. genus hoc, Rhanberte, quoddam est, quo ego eos, qui de me bene meriti sunt, remunerari soleo. perpende rem, nulla uidebitur, animum respice, gratissimum dices.

AD. DIEGV. M. HVRTADV. M.
DE. MENDOZA

CAROLI. CAESARIS. A. CONSILIO
EIVSDEMQUE. APVD. VENETAM. REMP. ORAT.
IN. PHILOSOPHIAE. CICERONIS
PARTEM. PRIMAM

SVPERIORIBVS diebus; cum domum tuam
venissem, vt Benedictum Accoltum, qui apud te di-
uersabatur, honoris causa viserem, quem ego hominem,
non tam quia Cardinalis est, quam quia Cardinalatu di-
gnissimus, vehementer obseruo: casu accidit, cum ego ad
essem, vt inter vos sermo oriretur iis de rebus, quae, ab
antiquis ignoratae, nostra patrumque memoria non solum
inuentae sunt, sed ad summam etiā elegantiam perpoli-
tae. cuius generis cum Accoltus ita multa commemo-
rasset, vt mihi quidem, credo item aliis, qui aderant, faci-
le probaret, veterum sollertiae nostrorum hominum indu-
striam antecellere: suggestisti tu, ne de philosophia qui-
dem, in qua tantopere antiquitatem admiraremur, tibi
videri esse dubitandum, quin ea posset etiam nunc expo-
liri, atque ornari; si modo, quam quisque linguam a pa-
rentibus, atque a nutricibus traditam cum lacte simul
hausisset, in ea vellet scribere: nunc vsu euenire, vt, ex-
terno sermone addiscendo, totam aetatem consumamus:
quod si nos a pueritia disciplinarum cognitioni totos de-
deremus; non esse desperandum, quin & Platonēs, &
Aristoteles

Astoteles aliquando possent exsistere: non enim & caelum hoc, unde spiritum addimus, idem est, quod olim fuit, & hominum ingenia non eadem esse possunt. prava consuetudo naturam peruertit. quae, tamquam ager, si colitur, fructus edit uberrimos; si negligitur, exarscit. annos triginta ponimus in verbis percipiendis: quantum spatii restat, ut res ipsas consideremus? licet ad antiquitatem animum referre: num aut Graeci illi philosophi, quorum nomen celeberrimum est, ea, quae ab Aegyptiis acceperant. Aegyptio potius, quam patrio sermone scripta reliquerunt; aut nostri aliena lingua, non domestica, sunt usi, cum ea, quae uel de Graecis sumperant, uel ipsi pepererant, in usum posteritatis explicarent? constat, apud omnes gentes, qui suas cogitationes litteris mandare voluerunt, eos fere iis esse verbis usos, quorum significationem matris in gremio cognouissent. quod item nostra aetate si fieret, facile contingeret, quod tu opinaris. Hurtade clarissime, ut in philosophia veterum inuentis non nihil, uel etiam non parum addi posset. neque enim eos, qui fuerunt, usque eo cogitatione, ingenioque processisse existimandum est, ut iis, qui futuri sunt, quod praeterea cognoscerent, nihil reliquerint. multa latent adhuc, retrusa, atque abdita in immensitate naturae: quae eliciet, & euocabit in lucem, si quis inuestigandis rationibus, & perscrutandis rerum causis ab ineunte aetate suum studium dederit. quod ab iis fieri commode non potest, uel potius nullo modo potest, quibus non ea lingua, in qua alii educati sunt, sed ea, qua ueteres utebantur, scribere consilium est. quorum tu si probares institutum, quotus-

Nn 3 quisque

quisque tecum esset in eo landis genere conferendus? tenes enim perfecte Latinam linguam, tenes Graecam, Arabicam, alias praeterea. scribis tamen, ut in patria tua loquuntur. in quo uideo quid spectes. quod pater tuus egit, ut optime de Hispania mereretur: id tu alia quadam ratione consequi uis. ille enim, cum annum ageret uix dum quintum & decimum, qua aetate milites in exercitu pauci solent esse, omnium approbatione, qui exercitus regeret, electus, Baeticae Regem, bis acie fuscum, regno exsult, & quaecumque in eius ditione fuerant, Catholici Regis Imperio potestati-que subiecit. Aliam tu ornandae, atque amplificandae patriae tuae rationem inuisti. profers enim, quantum in te est, Hispanicae linguae terminos; & ut ea non solum uerbis, & nominibus, sed etiam rebus, & scientiis per te locupletata ab exteris nationibus appetatur, ingenio doctrinaque consequeris. quod nescio an omnibus patris tui uictoriis, atque triumphis sit anteponendum. nam, etsi, populos bellos superare, & imperium augere, praeclarum est: tamen mihi cum animo meo consideranti multo melior uidetur esse condicio litterarum, quam regnorum: haec enim in unius hominis fortuna posita sunt, & unius saepe culpa extinguuntur; illae uiuunt, & uigent quo die magis, neque ulla temporis circumscriptione terminantur. itaque magni & excellentes uiri, qui bellicae laudis gloria florerent, cum earum rerum, quas gessissent, memoriam non satis fore diuturnam sperarent, nisi ab hominibus ingenio praeditis celebrarentur; eos, qui id praestare possent, non uulgaribus praemiis affectos, in honore

honore summo, atque etiam in amore semper habuerunt. Quo mihi illorum laus uidetur esse illustrior, qui & res praeclaras manu gerere, & quae gesserint, litteris custodire ipsi possunt. quo in numero fuit soror illa tua praestantissima femina: cuius militaria facinora cum audimus, cuius eam nostrae aetatis viro animi magnitudine comparamus; cum autem ea, quae scripsit, legimus vel antiquis scriptoribus ingenii praestantia simillimam iudicamus. Huiusmodi cum in tua familia mulieres existant, de viris quae sunt speranda? quamquam fratres omnes tui, tuque in primis, ea, quae sperabantur, iam praestitisti. itaque Carolus Imperator vestra potissimum virtute, vestraque fide nititur. nam fratrem tuum, Marchionem de Mondestr, qui ceteros aetate anteit, cum aliis in rebus, tum in victoria Tunetana, equitibus levis armaturae & classi maxime praepositum, magno suis rebus sensit esse adiumento: alterum autem, Episcopatu Ianenensi ornatum, summe propter eruditionem, & prudentiam diligit; tertium Indicis prouinciis Proregem: quartum Hispanicis tremibus praefecit: te primum sibi voluit esse in consilio: deinde, cum difficultatem quandam temporum paene fatalem impendere, & ea, quae cogitabat, sine summa prudentia non esse tractanda intelligeret, unum e maximo numero delegit, qui apud Venetam Remp. id muneris orator sustineres. quo quidem in munere clarior in dies significatio tuae virtutis elucet. nam ad usum rerum, quo vales plurimum, addis doctrinae cognitionem: quam a libris petitam, grauiore in causa consilium capere si vis, explicas, ut proposito praete-

ritarum rerum exitu, cautior praesentium sit delibera-
 tio. quod quoniam maxime praestant historia, & philo-
 sophia: tu quidem uehementer utriusque studio teneris;
 sed nescio quo pacto magis te philosophia delectat; cre-
 do, quod pluris apud te est, ex cogitare quae nemo uide-
 rit, quā imitari quae alii fecerint. quo in genere cum om-
 nino nullius ope uidearis in genere quippe qui ita abun-
 des ingenio, ut, quocumque te applicueris, excellas: ta-
 men uide, quid egerim: iniur rationem, ut iuuare te pos-
 sem. nam hos Ciceronis de philosophia libros cum ue-
 tustis exemplaribus contuli, & emendatos ad te misi;
 ut tibi, si quando eos in manus sumeres, quasi faciliior
 & expeditior legendi cursus esset. saepe enim ex te au-
 diui, cum diceres, antiquorum in scriptis ita multa esse
 corrupta, ut in eorum, qui legerent, animos permiste fal-
 sa cum veris influerent: cui malo si quis mederetur,
 eum te existimare à studiosis omnibus, sed a te ipso cer-
 te maximam esse gratiam initurum. quae me uox non
 cohortata est, sed impulit, ut id facerem, quod fecisse me
 uides. Ac fieri tamen potest, ut meo te studio, & diligen-
 tia nihil iuuerim; & ea, quae ego nunc in his libris resti-
 tuta, in tuo nomine emitto, iam pridem ipse habeas om-
 nia, domi tuae nata, & a te ipso quaesita: sed ego ita sum
 ratiocinatus: cum tua philosophis didiceris, non in reges
 solum, & principes, qui summam iuuandi facultatem
 habeant, sed in tenuiores etiam liberalitatis nomen pos-
 se cadere, quod benemereri, etiam si non possunt, tamen
 & cupiant, & praeclarum existiment; eadem ratione
 fore, ut, quod ego te iuuare uoluerim, pro eo id accipias
 quasi maxime iuuerim.

AD.

AD. MARCELLVM. CERVINVM
 SANCTAE. CRVCIS. CARDINALEM
 IN. PHILOSOPHIAE. CICERONIS
 PARTEM. ALTERAM 9

EST genus hominum, qui ita sentiunt: philosophari, aut totum nihil esse, aut non eorum esse, qui rerum agendarum in studio versantur, quorum in altero mihi videntur, cum homines sint, bestiarum consuetudinem imitari, quae tantum ea, quae pedibus teruntur, quaeque adsunt, intuentur, nihil altum suspiciunt, nihil longinquum cogitant: in altero res a natura copulatas velle seiungere. nam, qui ab actione rerum philosophiam excludit, is, quantum in se ipso est, corporis & animi societatem dirimit; cum & corpus regimine animi, & animus ministerio corporis indigeat. Sed proferunt multos, quibus ignoratio philosophiae non obstitit, quo minus ea, quae volebant, rectissime perficerent. quasi vero sit eadem rerum omnium natura, & quod uni aliqua in causa contigerit, id cuilibet omnibus in causis posse contingere credibile sit. naufragium facit natationis ignarus; arripuit tabulam, & amplexu tenens, ad litus incolumis a fluctibus appellitur: num ideo natandi peritiam negemus esse vilem, quod, sine ea qui fuit, e periculo tempestatis euaserit? incidat aliquis in febrem: non curatur, & conualescit: tollemus igitur medicinam, quoniam sunt, qui si ne-

eius

AD.

eius ope sanentur? nihil minus; nisi si ea, quae in casta sita sunt, antaponimus iis, quae ratio gubernat. quod idem de philosophia dicendum est. nam, ut illud demus, sine ea multos esse laudem consecutos: non & hoc dabimus, fore, ut sine eadem consequi omnes possint. non eiusdem semper generis agenda sunt res. est, ubi prudentia uel mediocris abunde satisfaciat; est item, ubi mentis aliorum contemplatio requiratur. hoc extremum qui poterit, sequitur ut & illud primum: sed, qui illud primum, non & hoc extremum. quod cum ita sit: utrum praestet habere, facilis est diiudicatio. in optione enim, & eligendi potestate, nemo fere est, quin totum partibus censeat esse praefendum: propterea quod non totum in partibus, sed partes includuntur in toto. Ergo, cum perspicuum hoc sit, accidere & posse, & solere, ut philosophiae cognitio & utilitatem afferat, ignoratio detrimentum: dubium non est, quin ea videatur esse cum rerum actione coniungenda. Sed iidem coniungi posse negant: quo argumento? aiunt eas dissimili in genere versari, alteram in otio, alteram in negotiis: itaque se non uidere, qui possit in utraque unus excellere. Hic ego, Ceruine praestantissime, meam memoriam non excutiam, ut ea, quae legerim, aut audiuerim, reminiscar. non est consilium, quae ad illos redarguendos faciant, veterum e scriptis eruere. uolo, ut exemplo tuo refellantur. Romae uiuis, & vixisti multos iam annos. numquam omnino tua virtus tam illustri loco latuit: sed postea quam te Paullus I I I. incredibili Pontifex non modo sapientia, sed bonitate etiam ornatus, in altiore dignitatis

tatis gradu collocatum, suorum omnium consiliorum
 & participem, & adiutorem esse uoluit; tum vero cla-
 rissime sese ostendit lumen animi, ingenique tui; ut
 nullus esset honor tantus, qui, in te collatus, non ui-
 deretur ei, qui contulisset, magnam esse iudicii laudem
 allaturus. itaque paullo post Cardinalis factus es, &
 factus tanto bonorum applausu, tantaque laetitia,
 quantam in animis hominum recte sentientium summa
 dignitas uirtuti tributa potuit excitare. quo toto tem-
 pore valde tu quidem fuisti, atque es etiam nunc distri-
 ctus à negotiis, maximeq. ab iis, quae & ad sedandas
 Christianorum Principum discordias, & ad restituen-
 dam Religioni dignitatem pertinent, sed te tamen a phi-
 losophiae studio nulla res umquam potuit diuellere. sic
 & animo, et corpori suis utrique muneribus apte distri-
 butis, quotidie fere modo a cognitione ad res agendas,
 modo a rebus agendis ad cognitionem traductus. teq.
 ipse in hoc quasi circulo identidem reuoluens, effecisti
 quod ab iis, de quibus initio dixi, fieri posse negatur,
 ut & in tractandis negotiis, & in considerandis rerum
 humanarum diuinarumq. causis occupatus, dispari in
 studio, pari tamen cum laude uerseris. ex quo intelligi-
 tur, ab iis, qui rerum actioni se dedunt, & percipi phi-
 losophiam, & tractari posse: debere autem ostendi-
 mus: est igitur eorum, qui aliter existimant, senten-
 tia omnis explodenda. Nos quidem, & nostra sponte
 commoti, & tuo exemplo impulsus, quotidie magis phi-
 losophiam admirantes, in eius cognitione cupimus ac-
 quiescere ad; eamque, magnis defatigati laboribus, &
 molestiis, tanquam ad iucundissimum diuersorium pro-
 peramus.

peramus . quo si peruenero , vel potius cum peruenero :
 (cur enim meam ipse cupiditatem ominibus optimis
 non prosequar ?) tum ego quidem multo , quam nunc ,
 facilius tua in me merita vel tuebor , vel etiam illustra-
 bo . interea non sumus otiosi : vinam potius aliquanto
 minus occupati . provinciam cepimus duram , atque dif-
 ficilem , veterum scriptorum libros emendare dum vo-
 lumus . omnino in hoc onere sustinendo valde sudamus :
 sed animus , tuarum cohortationum memoria confirma-
 tus , manet in officio , manebitque , dum id , quod in-
 stituimus , absoluitur . nunc edimus Ciceronis libros de
 philosophia , sane multis a mendis , potissimum ex an-
 tiquo Bernardini Maffei , qui te maxime obseruat ,
 inuenis eloquentissimi , libro vindicatos . qui cum ita
 digesti essent , ut in duas partes tributi legerentur : cum-
 que ego ex iis partibus eam maxime vellem tibi inscri-
 ptam emittere , quae tuae personae , dignitatieque
 aptissima videretur : feci , ut eam diligerem , in qua de
 natura deorum eleganter & acute disputatur : ut , quo-
 niam valde tibi pro tua veteri erga me voluntate , pro-
 que summis officiis deberi fructus industriae meae vi-
 dentur ; ii dum ad maturitatem peruenirent , his te inte-
 rim quasi floribus oblectares .

A. D.

AD. RAINVTIVM. FARNESIVM
C A R D I N A L E M
IN. SVOS. COMMENTARIOS
C I C E R O N I S . E P I S T O L A R V M
A D . A T T I C V M 10

BENE audire, qui est recte factorum fructus, omnes fere volumus, amplissime ac praestantissime Rainuti; ipsum quidem recte facere, unde illud quasi ex fonte deducitur, paucorum hominum semper fuit. est enim tuum perfectae naturae, tum doctrinae singularis, ut tamen natura sine doctrina facile possit ad laudem peruenire: doctrina sine natura laudabilis numquam, turpis etiam saepe sit. itaque vel in agris inculto homines ingenio virtutem tamen coluere; doctrinis autem eruditi viri, quae ad bene agendum esse instrumenta debuerant, iis ad perniciem suarum ciuitatum sunt abusi. quid de Pisistrato Graecae historiae loquuntur? quid nostrae de Caesare? doctum utrumque & eloquentem fuisse, iis tamen utrumque sensibus, ut, exempla maiorum, & legum sanctissima iura contemnentes, libertatem suis ciuibus eripere praeclarum duxerint. ergo prima laus bonitatis est: quae nihil nisi se ipsam, spectat, ipsa sibi finis est: altera doctrinae, quae nisi ad bonitatem referatur, laudabilis non est, ideoque, ut laudetur, finem sequitur se ipsa praestantior. quod si quis est, qui alterum cum altero coniunxerit; ut & bonus sit, & idem doctrinis institutus: neque rectum ideo solum cupiat, quia sit ipse ad rectum natura propensus, sed quia, quod rectum non est, id esse turpissimum

simum

A. D.

simum intelligat : hic est , quem in uita humana diuina bona consecutum putemus . praeclara res , sed exemplo minus nota : id autem , ut ego opinor , ob eam causam , quod unusquisque in vitam Principis , tamquam in speculum , intuens , ad illius similitudinem se ipse fingit , & format . ideoq. viri sapientes alterutrum recte cupiuerunt ut aut reges philosopharentur , aut regnarent philosophantes : utrum esset , futurum ut ex uirtute pendere-
mus . Quod si fuit ullum tempus , cum homines rationes , & cogitationes omnes suas in philosophia constituerent : tum profecto coepit esse , cum auus tuus ad Christianae Reipublicae , nimirum magno periculo fluctuantis , gubernacula Dei iussu accersitus , sedit in sede Pontificia Pontifex dignissimus , ea praeditus non solum auctoritate , sed etiam sapientia , ut hic nos in tantis tempestatibus seruare solus a naufragio possit . cumq. laudandus est maxime , quod optime ipse sentit , optimis semper in studiis , consiliisq. defixus : tum , quod optimos uiros adsciuuit sibi et consiliarios , & suae voluntatis administratos . in quo ego tantum soleo ponere ; ut , si mihi ad alterutrum eligendum optio detur , non bonum Principem malim cum bonis administris , quam bonum cum sui dissimilibus . sed bene , quod habemus utrumque ; & Pontificem , qualem res poscebat , & Collegium tali Pontifice dignissimum . itaque nunc emergit uirtus : honestum reuocatur : deserte per multos annos litterae patronos habent , diuque , ut auguror , habebunt . tu Rainuti , fraterq. tuus , duo clarissima Italiae lumina , uterque Cardinalis , & Cardinalis uterque optimus , praeclaram consuetudinem tenebitis ab auo traditam . certe enim non ideo te Patavi

laui per tot annos summi doctores erudierunt, ut ea,
 quae tantis uigiis quaerebas, consecutus negligeres.
 amabis eadem, & fouebis; tuumq. erit proprium stu-
 dium non solum colendae virtutis, sed etiam ornandae.
 refer animum ad eos, qui, multis ante seculis extincti,
 tamen in laude uiuunt: omnes reperiēs, his gradibus ad-
 scendentes, ad immortalitatem peruenisse quorum tu
 quia facta imitaris, non dubito, quin eorum semper flo-
 rentibus nominibus ita tuum nomen inseras, ut num-
 quam exarescat. Materiem habes ad gloriam, Anco-
 nitanae prouinciae: quam nunc ita regis adolescens,
 ut ea praestes, quae saepe desideramus in senibus. quae
 quamquā ad eos solum, quibus cum potestate praees, per-
 tinere videantur: tamen illa tuae ditioris terminis non cō-
 tinentur. scis consuetudinem famae illa nos per ora homi-
 num sublimes uehit: benefacta simul, & malefacta aeq.
 circumfert: sed benefacta laudibus excipiuntur, malefa-
 cta conuiciis exploduntur. Itaque noli putare te Picenti-
 bus solis esse continentem, esse iustum, esse beneficū.
 Picentes haec vident, longinqui audiunt, & praedicant.
 te aiunt esse, ad quem aditus omnibus pateat, cui sit in-
 stitiae, si pietatis antiquissima cura; cuius & potestas ti-
 meatur, cum omnia possis; & bonitas diligatur, cum
 idem non plus licere tibi uelis, quam quantum leges
 praescribant. macte adolescens laudibus exime, imita-
 tor aui, maiorumq. tuorum. recte cogitasti, in imperio
 laudem non esse, nisi cum is, qui imperat, imperio di-
 gnus est. quod quia tibi siue a natura, siue a disciplina, si-
 ue, ut ego arbitror, ab utraque simul contigit: quod ad
 naturam attinet, referimus ad Deum; de disciplina, te
 ipsum

ipsum & laudamus, qui ad haec praeclara inuigilaeris
 & amamus, quia sunt amabiles uirtute praediti. me qui
 dem & multis abhinc annis, cum Romae te uidissem,
 atque allocutus essem, in tui obseruantiam voluntas in-
 clinauit, iam tum de tua indole expectantem ea, quae
 consecuta sunt; & postea Patauii, cum in studiis optima-
 rum artium totus esses, iudicium impulit. haec tua Pi-
 centina legatio quasi operis perpolitio fuit: in qua thesau-
 ros philosophiae, multorum amorum studio congestos, ex-
 plicas, & cum prouincia communicas: itaque, cum ego
 multo ante, quam istam tibi administrationem summus
 Pontifex demandasset, eos commentarios, quibus episto-
 las ad Atticum illustrare sum conatus, in tuo nomine
 emittere statuissem; postea simul cum tuis laudibus cre-
 uit voluntas mea. Eos igitur nunc emitto, serius omni-
 no, quam nonnulli expectauerant; sed meam tarditatem
 opus ipsum excusat. epistolas ad Atticum interpretan-
 ti properandum non fuit. aliis in rebus possum esse quan-
 tumuis strenuus: in hac qui possum esse non tardus? pri-
 mum multa difficilia, deinde non iisdem causis omnia,
 sed alia propter breuitatem, alia propter historias, alia
 propter mores. Huc adde, quod mihi quibusdam in locis
 non satis fuit explicare ea, quae aperta non erant; sed ten-
 tui, num etiam paullo floridius possem, quam nostri gra-
 matici solent. Neque tamen sum nescius, fore multos, qui
 me in his commentarii ut hebetem, quia nonnulla mi-
 nus acute uiderim, vel fortasse etiam ut caecum, quia
 prorsus non uiderim, reprehendant. qui si mihi cur id fa-
 ciant, causas asserant probabiles; non committam, ut
 iidem me etiam ut pertinacem possint reprehendere. am-
 enim

IN. COMM. EP. CIC. AD. Q. FR. 39
enim veritatem, neque eam in me ipso magis, quam in
alio: itaque complectar, sicubi eam videro. Tibi vero, cla-
rissime Rainuti, quod in has Ciceronis epistolas laboris
impendi, maxime ob eam causam cupio probari, ut, si
qui vere iudicare propter incertitiam non possunt, aut pro-
pter malevolentiam nolunt, eos a consilio detrahendi tua
deterreat auctoritas. Venetiis. M D XLIIX.

AD. ALFONSV. CARAFAM
ANTONII. MARCHIONIS

MONTISBELLI. F.

IN. SVOS. COMMENTARIOS
CICERONIS. EPISTOLARVM

AD. Q. FRATREM II

SI suo quaeque res merito penderetur, Alfonse Ca-
rafa: hominum esset in virtute vigilantium praeclara
condicio; contraque, quos auersa a ratione voluntas
ad malas artes, & flagitiosa consilia traducit, cum
iis pessime semper ageretur; eorumque docti exemplo.
sapientius deinde alii non modo suis, verum etiam
publicis rationibus consulerent. iidem enim, ut e cor-
ruptis seminibus vitiosae fruges, sic a malis exemplis
improba studia, a laudabilibus optima nascuntur.
verum hoc totum secus est. quippe non modo ad repre-
hendendum, qui reprehendi iure possunt, procliuiores,
quam ad laudandum, quae laude digna sunt, omnes fe-
re sumus, nec satis aequa lance turpe & honestum exa-

O o minua-

minamus; quae debemus pariter, alterum odisse, alterum diligere: sed etiam saepe facimus, ut eas res, easque actiones, quarum causas ignoramus, quaeque recte ne an secus fiant, diiudicare non possumus, accusemus tamen, accerrimaque vituperatione, quae interdum efferrae laudibus oporteret, ea deprimamus. At, ne me putes, Alfonso clarissime, huius initium sermonis temere detulisse, ego nunc, si nescis, meam, meam dico: immo vero communem utriusque nostrum causam ago. aut enim uterque agimus egregie; aut uterque similiter peccamus. Audis ne tu noces in Latinae linguae nomen irrumperes, hominum obrectantium, qui rei pulcherrimae scientiam reprehendant; qui nos derideant, ludosque faciant, atque etiam, si diis placet, odio dignos existiment, quod operae tantum ac temporis in hoc tam nobili studio collocemus? tu fortasse non audis, totus in litteras abditus, multorum a consuetudine seiunctus: aut, si audis, negligis, opinor, magnis non tam fortunae, in qua tamen ipsa multum inest, quam rerum omnium laudabilium praesidiis ad omnia munitus. me vero, humilis hominem loci, hac una tibi Romani sermonis cupiditate parem, ceteris rebus omnibus inferiorem, ista sane, quae feriunt aures meas, vehementer commouent: non quod ea, quibus utuntur, argumenta firma sint; quae ostendam esse inania; sed quod, ut eam, quisque virginem, cuius amore flagret, intactam ab iniuria, puram ab omni labe velit, sic ego, quasi lutosi maculis adpersam, ac foedatam eloquentiam, quam semper dilexerim, cum adspicio, sensibus intimis afficio, sic, ut ferre non possim. Obiiciunt illud primum; quatenus aliquid

cogno-

cognosci possit, eatenus in eo laborandum: Latinam linguam obsoleuisse iam, & extinctam paene totam esse: quam enim hodie nationem, ut omnes animo perlustrentor, Latina loqui? quod vero ex ea supersit in libris, minimum id esse, tamquam aliquod inane simulacrum corporis exanimis: quo circa neque sciri perfecte, cum exiguum partem libri contineant, neque pronunciari decenter, cum sermonis usus euanuerit, a nobis posse. Secundo loco statuunt: ut absolute percipi, quod negant, Latina lingua possit; mirari se tamen etiam, cur industriam in ea perdiscenda tam diuturnam ponamus: vitio quidem id fieri voluntatis, & iudicii: dignitatem in re tantam non esse, ut haerere per tot annos in hoc studio debeamus. Concludunt postremo: ut de perfecta cognitione, de dignitate, ac praestantia concedatur; tamen esse, cum, ea pulsa, successerit alia, minime necessariam. Haec isti: quae specie aliquid videntur; ego, re nihil esse, si quando me praesente disputantur, ostendo. Conuenit inter nos, esse aliquid in omnibus facultatibus, atque artibus extremum: quo nostra studia cum peruenirint, quiescendum. sed hoc extremum quibus terminis metimur, rei ne natura, an vulgi opinione? si opinione vulgi: licet prope modum otiose vivere: mediocria, quae putantur excellere, quaeramus: id satis est, illa summa, ubi summum decus habitat, quae vulgus ignorat, omittamus. sin extremum illud esse volumus, quo peruenit cum est, progredi longius non licet: moderata studia non dantur. perfectam enim scientiae laudem adipisci, maximi operis est; itaque hoc extremum, quod, opinor, Natura nouit una, sapiens nemo umquam se putauit

tanit esse consecutum . exstant, litterarum clarissimis te-
 stata monumentis, exempla summorum philosophorum;
 qui cum aetatem in abditarum rerum perscrutanda noti-
 tia contriuisent, multaque partium legendo, partim cogi-
 tando praeclara & eximia reperissent, latere tamen ad-
 huc, magnis inuolutam difficultatibus, veritatem, & ali-
 quid sibi, atque adeo multum esse quaerendum existima-
 bant . Eadem nunc, aut certe similis admodum nostra
 ratio est . Quaerimus id, quod in Latina lingua perse-
 ctum putamus . non assequemur: esto; veruntamen, quo,
 plus, ut assequamur, contenderimus, eo scilicet propius,
 si quid studio proficitur, accedemus . At laboris, & in-
 dustriae terminus tamen statuendus aliquis est . Conce-
 do: sed hoc quidem, si diligenter attendatur, nihil aliud
 est, quam perfectum ipsum definire . hoc enim ad unum
 nostri labores intenduntur, hoc unum nostra spectat indu-
 stria . perfectum autem ipsum ego mihi ab hominibus
 imperitis certe definiri nolo . definiant ii, quibus utor
 magistris, Cicero, Caesar, Terentius, Plautus, quo-
 rum ex libris, quae Latinae linguae sit elegancia, quae
 ubertas, quae vis, facile possum intelligere . quae si,
 non dico quanta sunt, (immensa enim esse video) sed
 si ea mihi magna ex parte comparassem, modum fortas-
 se facerem studio meo: sed, ut inter hos, qui nunc ho-
 mines viuunt, aliquid esse videamur, nihil tamen, si
 vere de nobis ipsis iudicare volumus, prae illis, quo-
 rum exstant satis multa scripta diuinitus, nihil, inquam,
 plane sumus . Quare, quod ad scribendum attinet, ha-
 bemus abunde quod imitemur . De pronuntiatione vera
 minimum laboro . quid enim? an putamus in iis ipsis,

qui

qui tum Romae viuebant, eandem pronunciandi rationem fuisse? non fuit. confluebant in urbem, illecti spe summorum magistratum, quod habui illis temporibus praemium eloquentia, oratores ex vniuersa Italia. causas agebant Romani homines pariter & peregrini, sono vocis dissimiles, pronuntiatione diuersi: suam tamen quisque, pro eo, quantum quisque valebat, ingenio laudem ferebat. si Curibus educatum, aut Arpini, orantem in foro audires; Sabinum statim, aut Arpinatem agnosceres. neque tamen à forensi opera, & a iudiciis propterea quisquam est exclusus, quia minus Romane, hoc est quia minus apte, minus ne decenter, pronunciret. Nunc ipsum, in hac, qua Itali omnes utimur, lingua est ne omnium in disiunctis & longinquis urbibus simillima pronuntiatio? mehercule ne in iisdem quidem. Venetiis enim (domestico utar exemplo) aliter in urbe media, aliter in extrema loquuntur. qua propter nimis iniusto privilegio damnabitur Latina lingua, si, quod in ceteris linguis usu videmus euenire, ut non modo diuersis, verum etiam iisdem & temporibus, & locis non similiter omnes pronuncient, id ei praecipuum apponatur: cuius etiam magnis ac praestantibus meritis aliquid largiri, tum humanitatis, tum aequitatis esset. Secundum erat de dignitate, in quo, non tam equidem quid ipse respondeam, quam quid istos in hanc mentem impulerit, quaero. Ita ne? dignitatem Latine litterae non habent? humiles, & obscure sunt litterae illae, quae populi Romani nomen extollunt, atque illustrent? quae summorum Imperatorum foriuer & praeclare gesta per omnes gentes cum laude disseminant?

quae maiores opes, quam ulla umquam lingua maiora
 suorum meritorum praemia in orbis terrarum domina-
 ciuntate sunt adeptae? Sed ineptus sim, si me patronum
 Latinae linguae profitear: quae tantum possidet eloquen-
 tia, ut, ipsa suam causam si agat, facile se ab aduersa-
 riorum calumnia vindicare possit. Nunc quod isti po-
 stremo loco argumentum, quasi postrema in acie subsi-
 dium firmissimum, collocant, videamus in eo quantum
 roboris ac neruorum sit. plus enim est fortasse, quam ut
 contemnere, minus certe, quam ut pertimescere de-
 beamus. Nusquam, inquiunt, viget usus Latini sermo-
 nis: aliter nunc omnes loquimur. id verum est. si quid
 igitur in Latinam linguam studii confertur, opera non
 bene ponitur. hoc falsum. duplex autem est, qua vtor,
 ratio probandi. Primum illud suscipio, ac defendo: non,
 quaecumque necessaria non sint, propterea spernenda es-
 se omnia, atque explodenda; deinde, si spectetur utilitas
 ita Latinam utilem esse linguam, ut etiam necessaria
 videatur. Quae sunt, quae vere, & proprie necessaria di-
 cimus? nimirum ea, quibus carere nullo modo possu-
 mus. huiusmodi sunt primum elementa, deinde, quibus
 famem, frigoraque arcemus, victus, vestimenta, aedes, aut
 ea, quibus haec parantur? praeterea, in publicis rebus le-
 ges, & magistratus, in priuatis seueritas, & uigilan-
 tia. ex hoc numero Latinam certe non esse linguam,
 facile concedo. neque enim is ego sum, qui libenter cum
 veritate pugnem. Sed praeter haec, quibus hominum vi-
 ta sustinetur, ac regitur, quam multa sunt, minime ne-
 cessaria, quae tamen habemus in deliciis, quae ama-
 mus, quae etiam honore prosequimur? gemmas, &
 vasa

vasa pretiose caelata, columnas marmoreas, laqueata
lecta, sericas vestes, textiles picturas, artem in voci-
bus, & fidibus, odores in unguentis, condimenta in ci-
bis, haec certe, atque huius generis sexcenta, non ut ne-
cessitati pareret, sed ut sensibus satisfaceret, inuenit indu-
stria quae quin habeant iucunditatis, & ornamenti plu-
rimum, nemo negat. quod si, quae sensus iuuant, & la-
boriose quaesita sunt, & retinentur accurate: quanto no-
bis ea, quae animum oblectant, potiora debent esse? pa-
scitur animus magnitudine rerum; quid Lini sublimius
historia, quae populi R. bellicam virtutem commemorat?
gravitate sententiarum: quis Cicerone prudentius, quis
eruditius disputat? elegancia verborum, & copia: quis
eodem ornatio, quis uberius? varietate scriptorum: quod
genus Romanae litterae desiderant? poetas habent egre-
gios, historicos, oratores, philosophos etiam excellen-
ti doctrina claros. quae si vera sunt: (sint, nec ne, res
ipsa declarat: ambigere non licet) & si voluptatem stu-
diosis Latina lingua parit incredibilem; possum istis tri-
buere, quod volunt; necessariam vulgo non esse; dum ip-
si contra, quod ratio postulat, atque exigit, hoc mihi tri-
buant, amandam esse vehementer, atque expeten-
dam. Sed haec ad eam, qua legendo fruimur, volupta-
tem pars attinet: nunc, quod etiam alterum pollicitus, de
utilitate videamus. Omnes linguae aliarum admistione
linguarum si moderata sit, augentur; si nimia, corrup-
puntur, atque intereunt. quod enim recipitur, id ef-
se debet eiusmodi, ut recipientis naturam sua vi, suaq.
magnitudine non exsuperet. itaque sermo hic noster
Italicus multas Gallici sermonis, multas Hispanici,

quasdam aliarum nationum habet partes. causam si
quaerimus: non alia, quam earum gentium interuentus,
& consuetudo, fuit. quod si Gallorum, aut Hispano-
rum immensa multitudo, (exempli causa dictum à me
sit: omen quidem inane esse volo) sed si earum nationum
maior aliqua uis in Italiam irruerit, ac permanserit:
maior simul inducetur Gallici, aut Hispanici sermonis
usus; & fortasse aduentitium illud usque eo valebit, ut
hoc domesticum vincat, suisque sedibus expellat. quod
olim Romanae linguae contigit: quam, multarum aeta-
tum spatio, multis maximarum rerum adiuuentis au-
ctam, atque confirmatam, diuersis tamen populis Ita-
liam occupantibus diuersarum linguarum impetus op-
pressit. Cum igitur lingua linguam amplificet; nostraq.
haec Italica, non multis abhinc saeculis orta, nec ad-
modum liberaliter praemiorum nutrimentis educata,
non ita dum adoleuerit, ut suis contenta viribus esse pos-
sit: statuo sic, atque concludo: accessionem ei fieri maio-
rem non posse, quam si cum Latina coniungatur: non
modo, quia nulla plenior, aut ornatior: verum etiam,
quia nulla similior: ex quo sequitur, ut ad coeundam
cum ea societatem nulla commodior. Est igitur littera-
rum Romanarum cum per se laudabilis admodum, &
iucunda tractatio, tum vero, siquidem hunc ipsum, quo
nunc utimur, auctum exornatumq. sermonem cupimus,
magnopere necessaria. Atque haec tu quoque uides,
Alfonse ingeniosissime, tuumq. iudicium cum mea sen-
tentia coniungis. itaque cum à prima pueritia ad eloquen-
tiae Romanae cupiditatem incumbere coepisses; postea
te non ambitio, quae saepe praeclare iacta fundamenta
virtutis

virtutis evertit, non commodum, non illa bonis artibus
 inimica voluptas ab hoc studio deduxit. ac ne nunc qui
 dem langues, cum tamen omnia videas ardere bello,
 armorumque strepitu aures tuas quotidie personent. quin,
 dum patrum tui, Carolus Cardinalis, & Ioannes Pallia-
 ni Dux, uterque ob virtutem immortalitate dignissimus,
 maximeque pater tuus, Antonius Marchio Mon-
 tisbelli, natus ad omnem gloriam, omnique princeps lau-
 de cumulatus, urbem Romam, & iura Pontificia tuen-
 tur, partesque in bello quisque suas consilio, vigilantia, for-
 titudine ita explent, ut antiquam maiorum suorum con-
 suetudinem referant; ipse te interea contines in tuis pe-
 rennibus studiis; animumque tum aliis magno Princi-
 pe dignis virtutibus, tum vero maxime excolis elo-
 quentia, doctorem in ea, ducemque nactus, diuino quo-
 dam munere, virum excellentem, Ioannem Paulum
 Flaviu[m], qui te nouo quodam, planeque admirabili gene-
 re disciplinae, abductum à vulgi erroribus, per directam
 semitam ad eximium illud ueteris Romanae linguae de-
 cus facile ducit, quo vel cum summis laboribus ac ui-
 giliis adspirare pauci, aut fortasse etiam nemo potest.
 quamquam me nonnumquam, de statu Latinae linguae
 cogitantem, miseratio quaedam acerbo cum dolore tangit
 quod ita futurum animo cernam, ut haec, per tot iam sae-
 cula, a tot ingeniis, tam diligenter culta, Latine scribendi
 ratio quae parentem nostram Italiam nobilitauit, quae
 tot in nos merita contulit, aetate demum nostra, nisi re-
 medium aliquod diuinitus exstiterit, suam honesta-
 tem omnem neglecta prorsus in perpetuum amittat.
 quod si rebus inclinatis, iam iamque cadentibus opem
 ferre

ferre quisquam potest: vnus est Paullus I V. Pontifex omnium optimus, idemque diuina potius, quam humana, sapientia praeditus. vnus, inquam, aut nemo vnquam, & Latinam linguam, & laudabilia quaeq. studia veterem in dignitatem vindicabit. qui cum frater fuerit aui tui; cumque illum vna virtus ad eum gradum extulerit, vnde humana omni despicit, supra casus omnes, supra fortunam ipsam collocatus; hunc te decet imitari, huius vitam, perpetuo sanctissime traductam, huius omnia facta, consilia, instituta tibi ante oculos ponere. vides pietatem erga Deum, & in auctoritate Pontificia, idest in ipsa religione tuenda firmitudinem animi, atque constantiam. vides multiplicem rerum humanarum diuinarumque scientiam; trium vero linguarum, Hebraicae, Graecae, Latinae cognitionem paene singularem. eloquentia vero prorsus eum excellere omnes fatentur: qui quidem ita quacumque de re non modo copiose, verum etiam eleganter, ac diserte loquatur ex tempore, vt ei non arte quaesita, sed a natura donata videatur eloquentia. hunc igitur sequere, & in illius vestigio pedem statuere. ipse enim Deum secutus est; cum eam felicitatem, quam pleriq. mortales ignorant, animo cogitaret. quem tu quoq. finem spectas, vt audio: & ob eam causam futurum homines augurantur, vt eius dignitatis, quae summae proxima est, insignia breui omnino consequaris. quod cum euenerit; laetabor primum tua, deinde communium studiorum causa. qui enim tuos impetus ad laudem nunc videmus, tuosque plane sensus intelligimus; an, vbi ad istam voluntatem auctoritas, atque opes accesserint, fore dubitemus; vt a te ipso dissentiās? Praestabis

stabis *Alfonse* tu quidem alia praeclara, te ipso scilicet digna, tuaque familia, in qua florere vides heroes per multos, gloria circumfluentes, virtutis in studio defixos maxime vero gratiam referes optime de te merita Latinae linguae, eamque, paulatim Italia cedentem, & ad transalpinas nationes, magno nostro dedecore, migrantem, in suam sedem, domiciliumque reuocabis. Cuius gloriae causa, si monendus es, monitorem ad te; sin rogandus, supplicem volui mittere commentarium hunc meum in epistolas ad *M. Brutum*, & ad *Q. Fratrem*: qui cum tibi studia commendat eloquentiae, in quibus ego per tot annos, utinam cum aliqua laude, magno certe cum labore versor, commendat simul, paulo tamen verecundius, se ipsum, & vigilias meas: quarum fructus mihi erit uberrimus tum beneuolentia, tum iudicium tuum. Quaesiui omnino, idque mihi primum fuit, posteritatis utilitatem, quod est proprium familiae nostrae: sed in te ipsum simul, cum huic operam commentario darem, spectavi. tu si probas ea, quae litteris mandamus; si faues industriae, optimeque te esse animatum erga mea studia significas; ego me, quae summa sunt, omnia consecutum putabo.

AD.

AD . ANTONIVM . AELIVM
 POLAR . EPISCOPVM
 IN . ORATIONIS . CICERONIS
 PRO . P . SEXTIO
 COMMENTARIVM 12

CVM alia multa, quae vigeant olim, rerum laudandarum studia periisse, atque extincta prorsus esse, dolendum est, Aeli, vir optime ac doctissime; tum hanc, in qua sitam omnes vel maximam utilitatem intelligunt, interpretandi rationem ita amisimus, ut ex eorum, quibus nostra patrumque memoria suam hoc in genere industriam locare studium fuit, magno ac infinito prope numero, non tamen ita multos, qui tolerabiles videantur; qui vero excellent, quam paucissimos, aut fortasse neminem liceat inuenire. atque, huius quidem incommodi culpa unde manauerit, exponam. Primum illud in controuersiam non cadit; quo quidque praestantius, eo laboriosius, ac difficilius esse. alioqui nihil iam excelleret. quod enim consequerentur multi, in eo dignitas non esset, & ex copia vilitas existeret. est igitur in magnis rebus item magna, quae nos ab earum quasi possessione arcet, constituta difficultas. haec porro simplex non est, sed in duo genera diuiditur. quaedam enim, sicuti existimantur, ita difficilia sunt; quaedam, cum non existimantur, tamen sunt. ubi difficultas & est, & apparet; inde multitudo voluntatem & studium libenter abducit. rem quidem ipsam, quanti est, opinione aestimamus, & vehementer expetimus: magnis vero laboribus,

ribus, & vigiliis ut ematur, non facile quisquam a se ip-
 so, impetrat. amat enim hominis natura moderatam quie-
 tem eaq. alitur, & crescit; nimias contentiones, quibus:
 frangitur, ac minuitur, recusat. ubi vero facile in spe-
 ciem aliquid ostenditur, difficultas inclusa latet; cuiusmo-
 di non esse pauca, inanis multorum docuit experientia:
 eo frequentes, bona spe inuitati, accurrunt; facileque ad
 eas res aggrediuntur, in quibus vel medioerem ope-
 ram si ponant, futurum, ut ex animi sententia succe-
 dat, arbitrantur. quos deinde, graui temeritatis infam-
 ia, refellit euentus. huius generis haec est, de qua ora-
 tionem instituiamus, ratio interpretandi. quis enim est,
 qui se non existimet *Liuium* posse, *Sallustium*, *Virgi-
 lium*, ipsum mehercule *Ciceronem* ita commode expli-
 care, ut desiderari ab eruditiss, beneque intelligentibus
 uiris nihil queat? atque hi, cum in *C. Marii*, aut in
L. Sullae nomen inciderint; si *Marii*, aut *Sullae* vi-
 tam, a *Plutarcho* sumptam, in sua scripta totam translu-
 lerint; tum se suas praeclare partes absoluisse existimant
 cum interim, in quo doctrinae, quae paullo si occultior,
 appareant notae, in quo ingenii lumen eluceat, in quo
 prudentiae vis, aut iudicii signa cernantur, nihil affe-
 runt. exire videmus quotidianae, a postremi ordinis ho-
 minibus factos, speciosis magnaue pollicentibus, titulis
 insignes, minimi pretii commentarios: quos non modo
 qui scribunt, falsa de se ipsis opinione decepti, verum
 etiam qui typis impressos edunt, iis, qui hoc de genere iu-
 dicare possunt, inconsultis, quodam modo deformant
 praeclara studia litterarum, & de posteritate ipsa pes-
 sime merentur. sed cetera, quae ferenda non sunt,
 feramus

feramus tamen, ac dissimulemus, sane multa commentarios vero illos, qui passim leguntur, in Ciceronis orationes, (quem librum? Latinorum omnium facile Principem) gravem, inquam, illam immensi voluminis molem quis est qui ferre ullo modo possit? loca sunt in Ciceronis orationibus male mendis affecta quam plurima: sanari nullum videas. sunt ob antiquitatis obscuram notitiam difficilia: quis est, de tot interpretum numero, qui lumen explanationis illustret? denique communia tantum, quaeque omnibus paene patent, ea sumunt ad explicandum: ex abditis, quo sine labore & ingenio accessus non est, doctrinae fontibus nihil hauriunt. contraque, multa corrumpunt magis, dum emendare conantur, multa explanando pervertunt, & pulcherrimas saepe sententias turpissimis inscientiae maculis inquinant. Quae me ita commouit indignitas, itaq. meum animum, ut vere dicam, miseratio quaedam affecit, quasi ob illatam viro optimo, egregieque de litteris merito, Ciceroni, qui Romanae terminos eloquentiae longissime protulit, ignominiam, ut statuerim, si cum vita valetudo, & cum valetudine otium suppetat, triennium, aut quod omnino res exiget spatii, in hoc omnium pulcher rimo libro interpretando, studiosorum gratia, consumere: non quod ego is sim, qui mihi tantum arrogem, ut aliis detractam scientiae laudem ad me transferam: abest hoc a consuetudine mea, abest a natura plurimum: sed neque rursus is sum, qui, cum ceteros probe nouerim, ipse me prorsus ignorem, & qui, cum alios accussem propterea, qui non praestant ea, quae ab eorum studio postulantur, ego me, si quid praestare posse mihi videor, velim

lim contemnere . non ita laudem fugio, eisi nec nimis
 appeto . alterum studiae cuiusdam sapientiae, alterum
 insanae ambitionis esse vitium semper duxi: neque ve-
 ro, si quid mihi elegantioribus in litteris assumpsero, lon-
 ge admodum ab iis finibus, quos modestiae ratio prae-
 scribit, discedere mihi videbor . scis tu, Aeli, pro no-
 stra vetere amicitia, & familiaritate, per quot annos,
 quibus laboribus haec, quae ab humanitate nomen ac-
 ceperunt, studia coluerim . sciebat optime omnium,
 & mihi, cum viueret, hoc nomine tribuebat plurimum,
 Bernardinus Maffeus Cardinalis, meus ille, in om-
 ni mihi vita deplendus Maffeus, Urbis deliciae, le-
 por, humanitas, exemplum antiqui officii, flos om-
 nium virtutum . is amabat haec studia mirifice, eaque
 quibus poterat rebus (poterat autem plurimis) tueba-
 tur, & fouebat . bene autem de hac, quaecumque, in
 nobis est, vel potius quantulacumque est, Latinae ora-
 tionis facultate existimabat: meque quotidie, quantum
 possem, ut Latine scriberem, urgebat . & scribebat ip-
 se, ut scis, luculenter, & egregie . probabat omnino
 meum consilium, & efferebat, maxime, de commen-
 tariis in Ciceronis orationes; sed exerceri malebat prius
 industriam meam in Antiquitatibus Romanis, ipso po-
 tissimum auctore institutis . interim, ut quasi ex vnius
 partis forma de toto liceret aedificio conicere, vnā ali-
 quam, quae speciem ingenii mei praeberet, orationem
 subseciuis horis ut exponendam susciperem, hortatus
 est . ego sumpsi pro Sextio: nec multis post eum sermo-
 nem mensibus hunc, qui nunc in tuo nomine, Anto-
 ni Aeli, apparebit, commentarium absolui . &, quod
 ille

ille si viueret, fecissem, ut hoc ei, quidquid est, muneris, deferrem, studio meo commotus, illius uirtute impulsus; idem nunc, iisdem adductus causis, tecum facio libentissime. nam cum amicitia inter nos est, quanta inter duos, quorum & voluntates, & iudicia consentiant, esse potest maxima: tum habes virtutem, non eam, quae petitura libris, quae uno scientiae nomine definitur sed eam, quae oriur ex animi praestantia, & multas in se laudes continet, studium in suscipiendis Ecclesiae causa laboribus, constantiam in perferendis; humanitatem in excipiendis hominibus, benignitatem in subleuandis; comitatem in consuetudine familiarium, grauitatem in congressu & sermone clarorum tuique similium uiroꝝ: denique voluntatis propensionem ad optima quaeque singularem. itaque te summus ille artium honestarum patronus decus Italiae, Alexander Farnesius Cardinalis in oculis fert, tibi arcana communicat, tuis in consiliis, si quid deliberandum est, multum, si quid perficiendum, in uigilantia plurimum ponit. tu, quo apud illum, Maffeus olim loco fuit, eodem ipse nunc es, rectissimamque laudandarum actionum uiam, obseruatis Maffei uestigiis, ingressus, pergis eo fauentibus hominibus, approbante Deo, ubi debitum iis, qui bene ac laudabiliter vixerint, praemium, summa dignitas persoluitur. Mouit etiam me uehementer illa ratio: quod erat inter vos coniunctio animorum artificissima conueniebant sensus, congruebat voluntas: praeterea simplices animi, & puri, nulla simulationis arte obducti, nulla inuidiae, aut maleuolentiae labe suffusi. Quare, quoniam illa Maffei suauitas, illud ingenium, illa uirtus erepta morte, nimum

iniquo fato, nobis est, (tametsi memoriam illius vi-
 ri neque mors, neque omnino dies ulla umquam eripiet)
 & quando, quae illius erant partes in ornandis liberali-
 bus disciplinis, eae translatae ad te videntur, praeclariq.
 muneris quasi vicarius relictus es; ego quoque, quod in
 illum studii, quod habui voluntatis, ac benevolentiae, (id
 erat tantum, ut accedere nihil posset totum illud in te
 unum, illi quam simillimum, contuli; et qui te antea, mul-
 tis erga me meritis, multis ingenii tui suauitatibus addu-
 ctus, unice dilexissim, tamen id, quod in amore summum
 videbatur, auctum, cum hoc accessit, etiam atq. etiā, ple-
 nissimeq. cumulatam intelligo. Tibi igitur offero, fructū
 ingenii mei, in orationem pro Sextio commentarium,
 operis uniuersi, quod maiores a me vigilias postulat, ima-
 ginem: quod ipsum, Maffeo promissum, idem tibi, qui
 eius in locum successisti, iam nunc animo dicamus. verū
 hoc serius fortasse praestabitur. de re enim, quod ad me at-
 tinet, constitutum est, & ut vides, aggressus iam sum; de
 tempore, is, a quo nostrorum consiliorum pendet euentus,
 rerum omnium moderator viderit Deus. Habeo nunc
 in manibus Antiquitates. eas nisi pertexuero, nihil in-
 situere in animo est. pertexere autem ut possim, duo sunt
 optanda, valetudo, & otium, quod utrumque, assiduus an-
 norum superiorum studiis infirmatus, & rei familiaris
 cura impeditus, nunc quidem magna ex parte desidero.
 accipe interim hoc, quod adest, argumentum obseruantiae
 in te meae, & illud, quod aliquando, ut speramus, futu-
 rum est, suo tempore expecta.

P p A D.

AD. IOANNEM. MORVILLERIVM
 REGIS. GALLORVM
 APVD. VENETAM. REMP. ORAT.
 IN. IV. DEMOSTENIS. PHILIPPICAS
 LATINITATE. DONATAS. 13

QVAM difficili in loco versetur eorum industria,
 qui de Graeco vertunt, neque tu, ut arbitror, ignoras,
 Ioannes Moruilleri, vir clarissime, cui vel exercita-
 tio litterarum, vel ipsa natura, vel potius utraque si-
 mul hoc dedit, ut in iudicando excelleres; & ego ex-
 periens ita sensi, ut, qui aliis antea in hoc genere pec-
 cantibus acerbior fuisset, ac durior, idem postea, re-
 tentata, eo libentius ignouerim, quo magis eandem
 ipse culpam extimescerem. Occurrunt iis, qui de Grae-
 cis Latina faciunt, duo inter se maxime contraria vi-
 tia: quorum utrumque cum euitandum aequae sit, ita
 periculosa tamen cautio est, ut fere, declinare ab alte-
 ro dum vis, in alterum incurras. nam & qui in eo la-
 borant, ut Graeca verba totidem paene Latinis red-
 dant, quod fideles interpretes haberi volunt, inepte
 faciunt, atque in illa ipsa nimis attenuata diligentia gra-
 uiter peccant, quoniam quidem res ipsa primum fit ob-
 scurior; quod cum interpretis officio pugnat; deinde
 Latinae orationis dignitate cultuq. destituta sordescit:
 et qui horum in verbis referendis religionem improbant
 puti-

putidamq. appellant, libertatem ipsi quandam, & licentiam magis amant: his plerumque contingit, ut, dum ad ornamenta toto animo intendunt, ab ipsa sententia longius aberrant. summum artificium, summamque possidet prudentiam, si quis, inter has difficultates constitutus, quasi medius inter duas Syrtes ita nauigat, ut naufragium non faciat. quod aetate nostra cum ex transalpinis hominibus multi, ex nostris etiam non pauci tentauerint; tamen, cum omnes excussi, vix unum aut alterum ex uniuerfa multitudine reperio, qui perfecti munus interpretis expleuerit. Atque ego videbam fore, ut in illam ipsam peccantium interpretum turbam conicerer: & communem esse causam confiteor: sed mea tamen hoc probabilior est, quod alii se ad id, quod in hoc genere perfectum est, peruenisse sunt arbitrati; ego, quam a perfecto longe distem, ipsemet intelligo: ut mihi saltem incorrupta fuerit idaea, aliis non solum perficiendi ratio defuerit, verum etiam iudicandi. sed, quia fieri potest, ut, quemadmodum alii falluntur in eo, quia sua scripta nimis indulgenter probant; ego contra fortasse fallar in eo, quia mea seuerè nimis improbem: exspecto, quid tu sentias, Moruilleri sapientissime: ut, siue inter me & alios interpretes aliquid interesse duxeris; siue me quoque in eodem, quod aiunt, haerere luto iudicaueris; ego, quidquid statueris, ad tuam sententiam meum de me ipso iudicium in utramque partem accommodem. Equidem probari a te, atque etiam laudari mea scripta velim: & qui minime soleo esse ambitiosus, tamen igniculis quibusdam cupiditatis incendor, ut meum nomen in ore tuo versetur. non enim

Pp 2 a quouis

a quouis homine laudari, optabile est; turpe etiam, a quibusdam. me quidem non tam ipsa laus, quam laudantis auctoritas afficit. quare, cum tu is sis, de quo duo Reges, at quales Reges? omnium, qui in Gallia regnauerint, maximi, pater, & filius, optime senserit: quorum alter legationem tibi ad Venetam Remp. detulit, alter eundem honorem postea confirmavit; cumque in ipsa legatione publicam personam omni re, loco, tempore ita sustineas, ac tuearis, ut summam in te gravitatem omnes laudent, nec tamen humanitatem quisquam desideret; magni refert ad ingenii mei commendationem, quid tu, vir primarius, & omni laudes circumfluens, de hac mea tenui vigilia sentias. potest obscuram per se lucubrationem, tuum testimonium illustrare. quod ego si assequar, ad illa praestantiora, quae maiorum vigiliarum sunt, quae scis a me iam esse instituta, fiam alacrior, quae ipsa posterius cum legent, (non enim dicam, si legent; quia, quod summe cupio, summe etiam sperare iucundum est) de tua, non una, aut altera virtute, sed sapientia, quae omnes virtutes continet, me narrante cognoscent: & cum cognoverint, ipsi quoque praedicabunt.

Venetis, M D L I.

AD.

AD. HIPPOLYTVM . ESTENSEM
 C A R D I N A L E M
 I N . L I B R V M

DE . ROMANIS . LEGIBVS 14

OMNES artes, atque omnes res, HIPPOLYTE Princeps, & Cardinalis, modo augeri, modo minui, nec easdem perpetuo esse, satis inter omnes constat. patet hoc quidem oculis primum, deinde etiam mentibus. oculis notamus euenta; mente, cur quidque eueniat, quo ve referenda sit cuiusque rei mutatio, intelligimus. itaque lapides, & metalla, quae omnium durissima sunt, quae vis hominum frangere vix potest, haec tamen conficit, & consumit vetustas. quidquid enim ex partibus aliquando coit, & concretum est: id easdem in partes aliquando dilabatur, ac dissipetur, necesse est. habet hoc materia illa unde res omnes constant, vt formae mutationem quaerant: idque, quod sequitur, affecuta, migrat in alias naturas, quasi, quod appetiit, eo numquam esse contenta videatur. neque vero haec naturales tantum ad res condicio pertinet, sed inuenta quoque hominum, operaque attingit. mores, consuetudines, loquendi ratio, quam linguam vocamus, leges ipsae, quas ne quid umquam ex hominum memoria deleat, in aes incidimus, omnia demum, quae ab arte naturam imitante fluxerunt, quotidie mutantur, ac tolluntur, non modo ab exter-

Pp 3

AD.

nis causis, contra voluntatem nostram, verum etiam
 a nobis ipsis, quia tempus ita postulet. sed artes libera-
 les, optimaque studia, quae nusquam magis, quam in Ita-
 lia, honor aluerat, atque auxerat, aetas nulla magis
 afflixit, quam cum Romani Imperatores, Imperii se-
 de in Thraciam translata, Italiam barbaris nationibus
 diripiendam, ac deuastandum reliquerunt. quod nisi
 superioribus annis Principes, ac Pontifices aliquod,
 maxime vero Leonis X. egregia, propeque diuina li-
 beralitas huic malo subuenisset: quem Laurentii Me-
 dices, patris sui, clarissimi viri, exemplum commo-
 tum, etiam verae laudis cupiditas impulit, ut iacen-
 tes ingenuas artes, magnis propositis praemiis ex cita-
 ret: barbara, credo, quod ad litteras attinet, magna
 ex parte nunc esset Italia: dignitas omnis philosophiae,
 splendor omnis obsolenisset eloquentiae. sed neque ille
 huius praeclari operis summam potuit absoluere, ere-
 ptus morte, disciplinis liberalibus nimis immatura: &
 interitum illius tempora sunt eiusmodi consecuta, ut,
 quae paullulum iam luxerant honestarum scientia-
 rum studia, ea perpetuis multorum annorum tene-
 bris quasi nox quaedam obscurauerit prorsus, atque
 exstinxerit. fatalis enim bellorum tempestas non exer-
 citationem modo litterarum sustulit, verum etiam,
 quae sunt in excolenda virtute positae laudes, eas la-
 befecit omnes, atque peruertit. ac nunc quoque,
 cum pacis aliqua spes, longo sane intervallo, affulsis-
 set, misera rursus eodem malo tentatur Italia, uete-
 resque calamitates aduersus bonis artibus nescio quis
 Genius inuehit. Num te Hippolyte Cardinalis, cui
 summam

summam iuuandi generis humani voluntatem Deus
 tribuit, eximiam ad laudem uocat occasio. suscipe de-
 sertum paene ab omnibus litterarum patrocinium: col-
 lige tu, quae alii dissepant, omnium laudandarum do-
 ctrinarum studia, & restitue nobis illa, quae vel ho-
 minum improbitas, vel, ut alio culpa deriuetur, for-
 tinae uis eripuit. haec est actio digna Cardinali, digna
 Principe, Hippolyto uero & Cardinali, & Principe
 dignissima. Vidimus tuam praeteritam vitam. ab ea ni-
 hil humile, nihil obscurum, nihil vulgare, ampla om-
 nia, praeclara, inusitati exempli, noui generis exspe-
 ctantur. quae tu, ne a te ipso dissentias, nunc quidem
 magna ex parte praestabis, atque adeo iam praestas, bo-
 nis uiris, & eruditis beneficentia subleuandis. quorum
 ex ingeniis non dubito quin quotidie aliquid efflorescere
 tuo beneficio videas. quod quia praeclarum est, exem-
 plum alii sequentur. scribe omnes, quod quisque pote-
 rit, illecti gloria, & commodorum spe compusi. nam, ut
 coniecturam de me ipso faciam; quem esse nihil in lit-
 teris fateor; sed, ut aliquid tamen essem, laboraui;
 ego olim (decennium, opinor, abiit, eoque amplius)
 auctoribus duobus eximiis uiris, Petro Bembo Cardi-
 nali, & Bernardino Masseo, qui postea dignitatem
 eandem magnis in Ecclesiam Christi meritis est con-
 secutus, dederam me ad res Romanas, illas veteres, ob-
 seruandas, & ex omnibus antiquorum monumentis om-
 ni studio colligendas: ut, cum illam Remp. qua nulla
 fuit, nec erui umquam illustrior, uniuersam animo, ac
 scientia comprehendissem, Latinis eam litteris explica-
 rem egregiumq. bene, ac laudabiliter institutae ciuitatis

exemplum meis, quatenus quidem ipse possem, scriptis
expressum, posteris relinquerem. Res erat praeclara;
meque delectabat vehementer, & afficiebat ipsa tracta-
tio. itaque meam omnem industriam, omnem curam,
omnes denique in hoc studio cogitationes fixeram, ac
locaram. sed accidit iniquo meo fato, ut horum utrum-
que, Bembum primo iam senem, cuius in beneuolentia
ornamenti mihi erat plurimum, deinde Maffeeum, non
aetate minus, quam virtute, florentem, in quo mei spes
otii sita omnis erat, a quo pendebar totus, importuna
morte ereptum amiserim. destitutus eo praesidio, quo
meae fortunae nitebantur uno, fractus animo, ac de-
bilatus, institutum Antiquitatum Romanarum opus
omiseram, & ad alia me conuerteram. postea vero quam
honorificia in primis condicione delata, magno sum a te
tuo beneficio in tuorum familiarium ordinem inuitatus;
quod ego summae felicitatis loco duxi; erectus mente,
atque animo rursus, quod abieceram, suscepi, onus-
que tantum, quantum priuatis opibus perferri uix, aut
ne vix quidem potest, te uno fretus egregie sustineo. Et,
ut ex parte totum indicare posses, de decem, quos exor-
sus sum, libris hunc de legibus potissimum, quem ad te
mitterem, delegi: non quod ita postularet ordo: (sex-
tum enim in Antiquitatum volumine locum obtinet)
sed, quod, cum omnium librorum materies non modo
coacta iam in unum a me esset uniuersa, verum etiam
satis diligenter in partes distributa; casu accidit, ut hic
minus, quam ceteri, rudis, minus esset impolitus. prae-
terea feci libenter, tuis actionibus admonitus. leges
enim hic liber complectitur. proprio leges nihil aliud,
qua

quam rationem, nihil praeter ordinem, docent. ratio autem, & ordo, si usquam, in tuis moribus elucet. quippe nihil agis non moderatum, nihil non aequabile, nihil, quod non cum ea, quam sustines, persona, idest cum religione vere Christiana, ac Sedis Apostolicae dignitate consentiat. quare cum omnia mea tua sunt; quandoquidem ego me tibi, quidquid sum, & quantus quantus esse possim, totum addixi: tum vero hic de legibus Romanis liber vere tibi debetur, tibi que esta me iure optimo scriptus. quo in libro bene positam a nobis operam si duxeris, de ceteris quin idem sentias, haud equidem verebor. pergo enim studio pari, voluntate etiam, ut mihi videor, acriore. unum modo exoptandum est, ut, quando nos ab hoc studio nulla utilitas, nulla voluptas, ne valetudinis quidem satis imbecillae ratio potest auellere, nostris laboribus tua beneuolentia quasi propitium numen adsit, sic enim fiet, ne qua prorsus in difficultate, ne quo umquam in scopulo nostra haereat industria: & in eum, quo spectat animus, portum secundo cursu, tuae benignitatis aura prosequente, facile peruehemur. Venetiis, M D L VII.

IN . EDITIONE

KALENDARII . ROMANI

15

FACTVM est a me sane libenter, ut, cum edendi essent Romani Fasti, e lapidibus Capitolinis discripti, adungerem ad eos Kalendarium, ex quo ratio dierum, pro ea, quae Romae olim fuit, consuetudine, tota patet,

patet. atque in hanc me voluntatem, vel cupiditatem potius primum ea, quam & mea sponte, & patris exemplo semper spectavi, publica litterarum utilitas, deinde etiā Caroli Sigonii, viri optimi, & ab omni prorsus iniqui animi labe puri, singularis doctrina deduxit. putavi enim id, quod res est, futurum, ut ad Kalendarium ex Fastorum societate commendationis tantum accederet, quantum ad ipsos Fastos e Sigonii studio, ingenioque esse adiunctum, qui diligenter additamenta ipsius, & in ea commentarium, qui propediem edetur, plenissimum legerit, facile cognoscet. non enim illa supplementa, quae in lapidibus illis, unde fastos habemus, desiderantur, ex Livio, aut Dionysio, aut ex duobus tribus ve praeterea libris, quos etiam leuiter eruditi homines in manibus habent, colliguntur. non est id, ut rudes antiquitatis homines existimant, iocularis quiddam. opera haec quidem esset, non industria. & operae quis laudem tribuit, cum in tempore dumtaxat posita sit? industria vero non ab ingenio, non ab intentione quadam mentis abest: itaque iure laudatur. quod si satis esset historiam semel aut iterum legendo percurrere, nemo esset, cui Romanarum rerum notitiam assiduo biennii triennii ve studio comprehendere uniuersam non liceret: in qua tamen ego iam per decennium desudo: & quo diligentius ea ipsa, quae legi saepissime, cogitatione retracto, eo certius, quantum in hoc genere sit difficultatis, intelligo. itaque opto, ut, quae alii collegerunt, omnes edant statim, & mihi hanc laudem praeripere conentur. video enim fuisse nonnullos, qui, meis scriptis ad huius scientiae studium aliquot abhinc annis excitati, & indicibus eorum librorum, de quibus

edendis

edendis cogi
si quodam la
to, ambition
maximos, n
rim dios ali
nos, non illos
tis aperta, n
refellimus
Etis antiqu
tum vet
perfectio
latam, in
phos add
tut: nihil
bonorum
posset: ho
(nam me
manas cu
itaque, en
sibus, ami
lia, & G
Sigonii si
esse, nebe
fortasse n
rium. Re
rum in e
to, quod
nia, qui
scientia

edendis cogitare me, iamdiu polliceor, animaduersis, qua
 si quodam lumine ad ineundam studiorum viam prola-
 to, ambitione praecipites, dum anteire nobis uolunt, in
 maximos, maximeq. pudendos errores inciderunt. quo-
 rum alios alii peritiores, nulla facta mora, alios fortasse
 nos, non illos quidem nominatim, significatione tamen sa-
 tis aperta, ne omnino debita laude fraudentur, aliquando
 refellemus. Redeo ad Sigonium. Ille vero, cum, inspe-
 ctis antiquis libris, lapidibus, nummis, nomina magistra-
 tum uelustate uel amissa prorsus inuenit, uel mutila
 perfecit; cum fastorum partem, alienum in locum trans-
 latam, in suam sedem reuulit; cum censuras, cum trium-
 phos addidit, & trunco quasi corpori sua membra resti-
 tuit: nihil potuit difficilius, nihil, in quo maiorem a bonis
 bonarumque litterarum studiosis hominibus inire gratia
 posset: hoc enim libro, hoc, inquam, quem nos edimus,
 (nam inchoata quis perfectis anteponat?) qui res Ro-
 manas curant, horis fere singulis utantur necesse est.
 itaque, eum qui litteris a me poscebant superioribus men-
 sibus, amici homines aliquot ex Hispania, plures ex Gal-
 lia, & Germania, hoc adscribebant omnes, Cum Caroli
 Sigonii supplementis. quorum a me uoluntati satisfactum
 esse, uehementer gaudeo, eoq. magis, quod adiunxi, quod
 fortasse non exspectabant, non poscebant certe, Kalenda-
 rium Romanum, utile illud quidem dierum caussa, quo-
 rum in eo genera distinguuntur, sed utilius ob id al. quan-
 to, quod ad comitia, iudicia senatum, Romana deniq. om-
 nia, qui coniectura, ingenioq. ualebunt, multam inde
 scientiam deruabunt.

AD.

AD . HIERONYMVM . FALETVM

HERCVLIS . FERRARIENSIVM . PRIN.

APVD . VENETAM . REMP . ORATOREM

IN . IPSIVS . POEMATATA 16

MAGNA laus est eorum, Hieronyme Faletum, qui non ad vulgarem humilemque artem, sed ad nobilem aliquam liberalemque doctrinam sua studia contulerunt: maxima vero, si quis eam philosophiae partem, quae Poesis appellatur, ita est complexus, itaque haeret in ea cognoscenda, ut auelli nulla prorsus ratione possit. itaque veteres illos, quibus optimi ac summi Dei vocem audire, eiusque sermone frui saepe licuit, homines sapientissimos, atque sanctissimos, poeticae facultatis admodum studiosos fuisse constat, suasque cogitatione non eo, quo quilibet uteretur, sermone, sed versibus exponere voluisse. quorum exstant nonnulla, sane praeclara: quae cum legimus, afficimur, et, quasi diuina quadam vi abrepti, extollimur haud paulo altius, quam qui rerum humanarum in studio versantur. Habet igitur ars poetica dignitatem, quando quidem in ea latent arcana philosophiae, quae profanis oculis non patent: ea rudes animos excolit: ea nos ab rerum humilium studio deducit: ad egregios mores, ad veram religionem, ad excellentem magnarum rerum cupiditatem vocat. Habet eadem suauitatem: quia
voci-

vocibus apte constructa oratio miram infundit auribus animisque iucunditatem. Et, ut vno verbo comprehendam, poesis numerus est: numerus porro nihil aliud, quam ordo: ordinis autem principium a Deo fluxit. diuini sunt igitur homines poetae, nec ullo non honorum genere decorandi. poetas autem definitio, non quicumque versus faciunt; qui molesta & odiosa garritate saepe nobis obstrepunt; sed eos, quorum in vita non minus, quam in scriptis, elucet ordo; a quibus colitur humanitas, & beneficentia non modo laudatur, verum etiam pro facultatibus exercetur. haec enim sunt sacra illa mysteria, quae poesis fabularum specie ita velat, ut ea tamen uatum excellentium, hoc est honorum uirorum, mentes intelligant. quae uero his uirtutibus aduersantur uitia, haec sunt illa monstra, inimica naturae, quae poeticis figmentis ostenduntur, sus Erymanthius, leo Nemeaeus, hydra Lerneae, gygantes, & harpyiae, quaeque alia traduntur, perdendis hominibus, aut frugibus nata. Neque uero tu, Faete doctissime, tantam animi praestantiam possideres; non esses tam ad omnem uirtutem, ad omnem laudem propensus; non tam in moribus elegans, in consuetudine comis, atque etiam pro tuarum copiarum ratione beneficus, ac liberalis, nisi magistram ab ineunte aetate habuisses poeticam artem; quae te suis praeceptis erudit, atque informauit; nihil ut ageres, quod ab honesto dissideret: nihil ut in omni uita, praeter decus, & antiqua maiorum tuorum, hominum clarissimorum, instituta, cogitares. cuius tanti beneficii non est apud immemorem gratia collocata.

habes

habes enim poesim in deliciis eam amas: eam ornas. cumq. Herculis, Ferrariensium Principis post hominum memoriam maximi, personam sustineas, idq. tanto splendore, ac tanta, quanta nemo umquam antea, dignitate; summis tamen magnarum rerum occupationibus districtus, scribis saepe versus Calliope dictante, & a grauissimis curis tamquam in amoenissimos Musarum hortos animi causa diuertis. Superioribus quidem diebus, cum egregium illum Athenagorae, veteris philosophi, librum, de altera hominum vita Graece scriptum Italicum in sermonem conuertisses; atque ego te, quod uiatores, difficili confecto itinere, consueverunt, aliquot dierum quietem uelle capere existimarem: inueni te poema tuum de bello Sicambrico, nonnullis abhinc annis compositum, ita tractantem accurate, ut adderes non pauca, quaedam detraheres, multa corrigeres. quae cum legerem, admiratus elegantiam verborum, splendoremque sententiarum, hortatus sum ut ederes, & eo magis, quod reliqua tua poemata, non modo iam typis impressa, verum etiam scripta, per manus, perq. ora doctorum virorum eximia tua cum laude volitarent. qua in re non modo meo, verum etiam studiosorum omnium nomine gratias tibi habeo habeboque, dum viuam, immortales; quod meis hortatibus, ac precibus tribuisti tantum, ut te mihi totum remitteres, tuorumque poematum ius omne tuum, omnemque plane potestatem ad me liberalissime transferres. quod cum impetrassem, exceptus sum illico ea cura, Principi ne alicui uiro, quod fere solet, an amico homini, ac familiari, an uero tibi ipsi potius inge-

nii

nūi tui fetus essent dicandi . tibi quidem tua deberi uidebantur : sed ab huiusmodi consilio tua mihi multis in rebus perspecta modestia deterrebat . rursus , cum intelligerem , omnes fere libros , qui typis diuulgantur , uel iis dicari solere , quorum auctoritas , aut quorum opes utilitatem aliquando aliquam ei , qui mitteret , parere possēt , uel iis , quos pro magnis eorum beneficiis aliquo munere remunerari aequum esset ; uel iis denique , cum quibus minime vulgaris intercederet amicitia : haec , Faletē humanissime , cum omnia concurrerent , uictus sum , tuaque ad te ipsum scripta mittere constitui . nam , etsi Princeps tu quidem fortuna non es , summis tamen Principibus tua te uirtus ita commendauit , earumque reddidit , ut eorum opibus aequae , ac tuis , eos , quos diligis , beare possis . sed omitto reliquos . Hercules uero , Ferrariensium Princeps , immortalitate dignissimus , cui te totum uni addixisti , cuius esse uis quidquid in omni uita praestare potes , is quo te numero habeat , facile declarauit , cum post multas legationes , ad Sarmatarum Regem , ad Imperatorem , ad Pontificem , oratoris apud Venetam Remp. munus honorificentissimum tibi commisit . quapropter , quod ad hanc partem attinet , parui refert , utrum Principis nomine liber aliquis inscribatur , an uero eius , cuius apud Principes auctoritas ea sit , ut prodesse quibus uelit non mediocriter possit . De tuis autem erga me officiis quid agam pluribus ? quae cum & multa sint , & maxima ; tum uero illud excellit , quod in hac mea satis diuturna oculorum ualeitudine uenire domum meam quam saepissimae , animumque meum iristibus

curis

curis affectum, tuo adspectu, ac sermone recreare solitus es. Amicitia vero si spectanda fuit; neminem tibi debui anteferre. coniunxit enim nos non casus, ut multos, non unlgare aliquod studium, non ambitio, non utilitas, sed ipsa, quae omnes res nobilitate vincit, virtus, & artium liberalium societas; quarum uterque nostrum incredibili studio tenetur; Mitto igitur ad te, quando ita ratio postulat, tua poemata, non ut tibi, de me optimè merito, quasi gratiam referam de tuo; sed ut habeat a me nostra aetas, atque adeo posteritas ipsa, primum, testimonium beneuolentiae, atque obseruantiae in te meae, deinde beneficium, quod, tua scripta cum leget, fatebitur esse maximum. Interea peto a te, ut in illo maiorum uigiliarum opere de Fisco, cui nondum extremam manum imposuisti, exorari te sinas, idest ut absoluas, atque perpolias. magnum enim inde fructum capient omnes iurisperiti: cum te difficiles admodum reconditae materiae nodos ingenio soluentem, & quæstiones illas implicatas atque inuolutas explicantem, exquisitoque quodam ordine tractantem intuebuntur. Neque uero tua mihi est occupatio minus nota; cum & negotia tractes Principis eximii: & ob tuam uirtutem nobiles uiri non modo quotidie, uerum omnibus paene horis officii honorisque causa ad te adeant: rursus eum te esse noui, qui, quod tibi occupationes eripiunt, id ingenii præstantia consequaris. consule igitur gloriæ tuæ: consule studiosis omnibus antiquarum nouarumque legum: effice, ut, quantum in poetica facultate, quantum eloquentia polles, tantum in iure civili, maximeque in ea parte, quae obscuritatis habet plurimum, ualere

uallere te tua scripta significant. Meam vero hanc, quam profecto in hac epistola uides elucere, uoluntatem, animique singularem ad te amandum propensionem amplectere; atque ita statue, si tu mihi, quod, ut uideo, praeclare facis, in amore respondebis, par amicorum neque nostra, neque ueterum memoria coniunctius ullum fuisse. idque quanti a me fiat; dabo operam, quantum in me erit, quotidie certius ut intelligas.

AD. ISABELLAM. VILLAMARINAM

SALERNITANI. PRINCIPIS. CONIVGEM

IN. SCIPIONIS. CAPICII

POEMATATA 17

Ex omnibus rebus cum nihil sit litteris doctrinaque praestantius, sequitur, ut literato Principe laudabilius nihil esse uideatur. non enim, si quis humili fortuna scientiis animum excoluerit, quamuis omnium uirtutum intelligentia sit ornatus, aeq. tamen eas uirtutes exercere poterit, ut summo loco natus. omnium est scire, non omnium tamen agere. non cadit in quemuis administratio iustitiae, non liberalitatis. esse oportet, quibus imperes, ut iustitiam colere possis: esse, quod des, ut liberalitatem. Et, quoniam ad haec primum a natura formamur, & fingimur, ut, quae, laudabilia sunt, nostra sponte diligamus, deinde praeceptis instituimur, ut uoluntatem ratio confirmet utrumque si quis habet, uerissimis laudibus ornatur, eo magis si is est, cui tertium etiam illud contigerit, ut fortunae commodis abundet. nam, qui uirtutem

29

non

non ut primum bonum, sed ut alterius boni causam, quaerit, ut diuitiarum, ut bonorum: ei virtus, quae perfecta non est, quia quaeritur ad aliud, perfectam laudem afferre non potest. perfecta vero virtus est, quae se ipsa contenta nihil appetit, quod extra sit. hanc si quis est qui sequatur, qui unam diligat, qui ipsam propter ipsam, non propter aliud expetendam ducat; hic est, quem Divi praeter ceteros diligere putantur, cui quidem eam mentem dederint, ut praeter ceteros saperet. Tua haec est, Isabella praestantissima, tua inquam haec maxime laus est. cum enim tibi aut ad opes, aut ad dignitatem nihil se re posset accedere, quarum rerum cupiditate adducti, magnarum artium in studiis plerique vigilarunt; ipsa, nihil huiusmodi spectans, virtutis amore capta, cuius pulchritudinem animo cerneret, effecisti, studio tu quidem, sed ingenio magis, ut, cum esses omnium nobilissima, omniumque pulcherrima, quorum alterum maiorum tuorum, maximeque viri tui, Principis omni laude cumulati, magnis rebus testata virtus, alterum benignissima tibi Natura dedit, eadem & sis, & habearis omnium doctissima. hinc illa ad te colendam singularis omnium propensio: hinc multorum poetarum, quibus gravissima Regum bella magni operis argumentum suppeditare poterant, ad te cauendam traducta ingenia: hinc Capicius ille tuus, tuarum laudum laudatissimus praeco qui te admiratur unam, qui observat: qui cum de te multa, & vera praedicavit, ita concludit, unam habere, quae optabilia sint, omnia. itaque me quidem eodem studio inflammavit, nihil unquam ut ardentius optarim, quam ex tuis unus esse. quod quo facilius impetrarem,

travem, feci, ipso permittente, atque etiam libente Capicio, ut eius libros, de Principiis rerum duos de Vate maximo tres, meae in te summae observantiae testes emitterem. diuinum carmen est, multis luminibus ingenii, multa arte distinctum. equidem nihil legi in hoc genere perfectius: ut ne Lucretius quidem pluris apud me sit: quo cum antea propter sermonis elegantiam delectarer, vtererque multum, coepit mihi iam minus esse familiaris, postea quam Capicium legi. Hoc opus, & quia scriptum est a tui studiosissimo, & quia versibus te dignis, id est luculentissimis, non dubito, quin a me missum auide accipias, sic inquam, ut de isto me munere ames plurimum.

AD . TORQVATVM . BEMBVM

PETRI . FILIVM

IN . VIRGILIVM 18

QVOD ego de poetica facultate sentio, idem tibi, Torquate Bembe, qui res praeclaras ingenio studioque consecutus es, bene iam esse cognitum ac persuasum facile puto, non esse eam inter ea, quae minimi ducuntur, non vulgarem, non leuem, summum esse quiddam, ac plane diuinum, quique suas ad eam cogitationes conferant, etiam si, quod volunt, non assequantur, probandos tamen esse, quia scilicet ad maxima contendant, qui vero in ea ita versentur, ut excellent, colendos nobis esse vehementer, omni que omnium laudum genere cohonestandos. Ac miror equidem

Q 9 2 fuisse,

fuisse, hodieque esse nonnullos, qui rem hanc pulcherrimam, ac deorum nobis munere concessam, parvipendant atque etiam, si diis placet, in sermonibus vituperent. Quid, inquiunt, est poetica? fabulas continet: fabulis autem quid inanius? Ridicule: qui ex ipsorum ingeniis ceterorum ingenia metiantur; quaeque ipsis obscura sunt, ea reliquos videre non putent. Ego contra ita soleo disputare; utinam, Torquate, te praesente, ac tui similibus: nihil enim tam optandum, quam habere iudicem in controuersis, qui causam, qua de agitur, quaeque propter aliquam difficultatem in dubium vocatur, optime calleat sed ego contra, cum in hos incidi, ita soleo disputare. Est ne aliquid hominum generi vtilius, aut omnino philosophia praestantius? negare coguntur. si negent, eos ratio refellet, & veritas ipsa: quae cum pugnat, facile vincit. una enim est philosophia, quae vitia nostris ex animis euellat; una, quae inserat virtutes: humana omnia, multis obstructa difficultatibus, aperit; diuina, non illa quidem prorsus, sed magna tamen ex parte patefacit. atque hanc, quae tantas res praestat, siue artem, siue scientiam, ne communis esset omnibus, vulgique tractatione, impurisque mentibus contaminata sordesceret, obscuris fabularum inuolucris, quasi aliquid sacrosanctum, velauit, & custodiuit antiquitas. fabulas porro ipsas non eo, quo vulgus utebatur, communi, & soluto, sed exquisito, & numeris adstricto orationis genere prisci illi, summa homines sapientia praediti, prodiderunt. placet hoc illis, primum ut rei dignitatem, si posset, quatenus posset, verborum augetet elegantia: lectis enim, admodumque puris vocibus efficitur

citur uersus : nihil hauritur de faece : deinde , quia , cum philosophiam tractare , maiore nescio qua suauitatem ex illo concentu , quem numerosa uocum in uersibus compositio gignit , aures animoque perfundi pulchrum putabant . quae cum ita sint : neque fabulas , quae philosophiam continent , neque uersus , quibus facile ipsae continentur , iure quisquam reprehenderit . His ego ad coarctandam istorum inscitiam , aliisque praeterea utor argumentis . addo exempla , eaque Italarum , & eorum hominum , qui nostra , patrumque memoria floruerunt . Pontanos , Sannazarios , Fracastorios (omitto alios : sunt enim multi) non ne musarum in primis consuetudo delectauit ? propius accedo . pater tuus , Torquate , Petrus Bembus , quem orbis terrarum cantat : nec iniuria : uixit , enim , quantus ei uitae cursus fuit , in uirtute totus : is cum alias coluit philosophiae partes , tum uero poeticam artem amauit amore quodam ardentissimo ; eiusque studium a prima pueritia complexus , numquam ne in extrema quidem senectute dimisit . scripsit autem uersus in omni aetate multos , & scripsit omnium elegantissime , sic , ut ei Apollo dictasse uideatur . itaque recte fecit , optimoque sane consilio pater meus , qui Latinorum poetarum principem Virgilium eius nomini , quem optimum poetam nouerat , inscriptum emisit . recte item ego , qui , patris mei exemplum secutus , tibi , & tanti uiri filio , multis uirtutibus ornato , & facultatis poetica studiosissimo , ac peritissimo , eundem poetam , quasi minus Bembe familiare debitum , dicauerim . nam , quemadmodum parentes nostri alter alterum tum sermonibus , tum scriptis ornabat ; ut , quantum

inter se amarent, aequi, & iniqui cognoscerent: item ego cupio, & conabor, quantum in me erit, (an praestaret possim, nescio; sed conabor certe) ut ex meis scriptis nostram amicitiam, meamque in te summam observantiam etiam ipsa posteritas intelligat. non enim, cum hanc meam multis abhinc annis ad te amandum & colendum voluntatem contuli, id solum spectavi, ut quasi hereditatem adirem amicitiae paternae: tam etsi hoc ipsum quoque me movit, sicuti mouere debuit, sane plurimum; sed tua quaedam propria secutus sum: tuos, inquam, mores, tua studia, tuas virtutes vidi primum: deinde ex iudicio fluxit amor; & , quo mea sponte propendebam, ratio impulit. noui te adolescentem, noui iuuenem & Patavii, & Venetiis, sanctissime viuentem, & praeclara illa cum doctissimis viris philosophiae studia tractantem. in quibus cum iam, tuo quidem aliquid, aliorum autem iudicio multum profecisses; Romam te, in eam urbem, contulisti, quam pater tuus theatrum per annos multos habuit suarum virtutum celeberrimum. ibi nunc tu quoque spectaris, & probaris: ibi plausum fers a bene intelligentibus, beneq. sentientibus uiris: ibi denique vera illa Petri Bembi cernitur, et agnoscitur in te filio non minus animi, quam corporis, effigies: & , ut principia se dant, futurum omnes existimant, ut summi tibi in Ecclesia Petri honores, ac praefecturae deferantur: deberi quidem iam, nemo est, qui non intelligat. Quare laetor equidem, ac fruor iam nunc, pro meo erga te studio, quasi praesentibus honoribus tuis; & praecipio gaudea, quanta potest animus meus capere maxima, tuae futurae dignitatis. perge modo, ut coepisti,
in tuis

in tuis perennibus studiis, & animum tuum pulcherrimis, teq. dignis cogitationibus exerce. vides eam uiam, qua pater tuus iuit. exstant vestigia. istac euntibus relictissimus est ad gloriam cursus, offensio nulla, nullus error. quod fecisti, laudamus: sunt enim magni, vereq. laudandi processus in virtute tui. quod reliquum est: quia te summum illud ad decus, quod excellentibus ingeniis, propositum est, tamquam ad metam peruenire cupimus; & quod cupimus, id in te ipso positum videmus; fauimus animis, prosequimur studiis, uocibus cohortamur. Atque ego quidem huiusce animi mei non obscurum, ut opinor, argumentum, hunc librum, qui me tacente apud omnes gentes loquetur, tibi inscriptum ad te mitto. volo aeternum exstare monumentum, unde homines, quid de te senserim, quid indicauerim, intelligant. volo, habeas ipse munus a me, unde, quid tua causa velim, conicias; & maiora, cum ornandi tui maior aliqua facultas exsistet, officia, studiaq. expectes. Venetiis. M D LV.

A D . P A V L L V M . R H A M N V S I V M

I O A N N I S . B A P T I S T A E . F I L I V M

I N . C A E S A R I S . C O M M E N T A R I O S 19

QVI magistram vitae dixit esse Historiam; nae ille, Paulle Rhamnusi, & dixisse vere, & praeclare sensisse mihi videri solet. facile enim vnus homo, quid multis hominibus euenerit, cum intelligit, eruditur, atque ipse sibi normam componit actionum suarum,

Q 9 4 vitaeq.

vitaeque totius inter omnes errores, omniaque pericula ad veritatem, ac salutem dirigendae. nec aliud est nostra prudentia, quam euentorum observatio, rerumque praesentium, ac futurarum ex praeteritis, tamquam ex fonte, scientia deriuata. quod ex vniuerso litterarum genere, vel sola, vel certe maximae praestat historia; praesertim si quis eam ita tractet, ut, euenta dum notat, animum referat ad causas, in easq. attente inspiciat, & rationem quaerat, cur hoc factum, illud omissum, cur ex illo calamitates, ex hoc optata contigerint. Atque hoc primum est de historiae fructu. sequitur dignitas. Res gestae narrantur inter summos Reges, potentissimas ciuitates, bellicosissimas nationes. causae porro bellorum quae sunt humanarum rerum maximae, Imperium, salus, gloria: quae ponuntur in armis omnia, & a consilio ducuntur, a virtute militum, ab ipsa fortuna pendent. Neque vero dignitatem quidem habet, ac fructum, voluptatem autem historia desiderat. nam, si voluptas est, quam magnarum variarumque rerum adspectus animis nostris infundit: nulla pulchrior species, nulla gratior, nulla prorsus historia iucundior. vides, ut in tabula picta, aduersa ducum excellentium stratagemata, artes, insidias; spem potiundi, metum amittendi: caesos exercitus, urbes captas, imperia deleta: age, fortuna commutata, cadere insultantem, victum exsurgere; eodem paene momento laetitiam pelli maerore succedente, maeroremq. laetitia. haec dum legimus, haurit animus voluptatem incredibilem; aliturq. pabulo suauissimo, nec satiatur, donec ad exitum peruenit. Cyrus ille, Persarum Rex, qui orientem subegit,

Pyr-

Pyrrhus Epirota, castramentandi laude praeter ceteros insignis, & duo illi, barbarorum omnium clarissimi, Alexander Macedo, & Hannibal, praeterea de Graecis Themistocles, Agesilaus, Epaminondas, quo modo, cum eorum facta commemorantur, animos nostros afficiunt? expestatione suspendunt, pascunt gaudio, metu macerant. uerum haec maxime Romana patient in historia: quae uel diuturnitate, ac magnitudine bellorum, uel varietate fortunae uberrimam exemplorum in omni genere copiam suppeditat. Romana porro viri praestantes multi cum litterarum monumentis tradiderint; quorum ingenis, quae cuiq. merces glariae pro cuiusque facultate debebatur, ea posteritatis iudicio persoluta; eminet inter omnes, mea sententia, (nec uero secus antiquitas sensit) primumq. sibi dignitatis gradum C. Caesaris iure uindicat. nam & uixit qua plurimum aetate Romanae floruit eloquentia: & coluit ipse eloquentiam praeter ceteros: rebus uero gerendis non interfuit modo, uerum etiam praefuit: quo factum, ut usum quoque, qui ualet in scribenda historia multum, cum doctrina coniunxerit. exstant, bono quodam litterarum fato, praeclari illius de bellis, ipso Duce gestis, commentarii, qui se non solum omnibus omnium historiis aequare, uerum, ut omnes fatentur, anteferre etiam uidentur. Breuitatem scis in oratione magnam esse laudem, cum eo tamen, si uitetur obscuritas. facile enim dum, illam sequimur, in hanc incidimus. quod in Thucydide uerum Cicero notauit, cum esset alioqui scriptor egregius. At uero C. Caesar, cum breuitatem maxime omnium admauerit, ita tamen praesus est, ut eodem nihil fieri possit illustrius.

lustius . proprie loquitur , & significantur : ornamento-
rum tantum habet , quantum in exponenda re decet . nam
elaboratam studiosius orationem , nimiaq. excultam ele-
gantia prudentiam aures non modo in commentariis , ve-
rum in historia quoque respuunt . Hic tibi est , Rhamnusi
optime , mihiq. multis nominibus carissime , in manibus
habendus , tractandus assidue , abseruandus , ediscendus ;
ut eum penitus , si fieri potest , aut certe quantum po-
test , imitatione exprimas . nam , cum tibi Veneta Resp.
bellum illud memorabile , omniumq. difficillimum , quod
Henrico Dandulo Duce aduersus Byzantios gestum
est Latina oratione tradiderit explicandum ; magnisque
etiam tuam industriam praemiis honestandam decreto
publico , censuerit : debes eniti vehementer , ac omnes
ingenii tui nervos contendere , ne quis te tanto impa-
rem oneri fuisse umquam putet . Atque ego quidem ,
qui te fero in oculis , qui tuae gloriae faueo , cum in ip-
sam rem intueor , grauem sane , admodumque difficilem ,
paullulum commoueor : rursus , cum ad ingenium tuum ,
ad industriam , ad illos animi tui praeclaros ad laudem
impetus mentem & cogitationem refero , facile confir-
mor , & huiusce tibi commissi muneris eum , quem cupio
idest plane gloriosum exitum exspecto . Verum , ne sint in
te ipso quae sunt ; & sit haec , quae tibi ineunda via est ,
quantumuis lubrica , incerta , impedita : an tu potes labi ,
potes errare , potes usquam offendere , ducem secutus
patrem tuum , Joannem Baptistam Ramnusium , specta-
tae sapientiae virum , consiliorum omnium summi
Xuirum Collegii participem ; cuius elucet in vrbe no-
stra virtutes eximiae , nomen autem aeternis consi-
gnatum

gnatum atque impressum ingenii monumentis, per orbem terrarum fama dissipauit. is te sua doctrina instruet, consilio monebit, prudentia reget. at quo studio? quo scilicet pater filium, & quo talis pater talem filium debet. nec sane video, quem deceret magis, aut in quem haec aptius, quam in te, prouincia conueniret. nam, cum eas res, quas tibi sunt Latinis litteris tractandae, magna ex parte liber, ut audio, contineat Gallica scriptus veteris lingua, tum ipsa perobscura, tum multis praeterea diuersarum linguarum vocabulis permista, atque confusa; cum porro librum pater tuus & unicum habeat, & unus ipse (de nostris quidem hominibus) optime omnium intelligat: sapientissime, ut in omni re semper, ita proximis mensibus decretum a Xuiris est, ut haec tibi potissimum Venetae pars historiae mandaretur, cuius haurire scientiam non aliunde, quam ex tuis aedibus, licebat. Ego quidem, etsi intelligo, qui sis, quam te deleat verus honor, quam tua sponte incumbas ad decus; tamen hortor te, sensus huc omnes tuos, cogitationesque conuertas; excites ipse te; consideres etiam atque etiam quid susceperis, a quibus commissum, qua tua aetate, qua omnium expectatione. Venetam scribis historiam, nec niuersam, sed quod in ea maxima putatur excellere: scribis Principum Reip. decreto: scribis adolescens: qua aetate magnas res aggressos uel insignis admodum manet gloria, vel temeritatis nota sempiternae. Quibus ex rebus, & quod ante studiorum tuorum praestantes fructus edidisti; & quod patris tui virtus tua virtus putatur, nec tibi sunt petenda extrinsecus quae domi tuae nascuntur; orta est inter homi-

ne s

nes opinio, *historiarum* te nobis daturum egregiam; in qua *Venetarum* urbis ita naves praeclara facinora, ut aliena cum laude tui nominis immortalitatem coniungas. quod ita futurum, mihi persuasum est, si te ad legendos assidue Caesaris commentarios contuleris, eorumque ad imitationem, & quasi imaginem totum effinxeris. hoc enim in genere nihil habent perfectius Latinae literae: & eos, quo tibi essent, tui iuris quodam modo facti, cariores aliquanto, cum hoc tempore nostris ex aedibus haud paulo, quam antea, emendatiores exirent, uolui in tuo nomine apparere, multis in hanc mentem causis, usque minime vulgaribus adductus. nam, ut omitam, quod *historiam* scribenti nihil aptius, nihil omnino his commentariis utilius quisquam dixerit: valde me commouit multorum annorum, ac paene saeculorum in fouendis optimarum artium studiis praeclara tuae gentis consuetudo. ac uolo mihi, quod attinet ad illa vetustiora, silentium imponere: uenio ad ea, quae propius ad aetatem nostram accedunt. Auo tuo, cuius tu nomen, & una cum nomine uirtutem refers, quis in omni uita uirtutem amauit ardentius? qui cum in litteris usquequaque excelluerit, tum uero iuris ciuilis cognitionem egregie consecutus est; eiusque rei testes habuit amplissimas *Venetarum* Imperii ciuitates, in quibus tum ciuili, tum capitalium quaestionum iudiciis, magna pariter & integritatis, & doctrinae laude, praesuit. Mitto *Hieronymum*, patrum, medicinae, ac philosophiae studiis praestantem; qui cum in *Syriam* eo consilio esset profectus, ut *Arabicis* litteris imbueretur; paucis annis tantum proficit, ut plerisque *Auicennae* libros in *Latinam* linguam

linguam egregie conuerterit. *Alios quoque possum de tuis maioribus, hac laude praestantes, minime paucos inuenire, sed parente tuo contentus uno esse possum, quo semper in hac ciuitate non solum amico, uerum etiam patrono eruditi homines usi sunt; neque sibi ornamenti, aut praesidii plus in eius amicitia, atque auctoritate, quam commodi repositum in benignitate senserunt. Accedit illud, quod idem pater tuus cum in Gallia, Reip. causa, diu uixerit, eamq. prouinciam, Rege Ludouico XII. uniuersam fere peragrauerit: magnam eorum locorum partem, de quibus mentionem in his commentariis fieri uides, praesens ipse nouit, eaq. tibi in sermone, non secus ac in tabula picta, diligenter, uerissimeq. ostendere solitus est: itaq. cum hunc librum ad te statui mittere, illud intellexi, magistrum te habere excellentem in hoc rerum ac locorum Galliae prouinciae studio, parentem tuum, quo sum aliquanto magis in suscepto consilio confirmatus. Tibi uero displicere meum erga te officium non existimo. mihi quidem ipsi ob eam causam gratissimum fuit, ut ex tenui munere beneuolentiam in te meam perspiceres: quae cum a parentum nostrorum coniunctione, qua nulla maior esse potuit, originem duxerit, quotidie tamen augetur studiis erga me tuis, maxime uero causis iis, unde facile manat amor, uirtute, ac probitate; quarum altera tuis in scriptis, altera in moribus elucet.*

A D.

AD . ANTONIVM . TRIULTIVM

C A R D I N A L E M

IN . HISTORIAM . SALLVSTII 20

CUM omnes me litterae, omnisq. libero homine digna cognitio vehementer delectat, Antonii Triulti, Cardinalis amplissime: vero pascor incredibili voluptate, & afficior maiorem quendam in modum sensibus intimis, dum historiam tracto. quid enim potest esse iucundius? Rerum interitus obliuio est. at eae reuiuiscunt historia, cum in nostram memoriam reuocantur, quaeque multorum annorum spatio, multis ab hinc saeculis gesta sunt, ea nos, exiguo volumine comprehensa, & tamquam in conspectu nostro posita, cognoscimus. Si sermonibus delectamur: resonat in scriptis hominum vox eloquentissimorum, nihil temere, nihil incompote narrantium, omnia grauitate, suo quidque ordine, & loco si consuetudine clarorum virorum; versamur, vetera legentes, cum Regibus, cum Principibus viris, magnis in bello ducibus, sapientissimis rerum. rectoribus; ora ipsa mehercule, lineamenta, & formam non tam corporis, quam animi, eorum, quos numquam vidimus, videmur tamen quasi praesentes intueri. Quod si recte instituendae vitae rationem ac doctrinam sequimur: usu maxime rerum quaeritur prudentia. usus est, uel cum experimur ipsi, uel cum, experientibus aliis, quid euenerit, obseruamus. nobis ipsis, experiri multa si velimus, facile non licet. labore opus est, ac tempore, & fortuna tentanda;

tanda; nec tentatur interdum sine periculo, commodius ergo, ac tutius, euentis aliorum examinandis, prudentia comparatur. id autem, profecto uides, Antoni doctissime, ac sapientissimae, proprium esse historiae bonum, in qua patent fortunae uicissitudines, regnorum mutationes, hominum siue uitia, siue uirtutes, ex quibus quae uitanda nobis sint, quae expetenda, nullo nostro periculo, nullo labore, sedentes in otio docemur.

Atque hoc in genere Polybius inter Graecos, de nostris maxime is, cuius nunc libros tibi inscriptos emitto, Sallustius excellit, euenta enim ita narrat, ut causas simul aperiat. ex quo oritur illa omnium pulcherrima scientia, ut, malorum, & calamitatum origine perspecta, nihil agamus, nisi quod ratio praescribit, omniaque nostra consilia, omnes actiones ueterum exemplorum regula metiamur. Quae cum sit omnium, qui annales antiquorum euolunt, communis utilitas: alia quaedam tua condicio est. habes enim historiam in familia tua: neq. tibi, si quid inuenire uis egregium, & imitatione dignum, confugere ad libros necesse est, neque longius enagari, & quasi peregrinari animo, ac mente, more multorum. domo petas, licet, omnium uirtutum exempla. persequere maiores tuos cogitando. quae fuerit eorum in pace iustitia, in bello uirtus, in omni fortuna moderatio, si attendes, nihil ad gloriam domesticam requires. iustus Aristides, prudens Themistocles, fortis Epaminondas: de Romanis multi, multis eximisque uirtutibus insignes. horum alii facta dum legunt, bonas artes ex eorum uita discunt, & ad easdem res, eademque studia laudis cupiditate rapiuntur. at tu refer

animum

animum ad tuos maiores . eminere videbis , instructum egregiis artibus , Ioannem illum Iacobum Triultum , magni animi , summi consilii virum , scientia rei militaris aetate sua facile principem ; praeterea , iustum , liberalem , abstinentem , plane , praeter decus , & gloriam , nihil in uita cogitantem . . Nam de laudibus Hieronymi , parentis tui , quia tecum quasi loquor , ne seruire tuis auribus uidear , nolo multus esse : tantum dicam ; quam diu uixerit , Gallicam rem in bello floruisse : postea quam , hostium multitudine oppressus , fortiter pugnans in acie perierit , concidisse . tantum in uno uiro momenti fuit , ac roboris . Age , sint haec , ut ita dicam , in campestri quadam luce posita : quid ? in urbe Roma , idest in omnium gentium celeberrimo theatro , non spectata , probataque uehemementer est triumphus tuae gentis Cardinalium doctрина , religio , sapientia ? ut , Triultiorum nomine multorum uocibus in multas partes dissipato , non ipsa tantum Roma , sed omnis plane Italia , omnis , ubi colitur humanitas , Europa personaret . Omitto alios : sunt enim multi ; nec tu quemquam ignoras . non enim sunt ex imaginibus , aut ex illa colorum inani specie maiores tui cognoscendi . quaerenda tibi facies tuorum non est . clari sunt ex recte factis : uirtute distinguuntur ; cum alius in alia , in omnibus simul omnes enituerint . Quae tu quoniam a primis annis ad hanc aetatem non modo cogitasti , uerum etiam uita , ac moribus expressisti , propterea te , Episcopum Tolonensem iam antea insignitum , legationibus honestatum , primum Perusina , & Auenionensi , in quibus miram iustitiae laudem tulisti , deinde ad Regem Galliae , & ad Venetam Remp. ubi prudentiam,

dentiam, ubi gravitatem incredibilem praestitisti, proximis diebus Cardinalem creavit Paullus IV. Pontifex omnium optimus, omniumq. maximus, iudicio praeditus accerrimo in aestimandis hominum ingeniis, ac moribus, itaq. animatus, ut, quae cuiusque meritis praemia debentur, ea libentissime, ac liberalissime persolua. in quo nemo est, qui tuam animi singularem aequitatem, ac moderationem vehementer non admiretur ac laudet, qui summae nuncium dignitatis, cum est ad te multis praesentibus allatus, ita acceperis, ut nemo, te commotum, nemo, ne leuiter quidem affectum, ex vultu, aut oratione aut ullo corporis gestu, potuerit intelligere. ita patuit, quod ab insipientibus ambigi, ac disputari quandoque solet, a bonis viris virtutem magis ipsam diligere, quam virtutis insignia; honorem esse praemium recte agendi, finem non esse: magnos illos, ac praestantes esse homines, qui laudabiliter ita vivunt, quasi laudem percipiant, ita laudem aut dignitatem excipiant, quasi nihil minus antea cogitauerint. quod in te & animaduersum est maxime, & observatur quotidie magis. colere. n. te quidem studiosius, quam antea, omnes videntur: ipse autem, qui antea fueras, idem omnibus es. nemo excluditur sermone tuo, nemo congressu: tui omnibus copiam facis: eandem omnibus humanitatem ostendis. Sequitur insolentia fortunam: comes est rerum secundarum arrogantia: tu mansuetudinem amas: tu in continentiam, tu benignitatem perpetuo retines. iure ergo hoc etiam nomine Cardinalis es. iure habes hanc, quo tui te pro Petri Ecclesia suscepti labores extulerunt, maximi sacerdotii dignitatem. & nunc tu quidem comitatu stipulatus honestissimo familiarium tuorum, multo tamen infir-

R r gnior

gnior, atque ornatior cohorte tuarum uirtutum, quae tibi comites ubique sunt, Romam redibis expectatus, expectatusque columen futurus Christianae Reip. splendor sacri Collegii, ornamentum familiae tuae. I, decus Italiae amor, ac deliciae bonorum omnium, diis bene iuuantibus ad eam urbem, quae sola peregrinam uirtutem excipit, sola ornat honoribus, sola dominam facit rerum omnium humanarum. nos autem, quibus tuam iustitiam, tuam benignitatem ostenderas, laeti tua dignitate, maestis discissis, te prosequimur abeuntem optimis ominibus: fauimus animis, precamur linguis, uota prorsus eadem, quae pro parentibus, ac liberis nostris, pro tua salute suscipimus. Atque ego, in hac omnium eximia laetitia pariter & molestia, praecipuo quodam dolore diucllor: quia fato nescio quo meo contigerit, ut, quam diu Venetiis fuisti, ego semper afflictus importuno morbo iacuerim: quo etiam nunc langueo: & ad morbum accedit aegritudo: quoniam quidem, aliis ad te adeuntibus, deque ista dignitate gratulantibus, ipse excludor unus, nec possum meae summae erga te obseruantiae praesenti officio satisfacere. hac tamen spe sustentor, quod humanitas ac sapientia tua facile fortunam a crimine seiunget. consilio aliquid peccatur: accuses: iure feceris. culpam autem in iis rebus, quae non a uoluntate nostra pendent, sapiens nemo umquam dixit esse. quare nec tu mihi, quia non ualeo, uitio dandum putabis: & hoc ipsum, quia, me non ualere, non tam corporis, quam officii causa doleo, laudi etiam fortasse tribues. equidem habeo non uoluntatis modo testem, uerum etiam studii ac benenolentiae auctorem in te meae, hominem honoratum, & cum
omni

omni uirtute excellentem, tum vero omnium, quos ego
in vita viderim, humanissimum, qui te amat egregie, fa-
citq. plurimi, tuasq. laudes utraque manu ad astra sae-
pe tollit. verum ego non id solum spectro, mea ut uni tibi
pateat obseruantia. illustrabo eam, si potero, meis ali-
quando scriptis, & patefaciam omnibus gentibus. inte-
rim, ut haec tibi nostra ex aliquo signo voluntas illuce-
scat, praeclaram edo tuo cum nomine Sallustii historiam
cui tu si locum dabis inter eos libros, qui ab oculis tuis
abesse non solent; vigeat apud te nostri memoria; quoties
eam videbis, toties animo tibi occurrat: adero tibi saepe
absens; tacitus saepe tecum loquar; meq. esse de tuis fa-
miliaribus unum, de iis maxime, qui operam tibi assiduam
praebent, qui tuo potissimum honori seruiunt, existima-
bis; quod ut ita sit, vehementer opto: & si assequor, feram
in caelum istam humanitatem, colam animo, tuebor offi-
cui, & imitabor, quantum potero: studio certe, si minus
re licebit, tibi ut satisfaciam, elaborabo.

Venetiis, M D L V I I.

AD . ALOYSIVM . GARZONIVM

I N . L I B R O S . X X I I I

D E . L I N G V A . L A T I N A

QVI . CALEPINI . NOMINE

CIRCVNFERVNTVR

21

CONSTARE tibi puto, Aloysi Garzoni, cum
ad res praeclaras natus homo sit, quippe qui solus ex

Rr 2 omni-

omnibus animantibus munere rationis, ac mentis excellat, nullam tamen artem eodem tempore & inuentam simul esse, & obsoletam. omnes humili tenuique ab initio profectae, paullatim quasi per gradus adscendentes, ad id, quod summum videtur esse, peruenerunt. hoc & in literis accidit, maximeque quibusdam in libris, qui eiusmodi sunt, ut, semel atque iterum aucti, locupletari tamen, atque ornari deinde possint. quo ex genere bonum factum Calepinus sortitus est, cui quotidie fere omnes homines de suo largiantur. certe enim illius *Dictionary*, quod nunc emitimus, non tam ipsius industria, quam aliorum labore studioque in tantam altitudinem excreuit. unum tamen desidero, quod ii, quibus illud propositum fuit, ut in hunc librum quamplurima congererent, id ipsum, quod fecerunt, ut adderent, facere consideratius diligentiusque potuerunt. quorsum enim in herbarum montiumque nominibus colligendis diligentes sumus, verba autem Latinae linguae illustra maxime, ac significantia, quae nescire nemo vult, in augendo Calepino negligimus? ergo ipsi hoc potissimum spectauimus: & opinor tantum praestitimus, quantum qui, hoc *dictionary* cum aliis *dictionary* conferendo, cognoscet, non dubito quin de hac opera nobis & faueat, & bene praecetur. non enim libet hic commemorare, quae quibus in uerbis sint a nobis addita: nam sexcenta sunt, neque sumpta ex apertis aliorum librorum indicibus, sed ex iis Latinae linguae fontibus, ad quos peruenire cuius non licet. utrum autem ipsi peruenerimus, res ipsa indicet. In eo etiam ab aliorum instituto discrepauimus, quod alii tantum, ut addant, quae utilia putant, elaborant; nos etiam, quae

quae non vtilia sunt, & discendi cupidis contraria, quae
 scilicet Calepinus ipse non recte percepit, haec, inquam
 dedimus operam, ut de libro, tamquam de tritico lo-
 lium, eximeremus. addidimus, mutauimus, sustulimus,
 prout res postulauit. dictiones certe Graecas, ex multi-
 plici lectione deprauatas, ut est fere, nisi diligenter ca-
 ueas, corruptrix librorum Typographia; tam multas
 correximus, ut, quod fabulosum est, nos dicere i somnium
 possimus, Augeae stabulum a nobis esse repurgatum.
 Nostrum etiam in hoc opere proprium illud putamus,
 quod, cum alii in addendo supra modum curiosi fuerint,
 ut liber excresceret; nos contra, ne quid praeter rem
 adderemus, superstitiosi fuimus, nec minus in excutan-
 do diligentes. ut in dictionibus Graecis, Latinarum
 ordini insertis, vel potius intrusis, multas, quasi de alie-
 ro loco, migrare coegimus. exempli gratia inter La-
 tinas dictiones quem locum habere potuit Catabathy-
 nus, aut Hodedocus, aut Pseudonymus, & huiusmo-
 di, quae a Latinis scriptoribus Latine pro exemplo ad-
 ducta minime reperias: quae propemodum innumera-
 bilia sustulimus, eodem iure quo Latina vocabula de
 Graeco dictionario tolleremus. Et, quoniam hoc volu-
 men, ob variam infinitamq. doctrinam, multorum per
 manus circumfertur: facile futurum putavi, ut, si tibi a
 me inscriptum exiret, significationem multis daret amo-
 ris erga te mei. nam, ut omittam merita in me tua, quae
 nulla umquam delebit obliuio, tui me suauitates inge-
 nii, tua incredibilis humanitas, singularis probitas,
 eximia ad colendam virtutem animi propensio ad
 amandum alliciunt. non enim ideo mihi carus es, quia

Rr 3 sis

sis Venetae Reip. omnium amplissimae, a secretis, aut quia nunc una cum viro clarissimo omnibusq. virtutibus ornatissimo, Michiaele Suriano Legato, particeps & minister consiliorum omnium ad Philippum, Hispaniae Regem, sis profectus: sed: quia talem te praestas, ut & haec tibi, admodum ampla, atque honorifica, munera iure deferantur, & egregiis animi tui bonis maiora quoque debeantur. Sit igitur hic liber & tibi, & reliquis argumentum beneuolentiae meae, testimonium iudicii grati vero animi non omnino qualem velim, sed quale possum hoc tempore, monumentum. tu autem istam praeclaram in nos voluntatem conserva; &, quo instituisti cursu, per directam, maximeque expeditam, ac certam litterarum viam ad gloriam contende. quod ego quidem, qui tuos sensus, tuos ad laudem impetus optime teneo, ita opto, ut sperem, ita spero, ut futurum mihi persuadeam. idq. etiam reliquis praedicare non desino. Venetiis, M D L I X.

AD. MICHAELEM. GHISLERIVM

C A R D I N A L E M

IN. LIBRVM. DE. LOCVTIONE. DEI

ACADEMIAE. VENETAE. NOMINE 22.

RE R V M humanarum exitus, quam varia sint hominum consilia, de clarant. quod si quis bene cogitat: sequitur, ut idem laudabiliter agat. recte autem agentem, nihil umquam frustra laboratur, nihil fallit. Decet igitur nos
optima

optima spe niti, admodumq. firma, quibus, in condenda, atq. instituenda Academia nostra, nihil, praeter Dei gloriam, & communem hominum utilitatem, propositum fuit. Neq. vero actiones nostrae, ut speramus, eiusmodi erunt, ut hanc ad optimas res animorum nostrorum incredibilem propensionem ambigue aliquis interpretari, aut in dubium reuocare possit. apparantur quotidie summa cura, & edentur a nobis diuina doctrina referti, qui pietatem, ac religionem complectuntur, illustres libri. & interim, quasi specimen quoddam, aut pignus nostrae voluntatis, egregia quaedam de locutione Dei, ab excellenti viro conscripta, piis mentibus, ac sacrarum litterarum, idest verae gloriae, studiosis communicanda censuimus. quae duabus maxime de causis, praestantissime vir, tuo nomine decuit esse inscripta: primum quod, suscepto Academiae nostrae patrocinio, nihil praetermittis, quod ad eam ornandam, augendamq. pertineat; & nos, quae a te officia proficiuntur, quibus animis, quam libentibus, quam gratis excipiamus, aliquo item officio tum ipsi tibi, tum ceteris omnibus indicatum, maximeq. perspicuum esse cupimus: deinde, quae de Deo loquuntur, ad quem potius mitti nequum fuit, quam ad eum, qui diuina studia in omni suae vitae cursu, cunctis & opibus, & honoribus anteposuit? qui cum vniuersam de Deo, diuinisque rebus doctrinam accuratissime quaesivit, tum vero cum ipsa doctrina vitae rationem coniunxit, & ut omnes rectam, salutareque viam tenerent, aut, qui diuerterant, in eam reuocarentur, studio, consilio, monitis, auctoritate contendit. nihil obscure fama loquitur de tuis virtutibus. nihil de te aut exiguum, aut dubium.

Rr 4 affertur.

affertur. patent multis, ac certissimis argumentis eximia tua in Christi Ecclesiam merita: colunt te omnes ob doctrinam: imitantur multi ab integritatem: amant ob humanitatem, maximeq. ob rectam, ac simplicem naturam, ab omni fūco, omniq. fastu longissime remotam. praecorenem vero tuarum laudum omnibus horis audimus eum qui summa ipse laude dignus est, Federicum Baduarium, auctorem & conditorem, Deo duce, Academiae nostrae: cui quidem viro tum vitae probitas, tum ex assiduo studio doctrina, & ex diuturno rerum usu prudentia fidem, atque auctoritatem in omni sermone conciliat. ipso igitur non modo approbante, verum etiam hortante, praeclarum de Deo libellum, gravem sententiis, illustrem verbis, ad te mittit, tuoq. dicatum nomini cum omnibus gentibus Academia nostra communicat. quaecum se tibi, suo primum iudicio commota, tuis deinde meritis impulsā, penitus addixerit, eandem observantiam in omni vita praestabit, & ut eam futurae quoque gentes intelligant, ipso, ad quem omnia referimus, summo Deo opem ferente, aliquo merito consequemur Tu interim, quando iam hoc tribuisti humanitati tuae, ut nos susciperes; tribue idem constantiae, ut susceptos tuearis, ac foveas; ita tamen, si nos, tuo praesidio, ac studio dignos idest nostra ingenia in optimis artibus exercentes, nostrasque voluntates ad unam virtutem dirigentes, & audies & re ipsa cognosces.

Venetijs. M D L I X.

AD.

AD . ANTONIVM . CARLONEM
 ALLIFARVM . PRINCIPEM
 IN . SANNAZARII . POEMATA 23

UT est praeclarum, ornatissime Princeps, in arte poetica excellere: sic ea cognoscere, quibus ad illam laudem perveniatur, maximum quiddam, ac difficillimum est. fallitur enim, si quis absoluti poetae partes in eo positas arbitratur, ut, cum metiendi carminis rationem optime perceperit, cum elegantissimarum vocum suppellectilem quasi quandam sibi compararit, addo etiam cum materiem animo comprehensam ordine quodam atq. artificio distinxerit, hisce rebus tamquam egregie munitus ad scribendum se conferat. graviora sunt, quae requiruntur, & ex abditis plurimarum artium ac doctrinarum fontibus haurienda. nam, cum eius consilium, qui hoc in genere elaborat, vel in primis id spectare debeat, ut, voluptati versusum utilitate sententiarum admiscenda, nihilo minus lectorem moneat, quam oblectet; monita vero illa plerumque necessaria sint, ut in vitiis summam turpitudinem inesse, in virtutibus summam gloriam, ostendatur: quomodo hoc sine philosophiae cognitione prudenter ac perite poterit efficere? Iam, si res exigat, ut aut de caeli stellarumque ratione, aut de regionum terrestrium ac maritimarum situ dicendum sit: certe hos locos non potuerit, nisi qui Astrologiam & Geographiam attigerit, commode tractare. itaque, si quis huius facultatis studium eo complexus animo est, ut aliquando, quae litteris mandare studuerit, ea se speret, veluti pictorem

ctorem

AD.

ctorem egregium, omnibus artis coloribus illustraturum
 is omnium fere disciplinarum scientiam, quae ad bene
 beateq. viuendum pertinent, ne prorsus ignoret, necesse
 est. Quod si ad assequendum poetae nomen vbertatem
 illam ingenii a naturam datam satis esse putat; atque
 hac una instructus facile audet canoros illos quidem,
 rerum tamen inanes versus uel domi pangere, vel in tri-
 uis ad populi aures effundere; statim ab intelligentibus
 explodetur, neque solum imprudens aut parum ue-
 recundus, sed etiam plane stultus, ac temerarius ha-
 bebitur. Quo minus est mirandum, si, ut hac arte prae-
 starent, quam paucissimis contigit: cum in omni prae-
 terea liberalium doctrinarum genere plurimi semper
 floruerint. Sed egregiorum poetarum multo etiam maio-
 rem hac nostra tempestate, quam priscis temporibus,
 paenuriam esse constat: siue, quod saeculi felicitas illa
 fuit: siue, quod equidem magis existimo, quia non iis-
 dem, quibus olim, praemiis ad virtutem nunc homines
 excitantur. Eorum autem, quos in hoc genere praestantes
 cognouimus, sine controversia primum locum obtinuit
 vir eximius, & omni lande cumulatus, Iacobus San-
 nazarius: cuius ingenii monumenta non vetustas, non
 obliuio delebit ulla: ut ex tot Regum triumphis haud
 paullo clarior, quam ex vnius hominis doctrina, atque
 ingenio, Parthenope sit futura. Hoc autem, Princeps
 egregie, tui muneris fere totum est: qui, cum ad summam
 generis nobilitatem etiam optimarum disciplinarum sci-
 entiam adiunxeris: tamen haec per se, nisi accederet stu-
 dium de posteris bene merendi, quasi minima iudicans,
 quae cumque a doctis viris mandata litteris, digna, quae
 inter

inter manus versentur, existimas, in apertum ut referan-
 tur, maximopere contendis. Quo nomine ipsi profecto
 Sannazarii manes tibi nō vulgares gratias habent, cum
 eos libros, quos ille moriens tuae fidei commendaret, per-
 uulgandos diligentissime curas. Qui vero ingenuarum
 artium studiis dediti sunt, ii se tibi tantum debere profi-
 tentur, quantum persolui nullo modo possit. itaque a me,
 qui eodem in aere sum, petere videntur, vniuersorum
 causam ut suscipiam, tibi que, propter hoc officium, quid
 omnes de te & sentiant, & loquantur, aliqua ratione si-
 gnificem. Ego, licet ipsa te recte factorum conscientia con-
 tentum esse, nihil praeterea requirere, exploratum ha-
 beam; tamen, ut eorum honestissimo desiderio ne desim,
 do me libenter in eam partem, in quam etiam mea sponte
 propendebam; & ad ostendendum non eorum modo ani-
 mum, sed etiam obseruantiam & pietatem in te meam,
 haec ipsa Sannazarii poemata, quae nostris typis edenda
 curaſti, nomini tuo dicata ad te mitto. Leges hic omnia
 quaecumque ab eo Latine scripta nunc exstant. primum
 autem erit diuinum illud, quod ipse de partu Virginis
 inscripsit, opusculum: deinde Christi lamentatio: mox
 eclogae quinque: quas tamen decem scripserat; sed, e
 Gallia reuersus, has tantum, quas emisimus, & frag-
 mentum illud, quod post Salices collocauimus, inue-
 nit, reliquis aut furto surreptis, aut per incuriam suorum
 quibus eas discendens crediderat, amissis. sequuntur ele-
 giarum libri tres, epigrammatum totidem. quae omnia
 tuo inscripta nomini apparebunt; ut eius beneuolentiae,
 quam Sannazario & uiuo, & mortuo praestitisti, hunc
 saltem fructum percipias. Venetiis. M D XXXV.
 AD.

AD . PIVM . IV . MEDICEM
PONT. MAX.

IN . LIB. REGINALDI . POLI . CARD.

DE . CONCILIO

24



OPTIME consuluit Ecclesiae suae Deus,
atque humano generi vniuerso, cum in
tanta rerum omnium perturbatione, &
extremi iam periculi metu, Vicarium te
suum, Pie **IV.** inter homines constituit, ut omnibus ma
lis prudentia tua mederetur, nosq. a summis difficultati
bus, uel impendenti potius exitio ereptos ad summam
tranquillitatem, et optatam antea magis, quam speratam
felicitatem traduceret. itaque nunc, tuis adducti praestan
tissimis & consiliis, & factis, maxime vero tua freti iu
stitia, quae tibi prima, & antiquissima virtus est, fuitq.
in omni vita, boni viri ex omnibus Italiae partibus, at
que etiam ex transalpinis gentibus multi, ad Urbem
confluunt: &, quia tuas omnes curas eo spectare vi
dent, non ut angustis paucorum annorum terminis tuae
fructus beneficentiae definiatur, sed ut ad posteros
quoque perueniat; hic sibi certam omnium rerum, ac
fortunarum suarum sedem domiciliumque constituunt.
me quidem Venetiis, domestico patris mei restituen
dae antiquitatis instituto, & honeste satis, & com
mode uiuentem, nihilque minus, quam de migratione,
cogitantem, quippe cum ab egregiis saepe ciuitatibus
atque adeo a superioribus Pontificibus semel & ite
rum

rum optima inuitatus condicione, nihil tamen umquam
 noui consilii cepissem; tui Pontificatus fama Romam fa-
 cile perduxit. nam, cum ab summo viro, Hieronymo Se-
 ripando, cui tua sapientia, debitum iam pridem eius inte-
 gritati, atque doctrinae, in Cardinalium Collegio locum
 tribuit, litteras accepissem, in quibus erat scriptum, cupe-
 re te, sacros omnes libros, vel hominum incuria, vel im-
 probitate corruptos, quam emendatissimos peruulgari,
 velleque in eo opera uti, & industria mea; spatii ad de-
 liberandum nihil sumpsi; statim rescripsi, cum tua volun-
 tas maximae legis vim pro summa tua non modo po-
 testate verum etiam sapientia obtinere apud omnes de-
 beat, ita me animatum, ita paratum esse, tibi ut in omni-
 bus rebus libenter obsequerem, susciperem, quaecumque
 velles, agerem, & praestarem, quidquid possem. Quo-
 quidem tempore non mihi aut vlla nouorum commodor-
 um, quibus tamen ducuntur multi, est iniecta cupiditas,
 aut honorum splendor mentis oculos praestinxit: quam-
 quam haec ipsa cumulate & expectari a tua liberalita-
 te posse, & omnibus praeclare agentibus deferri a te so-
 lere intelligebam; sed, cum audirem, eas artes, quarum
 fructus immortalitas est, longo intervallo te Pontifice
 coli coeptas esse, suam religioni, ac verae pietati dignita-
 tem restitui, cedere virtutibus vitia, rationi amentiam,
 libidinem pudori, vim aequitati, haec ego sum secutus,
 haec omnibus & commodis, & honoribus anteposui.
 Erat praeterea mihi non modo laudabile, & honestum,
 sed illustre etiam, & gloriosum, vocari a Pio I V.
 Pontifice ad eam curam, ut sanctissimorum virorum
 scriptis, quibus humano generi salutaris doctrina con-
 tinetur,

tinetur, emendandis, edendisq. praeesset. quo in munere si mihi, non dico magnos labores excipere, (quis enim bono viro labor est pro tuenda Ecclesiae dignitate, id est pro communi salute, recusandus?) sed si vitam ipsam profundere opus esset, egregie mecum actum putarem. Atque ego illam sane incredibilem capio voluptatem, quod, cum praeclarum esse nihil constet, quin, idem operosum, & perdifficile sit, hac tamen in re, omnium pulcherrima, ac praestantissima, plane omnes difficultates tua cum excellens liberalitas, tum singularis sapientia sustulit. quis enim umquam tam libenter pecunias collegit, quam tu libenter effundis, ut exeant optimi libri, alii nondum editi, quorum notitia rectissimam ad fontem veritatis viam ostendit; alii sic emendati, ne qua supersit labes, quae imperitorum animos, obiecta falsae doctrinae specie, possit inficere? quo quidem antea malo nimium grauius laborauimus: utinam iis remediis, quae parantur, omnino liceat conualescere. quod ita facile consequemur, si modo is, qui optimarium, & maximarum auctor, perfectiorq. rerum est assuevit Deus. nam nos quidem, ut opibus valeamus, ut acumine mentis excellamus, quam tamen infirmi simus ad omnia, nisi praepotentis Dei ope fulciamur, quam plane caeci, nisi eiusdem luce regamur, multorum turpissimus & miserrimus exitus ostendit. quis porro assuetum esse Deum dubitet, si sanctissimam illius doctrinam, quam, praeceptis declaratam plurimis, suodemum ipse sanguine, suaeq. mortis exemplo comprobauit, non verbo tantum profitebimur, sed vita etiam, & moribus exprimemus? Hoc tu scilicet, Pie Pontifex

IN. I
tifex, illo
fauente,
dinalium
quod tibi
sed etiam,
sustulit. tu ex
constantia,
inde man
viuendi d
nentia. In
confirma
tambis, &
tes, omni
gius tras
ratum, ab
etiam vel
volente, m
ita fiant, e
cebit, ut i
virtus, &
remq. ref
generale
tudo sen
dissent
rum etia
tu nos, l
gem disti
ad, oboed
seruantia
tua, m

tífex, illo primum vidisti die, quo te in excelsa ista Sede,
 fauente, & approbante diuino Spiritu, omnium Car-
 dinalium sententia collocauit: neque vero vidisti solum,
 quod tibi fortasse cum multis commune esse potuit,
 sed etiam, in quo propria tibi debetur laus, accurate prae-
 stitisti. tu enim ipse tua temperantia, iustitia, grauitate,
 constantia, quales esse alios oporteret, exemplum dedisti.
 inde manauit statim ad propinquos & affines tuos bene-
 uiuendi disciplina: quorum omnium incredibilis absti-
 nentia, humanitas, pudor ciuitatem breui correxit, &
 confirmauit uniuersam. Nunc in illam curam totus in-
 cumbis, ut reliquae partes Ecclesiae, discordia laboran-
 tes, omni a te ratione sanentur. serpit enim quotidie lon-
 gius trās alpinum illud malum, a quibusdam primo igno-
 ratum, ab aliis postea neglectum, postremo a nonnullis
 etiam vehementer auctum. sed, ut hoc placuit Deo, quo
 volente, aut saltem permittente, geruntur ea, quae cur-
 ita fiant, causas indagare nostrum non est: sic eidem pla-
 cebit, ut imminutam Christianae Reip. dignitatem tua
 virtus, & sapientia in veterem integritatem, splendo-
 remque restituat. Instat a te indictum, & institutum iam
 generale Concilium: cuius ea ratio, ea vis, & consue-
 tudo semper fuit, ut, sanctissimi Spiritus interuentu,
 dissidentes animos non concordia solum, & pace, ve-
 rum etiam beneuolentia, studioque coniungere. Hoc
 tu nos, Pie IV. remedio seruabis; errantemque gre-
 gem disiectum varia culpa, tamquam Pastor optimus,
 ad, oboedientiam reuocabis, cōtinebisque in officio, & ob-
 seruantia erga diuinas leges tum perpetua sanctitate
 tua, unde hauriunt omnes exempla omnium virtu-
 tum,

tum, tum vero iis etiam edendis in hac urbe libris, quorum lectio malas & exitiosas euellit ex animis hominum opiniones, inserit eas, quae si coluntur pietate, & beneficentia, uberrimos, & praestantissimos, & plane salutare fructus ferunt. Atque huius quidem tanti, ac tam praeclari muneris initium unde sumi aptius potuit, quam ab eo libro, cuius argumentum & cum ratione temporum, & cum tuis consiliis ac studiis optime congruit? quid enim tempora, quid status Ecclesiae poscit, quid tu optas, curas ue magis, quam Concilium, quod unicum, & certissimum in tanti graui discrimine, tam propinqua communi peste superesse remedium videtur? at in hoc libro, quem tuo iussu primum emitimus, proxima ostenditur ad salutem via, spes omnis in confessione culpae, in vitae ac morum emendatione, in summa demum Pontificis auctoritate collocatur. Quae cum per se maxima sunt, & curandis Christianae Reip. vulneribus utilissima; tum vero ponderis accedit plurimum ab eximia scriptoris innocentia, doctrina, dignitate. quis enim, quibus animi bonis, quibus industriae, ingenique ornamentis abundauerit, qui denique uir, quantusque fuerit Reginaldus Polus, aut ignorat, aut, si quam modo tantarum laudum partem habet cognitam, non earum memoria, & desiderio vehementer commouetur? potest ne quisque tam inops a iudicio, tam auersus ab humanitate, tam plane ferus esse, ac ferreus, qui non intimis eum sensibus dilexerit, cuius non modo in studiis, in moribus, in sermonibus, sed in ipso plane adpectu omnis probitas, omnis luceret humanitas? De religione vero deque Christiani hominis officio

ficio quid senserit, & iudicarit, non aut in uno altero
 ve libro ita ostendit, ut in aliis umquam dissenserit: aut
 ita scripsit, ut aliter uiueret: aut ita vixit, ut interdum
 sibi non constaret: sed omnia, litteris ab illo prodita, sine
 ulla exceptione semper laudarunt, hodieque laudant bo-
 ni, & sapientes viri: quorum directa ad veritatem ipsam
 idest ad unam Dei gloriam sententia nec obtrectandi
 studio, aut inuidia flectitur, nec maleuolentia, aut am-
 bitione mutatur. Vitae vero totius instituta, & excel-
 lentem in omni actione, omnique fortuna pietatem, uti-
 nam, quam facile nouerunt, tam libenter imitarentur
 multi: Opes honores, clientelas, Regum maximorum
 gratiam, & beneuolentiam qui assequuntur, proxime ad
 felicitatem putantur accedere. at ille haec omnia apud
 Henricum, Britanniae Regem, & iure propinquitatis,
 & multo etiam magis sua virtute cum possideret, ultro
 contempsit, ne turpissimas Regis actiones, & aduersan-
 tem Christi Vicario sententiam probare, aut etiam ad-
 iuuare cogeretur. Patavii dum vixit, quamquam erat
 habitu naturae prope diuino, liberalibus tamen disci-
 plinis vehementer deditus: & cum eloquentiae, atque
 philosophiae pari studio flagrauerit, in vira tamen ma-
 gis entuerit, non facile est existimare. illud certe con-
 stuit, qui vel meliora, vel ornatiora scriberet, hac ho-
 minum memoria extitisse neminem. quamquam id ei
 propositum fuit, eo direxit cogitationes omnes, atque
 curas, ut philosophiae scientiam non tam scriptis,
 quam vita ostenderet, itaque maior, atque excelsior
 Patavii in tenui, & humili fortuna fuit, quam cum in
 Regno omnibus copiis, & ipsius maxime Regis gratia
 S s floureret.

floreret. Hic, hic nimirum verus est, ac praestantissimus optimorum studiorum fructus, si quis a se ipso pendeat, si temporum uicissitudines non eximescat, si aduersus hominum iniquitates, fortunaeque iniurias ratione, & virtute pugnet. quam in Polo constantiam, & sapientiam fuisse, quis ignorat? metuendae erant a Rege potentissima insidiae, metuenda vis; propterea quod, suscepta Ecclesiae causa luculento illo de Pontificis auctoritate libro, susceptum simul a se grauissimum eius odium intelligebat. deserebatur etiam quotidie magis a re domestica; fortunis exclusus amplissimis. nemo tamen eum deiecto, aut demisso sensit esse animo, nemo vidit umquam tristiore vultu. in sermonibus, in consuetudine, in conuietibus, in tota denique vitae ratione tranquillitatem mentis, quam habuerat antea, perpetuo retinuit. Nec desuere, quae numquam sperauerat, ac ne cogitauerat quidem, tantis debita virtutibus praemia. nam, cum ita uiueret, ut in uno Deo omnia poneret, cetera, quae mortales admirantur, infirma, caduca, inania duceret; cumque in illa Patauini gymnasii celebritate, domesticis otii suis finibus contentus, paucorum admodum consuetudine uteretur: breui tamen, ut sibi viam facile virtus aperit, ita manauit fama de admirabili eius prudentia temperantia, doctrina, ut ad aures Pauli I I I. Pont. Max. peruenerit. qui cum esset ea mente Praeditus, ut nemo umquam magis de ornanda egregiis Cardinalibus Ecclesia cogitauerit, eo iudicio, ut nemo in delectu errauerit minus; commotus multorum non dubio sermone, Reginaldum Polum, disciplinae Christianae renouandae causa, cum praestantibus aliquot uiris ad Urbem

Urbem acciuit; eumque paullo post non petentem, non optantem prope etiam recusantem, Cardinalem creauit. In hac dignitate, cum alios antea, se ipsum vicit omni genere laudis. Omitto singularem illam, cui par oratio reperiri nulla potest, in caede matris acerbissima fortitudinem, atque constantiam. unicum illi contra omnes iniurias, omnesque calamitates conscientia praesidium fuit: & in aduersis rebus iam antea didicerat esse fortis. grauitatem eximiam, pari comitate conditam, mansuetudinem, prudentiam, benignitatem in sublauanda miserrorum inopia non attingo. communia sint haec, in quibus tamen praecipua quadam laude Polus excelluit. venio ad id, quod a Cardinalis persona proprie postulatur. Nam, ubi primum sacerdotie est ornatus amplissimo, non ille mentem, ut multi, cum fortuna mutauit; non sericam uestem, non argenteam suppellectilem, non denique illustrem aliquam, aut opimam prouinciae praefecturam appetiuit; sed, contempta prorsus rerum humanarum specie, diuina studia, quae antea non leuiter attigerat, toto pectore complexus, de tuenda Pontificii iuris maiestate, de augenda inter homines Dei gloria, de illustranda ueritate dies noctesque cogitare coepit. quantum enim in ea philosophia, quae a sensibus ducitur, erroris insit, atque obscuritatis, cum antea non ignorasset, tum vero, totus ad eam philosophiam traductus, quae caelestium bonorum cognitionem parit, clarissime perspexit. iam, illam, quae colligitur ex rectorum praeceptis, eloquentiam, in qua praeter ceteros antea floruerat, neglexit penitus, inanemque duxit, cum sacrorum librorum uoces, non auxium voluptati

Sf 2 seruientes,

seruientes, sed ad intimas animorum partes incredibili quadam suauitate penetrantes, exaudiuit attentius. Nec vero quidquam habuit antiquius, quam ut a sanctissimis Ecclesiae legibus discedentes, quoquo modo ad sanitatem redirent; cum ipse multos cohortatione sua, consilio doctrina, nonnullos etiam lenitate quadam ad meliora consilia conuerteret. Incidit tempus, cum de sufficiendo post obitum Paulli III. Pontifice habenda Cardinalibus deliberatio esset. affuit Polus ita sedato animo, ita cupiditatis, & ambitionis expers, ut, maiore Collegii parte Pontificatum ad eum deferente, non statim assenserit, differendamque rem tantam in posterum diem censuerit: fore enim, si probaret Deus, eundem post aliquot horas Cardinalium consensum: sin minus, omnino sibi, quod Deo displiceret, placere nihil posse. Scripsit etiam in eo Conclauis praeclara quaedam de officio Pontificis: quae cum aliis eius libris, quos Ioannes Moronus, Cardinalis ob summa erga Sedem Apostolicam merita, perpetuamque vitae innocentiam clarissimus, accurate seruauit, propediem in lucem proferentur. quibus in libris cum spirare adhuc mens illa diuini hominis, & vigere videatur; afficimur non tam praeceptis, atque doctrina, quam recordatione tantarum virtutum, quas in illo vidimus. Vitae clausula fuit, in qua ostendit lumen animi, ingeniiq. sui, Britannica Legatio. nam, cum in illa insula per annos multos, duorum Regum imperio, Henrici primum deinde Odoardi, eius filii, legitimus Dei cultus intermissis optantibus, obsoleuisset; cumque, interitus Odoardi, succedente eius sorore Maria, spem aliquam reuocandae pietatis

tatis, & religionis attulisset; visa est unius maxime Poli
 sapientia rectam errantibus viam monstrare posse, adiun-
 cta praesertim auctoritate tanta, quantam nec sine vir-
 tute dignitas vlla pareret, nec sine dignitate virtus in ea
 legatione optimos Reginae sensus confirmavit; principi-
 bus viris, & multitudini, persuasit, ut novam heresim,
 Henrici nefaria libidine inductam, abiicerent veterem
 sacrorum disciplinam, rationemque susciperent; cum Ec-
 clesia, si salvi esse vellent, in gratiam redirent; unum
 esse Romae, potestate summa, Christi Vicarium, in quo
 creando commotae Spiritu sancto Cardinalium mentes,
 ex vetere multorum saeculorum instituto tradita per ma-
 nus consuetudine, consentirent: quaecumq. ille sancir-
 et in terris, ea firma & rata in caelo esse: cetera com-
 muni saluti vehementer aduersari, hominum seditioso-
 rum, vel Satanæ potius ipsius inuentaq. ut genus hu-
 manum, sit possit, uniuersum perdat, suaeq. socios ha-
 beat plurimos infelicitatis & culpae. Mansit in of-
 ficio, & fide, quam diu Polus, & Regina vixerunt,
 Britannica natio, utriusque innocentia, & sanctitate, al-
 terius etiam sermonibus, praeceptisq. commota. Postea
 cum utrumque Deus, cuius abdita consilia non assequi
 tur humana mens, ad caelestis vitae praemia vocasset,
 lapsa est iterum, & concidit illa gens, destituta consi-
 liis, quibus antea nitebatur. itaq. ad finitimas nationes
 peruasit haec pestis, & dira contagio, nec videretur pos-
 se consistere, nisi tua, Pie I V. Pont. Max. sapien-
 tia singularis occurreret, Tridenti in dicto Concilio,
 Romae omnibus rebus ad rationem, aequitatemq. re-
 uocatis. Quod vero etiam eorum scripta, quos in bea-

torum numerum iure olim Ecclesia retulit, integra, deletis omnibus maculis, peruulgari iubet: quod excellentē nobis Reginaldi Poli, amissa eius voce, doctrinam restituit: mirum est, quam vehementer adiuues communem causam, quantum se tibi pro ista mente, istaq. cura omnes homines debere fateantur, quantam ab ipso Deo, qui tibi nostram salutem commisit, gratiam, & beneuolentiā ineas. Haec sunt illa merita, quibus hominum vita, breuissimis circumscripta finibus, ad infinitam memoriam propagatur: haec illa, numquam satis laudata, uetere um Pontificum instituta, quibus hanc nobis Ecclesiam tam praeclare fundatam, exstructamq. reliquerunt. quae uti nam, sicuti propria tua sunt, ita perpetua esse possent. nemo enim dubitat, quin, optare tibi perpetuam vitam, idē sit optare nobis perpetuam felicitatem. nec vero cuiquā bono viro tanti est huiusce lucis usura, quin de sua detrahetum aliquid vita libenter, si possit, in tuam conferat. sed quoniam hac lege huc omnes ingredimur, ut aliquando discedamus; nec licet nobis in te vno singularem conditionem pro tua singulari beneficentia postulare: saltem, ut quam diutissime te praesente perfruamur, & petimus a Deo supplices, & futurum pro summa eius erga nos clementia confidimus. magna enim sunt, quae iam inchoasti: maiora tamen, quae mente designas. nihil vulgare cogitas, nihil humile, nihil angustum: metiris omnia tua dignitate potius, quam communibus exemplis. praeclare, non enim Pontificiae laudes in mediocritate versantur: nec decet, qui potestate, & honore cunctis hominibus antecellat, eum ab ullo homine recte agendi cupiditate, studioque superari. In te igitur, Pontifex Max.

primum

primum tuendae, atque amplificandae religionis, deinde
 eius otii conservandi, cuius auctor, & custos antea fui-
 sti, sita spes omnis est. a te honesta studia, a te liberales
 disciplinae, a te ipsa virtus ornamenta sua repetit. tu,
 quod facis, & fecisti egregie, perpetuo facies, ut om-
 nes gentes diuturna pace, iustitia, pietate foveas; ur-
 bem Romam operibus magnificentissimis, & cum ipsa
 antiquitate comparandis, exornes; civitatem, tui studio-
 sissimam, superiorum temporum calamitatibus afflictā,
 perpetua benignitate recrees; denique tollas aliquando
 ex imperitorum animis dubitationem illam, quae lau-
 dabilia multorum studia remoratur, utrum res maximas
 fortuna possit sine virtute perficere, an virtus, quo con-
 tendat, sine fortuna peruenire. de quo quid sentires ip-
 se, ostendit iampridem tuae vitae ratio; nunc, ut omnes
 idem sentiant, facile unus praestare potes, restituta iis
 artibus dignitate, quae te talem, tantumque fecerunt, ut,
 quales ipsae, quantaque essent, ope tua, studioque om-
 nes mortales intelligerent.

I N . L I B R V M

FRANCISCI. VARGAS

DE. IVRISDICTIONE. EPISCOPORVM

ET

SVMMI. PONTIFICIS

AVCTORITATE

25

IN Tridentino Concilio, singulari, atque divina
 PII Quarti Pont. Max. sapientia constituto, cum
 Ss 4 aliae

aliae res, vel antea parum exploratae, uel astutis hominum consiliis immutatae, atque corruptae, in consultationem controuersiamq. uenerunt, tum uero grauis illa, & perdifficilis de iurisdictione Episcoporum, & summi Pontificis auctoritate exorta quaestio est. qua in deliberatione cum illi Patres illi, vitae innocentia, doctrinaeque insignes, dissiderent, uix ut aliquando res conuenire posse uideretur: Pastor optimus, ut est animo semper ac mente in grege seruando, tuendaq. communi salute defixus, incubuit in eam curam, ut, adhibitis in consilium lectissimis Cardinalibus, hunc nodum expediret. & quoniam Francisci Vargas, Catholici Regis Oratoris, in maximis rebus antea saepe spectata uirtus erat: expedire in primis Reip. uisum est, talem uirum, cum tanta res ageretur, interesse. Qui cum esset accersitus a Pontifice, rogatusq. ut ea diceret, quae ad Apostolicae Sedis dignitatem, idest ad Christi gloriam, & salutem animorum nostrorum pertinere uehementer duceret sententiam dixit grauissimis ornatissimisque uerbis, ea doctrina refertam, ut nihil aut e sacris litteris, aut ex antiquarum legum, Canonum uel fontibus deriuari possit, quod ille non & memoria, scientiaque comprehendisse, & summarum rerum, in quibus aetatem fere totam contriuit, experientia comprobasse uideretur. excepta est perattentis animis eius oratio; magna est omnium Cardinalium, praecipue uero ipsius Pontificis, cuius ut potestas, ita iudicium, sapientiaque eminent, assensio consecuta. Et, quoniam, quae tum quisque sensit, eadem ut mandata litteris ad Tridentinos Patres mitterentur, Pontifex adinuandae cupidus publicae causae

iam

iam decreuerat: de Francisco Vargas hoc amplius placuit, ut eius Responsum (sic enim inscriptum est) impressum ederetur. Est hoc quoque P 11 Quarta diuinæ liberalitatis, ac beneficentiae, ut, unde aliquid ad commune commodum emanare possit, id non latere in tenebris, aut paucissimis impertiri, quod angusti, ieiunij. nimium animi est, sed peruulgari ad omnium gentium utilitatem uehementer curet. porro, si nihil est religione utilius, quae beatam, aeternamque uitam una largitur: quantamuis debemus gratiam, qui suam industriam eo totam conferunt, ut, nouis quorundam opinionibus, quas insecta dicam, an improbitas peperit? consutatis, ueritatem ipsam suae doctrinae lumine ita patefaciant, atque illustrent, ut a nemine iam, nisi plane impio, uocari in controuersiam possit? quod in hac maximi ponderis quaestione, quae per aliquot menses plurimorum hominum ingenia, mentesque torsit, Francisci Vargas praestanti beneficio consecuti sumus. uir enim egregius laboranti publicae causae multis nominibus opem tulit, doctrina primum, tot annorum studio collecta, deinde prudentia, quam a natura acceptam diuturnus rerum maximarum usus uehementer auxit: tum integritate uitae, sine qua inanis prudentia, perniciofa etiam doctrina omnis est, postremo auctoritate tanta, quantam capere uidetur ea persona posse, quae pro summo omnium, quos meminimus, aut legimus, Imperatore Carolo Quinto, eiusque dignissimo filio Philippo, Catholico Rege, grauissimis in muneribus, ac legationibus primariis, temporibus difficillimis, diutissime tractata sit. haec igitur ubi coniunguntur omnia, quae

quae per se singula in paucis excellere videmus; praeclaram quiddam, atque excellens fieri necesse est. nec nos veremur, cum haec simul uniuersa tali viro tribuimus, ne nos aliquando res ipsa redarguat, eiusque scripta, cum legentur, ita expectationi non respondeant, ut ei falsam affinxisse laudem vel gratiae causam, vel iudicii errore videamur. perfecta virtus laudem quasi fructum non quaerit; cognita, testimonio non indiget. id ipsum, lector optime tum ex hoc Responso, quod nunc, a multis iam expetitum, exit; tum ex reliquis eiusdem libris, qui propediem, ut spero, consequentur, facile iudicabis. id modo unum exopta, ne propensam ad bene merendum voluntatem casus aliquis impediatur, aut valetudinis moretur infirmitas.

Romae. M D L X I I I. Kal. Oct.

AD. CAROLVM. BORROMEIVM

C A R D I N A L E M

I N D. C A E C I L I I. C Y P R I A N I. O P E R A 26

MAGNA in molestia versor, Carole Borromaeie, praestantissime Cardinalis, quod auunculo tuo Pio I V. Pontifice, cuius & benignitas, & sapientia, veterem dignitatem restituere bonis artibus facile poterat, vereri saepe cogor, ne publica incommoda, & aduersi communium temporum casus, cursum optimae voluntatis impediatur: maximique inter homines operis, atque pulcherrimi perfectionem desideremus. nec vero, ubi resideat tanti mali culpa, reperire difficillimum est. optimis rebus difficultatem asserunt vitia nostra, ita Deo per-

mittente.

mittente, ut aliquando respiscamus . nam , si homines
intelligerent, quod tu optime intelligis , Borromaeie
prudentissime , quanti sit , ac semper fuerit, ab vno Deo
expectare omnia, inania ducere, quae a nostris confi-
liis proficiuntur : primum illud consequerentur , ut iu-
cunde viuerent , soluti molestissimis curis, quibus in om-
nium rerum affluentia ne magni quidem Principes va-
cant ; deinde , quae metuere solemus aduersa , ea vel
nulla umquam acciderent , vel nullo statim negotio de-
pellerentur . nunc aliter euenit . dum enim a nostris in-
geniis , opibusque secundus res petimus ; dum & ma-
gnificas aedes , & ingentem agri modum, & auri , ar-
gentique vim, quae ne bona quidem sunt , sola esse bona
credimus : eaque consecuti , quasi nobis dati sint obsides
perpetuae felicitatis , ita nihil timemus incommodi ; de-
stituti saepe diuino praesidio , iure plectimur , e maxima
laetitia in maximos luctus, miseriaeque coniecti . vterer
priuatis exemplis, nisi publica nimium etiam multa sup-
peterent . Vidimus , graui Christianae Reip. damno,
ardentem diu civili bello Germaniam ; cum exitiosa di-
scordiarum semina, mentibus iniecta multitudinis impe-
ritae , Principes ignari quid existere malorum posset,
auctoritate, opibus , armis denique fouissent . inde
sibi plebs infima , ut est cupida semper nouarum rerum
licentiam arbitratu suo viuendi, simulatione ac specie
religionis , arripuit . ex eo nequitia primum , & ince-
stus , deinde vis , rapinae , caedes , quaeque proposita
impunitate nascuntur mala , passim consecuta sunt . pen-
dent enim a diuinis humana iura . illa si contemnamus,
haec non facile uebimur : illa si labefactentur , haec
statim.

statim corruent. sublato igitur, qui per tot saecula vi-
 guerat, summi Dei cultu, perturbata sacrorum rituum,
 veteri disciplina, locum suum retinere diutius nec hone-
 stas, nec pietas potuit: periit fides, & omnis inopiae sub-
 leuandae consuetudo; illa vero, minimi pendentis huma-
 na omnia, uni Deo seruientis animi demissio, qua nul-
 la magis hominem Christianum virtus decet, quae, tam-
 quam hesperus, aut lucifer inter sidera. sic ipsa inter vir-
 tutes reliquas praecipue fulget, extincta penitus est.
 tum & domestica bella, populis varie dissidentibus,
 exorta; & externis hostibus, Christiano semper nomini
 crudeliter infestis, ad vniuersorum perniciem patefa-
 ctus aditus est: quosque antea tot ciuitatum, ac princi-
 pum, integrae vires, atque coniunctae facile sustinere
 irruentes, ac repellere potuissent, nunc ut eorum impe-
 tum imminutae, atque distractae, ferre possint, speran-
 dum vix est. Quid reliquae provinciae? satis ne va-
 lent, & alieno malo doctae sibi cauent? immo, quasi sit
 in dolore voluptas, in exitio salus, ita se libenter in ean-
 dem flammam pleraeque coniiciunt. vincere iam coe-
 pit humanam medicinam morbus: proxima quaeque
 corrumpuntur: nec iam vllae possunt aut artes homi-
 num, aut vires tantam pestem a finibus auertere.
 Gallia quidem, opibus antea florentissima, semper ho-
 stium religionis expultrix, semper inuadentibus Ec-
 clesiam monstris inimica, nunc, alienatis multorum
 animis, deformata domesticis cladibus, adpectu mise-
 rabili, paene procliuis ad perniciem labitur. nec peri-
 culo vacant finitimae gentes: quae si forte, quod auer-
 tat diuina clementia, insanire coeperint; verendum
 est,

est, ne malum erumpat, quod ferri non possit. nec vero nos, nisi praesidio nitamur innocentiae, quo uno seruari possumus, & vincere, vel excelsa asperrimarum alpium iuga, vel amnes rapidi, aut munitae arces, lectaeue militum copiae defendent. communibus remediis communes depelluntur morbi: nunc, in extremum adducta discrimen salute publica, exquisitam quandam, & plane singularem curationem rei magnitudo postulat. corrupta iampridem vitae ratio Deum extendit; eadem placabit emendata. huc igitur studia conferenda; huc intendendae sunt curae. quod quamquam ad omnes pertinet, cum in communi periculo commune officium requiratur: praecipuae tamen eorum partes videntur esse, qui, summo in gradu dignitatis, atque honoris, tamquam in specula, constituti, oculis patent omnium mortalium, ut nullum, prorsus eorum neque dictum, neque factum obscurum esse possit. Quæramus, quarum rerum amore flagrauerint, aut quibus artibus adiutum sibi in caelum aperuerint primi illi nostrae religionis antistites, quos ecclesiis moderandis praefecerat Deus: reperiemus eos, tamquam in hac vita peregrinarentur, ita semper, obuia quaeque contemnentes, ad caelestem patriam, optimique parentis Dei, qui nos ad se vocare nunquam desinit, adspectum, amplexumque properasse. quam multos e sacrarum litterarum monumentis, & ex memoria vetustatis licet eruere, quorum omnes vitae partes ea, quae nos in malis ponenda censemus, paupertas, exsiliium, carcer, mors denique illustrauerit; cum saepe in maximis incommodis, atque adeo inter exquisitissima tormenta, corporis dolorem ani-

mi

mi laetitia superante, quam hoc suaue est, dicerent, &
 immortalis Deo pro tam insigni munere gratias agerent.
 Non longe abeamus. est ne quisquam, aut esse potest.
 beato Caecilio Cypriano, cuius nunc emendatissima scri-
 pta emittimus, aut vitae sanctitate, aut mortis constan-
 tia maior, & clarior? quam ille se gessit in omni uita
 abstinenter, & pie? in Episcopi autem officio, ac mu-
 nere quam non attigit, immo quam non absoluit magno
 dignam praeside virtutem? exstant de eo prodita litteris
 aeternaeque consignata memoriae praeclara sanctorum
 hominum testimonia: sed in re nota, atque ante oculos
 posita, testibus non egemus. vitae illius prope animatam
 imaginem in libris, quos reliquit, verissimis expressam
 lineamentis intuemur. quantus est in tuenda Eccle-
 siae Catholicae dignitate? quam seuerus in retinenda
 vetere disciplina? quam acer in condemnandis no-
 uarum opinionum auctoribus, in contumacia inse-
 ctanda, libidine comprimenda? quae sententiarum
 grauitas, verborum vis, doctrinae praestantia? nemo
 ita languet, aut ita friget in cupidate summi boni,
 qui non excitetur, & quasi facibus admotis incen-
 datur, cum eius epistolas legit. Iam reliqua eius do-
 ctrina quos fructus affert, quam vberes, quam saluta-
 res? doceamur exoriri calamitates omisso veri Dei cul-
 tu; haerese gigni Pontificis auctoritate contempta; qui
 virginitatem, & pudicitiam colat, ei proposita esse
 maxima in caelo praemia; qui Ecclesiae praesit, aper-
 to animo ac simplici esse oportere, prudentia tamen
 ita tectum, ut insidiis minime pateat communis inimi-
 ci. plane omnes veterum philosophorum libri, praece-
 ptis

ptis referti comparandae virtutis, si cum Cypriani sermo-
nibus conferantur, inanes, & paene pueriles videbun-
tur. Sumantur in manus, quae de eleemosyna, ac be-
nignitate litteris mandauit: statim omnes, si quae resi-
dent in mentibus nostris, auaritiae sordes exhauriri, &
infundi eximium erga pauperes amorem sentiemus. Gra-
uis est, & late patet inuidiae morbus: at hic rationibus
egregie curatur, ex intima Theologia depromptis. Ve-
xamur calamitatibus, & aerumnis, quibus proposita
ex hominum vita: praeclaram audiamus Cypriani uo-
cem ad patientiam cohortantis, exemplo multorum al-
lato, qui nihil acerbum, aut malum praeter culpam
umquam duxerunt, & cum illo immenso sempiternae
vitae lucro libenter omnes huius exiguae vitae fructus
commutauerunt. Exstat etiam ad Martyres, primum,
ut cum dolore pugnent, acerbissimisque cruciatibus foris
animo resistent, prudens & pia cohortatio; deinde, quod
morte vitam quaesierint, & ex hostibus Dei victo-
riam reportauerint, amoris & gaudii plena gratulatio.
Neque vero aliter sensit, aut sui dissimilem se praebuit
in extremo vitae die: sed, cum ita semper vixisset, ut ob-
scure, inglorieq. decedere non posset, ita decessit, ut hoc
vno vel obscurissimam vitam illustrare posset. Multa
praetereo; nec sane persequi conor omnia; ne suscepisse
hoc videar, ut Cyprianum debitis ornem laudibus: quod
ut ego sentio, vel pro eius dignitate nemo, vel solus ipse
praestare posset. Verum haec me commemoratio cum
ipsa per se delectauit, tum quod in ea beneficii tui ma-
gnitudinem, & praestantem ad bene merendum natu-
rae propensionem agnoscebam, qui totus in eam cu-
ram

ram incubueris, ut omnia Cypriani scripta, mendis ante deformata, nunc in veterem illam integritatem, ac speciem, acersito etiam Verona mirae vetustatis exemplari, accurata doctorum virorum industria restituerentur. quo sane nomine, incredibile dictu est, quantum se tibi omnes boni debere fateantur. quamquam neque nunc primum, neque hoc vno tuos ad laudem impetus argumento cognoscimus. Omitto illa superiora, qualem te praestiteris in patria, qualem in Ticinensi gymnasio; cum nihil praeter verum decus, veramq. gloriam cogitans, Francisco Alciato, singularis doctrinae viro, iuris prudentiam publice proficenti, operam dares. sint haec in tuis laudibus minima: non quia, si spectentur sola, maxima videri non debeant: sed minora maioribus obscurantur: & angustior ille fuit privatae vitae campus, quam ut in eo tua virtus commode posset excurrere. itaque, Romam traductus ad publica negotia, parem facultati materiam nactus, dum te fingis quotidie ad exemplum sapientissimi Pontificis, anunculi tui, quotidie te ipsum vincis bene agendo adiuuante naturam imitatione, quemadmodum sine praestanti natura parum proficeret imitatio. ab hac disciplina fluxerunt illa, quae quam paucis contingant omnia, ignorat nemo; in consilio gravitas, in laboribus patientia, nihil in potestate insolens, nihil in opum abundantia dissolutum, seuerissimis omnia continentiae legibus adstricta; ut ab eius personae, quam sustines, dignitate numquam oculos deflectere, sed illud perfectum, absolutumque decorum, cuius & studium, & splendor magna ex parte iam obsoleuit, assidue spectare videaris. Iure igitur quotidie tibi sum-

mae

maeres a summo Pontifice committuntur: iure se in
 tuam clientelam, quasi portum quendam in tantis ho-
 rum temporum tempestatibus tutissimum, ac saluta-
 rem sperantes, conferunt omnes boni. tuum est, agentem
 patrocinio communem causam suscipere; & opinari,
 quod auunculus tuus, immortalitate dignus, iam pri-
 dem sibi persuasit, egregiaeque praestitit, duas maxime res
 a principe viro postulari, unam, ne quid reprehensione
 dignum committat; in quo tu excellis omnium consen-
 su, alteram, ne quid laude dignum praetermittat; quod
 aliquanto est optabilius, atque praestantius. nam, vacare
 culpa, est illud quidem, his praesertim moribus, egregium
 eiusmodi tamen, ut in privati hominis condicione subsi-
 stat, ad principis ornamenta non perueniat. vera virtus
 actione gaudet; vim suam longe lateque diffundi, & pro-
 pagari sua bono cupit; eoque ipso alitur, & augetur. cete-
 rae enim res, cum communicantur muniuntur: ex vir-
 tute quantum ad alios, manat, tantundem ad ipsam acce-
 dit. Quae tibi profecto saepe in mentem uenerunt; ne-
 que haec melius cuiusquam oratio, quam tu vita expri-
 mis. me tamen cum incredibilis quaedam erga te obser-
 uantia, ut Cypriani libros tibi inscriptos emitterem, ad-
 duxisset, eadem impulit obseruantia, & perpetuus in ip-
 sam uirtutem amor, ut haec scriberem. tibi enim, quam-
 quam neque cohortationi tua bonitas, neque admoni-
 tioni prudentia locum relinquit, ueruntamen, ut studio
 meo satisfacerem, liberales disciplinas commendare
 cupiebam: reliquis autem, qui haec legent, quid ab ex-
 cellentibus animi tui bonis sperari posset, significandum
 arbitrabar.

T i IN.

I N . E D I T I O N E

CONCILII TRIDENTINI 27

QVI de Catholica fide recte sentiunt, fatentur omnes utilissimum fuisse humano generi, atque adeo salutare Concilium Tridentinum, quod eximia summi Dei erga nos clementia, Pii IV. Pont. Max. sapientia singulari, mirifica Legatorum Cardinalium, qui praesuerunt, vigilantia, maximo etiam Imperatoris, Regum Rerumpublicarum, Principum, & Patrum, qui interfuerunt, consensu, ita confectum obsoletumque videmus, ut exitiosam illam animorum pestem, quae quotidie serpebat, latius, nunc quidem aliqua iam ex parte compressam esse, breui autem, ope diuina, cunctis populis & nationibus ad communem salutem consentientibus, prorsus tolli posse omnes confidant. quo merito gratiae sunt habendae primum immortalis Deo maximae, unde bona manant omnia, deinde Pio IV. qui hoc spectauit unum, & in hoc potissimum ab illo primum die, quo summam inter omnes homines potestatem, delatam diuinitus, accepit, fixit curas, & cogitationes omnes, ut communibus malis generali Concilio mederetur; quo saepe remedio Christiana Respublica erumpentibus vitis occurrat, & impendentes ex dissensione, atque discordia calamitates euitauit. Hoc beneficium disseminari quamprimum, ac distriqui per orbem terrarum, ad propagandam veritatem, & diuulgandam Ecclesiae Catholicae sententiam, necesse est. itaque nunc eduntur puri Canones, & ipsa Decreta, cum appendice nullastatum ut ea cognoscantur, quae
primum

primum Sacrosancta Synodus, in Spiritu sancto legi-
me congregata, deinde Pontifex ipse confirmando serua-
ri pariter ab omnibus in perpetuum iussit. nam reliqua
Concilii acta, diligentissime per scribas publicos in ipso
Concilio excepta, & litteris mandata, mox ita emitten-
tur, ut, quaecumq. res in controuersiam uenerit, quaecum-
que vel sententia dicta, vel oratio habita sit omnia deni-
que agitata, quaesita, deliberata, suo quidque loco, distin-
cte, & abundanter ab exponantur. Interim accipe sum-
mam rei, lector optime, quae ad salutem uehementer per-
tinet: uniuersam uero Tridentini Concilii, trium Pontifi-
cum distinctam temporibus, historiam, eodem, cuius ad
gloriam haec omnia diriguntur, iuuante Deo, propediem
expecta. nullam enim tanti negotii partem ignorare, nō
modo iucundum est, uerum ad multa etiam utile, & ac-
commodatum: quod aliorum Conciliorum lectio declarat.

Romae, M D L X I V.

CLEMENTI . MONILIANO
CARDINALI

CUM tibi, Clemens Moniliane, Cardinalis am-
plissime, multis nominibus debeam, nullum tamen ha-
beo tuae benignitatis argumentum illustrius, quam
quod ingenii, doctrinaeq. tua thesauros, cum qui-
bus nihil comparo, saepe mecum uel scriptis, uel ser-
mone communicas. quis enim est ita deditus rerum hu-
manarum studiis, itaq. falsae voluptatis delentus il-
lecebris, quem tua uox ad caelestium bonorum con-
templationem, admirationemq. non facile conuertat?

Ti 2 quem

quem tua pietas, non adumbrata leuiter, sed expressa
 moribus, dictis, scriptisque tuis, ad uerae uirtutis amorem
 non traducat. Quae cum ipse mecum cogito, quo nihil
 ad meam utilitatem facio libentius; ita mihi gratulor,
 ut ad multos, atque etiam, si fieri possit, ad omnes eun-
 dem fructum cupiam peruenire. caput enim illud religio-
 nis nostrae primum est, prodesse quam plurimis. ad hanc
 nos uoluntatem, & consuetudinem informauit, hac nos
 erudit disciplina magister omnium sapientissimus, aeter-
 nae salutis auctor & largitor, Christus. itaque, cum vo-
 lumen illud tuum Theologicarum Disputationum sa-
 luberrimis, sanctissimisq. refertum documentis, anno
 superiore multis efflagitantibus impressum, tuaq. mox in-
 dustria ita locupletatum, ut aliud prope videri posset,
 accurate legissem; admiratus rerum praestantiam, co-
 piam, varietatem, ordinem; praesertim vero duos il-
 los, nuper additos tractatus admodum egregios, unum
 de Caelibatu, alterum de peccatis, quibus ne optare qui-
 dem melius quidquam licet; contendere a te coepi, ut
 eundem librum iterum ederes, & Catholicorum pias
 mentes aleres cibo iucundissimo; pestiferis autem hae-
 reticorum opinionibus, latius quotidie serpentibus, pro ea
 facultate, quam tibi Deus optimus maximam tribuit,
 obsisteres. In quam sententiam cum tu iam antea tua
 sponte propenderes; (nihil enim tibi vel est, vel fuit um-
 quam Sedis Apostolicae dignitate carius, nihil anima-
 rum communi salute antiquius; eo spectant studia tua;
 eo dirigis omnes curas:) factum est, non tam meis, quam
 coniunctis multorum precibus, ut exirent denuo lucibra-
 tiones tuae, & frueretur non modo aetas nostra, sed
 etiam

etiam posteritas ipsa, minimo suo labore, maximis laboribus tuis. Cum enim tibi propositum fuerit, ea, quae ad vitam pie sanctaeque traducendam Christiano homini necessariae plane sunt, quae innumerabilibus prope libris dispersa, nec interdum satis dilucide traduntur, in unum ita colligere, ut confusis ordinem, obscuris lumen, dubiis certam notitiam redderes; id ita consecutus es, ut hoc tuo libro, quod ad res attinet, nihil uberius, quod ad verba, nihil breuius difficillimum est, nihil planius, apertius, communis esse possit. Quo quidem nomine & tibi, & Christianae Reip. uniuersae tantum gratulor, quantum res ipsa postulat: postulat autem quantum cogitatione vix quisquam comprehendere, verbis quidem assequi nemo potest. Romae, M D L X V. mense Sept.

Ti 3 AD.

AD. ILLVS. ATQVE. EXCELL.
IACOBVM. BONCOMPAGNV
IN. ORATIONIS. CICERONIS
PRO. ARCHIA. POETA
COMMENTARIVM

CVM mihi tuae primum virtutis, ac dignitatis, de
inde eius, qua me es complexus, beneuolentiae in
mentem venit: (venit autem saepissime) tibi quidem
animo ac mente pro meo erga te singulari studio vehe-
menter gratulor: ego autem, ut eius felicitatis, quae
in hominem cadere possit, haud minimam partem
assecutus, laetitia fruor tanta, quantam animus meus
capere maximam potest. rursus cum recordor, omni-
bus ad te quotidie honoris causa confluentibus, quo-
rum ego in te colendo atque obseruando nemini conce-
do, me unum tribus fere mensibus ad te non venisse:
quamquam intermissi causas officii, ut opinor, habeo
satis iustas, vel calores perpetuos, quibus maiores non
meminimus, vel aetatem, imbecillitatemq. meam; qua-
rum altera quietem postulat; altera non modo postu-
lat, verum etiam flagitat; peccasse tamen mihi videor;
& quasi excusationem accusatio vincat, ita sensibus
angor intimis, & in grauissimo dolore versor. Atq.
haec quidem aliquanto etiam acerbior cogitatio esset,
nisi perspecta mihi & cognita naturae tuae facilitas,
& singularis humanitas certam plane spem afferret,
nihil mihi obesse apud te, nihil detrudere prorsus aut
de amore

de amore tuo, aut de iudicio absentiam meam. quod quidem abs te, artium optimarum a pueritia studiosissimo, eo facilius debeo impetrare, quia non ego, ut alii feriatus aestu maximo sum, non me languori, non inertiae, aut de fidiæ tradidi, nec rursus quibusdam voluptatibus, quæ cum ab ætate mea, tum etiam a voluntate abhorrent, operam dedi, sed ad explanandas (Ciceronis orationes ex instituto meo totus incubui. quid autem his tribus mensibus, quibus vacationem sibi quandam a negotiis plerique sumunt, ego in hoc negotii genere, omnium, ut arbitror, nobilissimo, præstiterim, cum cuperem te intelligere, ut quasi rationem otii mei redderem, feci ut ad te mitterem non quas a quo die ad te veni orationes explicavi; ne molesta fortasse in magnis occupationibus, aut parum iucunda tibi copia esset; (decem enim illæ omnino sunt) sed unam tantum, eamque satis breuem, pro Archia poeta, sane luculentam, & ornatam: in qua studia illa, quæ ab humanitate nomen acceperunt, quibus uterque nostrum mirifice delectatur, in caelum laudibus extolluntur. Equidem spero fore, ut, quemadmodum ego, cū interpretabar, voluptate me perfundi maxima sentiebam sic tu, cum & ipsam orationem, & meam simul interpretationem leges, (simul enim utramque mitto) non minorem animo voluptatem capias. quod si ita erit, vberimum tulisse me fructum industriae meae putabo: et quod operis superest, ad id eo fiam alacrior, quo tibi magis, multas virtutes cum litterarum gloria coniungenti, quæ ceteris, hæc studia colentibus, placere & probari mea scripta uelim. Opto ut valeas, meque ut facis, perpetuo diligas. Ex aedibus, prid. Kal. Oct. M D LXXII.

Tt 4 AD.

AD. EVNDEM. ILL. ATQ. EXC.
IACOBVM. BONCOMPAGNVN
IN. HYPPOLITI. CAPILVPI

V E R S V S

SAEPE mihi, clarissime, ac praestantissime IACOBE, venit in mentem gratulari, quod Romae sim: non quod urbis ornamenta, & illa, quibus multorum oculi pascuntur, antiquitatis miranda uestigia me capiant, quae tamen numquam contempsit: sed quod in ea ciuitate vitam agere, quae otio, libertate, copia rerum, omnium, omni denique virtute, virtutumq. principe iustitia floreant, & in qua haec ipsa vel eadem perpetuo, vel etiam praestantiora, GREGORIO XIII. Pont. Max. fore videantur, ita incundum est, ut ad summam felicitatem prope nihil deesse videatur. Haec ego mecum saepe libenter cogito, multo etiam libentius, cum illud addo, frui me beneuolentia tua, esse in clientela tam illustri praestantis ingenio, honore, auctoritate iuuenis, ea nobilitate ornati, quae uera demum nobilitas est, cum ab una virtute, summisq. erga remp. studiis, ac meritis originem ducat. Nec vero, quae meae sunt partes, ne me tanto bono prorsus indignum praebeam, eas ut quisquam iure desideret, committo. quamquam enim, dispari fortuna, paria esse officia non possunt; gratiae tamen referendae facultates multae sunt. quarum illo fortasse non postrema: equidem ea vehementer delector: tucri

duri memoria beneficium ; commemorare , ubi locus
 est : cui debemus , eius causa velle omnia , praestare quae
 possumus : denique non amore , non studio , non obseruan-
 tia deesse . Quid illud ? non ad officium pertinet , atque
 adeo insigne quoddam officii genus est , eo de homine , a
 quo beneficium accepimus , quid alii sentiant , aut lo-
 quantur , in primis animaduertere , & eos , qui a certo sen-
 su , veroque iudicant , benevolentia complecti ; qui obtre-
 ctant , & quibus recte iudicandi facultatem adimit inui-
 dia , ab iis animum abducere , refellere falsa , vera prae-
 dicare . Sed haec opinionum & voluntatum dissimilitu-
 do , quam pauci effugiunt , in tuo statu ne accadat om-
 nium florentissimo , tu quidem cum aliis virtutibus , tum
 vero probitate , modestia , lenitate consequeris . una om-
 nium vox , unus de tua laude sensus est . quo tamen
 quisque sapientior , aut eruditior , eo te magis & diligit ,
 & laudat . qui cum sint multi , ex eo tamen numero
 vidi in primis excellere magna sapientia , summa re-
 ligione , moribus integerrimis Episcopum , poetica ve-
 ro laude antiquis illis uatibus quam simillimum , Hip-
 polytum Capilupum : cuius ego consuetudine , doctissi-
 misq. sermonibus , si mihi , quantum per eius humanita-
 tem licet , tantum per mea studia liceret , fruerer horis
 omnibus incredibili voluptate . interdum tamen una
 sumus : & quia certamus amore erga te ; ideo fit , ut
 eo magis inter nos amemus . atq. ille , totus ad tuam
 amplitudinem , & gloriam incumbens , assidua tuo-
 rum studiorum , tuarumq. laudum praedicatione non
 contentus , cum tuae uitae rationem luculentis quoq.
 uersibus explicasset , eosq. mihi ostendisset ; in quo hu-
 manitatem

manitatem, ac beneuolentiam eius agnosco, iudicium, quo praestat, fortasse possum requirere: admiratus doctrinae varietatem, singulari sermonis elegantia coniunctam, artemque miram cum praestanti natura ita contendentem, ut neutra alteram vincat, utraque pariter excellat, putavi me commode facturum, si dum animi caussa propinqua loca ita peruagaris, ut a tuo comitatu Musas, elegantioresque literas non disiungas, eos ipsos versus, nondum editos, & adhuc quasi parentis in sinu commorantes, euolare ad te sinerem mittente me. postulat enim hoc anni tempus, ut otium incunda aliqua re fallatur. quod si ad incunditatem fructus additur: quid magis expetendum? at in hoc opusculo utrumque cognoscas, optimeque perspicias: meum autem hoc officium, ut spero, vehementer probabis. Ego interim commentarios meos in Ciceronis Orationes, biennio ante inchoatos, hieme proxima superiore ad exitum adductos perpolire conor, et ita corrigere, ut addam multa, nonnulla detraham, pauca quaedam mutem. res est magni sane laboris, mihi praesertim, numquam intermissa tot mensium opera iam defatigato, ac paene confecto: sed addit vires Maximi Pontificis egregia benignitas, meque etiam in praeclaro munere per gentem antiquitatis illustrandae, & eam, quam suscepi, Spartam pro viribus ornantem, posteritatis temporis haud exigua spe sustentat. Vale.

F I N I S.

IN
AD.A Lexar
Alfon
dinali cre
Aloysio Este
creato.

Andreae Am

Andreae Gol

Andreae Pat

164

Andreae Silui

Andreae Zebr

po Cracomi

Antonio Aug

73-74-77

Antonio Farn

353-354-3

459-460-

524-525-

Antonio Me

Antonio M

Antonio Pe

Antonio Ro

Antonio Ve

po Agrier

Augustino

441-442

B Atti

6

Benedic

INDEX. EORVM AD. QVOS. MISSAE. SVNT EPISTOLAE

A
Alexander Crispo. 304
Alfonso Carafae, Cardinali creato. 3
Aloysio Estensi, Cardinali creato. 296
Andreae Antonio. 470
Andreae Gostinio. 338
Andreae Patricio. 198. 200. 264
Andreae Siluio. 318
Andreae Zebridouio, Episcopo Cracouiensi. 175
Antonio Augustino. 71. 72. 73. 74. 77
Antonio Farnario. 352. 353. 354. 377. 389. 415. 459. 460. 461. 514. 523. 524. 525.
Antonio Merlo. 235
Antonio Merulae. 378. 413
Antonio Posseuino. 43
Antonio Rolando. 284. 489
Antonio Verantio, Episcopo Agriensi. 173
Augustino Angelello. 422. 441. 442. bis. 534

B
Artholomaeo Riccio. 69
Benedicto Accolto, Cardi-

nali. 227. 229. 230
Benedicto Rhamberto. 77
Bernardino Mafacio, Episcopo creato. 27
Botuito Nericio. 440
Brancondio Ophidano. 535

C
Caesari Ferrantio. 104
Caesari Orlando. 531
Camillo Caetano. 509
Camillo Palacotto. 257. 359. 361. 389. 472. 475. 477. 494. 496. 498. 500. 502. 516. 517. 518. 519. 520. 522.
Carolo Borromacio, Cardinali. 398
Carolo Sigonio. 288
Christophoro, Baroni Lobcouiczio. 417
Christophoro Madrutio, Cardinali. 39
Christophoro Rufo. 365
Christophoro Saxo. 331
Claudio Strambonio. 408. 455
Colae Antonio Caracciolo, Marchioni Vici. 323
Pro collegio Canonicorum D. Petri, Sereniss. Reginae Austriis. 451
Decio

I N D E X

D Ecio Brancalconi. 350
 351
 Dionysio Lambino. 203.
 266

F Abio Stellae. 80. 81
 Federico Gallo. 278
 Federico Viualdo. 419
 Ferdinando Gatulae. 375
 Francisco Cicereio. 478
 Francisco Gonzagae. 42
 Francisco Luisino. 51
 Francisco Mancino. 382
 Francisco Molino. 118
 Francisco Morando. 209.
 340. 471
 Francisco Plantedio. 411.
 447

Francisco Richardoto, Epi-
 scopo Atrebaten. 309
 Francisco Robortellio 302
 Francisco Vargae, Caroli V.
 Imp. oratori. 53

G Abrieli Catiano. 29
 Gaspari Contareno,
 Cardinali. 226
 Gulielmo Paccio. 246
 Gulielmo Sirletto, Cardina
 li. 466. 467

H Annibali Caro. 107.
 109. 110. 111
 Hannibali Cruceio. 234.
 504
 Henrico, & Camillo Caeta-
 nis, fratribus. 484. 508

Herculi Ciofano. 444. bis.
 Hieronymo Caprae. 503
 Hieronymo Faletto, Hercu-
 lis, Ferrariensium Ducis,
 oratori. 56

Hieronymo Furnario. 94
 Hieronymo Lippomano. 45
 49. 50

Hieronymo Rubeo. 452
 Hieronymo Seripando, Car-
 dinali creato. 295

Hippolyto Capilupio, Epi-
 scopo Fanensi. 291
 Hippolyto Estensi, Cardina-
 li. 116

Horatio Cardaneto. 329.
 372. 488. 510
 Horatio Morono. 512
 Horatio Ursino. 271

I Acobo Boncompagno.
 491

Iacobo Falconio. 414. 424
 Iacobo Gorscio. 448
 Iacobo Grifolo. 232

Io. Antonio Seroni. 324
 Io. Antonio Turoneo. 275
 Io. Antonio Vulpio. 425

Io. Baptistae Arcucio. 415
 Io. Baptistae Ianuario. 457
 Io. Baptistae Oliuo. 450

Io. Baptistae Pastorio. 85
 Io. Baptistae Pignae. 238
 Io. Baptistae Rafario. 282

Io. Baptistae Rhamnusio,
 Xuirum Consilii a secre-
 tis. 149

Io. Baptistae Saracio. 298
 Io.

Io. Bapti
 Ioanni C
 392. 44
 Io. Crato
 414. 43
 Io. Fracis
 Cardina
 Io. Fracise
 Ioanni Ge
 Io. Morone
 Io. Sambu
 Io. Sario Za
 316. 327
 Io. Turritia
 Io. Vincent
 Iulio Bello
 Iulio Iusto.
 Iulio Pogiano

L Acino T
 210. 260
 Lucretio Gab
 Lazaro Bouar
 N

M Arcello
 diu
 Marco Ant
 445. 511
 Marco Ant
 no.
 Marco At
 119. bis. 1
 127. bis. 1
 133. 135
 140. 14
 147. 11
 Marco
 154. 1

I N D E X

Io. Baptistae Titio. 319. 367 161. bis. 162. bis. 163. 164.

Ioanni Caselio. 374. 383. 166. 167. 168. 169. 355.

392. 446. 486.

Io. Cratoni a Crafftheim.

434. 436. 437. 506. 526.

Io. Fracisco Commenduno,

Cardinali creato. 364

Io. Fracisco Cremonae. 407

Ioanni Genuae. 367

Io. Morono, Cardinali. 463

Io. Sambuco. 212. 224. 240

Io. Sario Zamoscio. 312.

316. 527

Io. Turritiano. 317. 121

Io. Vincentio Pinello. 180

Iulio Bellogrado. 294

Iulio Iusto. 341

Iulio Pogiano. 268

L

Laeuino Torrentio. 95

210. 260

Laurétio Gábarae. 212. 244

Lazaro Bonamico. 245

M

Marcello Ceruino, Car

dinali. 24

Marco Antonio Ciofano.

445. 511. 534

Marco Antonio Lombardi.

no. 99

Marco Antonio Mureto.

119. bis. 121. 122. 124. 125

127. bis. 129. 130. 131. 132

133. 135. 136. bis. 137. 139

140. 141. 142. bis. 143. 145.

147. 189

Marco Antonio Nattae. 152

154. 155. 156. 157. 158. 160

Mario Corrado. 78. 220. 344

345. 368. 370. 380. 409

Mario Nizolio. 65. 355

Martino Berzeuicaeo. 515

Matthaeo Senaregae. 468

Maximo Zabreræ. 532

Michaeli Sophiano. 236

Michaeli Turriano, Cene-

tenfi Episcopo. 170

Mucio Calino, Episcopo In-

teramnae. 387

N

Nicasio Castetano. 293.

317. 416

Nicolao. Caetano, Cardina-

li. 432

Nicolao Gotio. 311

Nicolao Nathanaelo. 213

O

Otrauiano Ferrario.

259. 273. 274. 281.

481

Octauiano Magio. 113

Octauio Sanmarco. 381

P

Paullo Contareno. 34

Paullo Lupo. 420

Paullo Magnulo. 247. 248.

249

Paullo Sacrato. 300. 357

Paullo Stempouio. 404. 435

Paullo Tachono. 450

Petro Celso. 221

Petro Mafacio. 356

Petro Misouio, Sarmatarū

Regi consiliario. 176. 262.

314.

INDEX

314.418.
Petro Perpiniano. 371.392
Pio IV. Pontifice creato. 253
Pio IV. Pontifici Max. 395

R

Ainutio Farnesio, Cardinali creato. 1
Romulo Ceruino. 41. 105

S

Ebastiano Leoni. 96. 250
Siluestro Aldobrandino. 251

Silvio Antoniano. 67
Stanislao Fogeluetrio. 265
Stephano Saulio. 5. 10. 15

V

Berto Folietae. 528
Vido Fabro. 21
Vido Gualterio. 386
Vido Lolgio. 106
Vido Pancirolo. 184
Vincentio Giliano. 207
Vincentio Macario. 406

Vincentio Riccio a Spec. 426. 427. 428. bis. 429. 430

Vincentio Stellae. 85. 87

Z

Erbino Ritio. 384. 87.
* 88. 89. 91. 93. 185. 188. 189. bis. 190. 191. bis. 192. 193. 195. 196. 197. 201. 204. 215. 216. 217. 242. 332.

* Episcopo creato. 347
Scriptit hanc, rogatus a nobilissimo viro. 305

Scriptit hanc, a Principe rogatus. 399

Ex libro de quatuor Rebus pub. 57

Proemium libri de Magistratibus Romanis. 100

Ioannes Crato Paulo Manutio. 433

IN AD


AD Ale
rinu
Ad Alfonso
tonii, Ma
belli F.
Ad Aloyfr
Ad Anton
lae Episcop
Ad Anton
Allifaru
Ad Anton
Card.
Ad Benedi
Card.
Ad Benedi
tom.
Ad Carolu
Card.
Ad Carolu
Ad Clemen
Card.
Conciliu
tio.
Ad Diegum
Mendoza
orat.
In librum
109
Ad Guliel
geum
geutes


INDEX. EORVM AD. QVOS. MISSAE. SVNT PRAEFATIONES


A D Alexandrum Caesari- num, Card. 15	Ad Hieronymum Falerum Herculis, Ferrariensem Principis, oratorem. 66
Ad Alphonsum Carafam, An- tonii, Marchionis Montis belli F. 39	Ad Hippolytum Estensem, Card. 59
Ad Aloysium Garzonium. 90	Ad Illust. atq. Excell. Iacobum Boncompagnum. 124. 128
Ad Antonium Aelium, Po- lae Episcopum. 50	Ad Ioannem Monlucium, Regis Gallorum oratorē. 17
Ad Antonium Carlonem, Allifanum Principem. 95	Ad Ioan. Moruillerium, Re- gis Gallorum orat. 56
Ad Antonium Triultium, Card. 84	Ad Isabellam Villamarinam Salernitani Principis con- iugem. 71
Ad Benedictum Accoltum, Card. 9	Kalendarium Romani praefa- tio. 63
Ad Benedictum Rhamber- tum. 23	Ad Marcellum Ceruinum, Card. 31
Ad Carolum Borromaeum Card. 112	Ad Matthaeum Senaregam. 1
Ad Carolum Pisaurum. 5	Ad Michaelē Ghislerium, Card. 92
Ad Clementem Monilianum, Card. 121	Ad Paullum Rhamnusium. 77
Concilii Tridentini praefa- tio. 120	Ad Pium IV. Medicem Pon- t. Max. 98
Ad Diegum Hurtadum de Mendoza, Caroli V. Imp. orat. 26	Ad Rainutium Farnesium, Card. 35
In librum Francisci Vargas. 109	Ad Torquatū Bembum, Petri. F. 73
Ad Gulielmum Bellaium Lan- geum, apud Subalpinas gentes Proregem. 12	


F I N I S.

5814525











Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.5.26